

O‘ZBEKISTON RESPUBLIKASI  
OLIV VA O‘RTA MAXSUS TA‘LIM VAZIRLIGI  
O‘RTA MAXSUS, KASB-HUNAR TA‘LIMI MARKAZI

---

**«O‘ZBEKISTON  
RESPUBLIKASI  
KONSTITUTSIYASINI  
O‘RGANISH»**

**kursidan o‘quv qo‘llanma**

*(O‘rta maxsus, kasb-hunar ta‘limi  
muassasalari uchun)*

*Qayta ishlangan, to‘ldirilgan to‘rtinchi nashr*

«SHARQ» NASHRIYOT-MATBAA  
AKSIYADORLIK KOMPANIYASI  
BOSH TAHRIRIYATI  
TOSHKENT — 2010

## M u a l l i f l a r :

- X.Odilqoriyev** — yuridik fanlar doktori, professor;  
**R. Qayumov** — yuridik fanlar nomzodi, professor;  
**X. Nazarov** — yuridik fanlar nomzodi, dotsent;  
**M.Lafasov** — tarix fanlar nomzodi, dotsent;  
**Z. Karimov** — ilmiy xodim;  
**O. Omonova** — O‘zbekiston xalq o‘qituvchisi.

O‘zbekiston Respublikasi fan arbobi, yuridik fanlar doktori, professor **X. B. Boboyevning** umumiy tahriri ostida.

O‘quv qo‘llanmaning metodik apparati **Z. Karimov,**  
**M. Sattorova, X. Azizov, G. Maqsudova,**  
**M. Usmonboyeva** tomonidan tayyorlangan.

## T a q r i z c h i l a r :

- A. To‘laganov** — yuridik fanlar doktori, professor;  
**M. Axmedshoyeva** — yuridik fanlar nomzodi, dotsent.

## E k s p e r t g u r u h i r a h b a r i

**O. T. Husanov** — yuridik fanlar doktori, professor.

O‘ 32

«O‘zbekiston Respublikasi Konstitutsiyasini o‘rganish»  
kursi o‘quv qo‘llanmasi: (O‘rta maxsus, kasb-hunar ta’limi  
muassasalari uchun). — T.: Sharq, 2010. — 224 b.

Sarl. oldida: O‘zbekiston Respublikasi Oliy va o‘rta maxsus ta’lim  
vazirligi; O‘rta maxsus, kasb-hunar ta’limi markazi.

**BBK 67.400.1 (5O‘)ya 722**

**ISBN 978-9943-00-035-3**

© Sharq nashriyot-matbaa aksiyadorlik kompaniyasi  
Bosh tahririyati, 2003, 2007, 2009, 2010.

*Har bir millatning taraqqiy va taoliysi ishlarini o'z vaqtida nizomdan chiqarmay tartib ila yuritmakg'a bog'lidir.*

*Abdulla Avloniy*

## KIRISH

O'zbek xalqi xotirasida XX asrning so'nggi o'n yilligidagi shonli tarixiy voqealar abadiy muhrlanib qoladi. Aynan shu o'n yillikning boshlarida istiqlol sari qadam qo'yildi. Ajdodlarimizning azaliy orzusi—mustaqillik — o'z taqdirini o'zi belgilash huquqi qo'lga kiritildi. Bu yillarda insonparvar, demokratik huquqiy davlatni va fuqarolik jamiyatini bunyod etish uchun zarur zamin yaratildi.

Yangi ming yillik boshi XXI asr — o'zbek xalqi uchun ***O'zbekistonni buyuk davlatga aylantirish va inson huquqlari ustuvor bo'lgan farovon hayot qurish asri*** bo'ladi. Bu borada jamiyat hayotining barcha sohalarida tub yangilanish va bunyodkorlik ishlari keng ko'lamda izchil amalga oshirilmoqda.

***Kelajagi buyuk O'zbekistonni yaratishga hissa qo'shish shu Vatan farzandlarining zimmasiga ulkan mas'uliyat yuklaydi.*** Yuksak mas'uliyatni anglab, jamiyatda o'rnatilgan tartib va intizomga amal qilib yashash huquqiy davlatga xos xususiyat hisoblanadi. Shuni aytish kerakki, huquqiy davlat o'z-o'zidan bunyod bo'lmaydi. Buning uchun hayotda Konstitutsiya va qonunlarning ustuvorligi ta'minlanishi kerak. O'zbekiston Respublikasi Konstitutsiyasi asosida yuksak huquqiy ong va huquqiy madaniyat bo'lishi, mas'uliyat va majburiyatni his qilib yashash tarzi qaror topishi zarur.

O'zbekiston Respublikasi Konstitutsiyasi — oliy yuridik kuchga ega huquqiy hujjatdir. Uning qabul qilinishi huquqiy tiklanish va taraqqiyot sari qadam

bo'ldi. Mustaqillik Konstitutsiyasi davlatimiz mustaqilligining ulkan ramzi bo'lib, unda o'z istiqbol va taraqqiyot yo'limiz aks etadi. Uni kelgusi avlod erkinlik, mustaqillik, ozodlik va hurlik tantanasi sifatida tarixda e'zoz-hurmat bilan tilga oladi. O'zbek xalqi ana shunday ulug'vor Konstitutsiyaga munosib buyuk xalqdir.

O'zbekiston Konstitutsiyasi *xalq xohish-irodasini ifoda etuvchi adolatli davlat, farovon jamiyat va erkin hayot qurish va uni rivojlantirishning istiqbollari*ni belgilaydi. Unda *inson hayoti, uning sha'ni, qadr-qimmati, haq-huquqlari va manfaatlari oliy qadriyat* sifatida mustahkamlab qo'yilgan.

Asosiy Qonunimizda belgilangan normalarning hayotda amaliy ifoda topishida *o'sib kelayotgan yosh avlodning Konstitutsiya va uning asosida qabul qilingan qonunlarning mazmun-mohiyati to'g'risida huquqiy bilimga egaligi, huquqiy ongi va huquqiy madaniyatning yuksakligi* muhim rol o'ynaydi.

Shuni hisobga olib davlatimiz ta'limning barcha tizimlarida huquqiy ta'lim va tarbiyani yanada yaxshilashga ustuvor vazifa sifatida alohida e'tibor berib kelmoqda. Huquqiy ta'limni rivojlantirish sohasida diqqatga sazovor amaliy ishlar qilinmoqda.

Biz qonun ustuvor bo'lgan jamiyat barpo qilmoqchimiz. Qonun ustuvorligi — bu ***qonunga rioya etish hamma uchun majburiy bo'lgan, uni buzishga aslo yo'l qo'yib bo'lmaydigan huquqiy hayotiy tartibdir.*** Shuning uchun shu hayotiy tartibga o'zimizni tayyorlab va yetarli huquqiy bilimlarga ega bo'lib borishimiz lozim.

Shuni aytish kerakki, faqat huquqiy bilimli bo'lishning o'zi yetarli emas, shu bilan birga ***egallagan bilimlarni hayotda qo'llay olish madaniyatini ham o'zimizda tarbiyalab borishimiz kerak.*** Chunki huquqiy bilim va uni amalda qo'llash madaniyati huquqiy-ma'naviy qiyofamizni ko'rsatuvchi mezondir.

Konstitutsiyadagi huquqiy g'oyalar istiqlool mafkurasida asosiy o'rinni egallaydi. Qonun jamiyat hayotida hamma uchun yashash va harakat qilish qoidasiga aylanar ekan, qonunga nisbatan fuqarolarning munosabati qanday bo'lishi kerak? Qonunga hurmat, e'tiqod-chi, degan qator savollar kelib chiqadi. Konstitutsiyaning mazmun va mohiyatini o'rganish, undagi ulug'vor g'oyalarni bilish, qonunga e'tibor va e'tiqod yuksak bo'lishini hayotning o'zi talab etadi.

Shuning uchun Konstitutsiya va qonunlar ustuvorligini ta'minlashda istiqlool mafkurasining tarkibiy qismi bo'lgan huquqiy mafkura muhim ahamiyat kasb etadi. Chunki odamlarni birlashtiruvchi va fikrlarni jamlaydigan qonunlarga murojaat etish zarur bo'lganda, yuksak huquqiy madaniyatga ehtiyoj kuchayganda qonunlarga bo'ysunish zarurligini tushuntiruvchi, huquqiy tizimni muhofaza qiluvchi, qonuniylik talablarini tashviq va targ'ib qiluvchi huquqiy mafkura har qanday davlat uchun zarurdir. Bundan esa, huquqiy mafkuraviy tarbiyalanganlik darajamiz qanday, degan savol tug'iladi. Biz o'zimizda huquqiy mafkuraviy sohadagi bilimlarimizni mustahkamlab borsak, har qanday vaziyatda jamiyat manfaatiga zid bo'lgan xatti-harakatlarga va tahdidlarga Konstitutsiya asosida baho bera olamiz, kerak bo'lsa kurasha olamiz va o'zimizni himoya qilamiz. Shuning uchun huquqiy mafkuraning asosiy o'zagi hisoblangan Konstitutsiya qoidalari bizning e'tiqodimizga aylanishi lozim.

O'zbekiston Respublikasi Konstitutsiyasi qadriyatini hech narsa bilan o'lchab va tenglashtirib bo'lmaydi. Chunki ***unda mustahkamlangan qoidalarda va ifodalangan g'oyalar zamirida xalqning, millatning, qolaversa sizning huquq va erkinliklaringiz mujassam.*** Uni aziz va muqaddas deb bilib, Konstitutsiyadagi qoidalar asosida yashash Sizning kelgusi hayotingiz farovon bo'lishining asosidir.

Sizlar O‘zbekiston Respublikasi Konstitutsiyasini o‘rganish naqadar muhim ekanligini anglab yetdingiz. O‘ylaymizki Konstitutsiya Sizning hamrohingizga aylanadi va yashash tarzingizni qurishda asosiy hayotiy qo‘llanma bo‘ladi.

**O‘zbekiston Respublikasi  
Konstitutsiyasini  
o‘rganish**

O‘zbekiston Respublikasi-ning huquq tizimida Konstitutsiya muhim o‘rin tutadi. Konstitutsiya huquq tizimi-ning birlamchi asosidir. U huquq tarmoqlari birligini, o‘zaro muvofiqligini hamda harakatlanish prinsiplarining yagonaligini ta‘minlaydi. Huquqiy davlat yaratish sari rivojlanib borayotgan davlatimizda huquq ustuvorligini ta‘minlab borish muhim vazifalardan sanaladi. Konstitutsiyaning ustuvorligi esa har birimizdan ulkan huquqiy mas‘uliyatni talab etadi. Ya‘ni, bu mas‘uliyat konstitutsiya va qonunlarni bilishni, ularga amal qilib yashashni taqozo etadi. *Bu Konstitutsiyani o‘rganish zarurligini belgilaydi.* Chunki uni o‘rganish Konstitutsiya mazmunini ifodalovchi huquqiy qoidalar, ularga ongli ravishda amal qilib yashash va qonun ustuvorligiga erishishning muhim shartidir.

O‘zbekiston Konstitutsiyasini o‘rganish zarurligini inobatga olib, 2001-yil 4-yanvarda Respublika Prezidentining «O‘zbekiston Respublikasi Konstitutsiyasini o‘rganishni tashkil etish to‘g‘risida»gi Farmoyishi qabul qilindi. Mazkur *Farmoyishning maqsadi*: O‘zbekiston Konstitutsiyasining jamiyatdagi o‘rni va ahamiyatini, ma‘no-mazmuni va mohiyatini o‘rgatish, yosh avlodning huquqiy ongi va madaniyatini tarbiyalash hamda yuksaltirishga qaratilgandir. Ushbu Farmoyish O‘zbekiston Respublikasi Konstitutsiyasini o‘rganishni fanlar tarkibida emas, balki alohida o‘quv fani sifatida birinchi marta ta‘lim muassasalari o‘quv rejasiga kiritishga asos bo‘ldi.

Ushbu Farmoyishdan kelib chiqib, ta‘lim tizimi-ning muhim bo‘g‘ini hisoblangan o‘rta maxsus, kasb-

hunar ta'limi tizimidagi o'quv muassasalari o'quvchilarining Konstitutsiya to'g'risidagi nazariy va amaliy bilimlarini yanada boyitish hamda mustahkamlash maqsadida «*O'zbekiston Respublikasi Konstitutsiyasini o'rganish*» o'quv kursi kiritildi.

O'quv kursi asosida Asosiy Qonunimiz to'g'risida chuqur va mukammal bilim, ko'nikma va malakalarga, shuningdek konstitutsiya qoidalari va qonun hujjatlarini mustaqil o'rganish imkoniyatiga ega bo'lasizlar.

«O'zbekiston Respublikasi Konstitutsiyasini o'rganish» o'quv kursi umumiy o'rta ta'lim bosqichida «Konstitutsiyaviy huquq» fanidan egallagan tushuncha va bilimlaringizni yanada rivojlantirish, boyitishga amaliy yordam beradi.

Sizlar o'quv kursi bo'yicha tayyorlangan ushbu qo'llanma orqali O'zbekiston Respublikasi Konstitutsiyasi bo'yicha umumiy batafsil ma'lumotga ega bo'lasiz, shaxs va davlat munosabati, fuqarolarning asosiy huquqlari va burchlari, huquq va erkinliklarning konstitutsiyaviy kafolatlari, davlat tuzilishi va boshqaruv shakli, davlat organlari haqida bilim olasizlar.

O'zbekiston Respublikasi Konstitutsiyasi bilan yaqindan tanishish va uni bevosita o'rganish o'z huquqingiz, erkinlik va burchlaringizni zamon talabi darajasida bilishingiz uchun zamin yaratadi. Qonunlar doirasida jamiyatda o'z o'ringiz va qadringizni tushunishingiz zarur. Hayotning talabi ham shu. Konstitutsiya asosida o'z huquq va erkingizni amalga oshirish to'g'risidagi bilimga ega bo'lishingiz orqali hayotingizdagi ko'p masalalarga javoblar topasiz.

**Konstitutsiya va qonunlarni bilish muhimligi**

O'z huquq, erkinlik va burchlarimizni yanada chuqurroq anglashda qonunlarni bilish muhim ahamiyat kasb etadi. Konstitutsiya huquq va erkinliklarni mustahkamlash bilan birga fuqarolar zimmasiga burch va mas'uliyatlar yuklaydi.

**Burch degani, avvalo Konstitutsiyani o‘qib o‘rganishdan boshlanadi.** *Konstitutsiyani bilgan kishi o‘z xatti-harakatini qonun doirasida amalga oshiradi. Boshqa kishilarning hamda jamiyat va davlatning huquqi va erkini hurmat qiladi.* Konstitutsiyani bilish asosida sizda shakllangan huquqiy ong jamiyat taraqqiyotining qudratli kuchiga aylanadi. Qonunlarni bilishning muhimligi oqibat natijada ana shunday maqsadni amalga oshirishga xizmat qiladi. Shu bois ajdodlarimiz qonunga hurmat va unga itoat qilishni qadrlaganlar. «Qonunning kaliti adolat, adolat kaliti saxovat», «Qonunbuzar — elbuzar, elbuzarni qonun tuzatar» va boshqa shu kabi hikmatli so‘zlar ham qonunga bo‘lgan ongli munosabatning mahsulidir.

Agarda jamiyat hayotiga e‘tibor bilan nazar tashlasak, hammaning huquqiy bilimlari barobar emasligini his qilamiz. Ayrim kishilar hatto Konstitutsiya va qonunlarni yaxshi bilishga, sinchiklab o‘rganishga, o‘z hayotida qo‘llashga beparvolik va loqaydlik bilan qarashadi. Bosh qonunning ma‘no-mazmunini anglamaydigan fuqaro jamiyatda o‘z haqini bilmaydi. Huquqiy ongsiz u tomoshabinga o‘xshab qoladi. Bu bilan ular nafaqat jamiyat manfaatlariga, balki o‘zlariga ham ziyon yetkazishlarini anglab yetmaydilar.

Yuqoridagi fikrlar tahlili shuni ko‘rsatadiki, Konstitutsiya va uning asosida qabul qilingan qonunlarni bilgan kishi o‘z huquqi va erkini jamiyat manfaatlarini bilgan holda amalga oshiradi.

**«O‘zbekiston Respublikasi Konstitutsiyasini o‘rganish» o‘quv kursining predmeti, maqsadi va vazifalari**

Siz o‘rganayotgan o‘quv kursi boshqa fanlar singari o‘z predmetiga, maqsadi va vazifasiga egadir. Ularni har tomonlama chuqur bilish O‘zbekiston Respublikasi Konstitutsiyasini o‘rganishda Sizga yordam beradi.

*O‘zbekiston Respublikasi Konstitutsiyasi mazmun-mohiyati, unda mustahkamlangan normalar va ularning*



*amaliyotda qo‘llanish jarayoni o‘quv kursi predmetini tashkil etadi.*

**O‘quv kursining maqsadi:** *O‘zbekiston Konstitutsiyasi bo‘yicha nazariy va amaliy bilimlar berish, Konstitutsiyaning jamiyatdagi o‘rni va ahamiyatini, uning mazmun-mohiyatini yoritish, qonunlarga hurmat uyg‘otish, huquqiy ongni oshirish va huquqiy madaniyatni yuksaltirish hamda huquqiy davlatni bunyod etishda faol ishtirok qiladigan huquqiy bilimli komil insonni tarbiyalashdir.*

Konstitutsiyaviy qoidalar mazmunini o‘rgatish va hayotda ularga amal qilib yashash zarurligini anglatish o‘quv kursining **bosh vazifasini** tashkil etadi.

O‘quv kursi o‘z oldiga bir qator ulug‘vor vazifalarni qo‘yadi. Bular ta‘limiy va tarbiyaviy vazifalardan iboratdir.

### ***Ta‘limiy vazifalar:***

1. Amaliy faoliyatda zarur bo‘lgan Konstitutsiya bo‘yicha huquqiy bilimlar berish va konstitutsiyaviy qoidalarni hayotda qo‘llay bilishga o‘rgatish.

2. Huquqiy ong, huquqiy tafakkur va huquqiy madaniyatni zamon talablari darajasida shakllantirish hamda huquqiy savodxonlikni oshirish.

3. Inson erkinliklari, u ayni vaqtda muayyan burch, majburiyat va mas‘uliyat ekanligini teran anglatish.

4. Ijodiy, mustaqil fikrlash, olgan bilimlarini hayotga tatbiq etish, huquqiy me‘yoriy hujjatlar, adabiyotlar ustida mustaqil ishlash va erkin mutolaa qilishga hamda ommaviy axborot vositalaridan foydalanishga o‘rgatish.

5. Jamiyatdagi voqea va hodisalarni huquqiy jihatdan mantiqiy tafakkur qilish va munosabat bildira olish layoqatini shakllantirish.

6. Konstitutsiya asosida qonunchilikni yaratish

yo'lida va huquqiy sohada yuz berayotgan o'zgarishlarni teranroq anglash hamda zarur ilmiy, g'oyaviy, tarbiyaviy xulosalar chiqarishga o'rgatish.

7. Mutaxassislik va kasb-hunar yo'nalishi bo'yicha huquqiy bilimlarini boyitish.

### ***Tarbiyaviy vazifalar:***

1. Konstitutsiya va qonunlarga nisbatan e'tiqod, milliy va umuminsoniy huquqiy qadriyatlarga hurmat uyg'otish hamda kelajakka ishonch ruhida tarbiyalash.

2. Yuksak xulq-atvor fazilatlarini bilan o'zgalarga namuna bo'la olishga o'rgatish va jamiyat hayotida ijtimoiy huquqiy faol bo'lish tuyg'usini tarbiyalash.

3. Jamiyat manfaatlariga zararli harakatlarga, diniy ekstremizm, aqidaparastlik, huquqbuzarliklarga nafrat uyg'otish.

4. Konstitutsiya bo'yicha olgan bilimlar natijasida o'z hayoti kelajagini belgilash, o'z Vatanining dunyoda munosib o'rin egallashida hissa qo'shish hamda boshqa millat vakillarining huquqiy manfaatlarini hurmat qilish ruhida tarbiyalash.

O'quv kursini o'rganishning o'ziga xos asosiy tamoyillari mavjud. Bu tamoyillar Konstitutsiyaning mazmuni yo'nalishlarini bildiradi. Konstitutsiyani o'rganishimizda ana shu tamoyillar asosida yondashuvimiz va xulosalar chiqarishimiz Asosiy Qonunimizning mohiyatini chuqur anglashimizga imkon beradi.

***O'quv kursini o'rganish tamoyillari:*** jamiyat hayotida Konstitutsiya va qonunning ustunligi; inson huquqlari va erkinliklari ustuvorligi; demokratiya va ijtimoiy adolat; xalqsevarlik, vatanparvarlik va insonparvarlik; umuminsoniy va milliy qadriyatlarga hurmat; xalqaro huquqiy me'yorlar va tamoyillarga sodiqlik; kelajak avlod oldidagi mas'uliyatni anglash; milliy davlatchilik va huquqiy tajribalarga tayanish; erkinlik va yaratuvchanlik; boy tarixiy huquqiy meros va ilg'or huquqiy g'oyalarga asoslanadi.

O‘zbekiston Respublikasi Konstitutsiyasini o‘rganishda o‘quv kursi o‘z metodlariga tayanadi. Bu metodlar quyidagilardan iborat: Konstitutsiyani o‘rganishga ilmiy yondashuv, nazariy va amaliy tahlil, qiyosiy tahlil, tarixiylik va mantiqiylik, o‘zaro bog‘liqlilik va aloqadorlik, siyosiy va huquqiy hurfikrlilik, huquqiy dalillardan foydalanish, umumlashtirish va xulosalar chiqarish kabi metodlardir. Bu metodlardan samarali foydalanish Konstitutsiya ma’no-mazmunini to‘g‘ri tushunishimizga yo‘l ko‘rsatadi.

Konstitutsiya mazmuni shunday tuzilganki, undagi qoidalarga aniq va to‘g‘ri, sinchkovlik bilan yondashilishini talab etadi. Chunki uning mazmuniga e’tiborsiz yoki yuzaki yondashuv noto‘g‘ri xulosalar chiqarishimizga olib kelishi mumkin. Konstitutsiyaviy qoidalarni har kim har xil tasavvur qilishi yoki har kim o‘z tafakkuridan kelib chiqib, shu asosda bajarishi uchun Konstitutsiya imkon bermaydi. Shuni aytish kerakki, konstitutsiyaviy qoidalar tub mazmunini hamma bir xilda tushunishi lozim. Konstitutsiyani o‘rganish metodlari konstitutsiyaviy qoidalarning asl mohiyatini qanday bo‘lsa, shundayligicha teran idrok qilishimizga xizmat qiladi.

**O‘quv kursining boshqa  
o‘quv fanlari bilan  
o‘zaro bog‘liqligi**

«O‘zbekiston Respublikasi Konstitutsiyasini o‘rganish» o‘quv kursi ijtimoiy gumanitar fanlar bilan uzviy aloqadorlikni o‘zida mujassam etadi. Konstitutsiya barcha huquq fanlari tizimida asosiy o‘rin tutadi. Huquq fanlari mazmunini yoritishni Konstitutsiyasiz tasavvur qilib bo‘lmaydi. Konstitutsiya huquq fanlarining asosiy manbayidir. Huquq fanlarining ahamiyati shundaki, ular Konstitutsiya qoidalarida qo‘llanilgan tushunchalarni to‘laroq o‘zlashtirishimizda yordam beradi.

O‘quv kursining ijtimoiy fanlar: tarix, shaxs va jamiyat, estetika, ma’naviyat asoslari va shu kabi fanlar bilan aloqadorligi mavjud. Ularni o‘rganish jara-

yonida Konstitutsiya va unga tegishli huquqiy tushunchalarga duch kelinadi. Bu fanlarda ularning fan sifatidagi o'ziga xos mazmuniga monand keladigan Konstitutsiya bilan bog'liq qirralari umumiy tartibda yoritiladi. Masalan, «Tarix» fanida davlat tushunchasi, konstitutsiyaning qabul qilinishi, uning jamiyat taraqqiyotida tutgan o'rni tarixiy nuqtayi nazardan, «Shaxs va jamiyat» fanida asosan shaxs va jamiyat bilan bog'liq tushunchalar, ularning rivojlantirish qonuniyatlari falsafiy jihatdan, tabiiy fanlarda esa, yer va tabiatni avaylab-asrash hamda muhofaza qilish masalalari yoritiladi.

Mazkur o'quv kursi esa, ana shu fanlardan olingan tushuncha va bilimlarni huquqiy jihatdan mustahkamlaydi. Demak, Konstitutsiyaga taalluqli tushunchalarning boshqa fanlar mazmunida qo'llanilishi fanlararo aloqaning namoyon bo'lishidir. O'zlashtirilgan davlat va huquqqa oid tushuncha va bilimlarni boyitishda, to'ldirishda va mustahkamlashda o'quv fanlararo aloqa muhim ahamiyat kasb etadi.

**Huquqiy hujjatlar va  
adabiyotlar bilan ishlash**

O'zbekiston Respublikasi Konstitutsiyasini o'rganishda manbalar muhim o'rin tutadi. Manbalarni quyidagi

tarkibiy qismlarga ajratish mumkin. **Asosiy manbalarga:** O'zbekiston Respublikasi Konstitutsiyasi; Konstitutsiya asosida qabul qilingan qonunchilik hujjatlarini; O'zbekiston Respublikasi Oliy Majlisi palatalarining qarorlari; O'zbekiston Respublikasi Prezidenti farmon, qaror va farmoyishlari; O'zbekiston Respublikasi Vazirlar Mahkamasi qarorlari kiradi. **Yordamchi manbalarni:** O'zbekiston Respublikasi Konstitutsiyasiga oid huquqiy adabiyotlar va turkum risolalar; o'quv qo'llanmalar va darsliklar, ommaviy axborot vositalarining konstitutsiyaga taalluqli materiallari, boy huquqiy ma'naviy va madaniy meros namunalari tashkil qiladi.

Ular bilan mustaqil ishlash va mutolaa qilish huquqqa bo'lgan qiziqishimizni oshiradi va erkin fikrlash ko'nikmasini shakllantiradi. Qonun hujjatlari va konstitutsiyaga oid huquqiy adabiyotlar bilan ishlash madaniyatini o'zimizda shakllantirib borish bilim doirasini kengaytirishga zamin yaratib beradi. O'quv kursiga taalluqli huquqiy hujjatlar bilan ishlash madaniyati izlanuvchanlikni, ijodkorlikni, tirishqoqlikni, bilim olishga chanqoqlikni, o'z iste'dodini namoyon etishni, hujjatlar mohiyatini to'g'ri talqin etishni talab etadi.

## **KIRISH QISMI BO'YICHA EGALLAGAN BILIMLARINGIZNI MUSTAHKAMLASH UCHUN TOPSHIRIQLAR**

1. O'zbekiston Respublikasi Konstitutsiyasini o'rganish nima uchun zarur?
2. O'zbekiston Respublikasi Prezidentining 2001-yil 4-yanvardagi «O'zbekiston Respublikasi Konstitutsiyasini o'rganishni tashkil etish to'g'risida»gi Farmoyishning ahamiyati nimada?
3. «O'zbekiston Respublikasi Konstitutsiyasini o'rganish» o'quv kursi predmeti, maqsad va vazifalarini aytib bering.

?



### **Erkin fikr bildiring**

1. O'zbekiston Respublikasi Konstitutsiyasining jamiyat rivojida tutgan o'rni qanday?
2. O'zbekiston Respublikasi Konstitutsiyasi to'g'risida bilimingiz yetarli? Agar bilimingiz yetarli bo'lmasa, uni qanday boyitasiz?
3. Sizningcha Konstitutsiya va qonunlarga munosabat, hurmat va e'tiqod qanday bo'lishi kerak?
4. Shaxs sifatida o'z huquqiy manfaatigizga oid Konstitutsiya doirasidagi me'yorlarni bilasizmi?
5. Jamiyatda fuqarolarning Konstitutsiyaga rioya qilish darajasiga munosabatingizni bildiring.
6. Konstitutsiyada belgilangan o'z huquq va erkinliklaringizni amalga oshirishda qiyinchiliklarga duch kelganmisiz?

**O‘ZBEKISTON RESPUBLIKASI  
KONSTITUTSIYASI, UNDA SHAXS VA DAVLAT  
MUNOSABATINING HUQUQIY ASOSLARI**

**1-§. O‘ZBEKISTON RESPUBLIKASI  
KONSTITUTSIYASI — ASOSIY QONUN**

*Davlat agar dinu oyin (qonun) asosida qurilmas ekan, to‘ra-tuzukka bog‘lanmas ekan, unday saltanatning shukuhi, qudrati va tartibi yo‘qoladi. Bunday saltanat yalang‘och odamga o‘xsharkim, uni ko‘rgan har kimsa nazarini olib qochadi. Yoxud kas-u nokas tap tortmay kirib chiqadigan tomsiz, eshigi-to‘sig‘i yo‘q uyga o‘xshaydi.*

*Amir Temur*

**Davlat mustaqilligi va  
inson erkinligi Qomusi**

Mustaqillik sharofati tufayli 1992-yil 8-dekabrda O‘zbekiston Respublikasining

Konstitutsiyasi qabul qilindi. **Erkinlik va ozodlikni, mustaqillik va hurlikni** tantanali tarzda o‘zida namoyon etuvchi bu muqaddas huquqiy hujjat qabul qilingan qutlug‘ sanani xalqimiz umumxalq bayrami sifatida keng nishonlab kelmoqda. Mustaqillik Konstitutsiyasi jahonning siyosiy xaritasida yangi suveren davlat — O‘zbekiston Respublikasi paydo bo‘lganligini qonuniy tasdiqlab berdi.

Asosiy Qonunimiz *davlat mustaqilligini mustahkamlab, inson huquqi va erkinligi huquqiy kafolati* sifatida muhim ahamiyat kasb etib bormoqda. Buni shu aziz Vatanning har bir farzandi yurakdan his etadi.

O‘zbekiston Respublikasi Konstitutsiyasi — davlatning Asosiy qonuni bo‘lib, istiqbol sari intilishimizga kuch baxshida etuvchi hujjatdir. U ijtimoiy va davlat hayotining huquqiy asosidir.

O‘zbekiston Respublikasining Konstitutsiyasi ozod va suveren davlatning huquqiy asoslarini yaratish bilan birga jamiyatimizning huquqiy taraqqiyotida yangi davrni boshlab berdi. Konstitutsiyaga binoan o‘zbek xalqining yo‘li bitta — *ozod va obod Vatan, erkin va farovon hayot qurish, mustaqillikni mustahkamlab, mamlakat ravnaqini ta’minlashdir.*

O‘zbekiston Konstitutsiyasining o‘ziga xos mazmuni shundan iboratki, u o‘zbek xalqining tarixiy va milliy qadriyatlarini, g‘arb demokratiyasining insonparvarlik tamoyillarini o‘zida mujassam etadi.

O‘zbekiston Respublikasi Konstitutsiyasi jamiyatimiz barcha a‘zolarining, shu jumladan yoshlarning manfaatlarini, ularning haq-huquqi va erkinliklarini o‘zida to‘la ifoda etadi. Chunki davlatimizning har tomonlama qudratli davlatga aylanishida yoshlarning faol ishtiroki hal qiluvchi ahamiyatga ega. Yoshlarning qobiliyati, iste’dodi, bilimiga muvofiq ijtimoiy ehtiyojlarini e’tiborga olib, ilm olish, kasb, mashg‘ulot turi va ish tanlash huquqini o‘z ichiga oluvchi huquqlar majmui Konstitutsiyaviy qoidalarda mustahkamlab qo‘yilgan.

**Konstitutsiyaning qabul qilinishi va unda aks etgan xususiyatlar**

O‘zbekiston yangi Konstitutsiyasini yaratish g‘oyasi 1990-yil 20-iyunda Mustaqillik Deklaratsiyasi qabul qilinishi bilan bevosita bog‘-

liqdir. Konstitutsiyani yaratish zarurati o‘z-o‘zidan paydo bo‘lgani yo‘q. Buning albatta o‘z sabablari bor edi. **O‘zbekiston Respublikasi Konstitutsiyasi qabul qilinishining asosiy sabablari:** o‘zbek xalqining ozodlik, erk va mustaqillik yo‘lidagi intilishi; xalqning butun bor imkoniyati va salohiyatini ishga solish, jamiyatning barqaror rivojlanishini ta’minlash; iqtisodiy va siyosiy munosabatlarni demokratlashtirish, suveren davlatning huquqiy asoslarini yaratish, huquqiy nigilizm va o‘zboshimchalikning oldini olish,

o‘z istiqloq va taraqqiyot yo‘lini huquqiy jihatdan belgilash zaruriyati va boshqa omillar tashkil etadi.

Birinchi Konstitutsiya loyihasini tayyorlash uchun mamlakatning ko‘zga ko‘ringan siyosatshunos, huquqshunos, iqtisodchi va boshqa mutaxassis olimlaridan tarkib topgan 64 kishidan iborat komissiya tuzildi. Konstitutsiya loyihasini tayyorlash komissiyasining birinchi tashkiliy majlisi 1991-yil 12-aprelda Prezident Islom Karimov raisligida o‘tdi. Unda kelajagi buyuk davlatning Konstitutsiyasi «o‘zbek xalqining munosib turmushini, huquqlari va erkinliklarini kafolatlashi, milliy qadriyatlarimiz va madaniyatimizni qayta tiklashi, insonning ma‘naviy-axloqiy barkamolligini ta‘minlashi kerak» degan vazifa qo‘yildi. Bu vazifa zamiridagi tamoyillarga javob bera oladigan xalqchil Asosiy Qonun yaratildi.

O‘zbekiston Respublikasi Konstitutsiyasi qabul qilinishi tarixda yangi burilish davri sahifasini ochib berdi. U jamiyatda tamomila yangi ijtimoiy-siyosiy, iqtisodiy, ma‘naviy tizim qaror topishiga huquqiy poydevor sifatida dunyoga keldi. **Uning qabul qilinishi qonunchilikdagi mustaqillik bo‘ldi.**

Konstitutsiya — xalqning, millatning yuz-ko‘zi, uning obro‘-e‘tibori va nufuzi timsoliga aylandi. Shu ma‘noda Konstitutsiya o‘zbek xalqi irodasi, erki, ruhiyati, ijtimoiy-siyosiy tafakkuri va madaniyati mahsulidir. Chunki Konstitutsiya loyihasi ustida ikki yil davomida ishlanib, u umumxalq muhokamasidan o‘tdi. Umumxalq muhokamasi davomida jami 6 mingdan ortiq taklif va mulohazalar bildirildi. Xalqning fikrlari asosida Konstitutsiya loyihasi yanada boyitilib sayqal topdi.

O‘zbekiston Respublikasi Konstitutsiyasi tub mohiyatiga ko‘ra yangi huquqiy hujjat bo‘lib, unda inson manfaati ulug‘lanadi. Insonning ajralmas huquq hamda erkinliklarining davlat huquqlaridan ustunligi tan olinadi va u davlat himoyasidadir.



Konstitutsiya xalqimizga xos bo'lgan xususiyatlar: *mehr-oqibat, odoq-axloq, odamiylik, o'zga millatlarga hurmat, aql-zakovatga intilish, iymon va e'tiqod, or-nomus, iffat va hayo kabi ezgu fazilatlariga asoslanadi.*

Konstitutsiyada milliy xususiyatlar ham yorqin aks ettirilgan. Bu xususiyatlar: konstitutsiyada mustahkamlangan qoidalarda milliy qonunchilik rivojlanishi uchun zamin yaratilganligi; tarixiy, etnografik, milliy an'analar, urf-odatlar va qadriyatlarimiz singdirilganligi; ma'naviy va madaniy tarixiy merosni asrash, oila qadriyatlari va milliy-ruhiy, demografik, tabiat-iqlim, ijtimoiy-iqtisodiy sharoitlar inobatga olinishida namoyon bo'ladi.

Konstitutsiyada yana bir muhim xususiyat o'z ifodasini topgan. Bu davlatchiligimizning tarixan tarkib topgan ilg'or tajribalaridan foydalanilganligidir. Tarixdan ma'lumki, biz yashayotgan Vatanimiz hududida qonun ustuvorligi ta'minlanishi asosida ozodlik va mustaqillik mustahkamlangan buyuk saltanatlar hukm surgan davrlar bo'lgan. Xususan, Amir Temur davrini alohida ta'kidlash lozim. «Temur tuzuklari» o'z davrining yorqin «Konstitutsiya»si bo'lib, jamiyatda ustuvor ravishda amalda bo'lgan. Ana shu tajribalardan, al-Forobiyning fozil davlat va Navoiyning adolatli jamiyat to'g'risidagi ta'limotlari hamda boshqa buyuk allomalar huquqiy merosidan foydalanilganligi Konstitutsiyaning mazmunini yanada boyitgan.

O'zbekiston Respublikasi Konstitutsiyasi yakka hukmronlikka da'vo qiluvchi mafkuradan, zo'rlab tiqishtirilgan siyosatbozlikdan, siyosatlashuvdan, balandparvoz shiorlardan, sinfiylikdan va partiyaviylikdan xolidir. Shuning uchun ham Mustaqillik Konstitutsiyasi sho'ro davrida qabul qilingan siyosiy manifest shaklidagi Konstitutsiyalardan hayotiyli va amal qiluvchi xususiyati bilan chinakam yuridik hujjat sifatida mazmunan ajralib turadi.

**O‘zbekiston Respublikasi  
Konstitutsiyasining  
mazmun va mohiyatini  
belgilovchi asosiy  
g‘oyalar**

O‘zbekiston Respublikasi Konstitutsiyasining maqsadi, prinsiplari, asosiy qoidalari mazmun va mohiyati negizini belgilovchi ulug‘vor g‘oyalar uning **Muqaddi-**

**masida** to‘la bayon etilgan. Konstitutsiya muqaddimasi juda ixcham va yuksak saviyali. Muqaddimada O‘zbekistonning rivojlanish, yangilanish va taraqqiyot yo‘li hamda yangi jamiyat va davlat qurilishining yo‘nalishlari belgilab beriladi. Ushbu istiqboldagi maqsadlar sari rivojlanishning o‘z istiqlol va taraqqiyot yo‘li quyidagi ilg‘or huquqiy g‘oyalarga tayanadi. Bular: inson huquqlari va davlat suverentetiga sodiqlik, hozirgi va kelajak avlodlar oldidagi mas‘uliyatni anglash, o‘zbek davlatchiligining boy tarixiy tajribasiga tayanish, demokratiya va ijtimoiy adolatga sadoqat, xalqaro huquqning qoida va talablarini tan olish, fuqarolarning farovon hayot tarzini yaratish, insonparvar demokratik huquqiy davlatni bunyod etish, fuqarolar tinchligi, milliy va millatlararo totuvlikni ta‘minlashdan iborat. Bu g‘oyalar xalqimizni yagona maqsad yo‘lida birlashtiradi va jiplashtiradi.

Konstitutsiya g‘oyalari o‘z-o‘zidan amalga oshmaydi. Ularni hayotga tatbiq qilishga qodir bo‘lgan kuch ham kerak. Bunday kuch jamiyat, davlat va insonning o‘zidir. Asosiy Qonundagi insoniy, ma‘naviy ahamiyatga ega bo‘lgan siyosiy-huquqiy g‘oyalarni ro‘yobga chiqarishda har bir inson va fuqaroning faol ishtirok etishi muhimdir. Shu bilan birga jamiyat a‘zolarining huquqiy madaniyat darajasi yuqori bo‘lishi ham zaruriy shartlardan biridir. Shuning uchun har birimiz aql-zakovatimizni va bilim salohiyatimizni Konstitutsiyada mustahkamlangan yuksak g‘oyalarni hayotda ro‘yobga chiqarishga safarbar etishimiz lozim bo‘ladi.

**O‘zbekiston Respubli-  
kasi Konstitutsiyasi  
tuzilishi va sifatini bel-  
gilovchi mezonlar**

O‘zbekiston Konstitutsiyasi 128 moddadan iborat bo‘lib, 26 bobni birlashtiruvchi 6 bo‘limni o‘z ichiga oladi.

***O‘zbekiston Konstitutsiyasi***

***tuzilishi mazmuni*** — fuqarolar o‘rtasida totuvlik, milliy va ijtimoiy hamjihatlik, shaxs erkinligi va saylov erkinligi, siyosiy barqarorlik, farovonlik va iqtisodiy o‘rishni ta‘minlash, davlatning inson va fuqarolar oldidagi o‘z burchini bajarishga erishishga yo‘naltirilgan. Shu bilan bir qatorda, Asosiy Qonunimiz mazmunida tenglik, erkinlik, birodarlik, xalqlar va millatlararo do‘stlik, mamlakat va dunyo barqarorligi kabi umuminsoniy g‘oyalar ham mujassamdir.

Konstitutsiyaga ega bo‘lish, unga tayanish, itoat qilish, u bo‘yicha yashash, undan himoya topish hamda uni himoya qilish lozim va shartdir. **Konstitutsiya biz uchun shunday aziz narsadirki, uni or-nomusni asraganday asramoq lozim.** Chunki aynan Konstitutsiyada O‘zbekistonning davlat suvereniteti (I bob), xalq hokimiyatchiligi (II bob), qonun ustuvorligi (III bob) aks etadi. Aynan u o‘zbek millatining tiliga davlat maqomini beradi (4-modda). Xalqni hokimiyat manbasi sifatida e‘tirof etadi. Ijtimoiy hayotda siyosiy institutlar, mafkuralar va fikrlar xilma-xilligini kafolatlaydi.

Inson huquqlari va erkinligi oliy qadriyat hisoblanadi. Shu bilan Konstitutsiyada inson eng mo‘tabar mavqega ko‘tariladi. Agarda Konstitutsiyaga e‘tibor bilan qarasangiz birinchi bo‘limdan so‘ng inson huquqlari va erkinliklari boshlanadi. Konstitutsiyaning 2-bo‘limi inson huquqlarining to‘liq va ixcham tizimidir. Undan keyingi 3-bo‘lim jahondagi birorta konstitutsiyada yo‘q. Mazkur bo‘limning asosiy maqsadi: fuqarolik jamiyati an‘analarini shakllantirish, jamoat birlashmalari va ijtimoiy munosabatlarning sog‘lom ravnaqini ta‘minlashdir. Bundan keyingi

bo'limlarda davlat tuzilishi va davlat organlariga oid qoidalar bayon etiladi. Demak, Konstitutsiya «Inson — jamiyat — davlat» yo'nalishida tuzilgan bo'lib, unda inson manfaati birinchi o'ringa qo'yilgan.

Asosiy Qonunda Birlashgan Millatlar Tashkilotining ustuvor yo'nalishdagi hujjatlari, Inson huquqlari umumjahon Deklaratsiyasi, xalqaro huquqning me'yor va tamoyillari hisobga olingan. Shu bilan birga AQSH, Germaniya, Fransiya, Shvetsiya, Ispaniya, Portugaliya, Italiya, Bolgariya, Vengriya, Turkiya, Eron, Yaponiya, Misr, Hindiston va boshqa davlatlarning xalqaro huquq talablarini aks ettiruvchi konstitutsiyaviy tajribalarini o'zida jamlagan.

**O'zbekiston Respublikasi Konstitutsiyasining bosh va ustuvor tamoyillari:** barcha fuqarolarning teng huquqliligi; biron-bir millatga daxldorligi, diniy e'tiqodi va mazhabidan qat'i nazar, jamiyatda shaxs ustunligi va ijtimoiy adolat barqarorligini ta'minlash; milliy ozchilikni tashkil etuvchi aholi qatlamlariga e'tibor bilan qarash, ularning tili, xalq an'analari va urf-odatlarini hurmat qilish; ularning o'ziga xosligi va taraqqiyotini saqlashga zaruriy shart-sharoitlar yaratish kabi yo'nalishlarni o'z ichiga oladi.

O'zbekiston Konstitutsiyasining sifatini belgilovchi mezonlar ham mavjud bo'lib, ular sirasiga quyidagilarni kiritish mumkin. Jumladan: konstitutsiyaning huquqiy davlatni barpo etish ehtiyoji va istiqbollariga muvofiqligi, xalqaro konstitutsiyaviy tajribalarning konstitutsiyani yaratishda ijodiy foydalanilganligi, konstitutsiyaning bevosita harakatdagi huquq ekanligi, konstitutsiyaning huquq manbayi sifatida yetakchilik roli hamda davlat va jamiyatda barqarorlikka erishishdagi ahamiyati va shu kabi mezonlardir.

Konstitutsiya jamiyatda amalda bo'lgan barcha qonunlarni bir maqsad, bir g'oya, bir tartibga bo'ysun-

**O'zbekiston Respublikasi Konstitutsiyasi normalari**

diradigan yagona umumdavlat miqyosidagi asosiy qonundir. Konstitutsiya qonunlarning huquqiy bazasi hisoblanadi. Konstitutsiyada mustahkamlangan normalar O'zbekiston davlati konstitutsiyaviy tuzumining asoslarini, inson va fuqarolarning asosiy huquqlari, erkinliklari va burchlarini, fuqarolik jamiyatining tarkibiy qismlarini, O'zbekiston Respublikasi davlat tuzilishini, davlat hokimiyati va mahalliy o'zini o'zi boshqarish tizimini belgilab beradi.

Konstitutsiya normalari hamisha ustuvorlik va ta'asis kuchiga egadir. Konstitutsiya normalari mazmuni talablariga mos va to'la muvofiq asosda qonunlar ishlab chiqilib, amalga kiritiladi. Konstitutsiyaviy normalarga bevosita amal qilib turgan huquq deb qaralishi mumkin. Konstitutsiya (III bobi)da konstitutsiyaviy normalarning to'g'ridan to'g'ri amal qilishiga oid qoida mustahkamlab qo'yilgan. Konstitutsiyaviy normalarning to'g'ridan to'g'ri amal qilishi tushunchasi *qonun yaratish, ijro etish va huquqni qo'llash jihatlarini* qamrab oladi. Hamda Konstitutsiya normalarini ijro etish uchun normativ hujjatlar chiqarilishini anglatadi. Normativ hujjatlarni shajara deb tasavvur etsak, shu shajara tepasida Konstitutsiya turadi. Konstitutsiyaviy normalar an'anaviy huquq mezonlariga nisbatan eng asosiy norma, qonunni sharhlash va qo'llash vositasi hisoblanadi.

Ijtimoiy turmush barcha sohalarining tartibga solib turilishida va hayotda qonun ustuvorligi qaror topishida qabul qilingan qonunlar yoki boshqa normativ-huquqiy hujjatlarning Konstitutsiya normalariga o'zaro muvofiqligi muhim ahamiyatga ega. Bu tamoyil qabul qilinadigan qonun hujjatlari Konstitutsiya normalariga to'la va aniq mos kelishi zarurligini bildiradi. Shu bilan birga Konstitutsiyada mustahkamlangan normalar inson, jamiyat va davlat manfaatlariga ziyon keltiradigan tarzda talqin qilinmasligi lozim. Shu bois Konstitutsiyaning 16-moddasida bu

ikkala muhim masala mustahkamlab qo'yilgan. Bu moddaga ko'ra, «Mazkur Konstitutsiyaning birorta qoidasi O'zbekiston Respublikasi huquq va manfaatlariga zarar yetkazadigan tarzda talqin etilishi mumkin emas.

Birorta ham qonun yoki boshqa normativ-huquqiy hujjat Konstitutsiya normalari va qoidalariga zid kelishi mumkin emas».

Konstitutsiya asosida qabul qilingan qonunchilik hujjatlarini yo'nalishiga qarab 4 ta turkumga ajratish mumkin. **Birinchisi** — davlatchiligimizni mustahkamlashga va davlat tuzilmalarini takomillashtirishga qaratilgan hujjatlar, **ikkinchisi** — iqtisodiy islohotlarni amalga oshirishning huquqiy negizini tashkil etadigan qonunlar, **uchinchisi** — jamiyat siyosiy tizimini erkinlashtirish va demokratlashtirish, inson huquq va erkinliklarini himoya qilish huquqiy asoslarini belgilovchi qonunlar, **to'rtinchisi** — xalqaro huquq subyekti sifatida O'zbekistonning tashqi siyosiy va tashqi iqtisodiy aloqalarini tartibga soladigan qonunlardir.

Konstitutsiya O'zbekistonning erkin taraqqiyotini huquqiy jihatdan to'la ta'minlaydi. Shu bilan birga butun qonunchilik va qonunni ijod qilish jarayonining, demokratiya va ijtimoiy-iqtisodiy rivojlanishning huquqiy manbai bo'lib xizmat qiladi.

Mustaqil O'zbekiston Respublikasi Konstitutsiyasida mustahkamlangan norma va tamoyillar demokratiya va huquqshunoslikning eng zamonaviy talablariga javob beradi. Bu esa jamiyatimizning hayotiy amaliyoti bilan tasdiqlanmoqda. Ayni vaqtda, O'zbekistonning Asosiy qonuni teran tarixiy ildizlarga, milliy an'analar va o'zbek xalqining siyosiy-huquqiy madaniyatiga tayanadi.

**O'zbekiston  
Respublikasi Prezidenti  
Konstitutsiya haqida**

O'zbekiston Respublikasi Prezidenti Islom Karimov o'z asarlarida Konstitutsiyaning mazmun va mohiyati-

ga, uning davlat mustaqilligini va inson huquqlarini mustahkamlashdagi ahamiyatiga alohida to'xtalib, unga sermazmun va ifodali tarzda baho bergan. Yurtboshimizning «Konstitutsiya bizga inson huquqlari, ozodlik, barqarorlik va taraqqiyot majmuini ifodalaydigan demokratik, huquqiy va adolatli davlatni qanday qilib qurish yo'llarini ochib beradi» degan so'zlari hayotda o'z ifodasini topmoqda. Konstitutsiyaga berilgan bu purma'no baho Mustaqillik Qomusi kelajagi buyuk O'zbekiston davlatini bunyod etishning huquqiy kafolati bo'lishligidan dalolat beradi. Prezidentimiz Konstitutsiya haqida to'xtalar ekan, shunday deydi: «Har qanday davlatning yuzi, obro'e'tibori uning Konstitutsiyasi hisoblanadi. Zotan, Konstitutsiya davlatni davlat, millatni millat sifatida dunyoga tanitadigan Qomusnomadir».

Konstitutsiya inson manfaatlarini himoya qiluvchi yuksak tayanchdir. Bosh Qomus fuqarolarimizning haq-huquqlarini himoya etishda asosiy mezondir. Ya'ni Konstitutsiya odamlarning Bosh himoyachisidir. Unda inson ulug' maqomga ega. Shu bois Prezidentimiz «Inson so'zi Ona, Vatan degan kalomlar kabi muqaddasdir. Bu muqaddaslikni, inson erkinining daxlsizligini mustahkam qonunlarimiz himoya qilishi kerak» degan edi. Konstitutsiyamiz va uning asosida qabul qilingan qonunlar ham ana shu ezgu maqsadga yo'naltirilgan. Chunki yurtboshimiz iborasi bilan aytganda: «Aslida inson baxt uchun, dunyo ne'matlaridan bahramand bo'lish uchun tug'iladi».

Prezident Islom Karimov O'zbekiston Respublikasi Konstitutsiyasi haqida shunday degan edi: «Demokratik O'zbekiston Konstitutsiyasida esa «har bir shaxs mulkdor bo'lishga haqli» ekani, O'zbekiston bozor munosabatlariga asoslanishi, uning negizini xilma-xil mulk shakllari tashkil etishi, barcha mulk shakllarini teng huquqqa ega ekaniga kafolat berildi. Ishbilarmonlik, tadbirkorlik va tashabbuskorlik harakatiga

keng yo‘l ochib berildi va mulkdorlar tabaqasini vujudga keltirish tamoyillari ishlab chiqildi». Konstitutsiyada o‘z aksini topgan va mustahkamlangan bu qoidalar jamiyatimizning iqtisodiy qudratini yanada oshirishda muhim ahamiyat kasb etmoqda.

**O‘zbekiston Respublikasi  
Konstitutsiyasining  
asosiy prinsiplari**

O‘zbekiston Respublikasi Konstitutsiyasining asosiy prinsiplari davlat suverenitetini, xalq hokimiyatchiligi hamda inson huquqlarini

tan olish va ta‘minlashga qaratilgan. Konstitutsiyaning birinchi bo‘limi suveren O‘zbekiston davlatining mohiyatini belgilab beradi. Bu mohiyatni *davlat suvereniteti, xalq hokimiyatchiligi, Konstitutsiya va qonunlarning ustuvorligi va tashqi siyosat prinsiplari* tashkil etadi.

**Suverenitet** — davlatning eng muhim ajralmas belgilaridan biridir. Suverenitet ikkita o‘zaro bog‘liq shaklga ega bo‘lib, ular xalq (millat) va davlat suverenitetidan iborat.

Xalq suvereniteti va davlat suvereniteti to‘g‘risidagi g‘oyalarning shakllanishi va rivojlanishi o‘z tarixiga ega. Bu masalada umuminsoniyat taraqqiyotiga ulkan hissa qo‘shgan buyuk shaxslar: Aflotun, al-Forobiy, Amir Temur, A. Navoiy va shu kabi mutafakkirlar qarashlarini o‘rganish muhim ahamiyatga ega. Ular bu tushunchalarga turlicha munosabat bildirganlar.

**Xalq suvereniteti** haqidagi g‘oyani XIV asrda yashagan yevropalik mutafakkir Marsiliy Paduanskiy keng ma‘noda asoslab, uning jamiyat hayotidagi ahamiyati to‘g‘risidagi qimmatli fikrlarni ilgari surgan edi. Keyinchalik bu g‘oya nazariy jihatdan yanada rivojlantirildi va mazmunan boyitildi.

**Xalq suvereniteti** davlatning asosi va manbayi xalq (millat) ekanligini anglatadi hamda xalqning to‘la hokimiyati va xalq boshqaruvi ma‘nosini bildiradi. Ko‘pchilik davlatlarning konstitutsiyalarida xalq su-



vereniteti g'oyasi o'z aksini topdi. Masalan, Fransiya Konstitutsiyasining 3-moddasida, Italiya Konstitutsiyasining 1-moddasida xalq suvereniteti g'oyasi mustahkamlab qo'yilgan. O'zbekiston Konstitutsiyasining 7-moddasida xalq suvereniteti g'oyasi to'la o'z ifodasini topgan. Hozirgi paytda xalq suvereniteti prinsipi va millatning o'z taqdirini o'zi belgilash huquqi xalqaro huquq tomonidan tan olingan.

**Davlat suvereniteti** — xalqning suveren irodasini ifoda etuvchi davlat hokimiyatining ichki ishlarda va xalqaro munosabatlarda butunlay mustaqil ekanligini bildiradi. Ya'ni, mamlakat hududida davlat hokimiyati ustun va boshqa davlatlar bilan qanday munosabatda bo'lishini o'zi belgilaydi, uning ishlariga boshqa davlatlar aralashish huquqiga ega emas, deganidir. Davlat suvereniteti haqidagi g'oyani XVI asrda fransiyalik mutafakkir Jon Boden ilgari surgan edi. Uning fikricha suverenitet davlatning muhim belgisi bo'lib, suveren bo'lmagan davlat, davlat emas. J. Boden davlat suvereniteti deganda, mutlaq, bo'linmas oliy hokimiyatni tasavvur qiladi. Davlat suvereniteti g'oyasi ham bir qator davlatlar Konstitutsiyalari mazmunida, xalqaro huquq hujjatlarida asosiy o'rinni egallaydi.

Jahondagi davlatlarni biri-biridan farqlovchi o'z nomlari bo'ladi. Konstitutsiyamizning 1-moddasiga binoan Vatanimiz — suveren demokratik respublika bo'lib, «*O'zbekiston*» yoki «*O'zbekiston Respublikasi*» degan nomlar bilan ataladi, mazkur atamalar bir ma'noni bildiradi. O'zbekiston davlatining nomi va uning ramzlari xalqaro shartnomalarda, davlat idoralarining muhrlarida, xizmat hujjalari va guvohnomalarida ifodalanadi.

O'zbekiston Respublikasi davlat suverenitetining ajralmas sifatlari quyidagilardan iborat: O'zbekiston Respublikasi suvereniteti uning butun hududida amal-

da bo'lishi, o'z ichki va tashqi siyosatini mustaqil belgilashi, butun hududda ustunlikka ega konstitutsiya va qonunlarni qabul qilishi, o'z hududining yaxlitligi va daxlsizligini ta'minlash huquqini bildiradi.

Davlat mustaqilligini shartli ravishda belgilovchi tashqi belgi, nishon yoki timsollar davlat ramzlari deb ataladi. Har bir o'zbekistonlik uchun muqaddas bo'lgan davlat ramzlari Konstitutsiyaning 5-moddasida mustahkamlab qo'yilgan. Bular — davlat bayrog'i, davlat gerbi va davlat madhiyasi. Davlat ramzlari o'zbek xalqining tuyg'ularini, uning erk va ozodlikka, baxt-saodatga intilishini tarannum etadi. Shuning uchun ham siz yoshlar har kuni o'qishni davlat madhiyasini ijro etish bilan boshlaysizlar. Bu odat o'tmishga hurmat va kelajakka bo'lgan ishonch tuyg'ularimizni mustahkamlaydi. Respublikamizda davlat ramzlari qonun bilan muhofaza qilinadi. 1994-yilning 22-sentabrida tasdiqlangan va 1995-yil 1-apreldan kuchga kiritilgan Jinoyat Kodeksining 215-moddasiga ko'ra davlat ramzlariga hurmatsizlik qilish boshqaruv tartibiga qarshi jinoyat deb ta'riflanib, unga jazo belgilangan.

Jahondagi demokratik davlatlarning konstitusiyalari «butun hokimiyat xalqqa tegishli» yoki «butun hokimiyat xalq tomonidan amalga oshiriladi» degan formulani o'zida mujassamlashtirgan. Mustaqillik Konstitutsiyasida ham xalq hokimiyatchiligi asosiy prinsiplardan biri hisoblanadi. Xalq, xalq hokimiyati g'oyasi butun Konstitutsiyaga singib, uning mohiyatini tashkil etadi. Konstitutsiyaning 2-bobida «xalq hokimiyatchiligi» atamasi «hokimiyat manbayi» degan atama bilan uzviy bog'langan. Asosiy Qonunimizning 7-moddasida xalq hokimiyatchiligi prinsipini ifoda etuvchi qoida mustahkamlangan. Ya'ni, bu qoidaga ko'ra, O'zbekistonda davlat hokimiyatining birdan bir manbayi xalq bo'lib, davlat xalq irodasini ifodalaydi, uning manfaatlariga xizmat qiladi.

Xalq hokimiyatchiligi prinsipi demokratik jamiyat bunyod etishning huquqiy asosini tashkil etadi. Shu bois demokratiya bugun yer yuzida inson hayotining uzviy shartiga aylandi. Demokratiyaning asl mohiyati xalqning o‘z-o‘zini boshqarishi, o‘z hayotini o‘z xohishidan kelib chiqib qurishi va buning oqibati uchun mas’uliyatni ham o‘ziga olishdir.

Konstitutsiyaning 3-bobida huquqiy davlatning muhim belgisi bo‘lgan Konstitutsiya va qonunning ustuvorligini ta’minlash prinsipi mustahkamlangan. Bu **birinchidan**, barcha joriy qonunlar va huquqiy hujjatlar Konstitutsiya asosida va unga muvofiq bo‘lishini, **ikkinchidan**, qonun oldida hammaning barobarligini, **uchinchidan**, hayotning barcha sohalarida qonunning hukmronligini anglatadi. Biror-bir fuqaro, davlat idorasi, jamoat tashkiloti, mansabdor shaxsning qonunga bo‘ysunish majburiyatidan xoli bo‘lishi mumkin emas. Jamiyatdagi barcha munosabatlar qonun bilan tartibga solinadi. Shu munosabatlarni belgilovchi normalarni buzganlar hech bir istisnosiz javobgar bo‘ladi.

Jamiyat hayotida qonun ustuvorligini ta’minlash huquqiy davlat bunyod etishning zarur shartidir. Buning ma’nosi shuki, Konstitutsiya va qonunlar hamma narsadan ustun turmog‘i va hamma uchun majburiy bo‘lmog‘idir. Demak, huquqiy davlat barcha fuqarolarning qonunga bo‘ysunib va qat’iy amal qilib yashashini talab etadi. Faqat qonun ustuvor bo‘lgan jamiyatdagina rivojlanish va taraqqiyot hukm suradi.

Shuni aytish kerakki, Konstitutsiya va qonunlarga so‘zsiz rioya qilib yashashni turmushimizning ajralmas qismiga aylantirish uchun har birimiz qonun harfi va ruhiga, ulardagi insonparvar qoidalarga o‘zimizda hurmat bilan qarash tuyg‘umizni tarbiyalab borishimiz kerak. Chunki unda Sizning va hammamizning ezgu intilishlarimiz jo bo‘lgan.

Konstitutsiyaning asosiy prinsiplari sirasiga tashqi siyosat masalasi ham kiritilgan. O'zbekiston tashqi siyosatining asosiy qoidalari Konstitutsiyaning 17-moddasida bayon etilgan. **Asosiy qoidalar:** *davlatlarning suveren tengligi, kuch ishlatmaslik yoki kuch bilan tahdid qilmaslik, chegaralarning daxlsizligi, nizolarni tinch yo'l bilan hal etish, boshqa davlatlarning ichki ishlariga aralashmaslik.* Bu qoidalar xalqaro huquqning tan olingan qoidalari talablari zaminiga qurilgan. Tashqi siyosatning asosiy prinsiplari mohiyati: mafkuraviy qarashlardan qat'i nazar tashqi munosabatda oshkoralik, teng huquqli va o'zaro manfaatli hamkorlik, o'zaro manfaatli aloqalarda to'la ishonch, ikki tomonlama va ko'p tomonlama tashqi aloqalar o'rnatish va rivojlantirishga asoslanadi. Bu prinsiplar tinchliksevar davlatlar bilan do'stona munosabatlarni mustahkamlash imkonini berdi va keng tashqi aloqalar yo'lga qo'yildi.

<b>Konstitutsiya va xalqaro huquq</b>
---

Konstitutsiyadagi qoidalar xalqaro huquq qoidalari va talablariga to'la monand keladi. Ya'ni, O'zbekiston

xalqaro huquqning umume'tirof etilgan normalariga sodiqligini Konstitutsiyada to'la ifoda etdi. Bu esa o'z navbatida davlatimizning xalqaro tashkilotlarga to'la huquqli a'zo bo'lishiga va xalqaro aloqalarning faol ishtirokchilaridan biriga aylanishiga zamin yaratib berdi. Konstitutsiyada xalqaro huquqning quyidagi ustuvor prinsiplari va me'yorlari mujassam bo'lgan, ya'ni *yashash, erkinlik va shaxsiy daxlsizlik, inson huquqlariga sodiqlik, demokratik g'oyalarga sadoqat, fuqarolar tinchligi, milliy va millatlararo totuvlik, barcha davlatlarning suverenitetini tan olish, ularning chegaralari daxlsizligini so'zsiz e'tirof etish, kuch ishlatmaslik va ichki ishlariga aralashmaslik.*


Yuqoridagi fikrlarga asoslanib aytadigan bo'lsak, Konstitutsiya eng ilg'or g'oyalarni jamuljam etgan hamda demokratik an'analar va umuminsoniy

huquqiy qadriyatlar asosida yaratilgan hujjatdir. U siyosiy, huquqiy va xalqaro ahamiyatga molik hujjat sifatida iqtisodiyotda, ijtimoiy-siyosiy munosabatlar va ma'naviy hayotda chuqur islohotlarni o'tkazish uchun huquqiy poydevor bo'lib qoladi.

Konstitutsiya haqida xorijliklar ham o'z baholarini berganlar. Fransuz professori O. Shmidt O'zbekiston va Fransiya Respublikalari Konstitutsiyalarini qiyosiy tahlil qilib, shunday degan edi: «O'zbekiston Konstitutsiyasi mutlaqo mustaqil va aynan xalqingiz va jamiyatingiz talablariga hamda an'analariga javob beradi... Konstitutsiyangiz davlat hamda fuqaro jamiyati Konstitutsiyasi hisoblanadi, chunki ana shu ikki muhim huquqiy sohani tartibga soladi».

Konstitutsiya va qonunlarga amal qilgan holda Vatan manfaati bilan yashashimiz va uning ravnaqi uchun mehnat qilishimiz, Vatan oldidagi o'z majburiyatlarimizni vijdonan bajarishimiz zarur. Vatan manfaati yo'lida birdamlik va hamjihatlik bo'lishini Konstitutsiya o'z mazmunida mujassam etadi. Konstitutsiya xalqimiz ongida O'zbekiston yagona Vatan degan tuyg'uni shakllantiradi va uning istiqboli bilan hamnafas yashashga har birimizni undaydi.

## 1-§ BO'YICHA EGALLAGAN BILIMLARINGIZNI MUSTAHKAMLASH UCHUN TOPSHIRIQLAR



Davlat mustaqilligi va inson erkinligi Qomusi	Konstitutsiya mazmun-mohiyatini belgilovchi g'oyalar	Konstitutsiya tuzilishi va normalari

## Qiyosiy tahlil



1. O‘zbekiston Respublikasi Konstitutsiyasi va qonunlari bilan Inson huquqlari Umumjahon Deklaratsiyasi qoidalari mazmunini solishtiring.
2. O‘zbekiston Respublikasi Konstitutsiyasi normalari bilan xalqaro huquq tan olgan normalarni qiyoslang.
3. O‘zbekiston Respublikasi Konstitutsiyasi bilan boshqa davlatlar Konstitutsiyalari o‘rtasidagi farqli jihatlarni ko‘rsatib o‘ting.
4. O‘zbekiston Respublikasi qaysi jihatlari bilan jahondagi davlatlar konstitutsiyaviy tajribalaridan farqlanadi?

## Ommaviy axborot materiallari



### Qaysi gazeta va jurnallarda:

1. O‘zbekiston Respublikasi Konstitutsiyasiga tegishli materiallar ko‘proq chop etiladi?
2. Ularda Konstitutsiyaning amaliyotdagi tatbiqining qaysi jihatlari ko‘proq yoritiladi?
3. Radio-televideniya Konstitutsiyaning qaysi qirralari ko‘proq yoritilishini maqbul deb bilasiz?
4. Konstitutsiya, qonun, huquqiy davlat to‘g‘risida o‘z fikringiz asosida material matnini tayyorlab, uni o‘rtoq‘laringiz bilan dars jarayonida muhokama qiling.

## Mulohaza yuriting



1997-yil 9-avgustda «Xalq so‘zi» gazetasida chop etilgan «Kecha va bugun» maqolasidan:

## Ilgari

Dunyo xaritasida O'zbekiston degan davlat yo'q edi. U faqat SSSR xaritasidagina mavjud edi, xolos. Biroq, xorijdagi ko'pgina davlatlar va ularning xalqlari SSSR degan davlatni ham bilmas, uni Rossiya deb atardi. Binobarin, xorijliklar uchun SSSR hududidagi barcha xalqlar rus hisoblanardi. Ikkinchi jahon urushida jon olib jon bergan, qurbon bo'lgan o'zbeklar ham Rossiya fuqarosi, go'yo rus kishisi hisoblangan... Konstitutsiyamiz, bayrog'imiz, gerbimiz, madhiyamiz bor edi-yu, biz ularning birortasini ham his qilmas edik.

## Hozir

Bayrog'imiz Birlashgan Millatlar Tashkiloti peshtoqida hilpirab turibdi. Bu — O'zbekiston dunyodagi barcha davlatlar safida o'zining munosib o'rniga ega, degan gap. O'zbekiston o'z Prezidenti siymosida Birlashgan Millatlar Tashkiloti minbaridan ham, boshqa juda ko'p nufuzli xalqaro anjumanlarda ham olamshumul masalalarni ko'tarib chiqmoqda, jahonning ko'pgina nuqtalarida delegatsiyalarimiz sharafiga bayrog'imiz ko'tarilib, madhiyamiz yangrayapti. Konstitutsiyamizga qat'iy rioya qilgan holda demokratik jamiyat qurayapmiz.

**Xulosa bering va umumlashtiring**



**O'rgangan mavzu yuzasidan o'zlashtirgan tushuncha va bilimlaringizni umumlashtiring va mustahkamlang**



## 2-§. O‘ZBEKISTONDA SHAXS VA DAVLAT MUNOSABATI

### Shaxs va davlatning o‘zaro munosabati tushunchasi

Fuqarolar bilan davlat o‘zaro huquqlar va burchlar orqali uzviy bog‘liqdir. Bu bog‘liqlik shaxs va davlat munosabati tushunchasi mohiyatidir. Shaxs bilan davlat o‘rtasidagi huquqiy aloqa fuqarolikni anglatadi. *Shaxs, jamiyat va davlat* — bu uchala asosiy qadriyat Konstitutsiyada belgilab qo‘yilgan. Ular o‘rtasida hayotda turli sohalarda yuzaga keladigan barcha munosabatlarning huquqiy tartibi Konstitutsiya qoidalarida o‘z ifodasini topgan. *Shaxs* — fuqarolik jamiyatining erkin, ongli, mustaqil tarkibiy qismidir. Fuqarolik jamiyati esa, o‘z-o‘zini tashkillashtirgan xalq — har qanday hokimiyatning haqiqiy manbayi va yetakchisidir. Fuqarolik jamiyati insonning o‘z-o‘zini kamol toptirishga yordam beradi hamda shaxs manfaatlari, uning huquq va erkinliklari ro‘yobga chiqishiga ko‘maklashadi. *Davlat* — jamiyat va shaxs manfaatlari va huquqlarining mustaqil, xalqchil, huquqiy himoyachisidir. Shu ma’noda Konstitutsiya fuqaro, jamiyat va davlat hokimiyati o‘rtasidagi munosabatlarni belgilovchi o‘ziga xos ijtimoiy shartnomadir. Konstitutsiya fuqarolarning umumiy teng huquqliligi, fuqaro va davlat o‘rtasidagi munosabatlarda o‘zaro mas’ulligi g‘oyasiga asoslanadi.

### Shaxs va davlat munosabati haqidagi konstitutsiyaviy qoidalar

Konstitutsiyaviy qoidalar shaxs va davlatning o‘zaro munosabatlari qanday shakllanishi lozimligi va bu inson hayotida qanday muhim ahamiyatga ega ekanligini tushunib olishda yordam beradi. O‘zbekiston Respublikasi Konstitutsiyasi shaxs va davlat o‘rtasidagi o‘zaro munosabatlar huquqiy tartibini belgilab beradi. Bunga ko‘ra xalq,



jamiyat, shaxs huquqi va manfaati birinchi o‘ringa qo‘yiladi. Agarda shaxs va davlat munosabatida davlat o‘rniga e‘tibor berilsa, davlat manfaati mohiyati zaminida ham inson huquqi va erki himoyasi yotadi. Biz bunyod etayotgan davlatning insonparvarlik va xalqparvarlik mohiyati shunda aks etadi. Ya‘ni davlat faoliyatining asosiy maqsadi insonga xizmat qilish ekanligi to‘la e‘tirof etiladi. Shaxs va davlat munosabatiga taalluqli barcha konstitutsiyaviy qoidalarni o‘rganganimizda bunga to‘la amin bo‘lamiz. Asosiy Qonunimizda shaxs va davlatning o‘zaro munosabatlarida shaxsning huquqiy maqomi ham qat‘iy mustahkamlangan. Shaxsning davlat oldidagi mas‘ulligi va majburiyatlari ham konstitutsiyaviy qoidalar mazmuniga singdirilgan. Ya‘ni konstitutsiyaviy qoidalar shaxsning davlat bilan yuzaga keladigan munosabatlarining huquqiy me‘yori va tartibini aniq belgilab beradi hamda bajarilishini talab etadi. Fuqaro sifatida shaxs bilan davlat o‘rtasida boshqacha munosabat shakllanadi. Fuqaro davlat oldida qonun bilan belgilangan majburiyatlarni bajaradi. Shaxs fuqaro sifatida Konstitutsiyaviy huquqlarga ega bo‘lib, ularning amalga oshishi uchun davlat zarur shart-sharoitlarni ta‘minlash majburiyatini oladi. Shu asnoda fuqaro va davlat o‘zaro huquq va majburiyatlarga ega bo‘ladi. Agarda shaxs davlat oldidagi mas‘uliyatini va majburiyatini anglab yetsa, unga vijdonan amal qilib borsa, davlat rivoji va ravnaqi ta‘minlanib boradi.

**Shaxs va davlatning  
o‘zaro majburiyatlari**

Istiqlol sharofati bilan har bir inson hayoti, uning huquqlari va erkinliklari to‘la amalga oshirilishi davlat

himoyasiga olindi. Bu nihoyatda muhim ahamiyatga molik huquqiy yutuq hisoblanadi. Inson huquqlarini barcha qonuniy vositalar bilan himoya qilish davlat va jamiyatning burchiga aylandi. Huquq va erkinliklarni amalga oshirish davlatni va jamiyatni demokrat-

lashtirishning ajralmas jihatidir. Bugungi kunda inson huquqlari buzilishiga olib keluvchi u yoki bu g'oyalar yoxud muayyan kuchlardan xalqimizni himoyalash davlatimizning ustuvor vazifalari sirasiga kiradi. Davlat qonun doirasida insonlarga munosib hayot kechirishlari uchun barcha zarur shart-sharoitlarni yaratib berish tadbirlarini amalga oshiradi.

Shuni aytish kerakki, Sho'ro istibdodi davrida davlat tizimlariga inson qaramligi holati mavjud edi. Ya'ni shaxsning davlat oldidagi majburiyati shunchalik kuchaytirilgan ediki, shaxsning o'z erki asosida ish olib borish imkoniyati chegaralangan edi. Boshqacha qilib aytganda, inson davlat uchun yaralgandek edi va davlat oldida inson qadri ko'zga ko'rinmas edi. Huquqsiz inson erksiz mehnat qilishga majbur bo'ladi. U o'zidagi iste'dod va qobiliyatni namoyon etish imkoniyatiga ega bo'lmaydi. U erksiz bo'lganligi uchun o'ziga munosib hayot tarzini yarata olmaydi. Aynan ana shunday holatlarga chek qo'yish, ya'ni insonning huquqlari va erkinliklari ustidan davlatning hukmronlik qilishiga yo'l qo'ymaslik maqsadida Konstitutsiyada davlat organlari va mansabdor shaxslarning jamiyat va fuqaro oldidagi majburiyati belgilab qo'yildi.

Shaxs va davlatning o'zaro munosabatida davlatning o'zni muhim ahamiyatga ega. O'zbekiston Respublikasi Konstitutsiyaning 2-moddasida shunday deyilgan: «Davlat xalq irodasini ifoda etib, uning manfaatlariga xizmat qiladi. Davlat organlari va mansabdor shaxslar jamiyat va fuqarolar oldida mas'uldirlar». Ushbu konstitutsiyaviy qoida Asosiy Qonunimizning eng muhim xususiyati bo'lib, davlat oldida shaxs qadrini tikladi. Bu qoida mazmuni jamiyat va fuqarolar oldida davlatning javobgarligi qonunan mustahkamlanganligi va kafolatlanganligini anglatadi. Shu bilan birga bu qoidada davlatning ijtimoiy ahamiyatiga e'tibor qaratilib, uning mohiyati xalq manfaatlari asosiga qurilgan. Konstitutsiyaning bu

normasi Respublikadagi barcha mansabdor shaxslarning mas'ulligini va davlat taraqqiyotidagi vazifalarini ham belgilaydi. Mansabdor shaxslarning mas'ulligi va ularning javobgarligini oshirish davlatni mustahkamlaydi va jamiyat hayotida huquq ustuvorligini ta'minlashda muhim rol o'ynaydi.

Davlatning mas'ulligi prinsipi O'zbekistonning konstitutsiyaviy rivojlanish tarixida ilk marotaba mustahkamlab qo'yildi. Fuqarolar oldida davlat mas'ulligi belgilab qo'yilishi huquqiy davlatga xos prinsipdir. Bu prinsip fuqarolik jamiyati uchun ahamiyatga ega bo'lib, mansabdor shaxslarning tajovuzlaridan himoya qilishning huquqiy kafolati bo'lib xizmat qiladi. Shu bilan birga jamiyat ishlarini boshqarish hamda shaxsni boshqa shaxslar, organlar va tashkilotlar o'zbo-shimchaligidan himoya qilishda davlatning o'rnini mustahkamlaydi.

O'zbekiston Respublikasi Konstitutsiyasining bir jihati alohida diqqatga sazovorki, unda davlat faoliyatini amalga oshirishning mezonlari belgilangan. O'zbekiston Konstitutsiyasi 14-moddasidagi qoidaga asosan «Davlat o'z faoliyatini inson va jamiyat farovonligini ko'zlab, ijtimoiy adolat va qonuniylik prinsiplari asosida amalga oshiradi». Bu qoidadagi ijtimoiy adolat va qonuniylik mezoni davlatning ikki qanotidir. Ularni hayotda to'la qaror toptirish nafaqat davlat faoliyatini mukammallashtiradi, balki shaxs hayotining farovon bo'lishida muhim ahamiyat kasb etadi.

O'zbekiston Konstitutsiyasining 19-moddasidagi qoidada «O'zbekiston Respublikasining fuqarosi va davlat bir-biriga nisbatan bo'lgan huquqlari va burchlari bilan o'zaro bog'liqdirlar. Fuqarolarning Konstitutsiya va qonunlarda mustahkamlab qo'yilgan huquq va erkinliklari daxlsizdir, ulardan sud qarorisiz mahrum etishga yoki ularni cheklab qo'yishga hech kim haqli emas», deyiladi. Shu bilan davlat fuqarolarning konstitutsiyada mustahkamlab qo'yilgan

huquqlari va erkinliklarini ta'minlaydi. Har bir fuqaroga o'zining huquq va erkinliklarini sud yo'li bilan himoya etishi kafolatlanadi. Shuni aytish kerakki, davlat fuqarolarga huquqni in'om etmaydi, balki fuqaro erkinlik tufayli o'ziga tegishli ajralmas huquqlar majmuidan ongli ravishda va mas'uliyat bilan foydalanadi. Bu degani huquq va erkinliklar inson tabiatining o'zidan kelib chiqadi, ular insonga tabiiy xosdir.

O'zbekiston davlati xalq manfaatlarini o'zining islohotchilik faoliyatida ayniqsa himoya qilmoqda. Bozor munosabatlariga o'tish davrida iqtisodiy, siyosiy va mafkuraviy jarayonlarni boshqarishda beboshlikka yo'l qo'ymaslik, aholining ijtimoiy jihatidan himoyalangan qatlamlarini qo'llab-quvvatlash davlat tomonidan keng ko'lamda amalga oshirilmoqda.

Shaxs va davlatning o'zaro munosabatida shaxsning o'rnini alohida ko'rsatib o'tish zarur. O'zbekiston Konstitutsiyasining 20-moddasidagi qoidaga ko'ra, «Fuqarolar o'z huquq va erkinliklarini amalga oshirishda boshqa shaxslarning, davlat va jamiyatning qonuniy manfaatlarini, huquqlari va erkinliklariga putur yetkazmasliklari shart». Bu qoida bevosita shaxsning jamiyat va davlat oldidagi javobgarligini belgilaydi. *Bu qoida shaxsning konstitutsiyada belgilangan majburiyatlari mohiyatining o'zagini tashkil qiladi.* Shaxs o'zining konstitutsiyaviy huquq va erkinligini amalga oshirish jarayonida boshqa shaxslarning huquqlarini ustuvor deb bilib, ularni hurmat qilishi zarur. Chunki, fuqarolar o'rtasida teng huquqlilik qonunda belgilab qo'yilgan. Teng huquqlilik — bu barcha uchun barobar huquqiy imkoniyatdir. Agarda shaxs o'z manfaatini ustun qo'yib, boshqalarning huquqlarini kamsitsa yoki konstitutsiyaviy qoidalarga zid ravishda noqonuniy ishlar orqali o'z shaxsiy manfaatiga erishish yo'lida turli xil harakatlar qilsa, javobgarlikka tortiladi.

Shaxs shu bilan birgalikda davlat va jamiyatning

qonuniy manfaatlari, huquq va erkinliklariga ham putur yetkazmasligi zarur. Bu Konstitutsiyaning shaxs oldiga qo‘ygan talabidir. Agar biz shu talabning mazmuniga yanada chuqurroq kirib borsak, shu talabning mohiyati yanada oydinlashadi. Mohiyat esa, shaxs o‘z manfaatini davlat va jamiyat manfaatlari bilan uyg‘un va aloqadorlikda deb bilishi lozimligini ko‘rsatadi. Ya’ni, davlat va jamiyat huquqi amalga oshirilishida shaxsning faol qatnashuvini anglatadi. Davlatimiz maqsadi mazmunida barcha fuqarolar va jamiyat manfaatlari mujassam bo‘lib, ularni amalga oshirishda ishtirok etish shaxs manfaatining ro‘yobga chiqishini ham ta’minlaydi. Shunday ekan, davlat va jamiyatning qonuniy manfaatlari, huquq va erkinliklarini hurmat qilishni har birimiz yuksak majburiyat sifatida e’tirof etib, buni chuqur anglab yashash hayotiy burchimizga aylanmog‘i kerak.

Shaxs huquqi va erkinligi hamda jamiyat huquqiy manfaatlarining ta’minlanishi, qonuniy himoyalaniishi Konstitutsiyada to‘la o‘zining huquqiy yechimini topgan. Bu masalaning jamiyat hayotida haqiqiy ifodasini toptirish uchun davlatimiz tomonidan amaliy ishlar qilinmoqda. Chunki inson va jamiyat, shaxs va davlatning o‘zaro munosabatlari, ularni tabiiy ravishda uyg‘unlashtirish huquqiy davlat va fuqarolik jamiyatini bunyod etishning asosiy o‘zagini tashkil etadi. Inson erki va shaxs kamolotini ta’minlash muhim vazifa. Mamlakatimiz hayotida 1997-yil — «Inson manfaatlari yili», 1998-yil — «Oila yili», 1999-yil — «Ayollar yili», 2000-yil — «Sog‘lom avlod yili», 2001-yil — «Ona va bola yili» 2002-yil — «Qariyalarni qadrlash yili», 2003-yil — «Obod mahalla yili», 2004-yili — «Mehr va muruvvat yili», 2005-yil — «Sihat-salomatlik yili», 2006-yil — «Homiylar va shifokorlar yili», 2007-yil — «Ijtimoiy himoya yili», 2008-yil — «Yoshlar yili», 2009-yil — «Qishloq taraqqiyoti va farovonligi yili», 2010-yil — «Barkamol avloq yili» deb

e'lon qilinishi va bu yo'nalishlarda davlat dasturlarining ishlab chiqilib hayotga tatbiq etilishi shaxsni har tomonlama yetuk, komil inson qilib tarbiyalash hamda Konstitutsiya va qonunlarda belgilangan shaxsning huquqi va erkinliklarini amalga oshirish uchun huquqiy ma'naviy muhit yaratishga qaratilgan.

Shaxs o'zini naqadar chinakam inson his etishi, o'z mehnatining, o'z taqdirining, o'z mamlakatining egasi bo'lishi muhimdir. Shuning uchun jamiyatni isloh qilish va yangilash markazida inson, suveren O'zbekistonning fuqarosi turadi. Islom Karimov bu borada shunday degan edi: «Islohotlarning mazmuni ayni har bir fuqaro o'z qobiliyatini, o'z iste'dodini namoyon etishga, shaxs sifatida o'zini ko'rsatish imkoniyatiga ega bo'lishga qaratilgan. Siyosiy va ijtimoiy hayotdagi barcha o'zgarishlar ayni mana shu oliy maqsadga erishishga — har bir kishining hayotini yaxshiroq, munosibroq, ma'naviy jihatdan boyroq qilishga bo'ysundirilgan». (O'zbekiston buyuk kelajak sari. T.: O'zbekiston, 1998.)

## **2-§ BO'YICHA EGALLAGAN BILIMLARINGIZNI MUSTAHKAMLASH UCHUN TOPSHIRIQLAR**




- ⇒
1. Shaxs va davlat munosabati tushunchasi mohiyatini tushuntiring.
  2. Shaxs va davlat munosabati haqidagi konstitutsiyaviy qoidalar mazmunini izohlab bering.
  3. Shaxs va davlatning o'zaro majburiyatlari Konstitutsiyada qanday asosga qurilgan?

### **Matn tayyorlang**

O'zbekistonda shaxs va davlat munosabati haqidagi Konstitutsiyaviy qoidalarni o'rganish asosida matn tayyorlang. Matnda asosan o'z fikr va mulohazalaringizdan kelib chiqib yondashing, hamda turli xil shu masalaga taalluqli adabiyotlardan foydalanib xulosalar chiqaring.

## MUNOSABAT



**Ko'rgazmali material tayyorlang** ⇒

O'zbekistonda shaxs va davlatning o'zaro majburiyatini aks ettiruvchi ko'rgazmali materialni quyidagi jadval ko'rinishida tayyorlang va dars jarayonida uni izohlab bering.



### SHAXS VA DAVLAT MUNOSABATI



Shaxs majburiyati	Davlat majburiyati

**Huquqiy meros** ⇒

Shaxs va davlat munosabati o'tmishda qanday hujjatlar asosida belgilangan? Bu munosabatlar qanday sharqona fazilatlarga asoslangan?

**Shaxsiy fikr** ⇒

Siz davlat oldidagi konstitutsiyaviy majburiyatlaringizni qanday his qilasiz? Bu majburiyatlarni anglab yashash shaxsning kamoloti uchun ahamiyatini tushuntiring.

## II bob

# O‘ZBEKISTON FUQAROLARINING ASOSIY HUQUQLARI

### 3-§. FUQAROLAR HUQUQLARINING KONSTITUTSIYAVIY ASOSLARI

**Inson va fuqarolarning  
asosiy huquq va erkin-  
liklari haqidagi konsti-  
tutsiyaviy qoidalar**

Hayotimizning asosiy qonuni bo‘lgan O‘zbekiston Konstitutsiyasining xalqimiz, jamiyatimiz va davlatimiz hayotida tutgan o‘rni va ahamiyati beqiyosdir.

Konstitutsiyada davlatimizning demokratik mohiyatidan kelib chiqqan holda asosiy inson huquqlari va erkinliklari huquqiy kafolatlab qo‘yilgan.

Konstitutsiya O‘zbekistonda erkin fuqarolik jamiyati, ya’ni xalqning o‘zi bevosita boshqariladigan jamiyat va demokratik huquqiy davlat qurishni asosiy maqsad qilib qo‘yadi. Unda «jamiki dunyoviy ne’matlar orasida eng ulug‘i — inson» ekanligi yorqin mujasamlashtirilgan. Insonni ulug‘lash, uni muhofaza qilish va har tomonlama kamol toptirish Konstitutsiyamizning asosiy g‘oyasiga aylantirilgan. Zero, Konstitutsiyamizning eng katta va muhim qismi «Inson va fuqarolarning asosiy huquqlari, erkinliklari va burchlari» deb nomlangan II bo‘limidir. Konstitutsiyamizda faqat fuqarolarning huquqlarigina belgilab qo‘yilmasdan, xorijiy davlatlarning va fuqaroligi bo‘lmagan insonlarning asosiy huquqlari, erkinliklari haqidagi qoidalari ham mustahkamlangan. Ushbu qoidalar, tamoyillar fuqarolar o‘z huquq va erkinliklaridan to‘g‘ri foydalanishlari va zimmalariga yuklatilgan burchlarini halol, vijdonan bajarishlari shartligini hamda davlat organlari, mansabdor shaxslar fuqarolarning huquq va erkinliklarini ishonchli va samarali tatbiq qilishida



mas'ul ekanliklarini bayon etadi. Bu qoidalar qonuniylik, fuqarolarning umumiy tengligi, fuqaro va davlatning bir-biriga nisbatan bo'lgan huquqlari va burchlari bilan o'zaro bog'liqligi, shaxsiy va ijtimoiy manfaatlarining uyg'unlashganligidan iborat.

Qonuniylik — barcha davlat organlari, jamoat birlashmalari, mansabdor shaxslar va fuqarolar tomonidan amaldagi qonunlar va boshqa normativ huquqiy hujjatlarning aniq va og'ishmay bajarilishidir.

Qonuniylikning asosiy talabi mamlakatning ijtimoiy va davlat tuzumini mustahkamlash, bozor iqtisodiyotiga o'tish uchun mulkning turli shakllariga yo'l ochish va ularni qo'riqlash, fuqarolarning huquqlari, erkinliklari va burchlarini mustahkamlashdir.

Qonuniylikning talablariga rioya qilish inson huquq va erkinliklarini to'la ta'minlanishiga yo'l ochadi, insonlarda qonunlarga ishonch va hurmat hislarini uyg'otadi. Ikkinchi tomondan esa, davlatimiz xavfsizligi, barqarorligi va taraqqiyotini ta'minlaydi.

Siz yoshlar Konstitutsiya va boshqa qonunlarning mazmun-mohiyatini chuqur o'qib va o'rganib ularga kundalik hayotingizda amal qilishga odatlanib borishingiz lozim. Shu bilan birga oila, litsey, kollej, kelajakda esa o'z ish joyingizdagi ichki tartib-intizomga vijdonan, muntazam amal qilib borsangiz, hayotningiz xavfsiz, barqaror va farovon bo'ladi. Sizni komil inson bo'lib hayotda o'z o'rningizni topishingizga yo'l ochiladi. Eng asosiysi inson huquqlari ustuvorligi va qonuniylik tamoyili buzilmaydi. Bu esa jamiyat va shaxsning taraqqiyot garovidir.

Ijtimoiy adolat Konstitutsiyaning asosiy prinsiplaridan biridir. Konstitutsiyada davlat inson va jamiyat farovonligini ko'zlab ijtimoiy adolat va huquqiylik prinsiplari asosida o'z faoliyatini amalga oshirishi belgilab qo'yilgan. Shu bois ham insonga munosib hayotni va uning rivojlanishini ta'minlash umumdavlat siyosati darajasiga ko'tarilgan.

O‘zbekiston ijtimoiy adolatga asoslangan davlatdir. Shuning uchun u fuqarolarni, ayniqsa aholining eng nochor qatlamlari bo‘lmish nogironlarni, ko‘p bolali oilalarni, yetim-yesirlarni ijtimoiy jihatdan har taraflama qo‘llab-quvvatlamocda.

Konstitutsiyamizning 18-moddasida shunday deyiladi: «O‘zbekiston Respublikasida barcha fuqarolar bir xil huquq va erkinliklarga ega bo‘lib, jinsi, irqi, millati, tili, dini, ijtimoiy kelib chiqishi, e‘tiqodi, shaxsi va ijtimoiy mavqeyidan qat’i nazar, qonun oldida tengdirlar. Imtiyozlar faqat qonun bilan belgilab qo‘yiladi hamda ijtimoiy adolat prinsiplariga mos bo‘lishi shart». Bu fuqarolarning umumiy tengligi qoidasi bo‘lib, u hamma fuqarolar huquqlari va burchlarining tengligini bildiradi. Bu tenglikning asosiy talabi qonunning hamma uchun bir xil kuchga ega bo‘lishidir.

O‘zbekiston Respublikasi fuqarolarining teng huquqliligi mustaqilligimizning buyuk yutuqlaridan biridir. Teng huquqlilik — turli millat va elatlarning teng huquqliligini, barcha fuqarolarning qonun va sud oldidagi teng huquqliligini, kasb tanlashda, bilim olishda, umuman shaxsiy, siyosiy, iqtisodiy, ijtimoiy huquqlardan foydalanishdagi teng huquqlilikni o‘z ichiga oladi.

Inson huquqlari Umumjahon Deklaratsiyasining 1-moddasida «Barcha odamlar erkin, qadr-qimmat va huquqlarda teng bo‘lib tug‘iladilar», deb belgilab qo‘yilgan. O‘zbekiston Respublikasi Konstitutsiyasida ta’kidlanganidek, «Xotin-qizlar va erkaklar teng huquqlidirlar». Ularga ilm olishda, kasb-hunar o‘rganishda, mehnat qilishda, mehnat uchun haq to‘lashda, davlat va jamiyat hayotida faol ishtirok etishda, saylash va saylanishda erkaklar bilan teng imkoniyatlar yaratib berilgandir. Bugungi kunda ayollar rahbar lavozimlarda, tadbirkorlik ishlarida faol qatnashmoqdalar. Davlat hokimiyatining vakillik

organlarida ko'pgina ayollar deputat sifatida faoliyat yuritmoqdalar.

O'zbekiston davlati fuqarolarning huquq va erkinliklarini Konstitutsiyaviy huquq normalari hamda boshqa huquq tarmoqlari, ya'ni mehnat, ma'muriy, oila qonunlari normalari bilan himoya qiladi. Davlat organlari orqali esa, jamiyat a'zolarining huquq va erkinliklarining bajarilishini adolatli kafolatlaydi. O'z navbatida fuqarolar ham Konstitutsiyada belgilab qo'yilgan burchlarni bajaradilar. O'zbekiston Respublikasi mustaqilligini mustahkamlash, ijtimoiy va shaxsiy mafaatlarni uyg'unlashtirib qo'shib olib borish, fuqarolarning yuksak ongliligini taqozo etadi.

Fuqarolarning jamiyat oldida o'z mas'uliyati, xalqning baxt-saodati uchun doimiy ravishda harakat qilish, o'z Vatanini himoya qilish, Konstitutsiyasi va qonunlarga rioya qilish, o'z oilasi e'tiqodiga sodiqlik, kasb mahorati bilan bog'liq yuksak vatanparvarlik burchini tushunish siyosiy va huquqiy madaniyatning ajralmas qismidir.

Konstitutsiyamizning 20-moddasida: «Fuqarolar o'z huquq va erkinliklarini amalga oshirishda boshqa shaxslarning davlat va jamiyatning qonuniy manfaatlari, huquqlari va erkinliklariga putur yetkazmasliklari shart» deb yozib qo'yilgan. Bu qoidaning mazmuni shaxsiy va ijtimoiy manfaatlarning uyg'unlashganligida ifodalanadi. Har bir fuqaro o'z huquq va erkinliklarini, burchlarini yaxshi bilishi, anglashi — uning boshqa kimsalar tomonidan poymol etilishiga yo'l qo'ymasligidir. Juda ko'p hollarda fuqarolar o'z huquqlarini davlat organlarining aralashuvisiz amalga oshiradilar, lekin fuqarolarning huquqi buzilsa, u sud tomonidan himoya qilinadi. Chunki shaxsiy manfaatlarga to'sqinlik qilish oqibat natijada ijtimoiy manfaatga to'sqinlik qilishga olib keladi. Fuqarolar qanchalik o'z huquq va erkinliklaridan keng foydalansalar, ular shunchalik jamiyatdagi mavjud

bo'lgan illatlarga qarshi keskin kurasha oladilar. Hech kim fuqarolar ustidan tazyiq o'tkaza olmaydi. Bu esa butun jamiyat hayotining yanada demokratiyalashishiga yordam beradi. Lekin har bir fuqaro o'z huquq va erkinliklarini, o'z maqsadlarini amalga oshirish yo'lida ijtimoiy muhitni va boshqa kishilarning huquqlarini inobatga olishi, davlat, jamiyat va fuqarolarning qonuniy manfaatlariga, huquq va erkinliklariga putur yetkazmasliklari shart. Shuning uchun har bir fuqaroning manfaati ijtimoiy manfaatlar bilan uyg'unlashib borishi lozim. Eng muhimi, jamiyat manfaati, Vatan manfaati shaxsiy manfaatdan ustun bo'lsagina, oldimizga qo'ygan orzu-maqsadlarimizga erishishimiz mumkin.

#### Fuqarolik tushunchasi

O'zbekiston Respublikasi  
Konstitutsiyasining VI bob  
21—23-moddalari «Fuqaro-

lik» deb atalib, ushbu moddalarda O'zbekiston Respublikasida fuqarolikka oid qoidalar bayon etilgan. Fuqarolik masalasi siyosiy masaladir. Ibtidoiy jamiyatda fuqarolik tushunchasi bo'lmagan, chunki unda davlat singari tashkilot ham bo'lmagan. Fuqarolik tartiblari davlat va huquq kabi ijtimoiy hodisalar paydo bo'lishi natijasida shakllanib, unda davlat qonunlar vositasida, odamlarni o'z fuqarolari sifatida tan olish asoslarini belgilay boshlagan. Shaxs va davlat o'rtasidagi o'zaro munosabat fuqarolik tartiblari bilan belgilanadi.

**Fuqarolik** — bu shaxsning muayyan davlatga mansubligini bildiruvchi, shaxs bilan davlat o'rtasidagi barqaror, doimiy siyosiy, huquqiy aloqalarini aniqlovchi tushunchadir. Bu aloqalar davlat va shaxsning o'zaro huquq va burchlarini aniqlashda namoyon bo'ladi. Ya'ni, davlat shaxsni o'zining fuqarosi deb tan olar ekan, uning Konstitutsiyada ko'rsatilgan fuqarolik huquqlari va burchlarini belgilaydi, uning huquqlari va erkinliklarini ushbu davlat ichida hamda

tashqarisida muhofaza qiladi. Shaxs ham jamiyat va davlat oldidagi burchlarini bajarishga majbur.

O'zbekiston Respublikasi Konstitutsiyasi asosida 1992-yil 2-iyulda «O'zbekiston Respublikasining fuqaroligi to'g'risida»gi O'zbekiston Respublikasining qonuni qabul qilingan. Ushbu huquqiy hujjatda O'zbekistonda fuqarolik masalalari, insonning fuqarolikka ega bo'lishi asoslari, fuqarolikni tasdiqlovchi hujjatlar, O'zbekiston Respublikasi fuqaroligini olish, O'zbekiston Respublikasi fuqaroligining to'xtatilishi, ota-onaning fuqaroligi o'zgarganda va farzandlikka olinganda bolalarning fuqaroligi, fuqarolik to'g'risidagi ishlarni yurituvchi O'zbekiston Respublikasining davlat idoralari va ularning vakolatlari, O'zbekiston Respublikasi fuqaroligi masalalariga oid arizalar va taqdimnomalarni ko'rib chiqish, fuqarolikka oid qarorlarning ijrosi, mansabdor shaxslarning fuqarolik masalalariga oid g'ayriqonuniy xatti-harakatlari ustidan shikoyat qilish, xalqaro shartnomalarning qo'llanilishi kabi eng muhim masalalar bayon etilgan.

O'zbekiston Respublikasi Konstitutsiyasining 21-moddasi hamda «Fuqarolik to'g'risida»gi qonunning 1-, 2-moddalariga binoan O'zbekiston hududida yagona fuqarolik o'rnatiladi. Qoraqalpog'iston Respublikasining fuqarosi ayni vaqtda O'zbekiston Respublikasining fuqarosi hisoblanadi.

O'zbekiston Respublikasining fuqaroligini tasdiqlovchi asosiy hujjat pasportdir. Pasport olingunga qadar esa tug'ilganlik to'g'risidagi guvoohnoma yoki shaxsning fuqaroligiga doir ma'lumotlar bo'lgan hujjat uning fuqaroligini tasdiqlovchi hujjat hisoblanadi. O'zbekiston Respublikasi fuqarosi pasportini berish tartibi O'zbekiston Respublikasi Prezidentining 1999-yil 26-fevraldagi «O'zbekiston Respublikasida pasport tizimini takomillashtirish to'g'risida»gi Farmoni bilan tasdiqlangan O'zbekiston Respublikasida pasport tizimi to'g'risidagi Nizomi bilan belgilanadi.

Ushbu Nizomga asosan O‘zbekiston Respublikasining 16 yoshga to‘lgan barcha fuqarolariga O‘zbekiston Respublikasi fuqarosi pasporti berilishi shart, deb ta’kidlangan.

O‘zbekiston Respublikasi pasporti xorijga jo‘nab ketish chog‘ida ham amal qiladi. Pasport Respublika Ichki Ishlar organlari tomonidan beriladi. O‘zbekiston Respublikasi fuqarosi pasporti butun O‘zbekiston Respublikasida yagona namunada o‘zbek, rus, ingliz tillarida, Qoraqalpog‘iston Respublikasi uchun esa qoraqalpoq, o‘zbek, rus va ingliz tillarida tayyorlanadi va u 32 betdan iboratdir.

Har bir shaxs o‘zini fuqaro sifatida tasdiqlovchi hujjat hisoblangan O‘zbekiston Respublikasi pasportini avaylab asrashi, pasport tizimi qoidalariga rioya qilishi shart. Fuqarolar pasport tizimi qoidalarini buzganlik uchun O‘zbekiston Respublikasi qonunchiligida belgilangan tartibda javob beradilar.

O‘zbekiston Respublikasida yashovchi har bir kishi fuqaro bo‘lish huquqiga ega. «O‘zbekiston Respublikasi fuqaroligi to‘g‘risida»gi qonunning 12-moddasiga binoan, O‘zbekiston fuqaroligiga ega bo‘lish quyidagi asoslar bo‘yicha amalga oshiriladi:

1. O‘zbekiston fuqarolaridan tug‘ilgan bolalar ular mamlakat hududida yoki xorijda tug‘ilsa ham O‘zbekiston fuqarosi hisoblanadi. Agar ota-onalardan bittasi O‘zbekiston fuqarosi, ikkinchisi chet el fuqarosi bo‘lsa, tug‘ilgan bola O‘zbekistonda tug‘ilsa, O‘zbekiston fuqarosi hisoblanadi. Agar shunday ota-onalardan bola mamlakatimiz tashqarisida tug‘ilsa, uning fuqaroligi ota-onaning kelishuviga binoan belgilanadi. Ota-onasi fuqarolikka ega emas shaxslardan tug‘ilgan bolalar O‘zbekistonda tug‘ilsa, O‘zbekiston fuqarosi hisoblanadi. Ota-onalardan bittasi O‘zbekiston fuqarosi, ikkinchisi O‘zbekiston fuqarosi hisoblanmasa, u qayerda tug‘ilsa ham O‘zbekiston fuqarosi hisoblanadi. Otasi noma’lum, onasi ma’lum bo‘lib,

O‘zbekistonda tug‘ilgan bola O‘zbekiston fuqarosi hisoblanadi.

2. Chet el fuqarolari va fuqaroligi bo‘lmagan shaxslar o‘z istaklari bilan O‘zbekiston Respublikasi fuqaroligiga qabul qilinishi mumkin. Buning uchun ular quyidagi shartlarni bajarishi shart:

a) chet el fuqaroligidan voz kechganda: bunda chet el fuqarolarini O‘zbekiston Respublikasi fuqaroligiga qabul qilish to‘g‘risida O‘zbekiston Respublikasi Prezidenti qaror qabul qiladi. Chet el fuqarosi esa o‘z fuqaroligini o‘zgartirilishi haqida mazkur davlatning munosabatini ko‘rsatuvchi hujjatni taqdim etishi shart;

b) chet el fuqarolari va fuqaroligi bo‘lmagan shaxslar O‘zbekiston hududida kamida besh yil yashagan bo‘lsa, ya‘ni so‘nggi besh yil davomida O‘zbekiston Respublikasi hududida doimiy yashaganligi va qonuniy yashash manbalar mavjudligi tasdiqlangan holda;

d) O‘zbekiston Respublikasining Konstitutsiyasini tan olsa va bajarsa, O‘zbekiston Respublikasi Prezidentining qaroriga binoan O‘zbekiston Respublikasi oldida buyuk xizmatlari yoki fan, texnika va madaniyat sohasida katta yutuqlari bo‘lgan, shuningdek O‘zbekiston Respublikasini qiziqtiradigan kasb yoxud malakaga ega bo‘lgan ayrim shaxslarga nisbatan ushbu moddaning 1-, 2- va 3-bandlaridagi talablar hisobga olinmasligi mumkin. Lekin ular ham albatta O‘zbekiston Respublikasi Konstitutsiyasini tan olishi va bajarishi shart.

Agar shaxs:

— O‘zbekiston Respublikasining Konstitutsiyaviy tuzumini zo‘rlik ishlatib o‘zgartirishini yoqlab chiqayotgan bo‘lsa;

— faoliyati O‘zbekiston Respublikasining Konstitutsiyaviy prinsiplariga zid bo‘lgan partiyalar va o‘zga tashkilotlarga a‘zo bo‘lsa;

— O‘zbekiston Respublikasining qonunlariga muvofiq jazolanadigan xatti-harakatlari uchun ozodlikdan mahrum etilgan va o‘sha jazoni o‘tayotgan bo‘lsa, uni O‘zbekiston Respublikasining fuqaroligiga qabul qilish to‘g‘risidagi iltimosnomasi rad etiladi.

Fuqarolik to‘g‘risidagi qonunning 19—21-moddalarida: O‘zbekiston Respublikasi fuqaroligining tugatilishi va yo‘qotilishi asoslari belgilangan.

Shaxsning iltimosnomasiga asosan u O‘zbekiston Respublikasi fuqaroligidan chiqarilishi mumkin. Agar shu shaxslarning O‘zbekiston davlati oldida burchlari, qarzlari bo‘lsa, jinoyat sodir etgan bo‘lsa ruxsat berilmaydi.

O‘zbekiston Respublikasi fuqaroligiga qabul qilish, fuqarolikni qayta tiklash, fuqarolikdan chiqish va uni yo‘qotish masalalari O‘zbekiston Prezidenti farmoni bilan rasmiylashtiriladi.

### **Qanday hollarda shaxs O‘zbekiston Respublikasi fuqaroligidan mahrum qilinadi?**

- Vatanga xiyonat qilsa;
- shaxs chet davlatda harbiy xizmatga, xavfsizlik xizmati idoralariga, politsiya, armiya idoralariga yoki davlat hokimiyati va boshqaruvining boshqa idoralariga ishga kirganligi natijasida;
- agar chet elda doimiy 5 yil davomida uzrli sabablarsiz konsullik hisobida turmagan bo‘lsa;
- agar O‘zbekiston Respublikasi fuqaroligi yolg‘on ma‘lumotlar yoki soxta hujjatlarni taqdim etish orqali olingan bo‘lsa;
- xalqaro shartnomalar asosida;
- ushbu qonunda ko‘zda tutilgan boshqa asoslarga binoan.

O‘zbekiston Respublikasi Prezidentining farmoni chiqqan kundan boshlab O‘zbekiston Respublikasining fuqaroligi yo‘qotiladi.



Masalan, xorijda ishlayotgan ota-onalarning farzandlari o‘z ota-onasidan ajrab qolsa, o‘sha bolalarni chet elliklar boqib olsa, ular 14 yoshga kirganidan so‘ng O‘zbekiston Respublikasi fuqaroligini o‘z-o‘zidan yo‘qotadi.

**O‘zbekiston Respublikasi fuqaroligi to‘g‘risidagi ishlarni yurituvchi O‘zbekiston Respublikasining davlat organlari quyidagilardan iborat:**



- O‘zbekiston Respublikasining Prezidenti;
- O‘zbekiston Respublikasining Ichki ishlar vazirligi;
- O‘zbekiston Respublikasining Tashqi ishlar vazirligi;
- O‘zbekiston Respublikasining diplomatik vakolatxonalar (elchixonalar) va konsullik muassasalari.

Biz fuqarolik masalalarini o‘rganar ekanmiz, O‘zbekistonda O‘zbekiston fuqarolaridan tashqari chet el fuqarolari hamda fuqaroligi bo‘lmagan shaxslarning ham huquqiy holatini bilishimiz zarur.

Konstitutsiyamizning 23-moddasida belgilanishicha, O‘zbekiston Respublikasi hududidagi chet el fuqarolarining va fuqaroligi bo‘lmagan shaxslarning huquq va erkinliklari xalqaro huquq normalariga muvofiq ta‘minlanadi. Ular O‘zbekiston Respublikasining Konstitutsiyasi, qonunlari va xalqaro shartnomalari bilan belgilangan burchlarni ado etadilar.

Chet el fuqarolari — O‘zbekiston hududida yashayotgan, boshqa xorijiy mamlakatlarning fuqaroligiga ega bo‘lgan shaxslar. Ularning O‘zbekistonda bo‘lishlariga turli sabablar mavjud. Masalan, shartnomalar asosida O‘zbekistonda ishlash, o‘qish, chet ellarning diplomatik va konsullik idoralarida ishlash, sayyohlik yo‘llanmasi bilan kelishi va hokazolar.

O‘zbekiston Respublikasining fuqarosi bo‘lmagan va o‘zining chet davlat fuqaroligiga mansubligini isbotlovchi dalillari (fuqarolik pasporti yoki ularning o‘rnini bosuvchi boshqa hujjati) bo‘lgan shaxslar chet el fuqarolari deb tan olinadi.

Fuqaroligi bo‘lmagan shaxsning huquqiy ta‘rifi «O‘zbekiston Respublikasi fuqaroligi to‘g‘risida»gi Qonunning 11-moddasida berilgan: «O‘zbekiston Respublikasi hududida yashab turgan holda O‘zbekiston Respublikasi fuqarosi bo‘lmagan va chet davlat fuqaroligiga mansubligini isbotlaydigan dalillari bo‘lmagan shaxslar fuqaroligi bo‘lmagan shaxslar deb hisoblanadi».

Chet ellik fuqarolar va fuqaroligi bo‘lmagan shaxslar O‘zbekiston Konstitutsiyasi va qonunlarida nazarda tutilgan huquq va erkinliklardan, xususan shaxsiy, mulkiy, oilaviy va boshqa huquqlardan foydalanadilar, shuningdek, o‘zlarini himoya qilishlari uchun sud organlariga murojaat qila oladilar.

Ayni paytda, ular O‘zbekiston fuqarolari bilan bir xil majburiyatlarni o‘taydilar. Respublikamizda doimiy istiqomat qiluvchi chet ellik shaxslarning huquq va majburiyatlarining huquqiy maqomi, ko‘lami muvaqqat istiqomat qiluvchilarga nisbatan kengroqdir. Doimiy istiqomat qiluvchilar O‘zbekistonda ishchi va xizmatchi bo‘lib ishlashlari yoki boshqa faoliyat bilan shug‘ullanishlari mumkin. Ular dam olish, sog‘liqni saqlash, nafaqa olish, uy-joydan foydalanish, shaxsiy mulk sifatida uy-joyli bo‘lish, ilm olish huquqiga egadirlar. Ular O‘zbekiston Respublikasi fuqarolari bilan nikohda bo‘lishlari va uni bekor qilishlari mumkin. O‘zbekistonda doimiy yashovchi chet elliklar toifasiga ichki ishlar organlari tomonidan beriladigan maxsus ruxsatnoma yoki yashash uchun guvohnoma olgan kishilar kiradi.

Chet el fuqarolari va fuqaroligi bo‘lmagan shaxslar

O‘zbekiston hududida qilgan jinoiy, ma‘muriy va boshqa huquqbuzarlik ishlari uchun O‘zbekiston Respublikasi fuqarolari bilan bir xil asosda javob beradilar. Ular O‘zbekiston hududida jinoyat qilsalar, O‘zbekiston Respublikasi qonunlari bilan javobgarlikka tortiladilar.

Chet el fuqarolari va fuqaroligi bo‘lmagan shaxslarning ayrim huquqlari cheklab qo‘yiladi. Jumladan, ular respublikadagi vakillik organlari saylovlarida ishtirok eta olmaydilar, deputat bo‘lib saylana olmaydilar, umumxalq ovoz berish (referendum)da qatnashish huquqiga ega emaslar. Ular O‘zbekiston Respublikasi Qurolli Kuchlari safida, Milliy xavfsizlik xizmatida, ichki ishlar organlarida ishlashlari mumkin emas.

Chet el fuqarolarining alohida toifasini chet el davlatlarining O‘zbekiston Respublikasidagi diplomatik va konsullik vakolatxonalari va xalqaro tashkilotlar xizmatchilari tashkil etadi. Ular ham O‘zbekiston Konstitutsiyasi, qonunlari va boshqa huquqiy normalarni hurmat qilishi va ularga itoat etishi kerak. Lekin ular diplomatik va konsullik imtiyozlaridan va shaxsiy daxlsizlik huquqidan foydalanadilar.

**Fuqarolar huquq va erkinliklarining asosiy turlari**

Fuqarolarning huquq va erkinliklari deyilganda, O‘zbekiston davlati tomonidan o‘rnatilib, Konstitutsiyada belgilangan, har bir fuqaroga berilgan imtiyozlardan shaxsiy hayotda va jamoat ishlarida qatnashish uchun foydalanish imkoniyati tushuniladi.

O‘zbekiston fuqarolarining asosiy huquq va erkinliklari bajarilish sohalari bo‘yicha uch turga bo‘linadi.

O‘zbekiston fuqarolarining asosiy huquq va erkinliklari ilmiy asoslangan tartibda tavsiflash O‘zbekiston Respublikasi Konstitutsiyasida o‘z aksini topgan:

**Shaxsiy huquq va erkinliklar***(VII bob, 24—31-moddalar);***Siyosiy huquqlar** *(VIII bob, 32—35-moddalar);***Iqtisodiy va ijtimoiy huquqlar***(IX bob, 36—42-moddalar).*

O‘zbekiston mustaqillikka erishgandan keyin, o‘zining davlat tuzilishi, faoliyati va hayotini umuminsoniy qadriyatlar asosida olib borishni maqsad qilib qo‘ydi. Bunda shaxsning manfaati, uning sha’ni, qadri-qimmati hamma narsadan yuqori turadi. Inson huquqlari ichida uning tabiiy va ajralmas huquqlari ayniqsa muhimdir. Inson huquqlarini himoya qilish hozirgi dunyoning eng jiddiy muammolaridan hisoblanadi. Inson huquqlari — bu insoniyat tarixiy taraqqiyotining umumiy yutug‘idir. Insoniyatga azob-uqubat, kulfatlar keltiruvchi urush ofatlaridan kelgusi avlodlarni xalos etish, inson huquqlarini xalqaro miqyosda himoya qilinishini ta’minlash BMT faoliyatining asosiy maqsadiga aylandi. Bu maqsadlar BMTning inson huquqlari to‘g‘risidagi xalqaro ahamiyatga molik hujjatlarida o‘z ifodasini topgan.

Inson huquqlari to‘g‘risidagi xalqaro hujjatlarning o‘rni shu bilan belgilanadiki, unda umumjahon manfaatlariga xizmat qiladigan huquqiy me’yorlar mujasamlashgan. Bu huquqiy me’yorlar inson huquqlariga, demokratik g‘oyalarga sadoqat, fuqarolar tengligi, milliy va millatlararo totuvlik, davlatlararo nizolarni tinch yo‘l bilan hal etish tamoyiliga asoslanadi.

Inson huquqlari to‘g‘risidagi asosiy huquqiy hujjatlar: «Inson huquqlari umumjahon Deklaratsiyasi», «Iqtisodiy, ijtimoiy va madaniy huquqlar to‘g‘risidagi xalqaro Pakt» va «Fuqarolik huquqlari va siyosiy huquqlar to‘g‘risidagi xalqaro Pakt» hamda so‘nggi hujjatga ilova qilingan Fakultativ Protokoldan iborat

bo‘lib, ular «Inson huquqlari to‘g‘risidagi xalqaro bill», deb yuritiladi. Xalqaro hamjamiyatning to‘la huquqli a‘zosi bo‘lgan O‘zbekistonning qonunchiligi, mustaqil O‘zbekiston Respublikasining birinchi Konstitutsiyasi ham xalqaro huquqning aynan ushbu hujjatlari talblariga muvofiq ishlab chiqilgan.

Inson huquqlari va erkinliklari masalasi BMTning 70 dan ortiq asosiy huquqiy hujjatlarida ifodalangan.

BMTning inson huquqlariga doir qabul qilingan xalqaro hujjatlari mantiqan bir-birini to‘ldiradi va mazmunan boyitadi. BMT Bosh Assambleyasi tomonidan 1989-yil 20-noyabrda qabul qilingan «Bola huquqlari haqidagi Konvensiya», 1965-yilda qabul qilingan «Irtiy kamsitishning hamma shakllarini tugatish haqidagi Konvensiya»larda inson shaxsi, uning huquq va erkinliklari har bir mamlakatda huquqiy jihatdan kafolatlanishi qayd etilgan. «Bola huquqlari haqidagi Konvensiya»da onalik va bolalikni himoya qilish, bolalarning mehnati, salomatligi, tarbiyasini huquqiy jihatdan muhofaza etish, ularning irtiy kamsitilishiga yo‘l qo‘ymaslik singari huquqlar har bir mamlakatda qonun asosida himoyalaniishi zarurligi ta‘kidlangan.

Mazkur Konvensiyaning insonparvar qoidalarini mamlakatimizda izchil amalga oshirilishini ta‘minlash maqsadida 2008-yil 7-yanvarda O‘zbekiston Respublikasining «Bola huquqlarining kafolatlari to‘g‘risida»gi qonuni qabul qilindi.

Ushbu hujjatlarga imzo chekkan davlatlar insoniyatning butun tarixi mobaynida qayd etilgan jamiki huquqlarini tan olishlari va ularga rioya etishlari shart. Inson huquqlari umumjahon Deklaratsiyasi davlatlar uchun tavsiya sifatidagi hujjat bo‘lib, ixtiyoriy ravishda bajariladi. Xalqaro Paktlar va Konvensiyalar ularga qo‘shilgan davlatlar uchun majburiydir.

BMTning 1945-yil 26-iyunda AQSHning San-Fransisko ta‘sis konferensiyasi qatnashchisi bo‘lgan

davlatlar tomonidan qabul qilingan va shu yili 24-oktabrda kuchga kirgan bu hujjat jahondagi davlatlarning yagona maqsad sari hamjihatlikda intilishini jamuljam qilib, inson huquqlari sohasidagi hamkorlikning huquqiy asoslarini o'zida namoyon etadi. Ushbu dunyoviy tashkilotga bugungi kunda 190 ga yaqin davlatlar a'zo bo'lib, O'zbekiston Respublikasi ushbu nufuzli xalqaro tashkilotga 1992-yil 2-martda qabul qilindi. 1993-yil 24-oktabrda Toshkent shahrida BMTning vakolatxonasi ochildi.

### **Hozirgi kunda BMT inson taqdiri bilan bog'liq bo'lgan quyidagi muammolarni:**

- xalqlar va inson huquqlariga qarshi harbiy kuch qo'llash va tahdid qilishni tugatish;
- asosiy inson huquq va erkinliklariga hurmat ustuvorligini ta'minlash;
- barcha uchun umumiy bo'lgan atrof-muhitni muhofaza qilish va kelajak avlod uchun avaylab-asrab saqlash;
- insoniyat o'zining bir butunligini anglashini ta'minlash kabi masalalarni hal qilmoqda.

Inson huquqlari umumjahon Deklaratsiyasi 30 moddadan iborat bo'lib, ushbu xalqaro huquqiy hujjatda inson huquqlarining tartibini va qoidasini belgilovchi huquqiy me'yorlar mujassamlashgan. Deklaratsiya muqaddimasida uning maqsadi — insoniyat oilasi a'zolariga xos bo'lgan ma'naviyat, qadr-qimmat, urf-odatlarini, ularning teng va ajralmas huquqlarini tan olish ekanligi ko'rsatilgan. Inson manfaatining ustunligi Deklaratsiyaning umumiy tamoyillarida to'la namoyon bo'ladi.

Bular:

- inson huquqlarini hurmat qilish;
- inson huquqlarining tengligi;
- inson erkinligi;
- inson huquqlarini amalga oshirishning demokratik jarayoni;

- inson huquqlarini ta'minlashning adolat tamoyilidir. Iqtisodiy, ijtimoiy va madaniy huquqlar to'g'risidagi xalqaro Pakt hamda Fuqarolik va siyosiy huquqlar to'g'risidagi xalqaro Paktlarning moddalarida insonning huquqlari aniq bayon etilgan:

- yashash huquqi insonning ajralmas huquqidir;
- hech kim o'zboshimchalik bilan insonni huquqidan mahrum qila olmaydi;
- hech kim azob-uqubatga solinmasligi, unga nisbatan shafqatsiz, noqonuniy yoki qadr-qimmatini xo'rlovchi muomala qilinmasligi yoki jazolanmasligi kerak;
- har bir inson ozodlik va shaxsiy daxlsizlik huquqiga ega; hech kim o'zboshimchalik bilan hibsga olinishi yoki hibsdan saqlanishi mumkin emas;
- biror-bir davlat hududida qonuniy ravishda bo'lgan har bir kishi ushbu hudud doirasida erkin ko'chib yurish va yashash joyini tanlash huquqiga ega;
- har bir inson fikr, vijdon va din erkinligi huquqiga ega.

Bu huquqlar insonga berilgan tabiiy huquqdir. Inson qaysi davlat fuqarosi bo'lishidan qat'i nazar, dunyoga kelishi bilan tabiiy huquqlarga ega bo'lishi shart. Davlat o'z fuqarolariga faqat qo'shimcha ravishda siyosiy, iqtisodiy, ijtimoiy sohadagi ayrim huquqlarni beradi. Bunday huquqlarni davlatlar o'z Konstitutsiyalarida ko'rsatib qo'yadilar.

O'zbekiston Respublikasi 1991-yil 30-sentabrda Inson huquqlari umumjahon deklaratsiyasini rasman tan oldi. O'zbekiston mustaqillikka erishgandan so'ng, inson huquqlariga bag'ishlangan 70 ta xalqaro hujjatlardan 35 tasini ratifikatsiya qildi. O'zbekiston Respublikasi Parlamenti 1995-yil 31-avgustda ratifikatsiya qilgan Iqtisodiy, ijtimoiy va madaniy huquqlar to'g'risidagi xalqaro Pakt, Fuqarolik va siyosiy huquqlar to'g'risidagi xalqaro Paktga fakultativ protokol, irqiy kamsitishning hamma shakllarini tugatish to'g'risidagi xalqaro konvensiya, qiynoq hamda muomala va jazo-

lashning qattiq, shafqatsiz, insoniylikka zid yoki qadr-qimmatni kamsituvchi turlariga qarshi konvensiya va boshqa xalqaro hujjatlar shular jumlasidandir. Rati-fikatsiya qilingan bu hujjatlardagi qoidalar yuqorida ta'kidlanganidek, respublika qonunchiligida, birinchi navbatda O'zbekiston Respublikasi Konstitutsiyasida mustahkamlangan.

### **3-§ BO'YICHA EGALLAGAN BILIMLARINGIZNI MUSTAHKAMLASH YUZASIDAN TOPSHIRIQLAR**

**E'TIBOR BERING!**



Inson jamiyat va davlat hayotining barcha sohalarida davlat qonunlarida mustahkamlangan o'z huquqi erkinligi va burchlarini amalga oshirish bilan qatnashadi. Jamiyat va davlat insonning huquqi va erkinligi, uning sha'ni va qadr-qimmatini oliy qadriyat sifatida e'tirof etadi. Inson huquqi va erkinligi doirasini kengaytirish, shuningdek, inson huquqlari to'g'risidagi xalqaro huquqiy hujjatlarni hisobga olish O'zbekiston Respublikasining Konstitutsiyasiga ham xosdir.

O'zbekiston Respublikasining Konstitutsiyasi insonning asosiy huquqlari, erkinliklarini tartibga solishda ijtimoiy adolat, fuqarolarning umumiy tengligi, fuqaro va davlatning o'zaro javobgarligi g'oyasiga hamda xalqaro huquq talablariga asoslanadi.

1. Asosiy huquq va erkinliklarning o'ziga xos xususiyati nimadan iborat?
2. O'zbekiston fuqarolarining asosiy huquq va erkinliklari boshqa huquq va burchlari paydo bo'lishi asoslaridan nimasi bilan farq qiladi?
3. O'zbekiston Respublikasi Konstitutsiyasida fuqarolarning asosiy huquq va erkinliklari qanday xususiyatli belgilariga ko'ra va qaysi xalqaro hujjatga muvofiq guruhlariga ajratilgan?

?





## Bilimingizni sinab ko‘ring

1. BMT hozirda inson taqdiri bilan bog‘liq bo‘lgan qanday muammolarni hal qilmoqda?
2. Xalqaro huquqiy hujjatlarda insonning qanday tabiiy huquqlari belgilangan?
3. O‘zbekiston hududida inson huquqlarini himoya qiluvchi organlar haqida tushuncha bering.
4. Inson huquqlari umumjahon Deklaratsiyasida mustahkamlangan inson manfaatlarini aks ettiruvchi tamoyillarni izohlab bering.

### XULOSA



Konstitutsiya alohida kishilar uchun ham, davlat va jamiyat uchun ham hayotiy zarur, hamda ijtimoiy ahamiyatga ega bo‘lgan huquq va erkinliklarni o‘zida mujassamlashtirgan.

Ular erkin shaxsga xos bo‘lgan g‘urur va qadr-qimmatni, o‘zi yashab turgan jamiyat qurilishi va uni boshqarishga oid masalalarni hal etishda, hayotiy moddiy va ma‘naviy ehtiyojlarni qondirishda zarur bo‘lgan iqtisodiy va ijtimoiy shart-sharoitlarni yaratishda qatnashish huquqini ta‘minlash uchun nihoyatda zarur.

Erkin mehnat qilish, erkin tadbirkorlik bilan shug‘ullanish huquqini ta‘minlamasdan, jamiyatning iqtisodiy taraqqiyotini tasavvur etish mumkin emas.

Fuqarolarning saylov huquqini amalga oshirmasdan esa jamiyatni demokratik asosda boshqarish tizimini yuzaga keltirib bo‘lmaydi. Shu sababli, huquq va erkinliklar davlat tomonidan tan olinibgina qolmay, ular davlat faoliyatining muhim sharti sifatida muhofaza etiladi.

## 4-§. SHAXSIY HUQUQ VA ERKINLIKLER

**Shaxsiy huquq va erkinliklar — insonning ajralmas huquqi**

Shaxsiy huquq va erkinliklar insonning tabiiy, asosiy ajralmas huquqlaridir. Ular tabiiy yashash huquqidan va

erkinliklardan kelib chiqqan, har bir kishi tugʻilgan-dayoq shunday huquqlarga ega boʻladi. Ular kishining shaxsiy erkinligiga kafolat beradi, davlatning va boshqa kishilarning oʻzboshimchaligidan himoya qiladi.

Oʻzbekiston Respublikasi fuqarolarining Konstitutsiyaviy huquqlari, erkinliklari tizimining asosini tashkil qiluvchi fuqarolarning shaxsiy huquq va erkinliklari Oʻzbekiston Respublikasi Konstitutsiyasining VII bobida mustahkamlangan boʻlib, ular xalqaro huquqning barcha talablariga mos keladi.

Shaxsni himoya qilish, shuningdek uning hayotini ijtimoiy xavfli tajovuzdan muhofaza qilish har bir demokratik davlatning asosiy vazifalaridan hisoblanadi.

Shaxsiy huquq va erkinliklarning boshqa turdagi huquqlardan muhim farqi shundaki, ular kishining individual hayotiy ehtiyojlarini taʼminlashga qaratilgan boʻlib, ularning oʻzlari tomonidan mustaqil amalga oshiriladi. Shaxsiy huquq va erkinliklar oʻz mohiyati bilan inson, yaʼni har bir shaxsning huquqlari hisoblanib, ular qaysi davlatning fuqaroligiga mansub ekanligiga bogʻliq boʻlmaydi. Shaxsning mazkur huquqlari daxlsiz va har bir shaxs ularga tugʻilishi bilan ega boʻladi.

Inson huquqlari ichida eng ulugʻi va muqaddasi uning yashash huquqidir. Konstitutsiyamizning 24-moddasida koʻrsatilganidek, «Yashash huquqi har bir insonning uzviy huquqidir. Inson hayotiga suiqasd qilish eng ogʻir jinoyatdir».

Inson huquqlari umumjahon Deklaratsiyasining

3-moddasida: «Har bir inson yashash, erkinlik va shaxsiy daxlsizlik huquqiga egadir» deb, Fuqaro huquqlari va siyosiy huquqlari to'g'risidagi Paktning 6-moddasida esa, «Har bir insonning yashash huquqi uning ajralmas huquqidir. Bu huquq qonunlar bilan muhofaza etiladi. Hech kim o'zboshimchalik bilan insonni yashash huquqidan mahrum qila olmaydi» deb belgilangan.

Xalqaro huquqning insonparvarlik qoidalaridan kelib chiqib, O'zbekiston Respublikasi Konstitutsiyasi insonning yashash huquqini uzviy va ajralmas deb e'lon qiladi hamda kafolatlaydi. Bizda insonning yashash huquqi qonunlardagina e'lon qilinib qolmasdan, balki juda ko'p vositalar bilan ta'minlanadi.

**Birinchidan,** O'zbekiston va uning hukumati tomonidan olib borilayotgan barqarorlik va tinchlikni saqlash siyosati, yurtimizda hukm surayotgan tinchlik va osoyishtalik insonning yashash huquqini ta'minlovchi eng muhim garovdir.

**Ikkinchidan,** O'zbekistonda yashash huquqining muhim kafolatlaridan yana biri inson umrini uzaytirish, o'limni kamaytirish, qulay va munosib turmush sharoitini vujudga keltirish kabi maqsadlarni nazarda tutuvchi kuchli ijtimoiy siyosat yurgizish hisoblanadi.

**Uchinchidan,** O'zbekistonda insonning yashash huquqi turli qonunlar bilan muhofaza qilinadi. Bular ichida, ayniqsa, O'zbekiston Respublikasi Jinoyat Kodeksi muhim o'rin tutadi. Unda inson hayotiga suiqasd qilish, hayotga qarshi jinoyatlar eng og'ir jinoyat sifatida qaralib, buning uchun qattiq jazo choralari belgilangan.

JKning 97-moddasiga ko'ra, qasddan odam o'ldirganlik uchun 15 yildan 20 yilgacha ozodlikdan mahrum qilish bilan jazolanadi. Chunki bunday jinoyatlarning barchasi insonning yashash huquqiga tajovuz qiladi.

O‘zbekiston Respublikasi Prezidentining «O‘lim jazosini bekor qilish to‘grisida»gi Farmoni (2005-yil, avgust)ga muvofiq o‘lim jazosi 2008-yil 1-yanvardan e’tiboran bekor qilinishi belgilandi.

Shunday qilib, har qanday demokratik va adolatli davlatda, jumladan O‘zbekiston Respublikasida ham insonlarning yashash huquqi kafolatlangan tabiiy va muqaddas huquq bo‘lib, unga nisbatan har qanday tajovuz eng og‘ir jinoyat hisoblanadi.

Insonga qarshi jinoyatlar deb, O‘zbekiston Respublikasi Jinoyat kodeksi bilan taqiqlangan, ijtimoiy xavfli qilmishlar (harakat yoki harakatsizlik), ya’ni inson hayotiga, sog‘lig‘iga, shaxsning ozodligi, sha’ni, qadr-qimmatiga, fuqarolarning Konstitutsiyaviy huquq va erkinliklariga qarshi qaratilgan jinoyatlarga aytiladi.

Shaxsga qarshi jinoyatlar Jinoyat Kodeksi bo‘yicha quyidagi turlarga ajratilgan:

- hayotga qarshi jinoyatlar;
- sog‘liqqa qarshi jinoyatlar;
- hayot yoki sog‘liq uchun xavfli jinoyatlar;
- nomusga qarshi qaratilgan jinoyatlar;
- oilaga, yoshlarga va axloqqa qarshi jinoyatlar;
- shaxsning ozodligi, sha’ni va qadr-qimmatiga qarshi jinoyatlar;
- fuqarolarning konstitutsiyaviy huquq va erkinliklariga qarshi jinoyatlar.

O‘zbekiston Respublikasi Konstitutsiyasining 26-moddasida: «Hech kim qiynoqqa solinishi, zo‘ravonlikka, shafqatsizlik yoki inson qadr-qimmatini kamsituvchi boshqa tarzdagi tazyiqqa duchor etilishi mumkin emas. Hech kimda uning roziligisiz tibbiy yoki ilmiy tajribalar o‘tkazilishi mumkin emas»ligi mustahkamlab qo‘yilgan. O‘zbekiston Respublikasi Konstitutsiyasi hamda O‘zbekiston Respublikasi Jinoyat Kodeksining eng muhim vazifalaridan biri fuqarolarning sog‘lig‘i va jismoniy daxlsizligini jino-

yatkorona tajovuzlardan muhofaza qilishdir. O‘zbekiston Respublikasi Jinoyat Kodeksining 101—111-moddalarida sog‘liqqa qarshi jinoyatlar va ularga qarshi jazo belgilab qo‘yilgan.

Har qanday kishining hayoti qonunchilik bilan himoya qilinadi va qo‘riqlanadi. Shaxs huquq va erkinliklarini turli tajovuz soladigan xavfdan himoya qilish davlat organlari tizimlari tomonidan amalga oshirilmoqda. Jamiyatda jinoyatchilikning kuchayishiga yo‘l qo‘ymaslik shu jamiyat a‘zolarining inson huquqlarini poymol etuvchi illatlarga birgalikda kurash olib borishiga bog‘liqdir. Shu bilan bir qatorda fuqarolar ham o‘z huquqlariga qarshi qaratilgan xavfdan o‘zini himoya qila olishi kerak. Inson huquq va erkinliklariga raxna soladigan jinoyatlarga qarshi kurashda va jinoyatlarning oldini olishda har birimiz faol ishtirok etishimiz lozim.

### **Sud orqali himoyalaniş huquqi**

Har bir fuqaro o‘zining buzilgan huquqlarini sud orqali himoya qilish huquqiga ega. Fuqarolarning bu

huquqini ta‘minlash uchun davlat sud hokimiyati tizimini tashkil etadi. O‘zbekiston Respublikasi fuqarolari o‘z huquqlarini har qanday tajovuzlardan himoya qilish uchun sudga murojaat qilish huquqini amalga oshirishning barcha huquqiy shart-sharoitlari yaratilgan.

Fuqarolarni sud tomonidan himoyalaniş huquqining mazmuni 1995-yil 30-avgustda qabul qilingan O‘zbekiston Respublikasining «Fuqarolarning huquq va erkinliklarini buzadigan xatti-harakatlar va qarorlar ustidan sudga shikoyat qilish to‘g‘risida»gi Qonunida bayon etilgan. Ushbu Qonun O‘zbekiston Respublikasi fuqarolarinigina emas, balki chet el fuqarolari va fuqaroligi bo‘lmagan shaxslarning ham O‘zbekiston Respublikasi sud organlariga murojaat qilish huquqini kafolatlaydi.

Ushbu mulohazalardan shunday xulosalar chiqarishimiz mumkinki, Prezidentimiz, doimo ta'kidlaganidek insonning yashash huquqi «insonning eng ustuvor muqaddas huquqi»dir.

Siz O'zbekiston Respublikasi Konstitutsiyasi, qonunlar va boshqa me'yoriy-huquqiy hujjatlarning mazmun-mohiyatini o'qib o'rganar ekansiz, mamlakatimizda inson huquqi, uning hayoti, sog'lig'i bebaho, buyuk ne'mat ekanligini anglaysiz. Kelajakda bu sohada olgan huquqiy bilim, malaka va ko'nikmalingiz orqali avvalo o'z haq-huquqlaringiz va burchlaringizni adolat tarozisida amalga oshishini ta'minlashingiz zarurdir. Ikkinchidan esa, siz boshqa insonlarning yashash huquqini, hayoti va sog'liqlarini himoya qilishlaringiz shartligi, shaxsga qarshi jinoyatlar eng og'ir jinoyatlar ekanligi hamda unga qarshi jazolar muqarrar ekanligi haqida xulosalar chiqarasiz.

**Fikrlash, so'z, e'tiqod  
va vijdon erkinligi**

O'zbekiston Respublikasi Konstitutsiyasining 29-moddasida: «Har kim fikrlash, so'z va e'tiqod erkinligi hu-

quqiga ega. Har kim o'zi istagan axborotni izlash, olish va uni tarqatish huquqiga ega, amaldagi konstitutsiyaviy tuzumga qarshi qaratilgan axborot va qonun bilan belgilangan boshqa cheklashlar bundan mustasnodir.

Fikr yuritish va uni ifodalash erkinligi faqat davlat siri va boshqa sirlarga taalluqli bo'lgan taqdirdagina qonun bilan cheklanishi mumkin» deyiladi.

Fikr yuritish bu — insonning o'z bilimi va ishonchiga asoslanib, hayot, jamiyat, davlat hayoti va ijtimoiy-siyosiy muammolarga doir mulohaza va qarashlarini erkin bayon qilish huquqidir. Inson va fuqarolarning bu huquqi Konstitutsiya va 1994-yil 6-mayda qabul qilingan O'zbekiston Respublikasining «Fuqarolarning murojaatlari to'g'risida»gi qonuni bilan kafo-

latlanadi. Ushbu Qonunda fuqarolarning davlat organlariga, jamoat birlashmalariga, mulkchilik shaklidan qat'i nazar korxonalar, muassasalar va tashkilotlarga murojaat qilish huquqini ifoda etuvchi asosiy qoidalarni, shuningdek fuqarolarning murojaatlarini ko'rib chiqish tartibi va muddatlari belgilangan.

So'z erkinligi bu fuqarolarning og'zaki ravishda fikr bildirish huquqidir. Fuqarolar so'z erkinligi orqali o'zining siyosiy huquqlaridan keng foydalanish imkoniyatiga ega bo'ladi, Ya'ni ular qonun loyihalari-ni himoya qilishda, referendumlar o'tkazishda, O'zbekiston Respublikasi Prezidentini saylashda, Oliy Majlis Qonunchilik palatasi deputatlarini va mahalliy Kengashlarning deputatlarini saylashda o'zining mulohazalarini bayon qilish va qatnashish imkoniyati-ga ega bo'ladilar. Har kim o'zi istagan axborotni izlash, olish va uni tarqatish huquqiga ega. Lekin ushbu axborotlar konstitutsiyaviy tuzumga qarshi qaratilgan bo'lsa, tinchlik va xavfsizlikka qarshi, demokratiya va jamiyatning manfaatlariga qarshi, davlat siri va boshqa sirlarga taalluqli bo'lgan taqdirdagina qonun bilan cheklanishi mumkin.

O'zbekiston Respublikasining davlat sirlari:

- davlat siri;
- harbiy sir;
- xizmat siriga bo'linadi;

*Davlat siri* — oshkor etilishi Respublika harbiy-iqtisodiy salohiyatining sifat holatiga salbiy ta'sir etishi yoki O'zbekiston Respublikasining mudofaa qobiliyati, davlat xavfsizligi, iqtisodiy va siyosiy manfaatlar uchun boshqa og'ir oqibatlar keltirib chiqarishi mumkin bo'lgan ma'lumotlar.

*Harbiy sir* — oshkor qilinishi O'zbekiston Respublikasi mudofaa qobiliyati, davlat xavfsizligi va Qurolli Kuchlari uchun og'ir oqibatlar keltirib chiqarishi mumkin bo'lgan harbiy yo'sindagi ma'lumotlar.

*Xizmat siri* — oshkor qilinishi O'zbekiston Res-

publikasi manfaatlariga zarar yetkazishi mumkin bo'lgan fan, texnika, ishlab chiqarish va boshqaruv sohalariga doir ma'lumotlar.

Davlat sirlari — davlat tomonidan qo'riqlanadigan va maxsus ro'yxatlar bilan cheklab qo'yilgan o'ta muhim, mutlaq maxfiy va maxfiy bo'lgan harbiy, siyosiy, iqtisodiy, ilmiy-texnikaviy va boshqa ma'lumotlardir.

O'zbekiston Respublikasining «Davlat sirlarini saqlash to'g'risida»gi qonuni va Jinoyat kodeksining 162-,163-moddalariga binoan O'zbekiston Respublikasiga qarshi davlat sirlarini oshkor qilish yoki harbiy sir hisoblangan hujjatlarni yo'qotish harakatlari jinoyat hisoblanadi hamda ularga qarshi javobgarlik belgilangan.

*Vijdon erkinligi* masalasiga O'zbekiston Respublikasi Konstitutsiyasining 31-moddasida alohida to'xtab o'tilgan: «Hamma uchun vijdon erkinligi kafolatlanadi. Har bir inson xohlagan dinga e'tiqod qilish yoki hech qanday dinga e'tiqod qilmaslik huquqiga ega. Diniy qarashlarni majburan singdirishga yo'l qo'yilmaydi».

O'zbekistonning mustaqilligi inson va fuqarolarining ham, ular yashayotgan jamiyatning ham ma'naviy jihatdan boyib borishi uchun keng yo'l ochdi. Davlatimizdagi vijdon erkinligi masalasi bilan bog'liq munosabatlar o'zgardi. Istiqlolning dastlabki kunlaridanoq diyorimizning barcha fuqarolari haqiqiy e'tiqod erkinligini his eta boshladilar. Davlat bilan diniy tashkilotlar o'rtasidagi munosabatlar O'zbekiston Respublikasining 1998-yil 1-mayda qabul qilingan «Vijdon erkinligi va diniy tashkilotlar to'g'risida»gi (yangi tahrirdagi) Qonuni bilan tartibga solinadi.

Bugungi kunda O'zbekistonda turli din vakillarining hech qanday to'siqlarsiz o'z dinlariga e'tiqod qilishlari uchun barcha sharoitlar yaratilgan. Sobiq sho'ro davrida respublikamizda bor-yo'g'i 89 ta masjid



va ikkita madrasa faoliyat ko'rsatgan bo'lsa, hozir O'zbekiston musulmonlari idorasi boshqaruvi ostida Adliya vazirligidan rasmiy ro'yxatdan o'tgan ikki mingdan ziyod diniy tashkilotlar faoliyat ko'rsatib turibdi. Ular uchun barcha qulayliklar yaratilgan.

Shuningdek, mamlakatimizda istiqomat qilayotgan turli millat vakillari ham o'zlari e'tiqod qilayotgan dinlariga erkin ibodat qilmoqdalar. Bugun Respublikamizda 15 turdagi 170 dan ziyod noislomiy diniy konfessiyalar (tashkilotlar) rasman faoliyat ko'rsatmoqda. Respublikamizda to'rtta diniy markaz — Movarounnahr Musulmonlari Boshqarmasi, O'rta Osiyo Rus pravoslav cherkovi boshqarmasi, O'rta Osiyo Injil Nasroniylar — Baptistlari markazi va O'rta Osiyo Yettinchi kun Adventistlari Cherkovi konfessiyalari yagona huquqiy tizim va maqom asosida ish olib bormoqda.

1999-yil 7-aprel kuni O'zbekiston Respublikasi Prezidenti I. Karimovning Farmoyishiga asosan Toshkent islom universiteti tashkil etildi. Har yili mazkur oliygoh islom tarixi va falsafasi, diniy qonunchilik, iqtisod va tabiiy fanlar fakultetlariga talabalarni qabul qiladi. Universitet qoshida Islomshunoslik ilmiy tadqiqot markazi, manbalar xazinasini hamda akademik litsey faoliyat ko'rsatmoqda. Xalqimizning vijdon erkinligi huquqining kafolatlanganligi, bu sohada erishayotgan yutuqlarimizning asosi Konstitutsiyamiz va qonunlarimizning insonparvarlik, demokratik tamoyillariga asoslanganligidadir.

Sobiq mustabid sho'ro tuzumi davrida diniy jamiyat hayotidan siqib chiqarishga urinishlar bo'ldi. Natijada ma'naviyat va ma'rifat o'rnini ma'lum darajada jaholat egallab, yurtdoshlarimiz fiqh, tafsir, hadis, tasavvuf ilmlari haqida hatto umumiy tushunchaga ham ega bo'lmay qoldilar. Hatto islom dini nima degan savollarga to'liq javob bera oladiganlarning soni

ham ozchilikni tashkil etdi. Movarounnahr diyori azaldan dinu diyonat o'chog'i, fuzalo ulamolar yurti ekanligini unutib qo'ydik.

O'zbekiston Respublikasi Konstitutsiyasining 57-moddasiga binoan: «Konstitutsiyaviy tuzumni zo'rlik bilan o'zgartirishni maqsad qilib qo'yuvchi, respublikaning suvereniteti, yaxlitligi va xavfsizligiga, fuqarolarning konstitutsiyaviy huquq va erkinliklariga qarshi chiquvchi, urushni, ijtimoiy, milliy, irqiy va diniy adovatni targ'ib qiluvchi xalqning sog'ligi va ma'naviyatiga tajovuz qiluvchi, shuningdek harbiylashtirilgan birlashmalarning milliy va diniy ruhdagi siyosiy partiyalarning hamda jamoat birlashmalarining tuzilishi va faoliyati taqiqlanadi. Maxfiy jamiyatlar va uyushmalar tuzish taqiqlanadi». Bundan shunday xulosaga kelish mumkinki, mamlakatimizdagi tinchlik, barqarorlikni ko'rolmayotgan, yoshlarimizni endigina shakllanayotgan pok, beg'ubor ongini buzishga intilayotgan yuqorida tilga olingan ekstremistik oqimlarning g'oyaviy qarashlari Konstitutsiya va qonunlarimizga mos kelmaydi.

Diniy ekstremizm — ma'lum siyosiy maqsadlar yo'lida va din niqobi ostida mutaassiblar yoki ularning irodasiga ko'ra ish ko'ruvchi guruhlar tomonidan olib boriladigan o'ta ashaddiy harakat va qarashlar majmuini anglatadi.

Diniy aqidaparastlik esa — siyosiy maqsadlar yo'lida mavjud ijtimoiy muammolarni ilk, ya'ni mazkur din paydo bo'lgan paytdagi arkonlar asosida hal etmoq niyatidagi harakat va qarashlardan iborat.

Islom aqidaparastlarining asosiy g'oyasi — «sof islom» qat'iyatlariga (prinsiplariga) qaytish, maqsadi esa — islomiy davlat va taraqqiyot yo'lini joriy etishdan iborat.

«Vahobiylar» hukumatni qo'lga olishda ochiq kurash, ekstremistik, terror yo'lini tutsalar, «xizbutchilar» g'oyaviy, mafkuraviy kurash uslubini qo'llaydi-

lar, ular yoshlar tarbiyasidagi ma'naviy bo'shliqdan foydalanib, ularning ongini zaharlashga urinadilar.

Diniy oqimlarning nomlari turlicha bo'lsa-da, aslida ularning maqsadlari va g'oyalari bitta — dinni niqob qilib, hokimiyatga intilish, tinch-osoyshta xalq orasida nifoq va ixtilof chiqarish. Eng achinarlisi shundaki, bu oqimlar hali ongi shakllanib ulgurmagan, tajribasiz, g'o'r yoshlarni o'z tuzog'iga ilintirib, ulardan o'zlarining g'arazli maqsadlari yo'lida foydalanmoqdalar.

O'zbekiston Respublikasi Prezidenti I. Karimov «O'zbekiston XXI asr bo'sag'asida: xavfsizlikka tahdid, barqarorlik shartlari va taraqqiyot kafolatlari» kitobida dinning jamiyat hayotida tutgan o'rni haqida jumladan shunday deydi:

«Bizda din bundan buyon ham aholini oliy ruhiy, axloqiy va ma'naviy qadriyatlardan, tarixiy va madaniy merosdan bahramand qilishi tarafdorimiz. Lekin biz hech qachon diniy da'vatlar hokimiyat uchun kurashga, siyosat, iqtisodiyot va qonunshunoslikka aralashishi uchun bayroq bo'lishiga yo'l qo'ymaymiz. Chunki, bu holni davlatimizning xavfsizligi, barqarorligi uchun jiddiy xavf-xatar deb hisoblaymiz».

#### **4-§ BO'YICHA EGALLAGAN BILIMLARINGIZNI MUSTAHKAMLASH YUZASIDAN TOPSHIRIQLAR**



Konstitutsiyaning quyida keltirilgan moddasida qanday milliy qadriyatlar singdirilgan?

**24-modda:**

Yashash huquqi har bir insonning uzviy huquqidir. Inson hayotiga suiqaqd qilish eng og'ir jinoyatdir.

**Javob  
bering**



1. O'zbekiston Respublikasi Jinoyat Kodeksida inson hayotiga qarshi jinoyatlardan qasddan odam o'ldirganlik uchun qanday jazo choralari belgilangan?
2. Inson hayoti va sog'ligi uchun xavfli bo'lgan jinoyat turlarini sanab bering.

**Bilimingizni  
mustahkam-  
lang**



Quyida keltirilgan huquq va erkinliklar orasidan O'zbekiston Konstitutsiyasida belgilangan shaxsiy huquq va erkinliklarni aniqlang, ularni davom ettiring va quyidagi jadvalga joylashtiring:

- erkinlik va shaxsiy daxlsizlik huquqi;
- xususiy mulkka ega bo'lish huquqi;
- fikr va so'z erkinligi huquqi;
- turar joy daxlsizligi huquqi;
- sog'liqni saqlash huquqi;
- dam olish huquqi;
- vijdon erkinligi huquqi;
- bir joydan ikkinchi joyga ko'chib yurish huquqi;
- mehnat qilish huquqi;
- saylash va saylanish huquqi;
- shaxsning aybi aniqlanmaguncha uning aybdor hisoblanmaslik huquqi.

	<b>Shaxsiy huquqlar</b>	<b>Boshqa turdagi huquqlar</b>
1		
2		
3		
4		
...		
...		

**Qiyosiy tahlil qiling!**



1948-yilda BMT Bosh Assambleyasi tomonidan qabul qilingan «Inson huquqlari Umumjahon Deklaratsiyasi»ning 11-moddasi bilan O'zbekiston Respublikasi Konstitutsiyasining 26-moddasi o'rtasida qanday farq va umumiy o'xshashlik bor?

## 11-modda:

Jinoyat sodir etishda ayblanayotgan har bir inson unga himoya uchun barcha imkoniyatlar yaratib berilib, sud majlisida oshkora tartibda qonuniy yo‘l bilan uning aybdorligi aniqlanmaguncha, beayb deb hisoblanish huquqiga egadir.

## 26-modda:

(1-bandi)

Jinoyat sodir etishda ayblanayotgan har bir shaxsning ishi sudda qonuniy tartibda, oshkora ko‘rib chiqilib, aybi aniqlanmaguncha u aybdor hisoblanmaydi.

**Huquqiy manbalar asosida matn tayyorlang**



Fikr yuritish, uni ifodalash erkinligi hamda axborot olish va uni tarqatish huquqi qaysi hollarda taqiqlanadi?

**BU TUSHUNCHALARNI XOTIRADA SAQLANG!**



Hamma uchun vijdon erkinligi kafolatlanadi. Har bir inson xohlagan dinga e‘tiqod qilishi yoki hech qaysi dinga e‘tiqod qilmaslik huquqiga ega. Diniy qarashlarni majburan singdirishga yo‘l qo‘yilmaydi.

Mamlakatimizda diniy tashkilotlar davlatdan ajratilgan bo‘lib, ular qonun oldida tengdirlar. Davlat diniy birlashmalarning faoliyatiga aralashmaydi.

## 5-§. SIYOSIY HUQUQLAR

O‘zbekiston Respublikasi Konstitutsiyasining sakkinchi bobi siyosiy huquqlarga bag‘ishlangan bo‘lib, bu huquqlarni kafolatlaydi. Bu huquqlar quyidagilar-dan iborat: jamiyat va davlat ishlarini boshqarishda bevosita hamda o‘z vakillari orqali ishtirok etish hu-

quqi (32-modda); ijtimoiy faollikni mitinglar, yig‘ilishlar va namoyishlar shaklida amalga oshirish huquqi (33-modda); kasaba uyushmalariga uyushish; ommaviy harakatlarda ishtirok etish huquqi (34-modda); bevosita o‘zi va boshqalar bilan birgalikda vakolatli davlat organlariga, muassasalariga yoki xalq vakillariga ariza, taklif va shikoyatlar bilan murojaat qilish huquqi (35-modda).

**Siyosiy huquqlar** — bu odatda, faqat shu davlat fuqarolarining huquqlaridir. Ular davlat hayotida, davlat ishlarini boshqarishda qatnashish huquqlarini beradi va tabiiyki, bunday huquqlarga mamlakat hududida yashayotgan yoki hozir bo‘lgan barcha odamlar da’vo qilishi mumkin emas. Bu O‘zbekiston Respublikasi Konstitutsiyasi tegishli moddalarida belgilangan qoidalardan kelib chiqadi.

Deylik, «shaxsiy huquq va erkinliklar»ga doir VII bobdagi 24-moddada «**yashash huquqi har bir insonning uzviy huquqidir**», deb aytiladi. 26-, 27-, 29-moddalar ham «**har bir shaxs**», «**har kim**» uchun shaxsiy daxlsizlik, adolatli sudlov, fikrlash, so‘z va e’tiqod erkinligi huquqlarini kafolatlaydi, 31-modda ham vijdon erkinligini «**hamma uchun**» ta’minlaydi. Bularning hammasi shundan dalolat beradiki, shaxsiy huquqlar mamlakatda yashovchi hamma insonlarga tegishlidir.

Ulardan farqli o‘laroq, O‘zbekiston Respublikasi Konstitutsiyasining «siyosiy huquqlar»ga bag‘ishlangan VIII bobdagi 32-, 33- va 34-moddalar O‘zbekiston Respublikasi fuqarolarigagina tegishlidir. «Jamiyat va davlat ishlarini boshqarishda bevosita hamda o‘z vakillari orqali ishtirok etish», «o‘z ijtimoiy faolliklarini O‘zbekiston Respublikasi qonunlariga muvofiq mitinglar, yig‘ilishlar va namoyishlar shaklida amalga oshirish», «kasaba uyushmalariga, siyosiy partiyalarga va boshqa jamoat birlashmalariga uyushish, ommaviy harakatlarda ishtirok etish» huquqlari faqat O‘zbe-

kiston Respublikasi fuqarolarigagina taalluqli bo'radi. Siyosiy huquqlarning o'ziga xosligi ham shundadir.

Bunday holat xalqaro huquqiy andozalarga ham mos keladi. Masalan, Fuqaroviy va siyosiy huquqlar haqidagi xalqaro Paktning 9-moddasida: «Har bir inson erkinlik va shaxsiy daxlsizlik huquqiga ega-dir», 10-moddasida: «ozodlikdan mahrum qilingan barcha shaxslar insoniy munosabat va qadr-qimmatini e'zozlash huquqiga ega», 14-moddasida: «barcha shaxslar sudlar va tribunallar oldida tengdir», deyiladi, 19-moddasida o'z fikrini daxlsiz e'tirof etishni «har bir inson» uchun kafolatlaydi. Bu moddalardan farqli ravishda 25-moddasida: «har bir fuqaro hech bir kamsitishsiz: a) davlat ishlarini yuritishda qatnashish...; b) saylash va saylanish...; d) o'z mamlakatida umumiy tenglik asosida davlat xizmatiga kirish... huquqi va imkoniga ega bo'lishi shart», deyilgan. Ko'rinib turibdiki, xalqaro huquq ham siyosiy huquqlarni hammaga, har kimga emas, fuqarolargagina beradi.

O'zbekiston Prezidenti Islom Karimov aytganiday: **«odil va oqil hokimiyat xalq kayfiyatini, uning irodasini albatta hisobga oladi»**. Shu joyda AQSH Prezidenti Avraam Linkolnning so'zlarini keltirish o'rinli: **«Hech bir inson boshqalarni ularning roziligisiz boshqaradigan darajada komil emas»**. Xalqni uning roziligi bilan boshqarish, xususan, erkin saylovlarni bildiradi. O'zbekiston Prezidentining muqobillik asosida umumiy yashirin ovoz berish yo'li bilan saylanishi ham respublikada demokratiya o'rnatilishining bir isboti bo'ldi.

O'zbekiston Respublikasi fuqarolari kasaba uyushmalari va boshqa jamoat birlashmalariga uyushish, ommaviy harakatlarda ishtirok etish huquqi — muhim siyosiy huquqlardan biri hisoblanadi. Chunki bu jamoat birlashmalari va ommaviy harakatlarning asosiy maqsadi fuqarolarning siyosiy sohadagi huquqlarini amalga oshirishga xizmat qiladi.

Bugungi kunda O‘zbekiston Respublikasida 5 mingdan ziyod nomdagi jamoat birlashmalari mavjud bo‘lib, fuqarolarning turli xil sohadagi huquq va erkinliklarini amalga oshirish imkonini yaratmoqda.

Jamoat birlashmalari tizimida siyosiy partiyalar muhim o‘rin tutadi. Chunki siyosiy partiyalarda jamiyatimizning eng ilg‘or, siyosiy yetuk fuqarolari birlashib, davlat va jamiyatning siyosiy, iqtisodiy, madaniy rivojlanish yo‘nalishlarini ishlab chiqish va amalga oshirishda faol qatnashadi. Kuchli davlatdan kuchli jamiyat sari borishimizga xizmat qiladi.

Bugungi kunda O‘zbekistonda 4 ta siyosiy partiya, 2 ta ijtimoiy harakat mavjud. Jumladan, O‘zbekiston Xalq demokratik partiyasi (XDP) 1991-yil 1-noyabrda Toshkentda bo‘lib o‘tgan ta‘sis qurultoyida tuzilgan. Bu partiya mamlakatda adolatli jamiyat qurish, uning siyosiy va iqtisodiy mustaqilligini mustahkamlash, O‘zbekiston xalqlari o‘rtasida tinchlik, osoyishtalik, fuqarolar totuvligini ta‘minlash, har bir mehnatkashning moddiy va ma‘naviy turmushini yaxshilash, fuqarolarning teng konstitutsiyaviy haq-huquqlarini himoya qilishni o‘z oldiga maqsad qilib qo‘ygan. XDPning «O‘zbekiston ovozi», «Голос Узбекистана» gazetalari mavjud.

O‘zbekiston «Adolat» sotsial-demokratik partiyasi 1994-yil 18-fevralda Toshkentda bo‘lib o‘tgan I ta‘sis Qurultoyida tuzildi. Partiyaning asosiy maqsadi mustaqil O‘zbekiston Respublikasida barcha millat va elatlarning umumiy manfaatlariga mos keladigan siyosiy, iqtisodiy va ijtimoiy jihatdan yetuk, demokratiya tamoyillariga asoslangan adolatli, fuqarolik jamiyat qurishda faol ishtirok etishdir.

O‘zbekistonda shakllanayotgan partiyalardan biri — O‘zbekiston Milliy tiklanish demokratik partiyasidir (MTDP). U 1995-yil 3-iyunda Toshkentda bo‘lib o‘tgan ta‘sis Qurultoyida tashkil etildi. Partiya o‘z oldiga milliy yakdillikni ta‘minlash, huquqiy



davlatni barpo etish va O‘zbekistonni jahonning yetakchi davlatlari safiga olib kirish uchun xalqni safarbar qilish, fuqarolarda Vatanga sadoqat tuyg‘ularini shakllantirish, bozor munosabatlariga asoslangan yangi jamiyat qurish, milliy meros va an‘analarni ro‘yobga chiqarish, millatning ilmiy, texnikaviy salohiyatini yuksaltirishni maqsad qilib qo‘yadi. O‘zbekiston MTDPsining «Milliy tiklanish» haftalik gazetasi faoliyat ko‘rsatmoqda.

Hozirgi kunda O‘zbekiston Liberal-demokratik partiyasi ham faoliyat yuritmoqda. Bu partiya 2004-yilda tashkil etilgan.

Istiqlol tufayli O‘zbekistonda turli jamoat tashkilotlari uchun ham keng imkoniyat yaratildi. Jumladan, shu kunlarda O‘zbekiston kasaba uyushmalari turli kasb egalari bo‘lgan mehnatkashlarni jinsi, diniy e‘tiqodlari, irqiy va milliy mansubliklaridan qat’i nazar ixtiyoriy birlashtiruvchi mustaqil ommaviy jamoat tashkiloti faoliyat ko‘rsatmoqda. Kasaba uyushmasining tashkiliy tuzilishi va faoliyati mazmuni o‘zgardi. Uning asosini jahon kasaba uyushmalari amaliyoti andozalariga mos keladigan federalizm, demokratiya, mustaqillik va ixtiyoriylik tamoyillari tashkil eta boshladi. Kasaba uyushmalarining har bir a‘zosi saylash va saylanish, yig‘ilishlar, matbuot va boshqa vositalar orqali kasaba uyushmalari hamda ma‘muriy organlar faoliyatiga taalluqli masalalarni qo‘yishi mumkin.

O‘zbekiston Respublikasi Xotin-qizlar qo‘mitasi ayollarni, ko‘p bolali onalarni har tomonlama muho-faza qilishni yanada kuchaytirish, mehnatkash va ijodkor ayollarni bozor iqtisodiyoti bilan bog‘liq bo‘lgan muammolarni hal etishda faol qatnashishga keng safarbar etish, ilm-fan sohasidagi ayollarning imkoniyatlarini yanada kengaytirish yo‘lida faoliyat ko‘rsatmoqda. Qo‘mita jamiyatda xotin-qizlarning rolini oshirish, ularning manfaatlarini himoya qilish, oilani,

onalik va bolalikni muhofaza qilish va shu kabi vazifalarni bajarmoqda.

Prezidentimiz tashabbusi bilan «Kamolot» yoshlar ijtimoiy harakati tashkil etildi. Mazkur harakat o'z dasturi va Nizomiga ega. «Harakatning asosiy vazifasi, — deb ta'kidlaydi Prezidentimiz, — yoshlarni birlashtirish, sog'lom turmush talablari asosida tarbiyalash, jamiyatda munosib o'rin egallashiga ko'maklashishdan, ularning manfaatlarini har tomonlama himoya qilishdan iborat bo'lishi darkor»<sup>1</sup>.

Darhaqiqat, «Kamolot» yoshlar ijtimoiy harakati yoshlar harakatining muhim jihatlariga e'tibor berishi kerak:

**birinchidan**, bu harakat hayotda uchrab turishi tabiiy bo'lgan turli to'siqlar, muammo va qiyinchiliklar tufayli yoshlar kayfiyatining, yoshlar dunyoqarashining salbiy tomonga o'zgarishiga, ularning tushkunlikka berilishiga, noma'qul yo'llarga kirib ketishiga yo'l qo'ymaydigan, mustaqil hayotga qadam qo'yayotgan o'smirlar huquq, erkinliklarini himoya qiladigan tashkilot bo'lishi kerak;

**ikkinchidan**, yoshlarni orzu-umidlariga erishish, ezgu maqsadlarini amalga oshirishga xizmat qiladigan siyosiy-huquqiy ijtimoiy harakatga aylanishi kerak;

**uchinchidan**, tabiatan yetakchi bo'lib tug'ilgan yoshlarni kuchi, salohiyati, qobiliyatlarini kamol topirib, ular o'z eli, yurti, Vatani uchun faol arboblar, rahbarlar bo'lib tanilishiga imkon yaratish zarur;

**to'rtinchidan**, yoshlarga hayotda o'z o'rnini topishga, mustaqil fikrlashga, kasb-hunarga yo'naltirishga yordam berishi kerak;

**beshinchidan**, bu tashkilot yoshlarni ichki va tashqi yot mafkuraviy tajovuzlardan muhofaza qilishga, ish-

---

<sup>1</sup> K a r i m o v I. A. «Kamolot» yoshlarimizning chinakam suyanchi va tayanchi bo'lsin. «Xalq so'zi» gazetasi, 2001-yil 25-yanvar.

sizlik muammolarini hal qilish, yoshlarni xorijga, ishga yuborish imkoniyatlariga ham ega bo'lishi kerak;

**oltinchidan**, bu harakat yoshlarni oila qurishdagi qiyinchiliklariga barham berishda yordam bera oladigan tashkilot bo'lishi kerak;

**yettinchidan**, harakat yosh mutaxassislarni xizmat pog'onalaridan ko'tarilishiga, o'sishiga imkon yarata-digan hayot maktabiga aylanishi kerak;

**sakkizinchidan**, bu harakat milliy istiqlol mafkurasi g'oyalarini yosh avlod ongi va tafakkuriga singdirishi, uni eng oliy, eng ustuvor maqsadga aylantirishga xizmat qilishi kerak.

Mazkur harakat «davlat va yoshlar o'rtasida ba-misoli bir ko'prik bo'lishi, davlatimizning yoshlar siyosatini ularga, yoshlarimizning o'y-tashvishlarini, orzu-intilishlari va muammolarini esa davlat tashki-lotlariga yetkazib turishi, ularning haqiqiy himoyachisi bo'lishi zarur»<sup>1</sup>.

## 5-§ BO'YICHA EGALLAGAN BILIMLARINGIZNI MUSTAHKAMLASH YUZASIDAN TOPSHIRIQLAR



O'zbekiston Respublikasi Konstitutsiyasining 32-moddasini o'qing. Ushbu Konstitutsiyaviy qoi-dada qo'llanilgan «bevosita ishtirok etish» hamda «o'z vakillari orqali ishtirok etish» huquqi kabi tushunchalarning farqlarini izohlab bering.

**Xalqaro huquqiy hujjatlar bilan tanishing!**



«Inson huquqlari Umumjahon Deklaratsiyasi» hamda «Fuqarolik huquqlari va siyosiy huquqlar to'g'risida»gi Xalqaro Paktning siyosiy huquqlarga bag'ishlangan mod-dalari mazmuni bilan tanishib chiqing.

<sup>1</sup> K a r i m o v I. A. «Kamolot» – yoshlarimizning chinakam suyanchi va tayanchi bo'lsin. «Xalq so'zi» gazetasi, 2001-yil 25-yanvar.

**20-modda:**

1. Har bir inson osoyishta yig'ishlar va uyushmalar o'tkazish (tuzish) huquqiga egadir.
2. Hech kim biror bir uyushmaga majburan kiritilishi mumkin emas.

*(Inson huquqlari Umumjahon Deklaratsiyasi)*

**21-modda:**

1. Har bir inson bevosita yoki erkin saylangan vakillar vositasi orqali o'z mamlakatini boshqarishda qatnashish huquqiga ega.

2. Har bir inson o'z mamlakatida davlat xizmatiga kirishda teng huquqqa ega.

3. Xalq irodasi hukumat hokimiyatining asosi bo'lishi lozim; bu iroda davriy va soxtalashtirilmagan, yalpi va teng saylov huquqida, yashirin ovoz berish yo'li bilan yoki ovoz berish erkinligini ta'minlaydigan boshqa teng qiymatli shakllar vositasida o'tkaziladigan saylovlarda o'z aksini topishi lozim.

*(Inson huquqlari Umumjahon Deklaratsiyasi)*

***Fuqarolik huquqlari va siyosiy huquqlar to'g'risida  
Xalqaro Paktdan:***

**21-modda:**

Tinch yig'inlarga huquqlar tan olinadi. Bu huquqlardan foydalanishga hech bir cheklash qo'yilmaydi. Qonunga muvofiq qo'yilgan va demokratik jamiyatda davlat va jamiyat xavfsizligi, jamoat tartibi, aholi salomatligi va axloqi yoki boshqa shaxslar huquqlari va erkinligi manfaatlari uchun zarur bo'lgan cheklanishlar bundan mustasno.

**22-modda:**

Har bir inson boshqalarning assotsiatsiyalar tuzish, jumladan kasaba uyushmalar tashkil etish erkinligi va o'z manfaatlarini himoya qilish uchun shunday uyushmalarga kirish huquqiga ega.

## Huquqiy adabiyotlar asosida javob bering



**A.** Mustaqillik davrida O‘zbekiston Respublikasida saylov to‘g‘risida qanday qonunlar qabul qilingan?

**B.** O‘zbekiston Respublikasi Konstitutsiyasi va saylov to‘g‘risidagi qonunlarga binoan fuqaroga necha yoshdan saylash huquqi beriladi?

**C.** Kimlar saylovda qatnasha olmaydilar?

**D.** O‘zbekiston Respublikasi Prezidentligiga va vakillik organlariga bo‘ladigan saylovlar qanday prinsiplarga taynadi?

## Mustaqil bajarish uchun vazifa



1. O‘zbekiston Respublikasi Jinoyat Kodeksida siyosiy huquqlar buzilishiga doir qoidalar belgilanganmi? Agar belgilangan bo‘lsa, ularga nisbatan qanday jazo choralari qo‘llanilishi ko‘zda tutilgan?

Fikringizni tegishli qonunlar va hayotiy misollar asosida tushuntiring.

2. O‘zbekiston Respublikasi Konstitutsiyasining quyidagi moddasiga izoh bering.

**35-modda:**

Har bir shaxs bevosita o‘zi va boshqalar bilan birgalikda davlat organlariga, muassasalariga yoki xalq vakillariga ariza, taklif, shikoyatlar bilan murojaat qilish huquqiga ega.

Arizalar, takliflar va shikoyatlar qonunda belgilangan tartibda va muddatlarda ko‘rib chiqilishi shart.

## Siyosiy bilimingizni sinab ko‘ring



**A.** O‘zbekistonda qanday ijtimoiy harakatlar va siyosiy partiyalar mavjud?

**B.** Siyosiy partiyalarning oliy organlari haqida nimalarni bilasiz?

**C.** Mamlakatimizda qanday jamoat birlashmalari faoliyat ko'rsatmoqda? Jadval tuzib, mazkur jamoat birlashmalari tizimini unga joylashtiring.

**D.** «Kamolot» yoshlar ijtimoiy harakatining muhim jihatlarini aytib bering.

## **6-§. IQTISODIY VA IJTIMOIIY HUQUQLAR**

### **Iqtisodiy va ijtimoiy huquqlar tizimi**

Iqtisodiy va ijtimoiy huquqlar fuqarolarning normal turmush kechirishini ta'minlovchi, yashash uchun ma'lum darajada o'zining moddiy va ma'naviy ehtiyojini qondiruvchi huquqlardir.

Fuqarolarning iqtisodiy va ijtimoiy sohadagi huquqlari O'zbekiston Respublikasi Konstitutsiyasining IX bob, 36—42-moddalarida ko'rsatilgan bo'lib, ular:

- shaxslarning mulkdor bo'lish huquqi;
- mehnat qilish, erkin kasb tanlash huquqi;
- adolatli mehnat sharoitlarida ishlash, ishsizlikdan himoyalani sh huquqi;
- dam olish huquqi;
- qariganda, mehnat layoqatini yo'qotganda iqtisodiy ta'minot olish huquqi;
- malakali tibbiy xizmatdan foydalanish huquqi;
- bilim olish huquqi;
- ilmiy va texnikaviy ijod erkinligi, madaniyat yutuqlaridan foydalanish huquqlaridan iborat.

Davlatimizda o'tkazilayotgan iqtisodiy islohotlar, bozor iqtisodiyoti, tadbirkorlikka keng yo'l ochish, mulkchilikning turli xil shakllarini muhofaza qilish natijasida davlatimiz bu huquqlarning amalga oshishini tobora kengroq kafolatlab bormoqda.

Mulkdor bo'lish huquqi — O'zbekiston Res-

publikasi Konstitutsiyasining 36-moddasiga ko‘ra: Har bir shaxs mulkdor bo‘lishga haqli. Bankka qo‘yilgan omonatlar sir tutilishi va meros huquqi qonun bilan kafolatlanadi. Mulkdor bo‘lish huquqi, mulk bilan bog‘liq shaxsiy va tadbirkorlikka oid bo‘lgan munosabatlarning barchasi O‘zbekiston Respublikasi Fuqarolik Kodeksi bilan tartibga solinadi. O‘zbekiston Respublikasi Fuqarolik Kodeksining birinchi qismi 1995-yil 11-dekabrda va 1996-yil 29-avgustda ushbu Kodeksning ikkinchi qismi tasdiqlandi va 1997-yilning 1-mart kundan boshlab kuchga kirdi.

Mulk huquqi — shaxsning o‘ziga qarashli mol-mulkka o‘z xohishi bilan va o‘z manfaatlarini ko‘zlab egalik qilish, undan foydalanish va uni tasarruf etish, shuningdek o‘zining mulk huquqini, kim tomonidan bo‘lmasin, har qanday buzilishini bartaraf etishni talab qilish huquqidan iboratdir. Mulk huquqi muddatsizdir.

Fuqarolik Kodeksida — O‘zbekiston Respublikasi Konstitutsiyasiga amal qilgan holda, mulkning o‘tmishda sobiq ittifoq davrida mulkchilikka bo‘lgan davlat monopoliyasiga barham berildi.

FKning 167-moddasiga binoan mulk shakllari xususiy mulk va ommaviy mulkka bo‘linadi. Sobiq ittifoq davridagi qonunlarda fuqarolar faqat shaxsiy mulklar — uy-ro‘zg‘or buyumlari, shaxsiy iste‘mol mollari, yordamchi xo‘jalik asbob-uskunalari, turar joy, mehnat jamg‘armasi bo‘lishi mumkin edi. Ishbilarmonlik bilan shug‘ullanishga va xususiy mulk egasi bo‘lishga yo‘l qo‘yilmas edi. O‘zbekiston Respublikasi Konstitutsiyasi, Fuqarolik Kodeksi va O‘zbekiston Respublikasining «Mulkchilik to‘g‘risida»gi Qonuni fuqarolarning xususiy mulkka ega bo‘lish huquqini mustahkamlaydi.

Konstitutsiyaning XII bobi «Jamiyatning iqtisodiy negizlari» deb nomlanib, unda bozor iqtisodiyotining negizini xilma-xil shakllardagi mulk tashkil etishi,

xususiy mulk boshqa mulk shakllari kabi daxlsiz va davlat himoyasida ekanligi hamda mulkdor mulkiga o'z xohishicha egalik qiladi, undan foydalanadi va uni tasarruf etadi deb belgilangan. Lekin asosiy Qonunimizga binoan, mulkdor o'z mulkidan foydalanishda ekologik muhitga zarar yetkazmasligi, fuqarolar, yuridik shaxslar va davlatning huquqlarini hamda qonun bilan qo'riqlanadigan manfaatlarini buzmasligi shart.

O'zbekiston Respublikasi Konstitutsiyasining 37-moddasiga binoan har bir shaxs mehnat qilish, erkin kasb tanlash, adolatli mehnat sharoitlarida ishlash va qonunda ko'rsatilgan tartibda ishsizlikdan himoyalanih huquqiga egaligi, dam olish huquqi (38-modda), ijtimoiy ta'minot olish (39-modda), malakali tibbiy xizmatdan foydalanish (40-modda) huquqlari belgilangan va kafolatlangan.

Inson va fuqarolarning bu huquqlari o'rta maxsus, kasb-hunar ta'lim muassasalarida o'tiladigan «Davlat va huquq asoslari» fanining huquq sohalarida keng va atroflicha o'rganiladi.

<b>Bilim olish huquqi</b>
---------------------------

O'zbekiston Respublikasi Konstitutsiyasining 41-moddasida: **«Har kim bilim olish huquqiga ega. Bepul umumiy ta'lim olish davlat tomonidan kafolatlanadi. Maktab ishlari davlat nazoratidadir»**, deyilgan.

Bilim olish huquqi shaxsning asosiy huquqlaridan hisoblanib, ushbu huquqni aniq va to'liq amalda bajarilishiga 1997-yil 29-avgustda qabul qilingan «Ta'lim to'g'risida» hamda «Kadrlar tayyorlash milliy dasturi» to'g'risidagi O'zbekiston Respublikasining qonunlari huquqiy kafolat bo'lib xizmat qilmoqda.

Bilim olish huquqining muhim qoidalarini amalga oshirishda Prezidentimizning «Ta'lim-tarbiya va kadrlar tayyorlash tizimini tubdan isloh qilish, barkamol avlodni voyaga yetkazish to'g'risida»gi farmoni, Vazirlar Mahkamasining 1998-yil 5-yanvar 4-sonli «Uzluksiz



ta'lim tizimini darsliklar va o'quv adabiyotlar bilan ta'minlashni takomillashtirish to'g'risida»gi Qarori, 1998-yil 5-yanvar 5-sonli «Uzluksiz ta'lim tizimi uchun davlat ta'lim standartlarini ishlab chiqish va joriy etish to'g'risida»gi Qarori alohida ahamiyat kasb etadi.

**O'rta maxsus,  
kasb-hunar ta'limi  
davlat ta'lim standartlari**

O'zbekiston Respublikasi Vazirlar Mahkamasining 2000-yil 16-oktabrdagi 400-sonli Qarori bilan «O'rta maxsus, kasb-hunar ta'limining davlat

ta'lim standartlari» tasdiqlandi va bugungi kunda ta'lim muassasalarida qo'llanilmoqda.

Davlat ta'lim standartlari ta'limga davlat tomonidan qo'yiladigan talablarni bildiradi. O'rta maxsus, kasb-hunar ta'limining davlat standartlari — akademik litseylar va kasb-hunar kollejlari o'quvchilarining umumta'lim fanlari bo'yicha majburiy o'quv yuklamasi hajmini, bitiruvchilar saviyasiga qo'yiladigan talablarni belgilab beradi.

**O'MKHT standartlarining joriy etilishi quyidagi maqsadlarni ko'zlaydi:**

- O'MKHTning yuksak sifatini hamda mamlakatda amalga oshirilayotgan chuqur iqtisodiy va ijtimoiy islohotlarni, rivojlangan demokratik davlat barpo etish talablariga javob beruvchi raqobatbardosh kadrlar tayyorlanishini ta'minlash;
- mamlakatning ijtimoiy va iqtisodiy taraqqiyoti istiqbollariidan, jamiyat ehtiyojlaridan, fan, texnika va texnologiyaning zamonaviy yutuqlaridan kelib chiqib kadrlar tayyorlash mazmunini tartibga solish;
- O'MKHTning demokratlashuvi, insonparvarligi va ijtimoiylashuvi, ta'lim oluvchilarning huquqiy va iqtisodiy bilimlar darajasini, shuningdek ta'lim jarayoni samaradorligini oshirish;
- sifatli ta'lim xizmatlari ko'rsatish, ta'lim va kadrlar tayyorlash sohasida shaxsning, jamiyat va davlatning manfaatlarini himoya qilish;

- kadrlar tayyorlash sifatini va ta'lim faoliyatini, baholash mezonlarining tartibini belgilash;
- O'MKHT jarayonini va kadrlar tayyorlashning izchilligi va uzluksizligini ta'minlash va shu kabildan iborat.

**O'rta maxsus, kasb-hunar ta'limi davlat ta'lim standartlarining vazifalari:**

- O'MKHT sifatiga va kadrlar tayyorlashga, ko'rsatiladigan ta'lim xizmatlari turlariga qo'yiladigan talablarni belgilash;
- O'MKHT va uning pirovard natijalariga, ta'lim oluvchilarning bilimi va kasb malakasini vaqti-vaqti bilan baholash va nazorat qilish talablarini belgilovchi me'yoriy negizini yaratish;
- xalqning boy aql-zakovat merosi va umuminsoniy qadriyatlar asosida ta'lim oluvchilarni ma'naviy-axloqiy tarbiyalashning samarali shakllari va usullarini joriy etish;
- O'MKHT o'quv-tarbiya va ta'lim jarayoniga, pedagogik va axborot texnologiyalari bilan ta'minlashga, ta'lim darajasini nazorat qilishga, ta'lim oluvchilar va bitiruvchilarning malakasiga nisbatan me'yorlar va talablarni belgilash;
- kadrlarni maqsadli va sifatli tayyorlash uchun ta'lim, fan va ishlab chiqarishning samarali integratsiyasini ta'minlash.

**O'MKHT muassasalari bitiruvchilariga qo'yiladigan umumiy talablar:**

- fundamental fanlar va aniq fanlar bo'yicha bilimlar, kasbiy malaka va ko'nikmalarga ega bo'lish;
- kasbiy mohirlik va tafakkur doirasining shakllanganligi;
- tashkilotchilik va tadbirkorlik xislatlarining shakllangan bo'lishi;
- davlatning tuzilishi, uning ijtimoiy va siyosiy rivojlanishi haqida aniq bilimlarga ega bo'lish, xalqaro voqea, hodisa va muammolarni tushuna olish;

- mustaqil va ijodiy fikrlash, fikrlarini yozma va ogʻzaki ravon bayon etish malakalari shakllangan boʻlishi;
- turli vaziyatlarni tanqidiy baholash, yangiliklarga doimo intilish;
- oʻzbek tilini mukammal bilish, davlat tilida yozma va ogʻzaki ravishda erkin muloqotda boʻlish;
- umuminsoniy fazilatlariga ega boʻlish, oʻz millatini va Vatanini sevish, u bilan faxrlanish, milliy urf-odatlar, qadriyatlarni hurmat qilish;
- kompyuterlar va boshqa telekommunikatsiya vositalaridan foydalana olish;
- rus tilini yaxshi oʻzlashtirgan holda boshqa chet tili-ni mukammal bilish;
- oʻzlashtirilgan nazariy bilimlarni amaliyotga boshlangʻich kasbiy koʻnikmalarni kundalik hayotga, turmushga tatbiq eta olish;
- jismoniy baquvvat, sogʻlom boʻlish, harbiy xizmatga va tezkor tibbiy yordam koʻrsatishga layoqatli boʻlish;
- maʼnaviy, ruhiy, jismoniy jihatdan oʻzini oʻzi doimo takomillashtirish xislatlariga ega boʻlish;
- bilimlarni doimo oshirib, yangilab borishga intilish, oʻquv va mehnat faoliyatiga ijodiy, mustaqil yondashish sifatlariga ega boʻlish;
- huquqiy bilimlar asoslariga ega boʻlish;
- iqtisodiy bilimlar asoslariga ega boʻlish;
- zamonaviy axborot vositalari bilan ishlashning amaliy koʻnikmalarini mustahkam egallash;
- maʼnaviy-axloqiy madaniyatga ega boʻlish;
- siyosiy madaniyatga egalik, fuqarolik burch va masʼuliyat hislari shakllangan boʻlishi;
- ekologik madaniyatga egalik — kasbiy faoliyatda masʼuliyatni his qilish, tabiat muhofazasi sohasidagi bilimlarga ega boʻlish;

- o‘quv fanlari bo‘yicha oliy ta‘lim muassasasida tahsil olish uchun zarur bo‘lgan bilimlar majmuiga ega bo‘lish.

O‘rta maxsus, kasb-hunar ta‘limi muassasalarining bitiruvchilariga o‘rta maxsus, kasb-hunar ta‘limi to‘g‘risida davlat namunasidagi diplom beriladi, unda:

- akademik litseylar uchun — fanlar bo‘yicha o‘qitilgan soha;
- kasb-hunar kollejlari uchun — o‘rta maxsus, kasb-hunar ta‘limidagi tayyorlov yo‘nalishlari, kasblar va ixtisosliklar umumdavlat tasniflagichi (O‘MKHT-TYKIUT)ga muvofiq kasblar va ixtisosliklar bo‘yicha berilgan malaka ko‘rsatiladi.

Diplomlarga o‘zlashtirilgan umumta‘lim va maxsus (kasb-hunar) fanlar (kurslar), soatlar hajmi va ular bo‘yicha baholar (reytinglar), shuningdek, bitiruvchining umumiy reytingi va yakuniy davlat attestatsiyasining natijalari ko‘rsatilgan qo‘shimcha varaqa ilova qilinadi.

Akademik litseyni tugatganlik to‘g‘risidagi diplom oliy ta‘lim muassasasiga o‘qishga kirish va olingan bilimlarni ish faoliyatida ro‘yobga chiqarish huquqini beradi.

Kasb-hunar kollejini tugatganlik to‘g‘risidagi diplom olingan mutaxassislikka muvofiq mehnat faoliyatini amalga oshirish hamda oliy ta‘lim muassasasiga o‘qishga kirish huquqini beradi.

**Iqtidorli bolalar va iste’dodli yoshlar, ularning ilm olishini qo‘llab-quvvatlovchi va rag‘batlantiruvchi jamoat tashkilotlari**

«*Iqtidor*» so‘zi «*kuch-qudrat*», «*qodirlik*» degan ma‘nolarni anglatadi. «*Iste’dod*» so‘zi ham arab tilidan olingan bo‘lib, «*ijodiy qobiliyat*», «*layoqat*», «*talant*» demakdir.

Iqtidorli bolalar va iste’dodli yoshlar deyilganda — qobiliyatli, layoqatli, talantli hamda kuch-qudratli, mahoratli tashkilotchi o‘quvchi yoshlar tushuniladi.

Kadrlar tayyorlash milliy dasturining asosiy maqsadlaridan biri ham iqtidorli bolalar va iste'dodli yoshlarni har tomonlama qo'llab-quvvatlashga qaratilgan bo'lib, dasturda alohida 4.5-bandi «Iqtidorli bolalar va iste'dodli yoshlar» deb ataladi.

Dasturga ko'ra iqtidorli bolalar va iste'dodli yoshlarni aniqlash va o'qitish uslubiyati, psixologik-pedagogik va tashkiliy sharoitlarining yaratilishi, bunda bolalar va yoshlarga oid ma'lumotlarning respublika banki va monitoringini shakllantirish ko'zda tutulgan edi. Maxsus o'quv dasturlari va progressiv pedagogik texnologiyalar ishlab chiqarish uchun eng yaxshi pedagog va olimlar jalb qilinib, o'quv tarbiya jarayonida ularning faol ishtiroki ta'minlandi. Fan va texnikani, siyosat va iqtisodiyotni, madaniyat va san'atni o'rgatish markazlari qabilidagi hamda milliy (elita) ta'lim muasasalari tashkil etildi.

Iqtidorli bolalar va iste'dodli yoshlarni chet ellarda umumiy va kasbiy jihatdan tayyorgarlikdan o'tkazishga qaratilgan sobitqadam faoliyat amalga oshirilmoqda. Akademik litseylarning o'quvchilariga, birinchi navbatda iqtidorli, yuksak iste'dod sohiblariga, bilimning tegishli sohalari va fanning aniq yo'nalishlari bo'yicha o'z tabiiy qobiliyatlarini namoyon etish va rivojlantirish, o'zlaridagi noyob iste'dodini ro'yobga chiqarish uchun keng imkoniyatlar yaratildi.

Mustaqil O'zbekiston Respublikasida bugungi kunda iqtidorli bolalarni hamda iste'dodli yoshlarni qo'llab-quvvatlovchi va rag'batlantiruvchi bir necha jamoat tashkilotlari faoliyat ko'rsatmoqda. Jumladan, «Kamolot» yoshlar ijtimoiy harakati, «Ulug'bek», «Iste'dod» jamg'armalari hamda «UNESCO», «UNISEF» kabi xalqaro jamg'armalarni olishimiz mumkin.

2003-yil 1-iyulda O'zbekiston Respublikasi Prezidentining «Istiqbolli yosh pedagog va ilmiy kadrlar malakasini oshirish va stajirovkasi tizimini takomillashtirish to'g'risida»gi farmoni qabul qilindi. Farmonga

muvofiq «Umid» va «Ustoz» jamg'armalari birlashtirishi asosida «Iste'dod» jamg'armasi tashkil etildi.

Mamlakatimizda tarixiy tub o'zgarishlarni muvaffaqiyatli o'tkazish, ijtimoiy-siyosiy, ma'naviy-iqtisodiy islohotlarni amalga oshirish uchun jahon andozalari darajasida bilim olgan iste'dodli, ruhan barkamol yosh milliy kadrlar zarur. Ular Vatan baxt-saodati yo'lida, uning qudratini mustahkamlash borasida fidokorona mehnat qiladilar, mustaqillik g'oyalariga sadoqatli bo'ladilar. «Iste'dod» jamg'armasi o'z oldiga ana shunday iqtidorli va iste'dodli, o'z Vatanga shon-shuhrat keltira oladigan yosh yigit-qizlarni aniqlash, jahonning yetakchi mamlakatlardagi obro'li oliy o'quv yurtlarida ularning bilim olishini tashkil etish, xalq xo'jaligining nufuzli tarmoqlari uchun yuqori malakali mutaxassislar tayyorlash kabi vazifalarni asosiy maqsad qilib qo'ygan.

«Iste'dod» jamg'armasiga ariza bergan har bir yosh yigit va qiz maxsus tanlov bosqichlarida ko'rik imtihonlaridan o'tadi. Mamlakatimiz oliy o'quv yurtlarining II—III kurs talabalari ta'limning bakalavr bosqichi bo'yicha tanlov saralashlarida, bitirayotgan kurslarning talabalari, oliy ma'lumotli yosh xodimlar magistrlik bosqichi tanlovlarida qatnashishlari mumkin. Shuni alohida ta'kidlash kerakki, ta'lim masalalari bilan shug'ullanuvchi chet el tashkilotlari xorijiy tillar bo'yicha tanlov da'vogarlarining bilimlarini test yo'li bilan sinovdan o'tkazadilar. Bu ishga ta'lim va til o'rganish bo'yicha AKSELS (AQSH), Britaniya kengashi (Buyuk Britaniya), Akademiya almashuvning nemis xizmati (Germaniya) singari xalqaro tashkilotlar, shuningdek mamlakatimizdagi Fransiya, Italiya va Yaponiya elchixonalarining vakillari ham jalb qilingan. Bundan tashqari da'vogarlar kompyuter testlarida tanlagan mutaxassisliklari bo'yicha suhbatdan o'tkaziladi. Shuningdek, ularning O'zbekiston iqtisodiyoti va siyosiy mustaqilligini mustahkamlashga daxldor bo'l-

gan dunyoqarashlari, ma'naviyat va tarix bo'yicha bilimlari ham tekshirib ko'riladi. Barcha sinovlardan muvaffaqiyatli o'tgan yoshlarga xorijiy o'quv yurtlarida bilim olish uchun *Prezident granti* topshiriladi.

Bugun tanlovning 200 nafar g'oliblarining 75%i respublikamizning turli chekkalaridan, olis qishloqlaridan kelgan yoshlar bo'lib (1998-yilda), AQSH oliy o'quv yurtlariga 99 nafar, Buyuk Britaniyaga 35 nafar, Germaniyaga 9 nafar, Fransiyaga 5 nafar va Yaponiyaga 9 nafar talaba o'qishga yuborildi. Hozirgi vaqtda o'zbekistonlik talabalar o'z tanlagan mutaxassisliklari bo'yicha AQSH, Buyuk Britaniya, Germaniya va Yaponiyaning jahonga mashhur oliy o'quv yurtlarida muvaffaqiyat bilan shug'ullanmoqda.

Demak, bugungi kunda «Iste'dod» jamg'armasi-ning hamda boshqa yoshlarni qo'llab-quvvatlovchi tashkilotlarning faoliyati xalqimizning, ayniqsa, iqtidorli va iste'dodli yoshlarimizning ilmiy-intellektual (aqliy) imkoniyatlarini mustahkamlashga, ularning xalqaro obro'-e'tiborini ko'tarishga qaratilgandir.

## **6-§ BO'YICHA EGALLAGAN BILIMLARINGIZNI MUSTAHKAMLASH YUZASIDAN TOPSHIRIQLAR**

**Munosabat bildiring**



**Mehnat huquqi qanday ma'nolarda ishlatiladi?**

**Diqqat qiling!**



1. Ma'lum munosabatlarni (mehnat munosabatlarini) tartibga solib turuvchi huquqiy me'yorlar yig'indisi bo'lib, huquqning alohida bir tarmog'i hisoblanadi.
2. Shaxsning mehnat qilish huquqini bildiradi. Unga asosan har bir shaxs mehnat qilish, erkin kasb tanlash huquqiga ega bo'ladi.

**Shaxsiy fikringiz!**



**Ushbu jadvalni to'ldiring:**

Moddalar	Iqtisodiy huquqlaringiz	Moddalar	Ijtimoiy huquqlaringiz

**?**



1. O'zbekiston Respublikasida ta'limning qanday turlari joriy qilingan?
2. O'MKHT muassasalari bitiruvchilariga qanday umumiy talablar qo'yiladi?

**Erkin fikr yuriting**



O'zbekiston bozor munosabatlariga bosqichma-bosqich o'tayotgan hozirgi sharoitda mehnat qilish, ijtimoiy ta'minot olish, bilim olish huquqlarining qanday ahamiyati bor deb o'ylaysiz?

**Mustaqil bajarish uchun vazifa**



Fuqarolar qariganlarida, mehnat layoqatini yo'qotganlarida, boquvchisidan mahrum bo'lganlarida ijtimoiy ta'minotning qanday turlarini olishga haqli bo'ladilar?

Javobingizni tegishli joriy qonunlardan foydalangan holda hayotiy misollar yordamida yozma shaklda bayon qiling.



## Xotirada saqlang!



- O‘zbekistonning demokratik huquqiy davlat qurish yo‘liga o‘tishi ijtimoiy-iqtisodiy huquqlarga yangicha yondashish, eski andozalardan voz kechish, hamda jahon tajribasini hisobga olishni talab qilmoqda.
- Ko‘pchilik ijtimoiy-iqtisodiy huquqlar: mulkka egalik huquqi; ishsizlikdan himoyalaniş huquqi; mehnatning oqilona shart-sharoitlariga ega bo‘lish huquqi; madaniyat yutuqlaridan foydalanish huquqi va boshqalar O‘zbekiston Respublikasi Konstitutsiyasida mustahkamlandi.
- Bozor iqtisodiyotiga o‘tish birinchi navbatda mulkchilik munosabatlarini shakllantirishni taqozo qiladi.
- Mulk egasi fuqarolarning qonunda belgilangan boshqa huquqlarini buzmasligi lozim.
- Biror kishining xohishiga qarshi holda u mehnatga jalb qilinishi mumkin emas va bu holat aybdor shaxsning qonun oldida javobgarlikka tortilishiga asos bo‘lishi mumkin.
- O‘zbekiston Respublikasi Konstitutsiyasida mustahkamlangan majburiy mehnatning taqiqlanishi siyosiy va fuqarolik huquqlari hamda xalqaro bitim talablariga, Xalqaro Mehnat Tashkiloti (XMT)ning 1930-yildagi 29-sonli, 1957-yildagi 105-sonli «Majburiy mehnatni bekor qilish to‘g‘risida»gi Qarorlariga mos keladi.

### III b o b

## O‘ZBEKISTON FUQAROLARINING ASOSIY BURCHLARI

### 7-§. FUQAROLARNING KONSTITUTSIYAVIY BURCHLARI

O‘zbekiston Respublikasi Konstitutsiyasi alohida bobining 47—52-moddalarida fuqarolarning burchlariga oid konstitutsiyaviy qoidalar berilgan.

Fuqarolarning burchi deganda qonun hujjatlarida belgilangan fuqarolar bajarishi shart bo‘lgan talablar tushuniladi. Burchlarni o‘z ahamiyatiga ko‘ra *konstitutsiyaviy burchlarga, joriy qonun hujjatlarida belgilangan burchlarga* ajratish mumkin.

*O‘zbekiston fuqarolarining Konstitutsiyada belgilangan burchlariga:*

- Konstitutsiya va qonunlarga rioya etish;
- boshqa kishilarning huquqlari, erkinliklari, sha’ni va qadr-qimmatini hurmat qilish;
- O‘zbekiston xalqining tarixiy, ma’naviy va madaniy merosini avaylab-asrash;
- madaniy yodgorliklarni muhofaza qilish;
- atrof tabiiy muhitga ehtiyotkorona munosabatda bo‘lish;
- qonun bilan belgilangan soliqlar va mahalliy yig‘imlarni to‘lash;
- O‘zbekiston Respublikasini himoya qilish;
- qonunda belgilangan tartibda harbiy yoki muqobil xizmatni o‘tash kabilar kiradi.

Har bir fuqaro o‘z burchlarini halol va vijdonan bajarsa, yurtimiz tinch, osoyishta, xavfsiz, farovon bo‘lishiga zamin yaratiladi.

**Konstitutsiya va  
qonunlarga rioya qilish**

O‘zbekiston Respublikasi Konstitutsiyasi va qonunlarida bajarilishi shart bo‘lgan talablar aniq ko‘rsatilgan. Ushbu talablarning o‘z vaqti-

da, halol va vijdonan bajarilishi Vatan tinchligi, millatlar totuvligi, xavfsizligi, osoyishtaligi, taraqqiyoti uchun g'oyat zarurdir. Mana shu burchlarning bajarilishi O'zbekistonda qonuniylik va huquqiy tartiblarni ta'minlash imkonini beradi.

O'zbekiston hududida yashayotgan har bir fuqaro tomonidan Konstitutsiya va qonunlarda belgilangan burchlarning bajarilishi Vatanimizning istiqbolini belgilab beradi. «Demokratik jamiyat qurish uchun, demokratik tamoyillarni to'la qaror toptirish uchun, eng avvalo mo'tabar zaminda tavallud va tarbiya topgan shaxs, o'zini aynan shu yurt farzandi deb biluvchi inson o'z davlati, o'z xalqi oldidagi, uni katta umidlar bilan tarbiya qilgan, voyaga yetkazgan jamiyat oldidagi burchini ado etishi kerak... Har qaysi fuqaro, har birimiz: «Shu davlat, shu jamiyat menga nima berdi?» deb emas, balki «Men o'zim Vatanimga, el-u yurtimga nima berdim?» — deb o'ylashimiz va shu aqida bilan yashashimiz kerak»<sup>1</sup>, deya ta'kidlagan edi Prezidentimiz.

Konstitutsiya va qonunlarda belgilab qo'yilgan burchlarni bajarishi fuqarolar shu davlat Konstitutsiyasi va qonunlarini tan olganligini anglatadi. Mazkur konstitutsiyaviy talab zamirida mamlakatimizda qat'iy qonuniylik tartibini ta'minlash imkonini beradi.

Qonuniylik — davlatda, jamiyatda mustahkam huquqiy tartib, barqarorlik, tinchlik va osoyishtalikning asosidir. Konstitutsiya va qonunlarga rioya etish burchi huquqiy munosabatlarning barcha subyektlari uchun umumiy talabdir. Uning ma'nosi shuki, har bir fuqaro hayot faoliyatining barcha sohalarida Konstitutsiya va qonunlarga muvofiq xatti-harakat qilishdek e'tiqodga ega bo'lishi zarur.

Konstitutsiya va qonunlarga rioya qilish faqat ular-

---

<sup>1</sup> K a r i m o v I. A. «Buyuk kelajagimizning huquqiy kafolati». — T.: «Sharq» 1993, 27-bet.

ning qoidalarini buzmaslik emas, fuqarolar o'z faoliyati, hayotini Konstitutsiya va qonunlarda mustahkamlangan tamoyil va asoslarni, qonun me'yorlarini real voqelikka aylantirishga yordam berish ham demakdir.

Konstitutsiya va qonunlarda jamiyat va davlatning ijtimoiy-siyosiy asoslari, mamlakatdagi huquqiy tartibot, ijtimoiy munosabatlarning butun tizimi o'z ifodasini topgan.

Shu sababli, ularga har bir fuqaro qat'iy rioya etishga majbur. Bu qoidalarni buzish avvalambor fuqaroning o'ziga, davlatga, jamiyatga zarar yetkazadi. «Fuqarolar Konstitutsiya va qonunlarga rioya etishga, boshqa kishilarning huquqlari, erkinliklari, sha'ni va qadr-qimmatini hurmat qilishga majburdir» (Konstitutsiya, 48-modda).

**Tarixiy, ma'naviy  
va madaniy merosni  
avaylab-asrash**

O'zbek xalqi boy tarixiy, ma'naviy va madaniy meros sohibidir. Shu boisdan Konstitutsiyada, «Fuqarolar O'zbekiston xalqining tarixiy, ma'naviy va madaniy merosini avaylab-asrashga majburdir» — deb belgilangan. O'zbek xalqi o'zi yaratgan tarixiy, ma'naviy, madaniy boyliklarini to'la saqlash va asrash imkoniyatiga ayrim davrlarda ega bo'lmagan. Ayniqsa, sobiq sho'rolar davrida xalqimizning juda ko'p tarixiy, ma'naviy va madaniy boyliklari talon-taroj qilingan, xorijiy davlatlarga olib ketilgan, o'zaro va bosqinchilik urushlarida yakson qilingan. Asrlar bo'yi shakllangan o'zbek davlatchiligi, huquqiy madaniy meros namunalari sobiq sho'rolar davrida e'tiborsiz qoldirilgan.

Bugungi kunda xorijiy davlatlarga olib ketilgan xalqimizning bebaho boyliklarini qaytarish masalalari bilan maxsus komissiya shug'ullanmoqda.

O'zbekistonning har bir fuqarosi xalqimizning tarixiy, madaniy, huquqiy boyliklar xazinasini ko'z qorachig'iday asrashi, uni kelgusi avlodlarga yetkazib berishni o'zi uchun farz, ham qarz deb his qilishi zarur.

**Atrof tabiiy muhitga  
ehtiyotkorona  
munosabatda bo'lish**

O'zbekistonda inson va fuqarolar atrof tabiiy muhitga ehtiyotkorona munosabatda bo'lishga majburligi Kons-

titutsiyaning 50-moddasida mustahkamlangan. Inson tabiatning eng muqaddas boyligidir. Inson salomatligi, uning taqdiri, hayoti uchun tabiiy muhit nihoyatda zarurdir. Shu boisdan bu muqaddas burchni bajarish har bir fuqarodan aql, zakovat va tabiatga mehr, muruvvat talab qiladi. Tabiiy muhit qanchalik sog'lom bo'lsa insonlar, ayniqsa yoshlar jismonan sog'lom, baquvvat, kuchli, shijoatli bo'lib kamol topadi.

Fan va texnikaning taraqqiyoti avj olgan hozirgi kunda insoniyatning hayot kechirish maskani bo'lmish tabiiy muhit alohida muhofazaga muhtoj. Atrof tabiiy muhitga ehtiyotkorona munosabatda bo'lish, asrash «Ekosan», «Orolni qutqarish» jamoat birlashmalari va davlatning maxsus organlari tizimi tomonidan tashkil qilinadi. Har bir fuqaro o'zi yoki mana shu kabi jamoat tashkilotlarining faoliyatlarida, davlatning tabiatni muhofaza qilish organlari faoliyatida faol qatnashib, o'zining Konstitutsiyaviy burchini ado etishi zarur. Konstitutsiyada belgilangan bu qoidani amalga oshirish, bu burchning mazmunini ochib berish uchun muhim joriy qonunlar ham qabul qilingan.

Mustaqillik yillarida «O'zbekiston Respublikasining tabiatni muhofaza qilish to'g'risida»gi, «Suv va suvdan foydalanish to'g'risida»gi, «Davlat sanitariya nazorati to'g'risida»gi, «Alohida muhofaza qilinadigan tabiiy hududlar to'g'risida»gi, «Atmosfera havosini muhofaza qilish to'g'risida»gi muhim qonunlar, shuningdek Yer kodeksi qabul qilindi. Mazkur qonunlar fuqarolarning tabiat bilan bo'ladigan muloqotdagi majburiyatlarini belgilaydi. Tabiatga oid qonunlarda belgilangan burchlarni bajarish, ularning buzilishini oldini olish har bir fuqaroning muqaddas burchidir.

Tabiatni qanchalik yaxshi asrasak, yashash hu-

quqimizni, sog‘liqni saqlash huquqlarimizni ta‘minlash imkoni kuchayadi. Tabiiy muhit sog‘lom bo‘lsa insonlarning umri uzayadi, salomatligi mustahkamlanadi.

**Soliq va mahalliy  
yig‘imlarni to‘lash  
burchi**

Fuqarolarning konstitutsiyaviy burchlaridan yana biri ularning qonun yo‘li bilan belgilangan soliqlar va

mahalliy yig‘imlarni to‘lashga majburligidir (51-modda). Soliqlar yuridik shaxslar va fuqarolarning davlatga to‘laydigan majburiy to‘lovlari bo‘lib, uning ijtimoiy-iqtisodiy mohiyati va ahamiyati shu jamiyatning ijtimoiy-iqtisodiy, siyosiy tizimi, davlatning tabiati va vazifalariga ko‘ra belgilanadi.

Fuqarolar to‘laydigan soliqlar davlat rivojlanishining turli davrlarida respublika hal qiladigan masalalarga qarab o‘zgarib boradi. Fuqarolardan soliq undirish tartibi va turlari 2007-yil 25-dekabrda qabul qilingan O‘zR Soliq kodeksida belgilangan. Ushbu Kodeks soliqlarni va Davlat budjetiga, maqsadli davlat jamg‘armalariga yo‘naltirilgan boshqa to‘lovlarni belgilash, hisoblash va to‘lash, shuningdek soliq majburiyatlarining ijrosi bilan bog‘liq munosabatlarni tartibga soladi. U soliq to‘lovchilarning huquqlari hamda erkinliklarini kafolatlaydi, soliq ishlarini yuritish tartibotini va soliq qonunchiligini buzganlik uchun javobgarlikni tartibga soladi.

Soliq munosabatlarining subyektlari sifatida soliq to‘lovchilar (yuridik va jismoniy shaxslar) hamda vakolatli organlar maydonga chiqadilar.

Soliq to‘lash manbayi shaxslarning pul yoki natura tarzida olgan daromadlari hisoblanadi. Bu soliqlar ish haqi to‘lovlari, mukofotlar va boshqa daromadlardan; fuqarolarning dehqon xo‘jaligini yuritishdan olinadigan daromadlaridan; O‘zbekiston Respublikasida doimiy istiqomat joyiga ega bo‘lmagan shaxslarning O‘zbekistondagi manbalardan oladigan daromadlari-

dan tashkil topadi. Bu soliq va yig'implarni undirishni davlat idoralari tomonidan O'zbekiston Davlat soliq qo'mitasi, moliya vazirligi organlarining o'zini o'zi boshqarish idoralari amalga oshiradi.

Soliqlarni o'z vaqtida to'lamagan, to'lashdan bo'yin tovlagan, daromadini yashirgan va soliq to'g'risidagi qonunlarni buzgan shaxslar uchun moddiy (jarima to'lash, yashirgan yoki kamaytirib ko'rsatgan daromadni undirish), ma'muriy (jarima to'lash) va qonunda ko'rsatilgan hollarda jinoiy javobgarlik ham belgilangan. Shuni qayd etish kerakki, fuqarolardan undirilgan soliqlar va to'lovlar fuqarolarning ehtiyojlari uchun xalq ta'limiga, sog'liqni saqlashga, ijtimoiy yordamning boshqa turlariga sarf etiladi.

Soliqlar va yig'implar davlatning eng muhim atributlaridan biri bo'lib, u davlat mahkamalarini saqlash, hokimiyatni mustahkamlash, mudofaa va ijtimoiy sohalar: maktablar, shifoxonalar xodimlarini maosh bilan ta'minlash uchun zarurdir.

## **7-§ BO'YICHA EGALLAGAN BILIMLARINGIZNI MUSTAHKAMLASH YUZASIDAN TOPSHIRIQLAR**

Quyidagi konstitutsiyaviy qoida zamirida qanday maqsad yotibdi?

**O'qing**

**48-modda:**

Fuqarolar Konstitutsiya va qonunlarga rioya etishga, boshqa kishilarning huquqlari, erkinliklari, sha'ni va qadr-qimmatini hurmat qilishga majburdirlar.

**E'tibor bering!**

«Qonuniylik va huquq-tartibot tantana qilmasa, shaxsning huquqlari va erkinliklari, qattiq intizom, ichki uyushqoqlik va mas'uliyat ustuvor bo'lmasa, qonunlar va an'analar hurmat qilinmasa, huquqiy davlatni tasavvur etib bo'lmaydi».

**I.A. Karimov**



1. Burch deganda nimani tushunasiz?
2. Jamiyat va davlat oldidagi burchingizni bilasizmi?
3. Agar Konstitutsiyada belgilangan burchlarni bajarmasangiz, bu qanday oqibatlariga olib kelishini tasavvur qila olasizmi?
4. Fuqarolar majburiyatlarining Konstitutsiyaviy darajada mustahkamlanishining boisi nimada deb o'ylaysiz?
5. Ushbu mavzu bo'yicha tanishgan qonunlaringizga sizning munosabatingiz qanday?

### **8-§. VATANNI HIMOYA QILISH VA HARBIY XIZMATNI O'TASH BURCHLARI**

O'zbekiston Respublikasini himoya qilish har bir fuqaroning Konstitutsiyada belgilangan asosiy burchidir. O'zbekiston Respublikasini o'zining Vatani deb hisoblagan har bir inson uni himoya qilishi nihoyatda zarur va muqaddas tabiiy talabdir. Mazkur burchning mazmuni:

**birinchidan**, O'zbekiston Respublikasi mustaqilligini himoya qilish;

**ikkinchidan**, O'zbekiston Respublikasini hududiy yaxlitligini himoya qilish;

**uchinchidan**, respublikaning barcha sohalar bo'yicha manfaatlarini himoya qilish;

**to'rtinchidan**, O'zbekiston aholisining tinch va osoyishta, xavfsiz va farovon hayot kechirishi uchun zarur bo'lgan siyosiy, iqtisodiy, huquqiy, madaniy, harbiy tadbirlarida faol qatnashish kabi talablarni o'z ichiga oladi.

Vatanni himoya qilishdan maqsad O'zbekiston Respublikasiga qarshi chetdan qilinadigan hujumning oldini olish va har qanday tajovuz qilingan sharoitda qurolli kuchlar yordamida himoya qilishni amalga oshirish uchun zarur shart-sharoitlarni yaratishdir.



Vatanni himoya qilish burchining mazmun va mohiyati O‘zbekiston Respublikasining Konstitutsiyasi va unga asoslanib qabul qilingan «Mudofaa to‘g‘risida»gi qonundan kelib chiqadi. «Mudofaa to‘g‘risida»gi qonun:

- O‘zbekiston Respublikasi mudofaasi asoslarini;
- mudofaani tashkil etish qoidalarini;
- mudofaa to‘g‘risidagi qonunlarni;
- mudofaa bo‘yicha Oliy Majlis vakolatlarini;
- mudofaa bo‘yicha Prezident vakolatlarini;
- mudofaa bo‘yicha Vazirlik va idoralarning vakolatlarini;
- mahalliy hokimiyat va ijroiya organlarining vakolatlarini;
- Qurolli Kuchlar haqidagi qoidalarni;
- urush holati;
- harbiy holat;
- safarbarlik;
- hududiy mudofaa;
- fuqaro va mansabdor shaxslarning mudofaa to‘g‘risidagi qonunlarni bajarmaganlik uchun javobgarlik tartiblarini belgilab beradi.

Fuqarolarning bu asosiy burchi boshqa davlatlarning doimiy yoki vaqtincha O‘zbekistonda yashab turgan fuqarolari va fuqaroligi bo‘lmagan insonlarga taalluqli emas. Chunki ular O‘zbekiston Respublikasida harbiy xizmatga yoki harbiy tayyorgarlikka jalb qilinmaydi

Vatanni himoya qilish burchini bajarmaslik O‘zbekiston qonunlariga muvofiq yuridik javobgarlikka asos bo‘ladi. O‘zR Jinoyat kodeksining 157-moddasida Vatanga xoinlik qilish, 158-moddasida O‘zR Prezidentiga tajovuz qilish, 159-moddasida O‘zbekiston Respublikasining Konstitutsiyaviy tuzumiga tajovuz qilish, 161-moddasida qo‘poruvchilik, 162-moddasida davlat sirlarini oshkor qilish O‘zbekiston davlatiga qarshi qaratilgan og‘ir jinoyatlar ekanligi belgilangan.

**Harbiy xizmatni  
o'tash burchi**

Harbiy xizmatni o'tash har bir O'zbekiston fuqarosining muqaddas burchidir. Bu

burchning mazmuni «Umumiy harbiy majburiyat va harbiy xizmat to'g'risida»gi, hamda «Muqobil xizmat to'g'risida»gi O'zbekiston qonunlarida aniq belgilangan. **Umumiy harbiy xizmatni o'tash burchi:**

**birinchidan**, o'z Vatanini qurolli himoya qilish uchun majburiy harbiy tayyorgarlikdan o'tish;

**ikkinchidan**, O'zbekiston qurolli kuchlarini harbiy xizmatchilar bilan ta'minlash va harbiy xizmatchilar zaxirasini yaratish;

**uchinchidan**, fuqarolarni harbiy xizmatga tayyorlash;

**to'rtinchidan**, chaqiruv uchastkalarida qayd etilish, zaxirada xizmat qilish;

**beshinchidan**, harbiy ro'yxatdan o'tish qoidalariga rioya qilish;

**oltinchidan**, umumiy harbiy ta'lim olishni o'z ichiga oladi.

Harbiy xizmat O'zbekiston Respublikasi fuqarolarining O'zbekiston Respublikasi Qurolli Kuchlari va boshqa harbiy tuzilmalarida umumiy harbiy majburiyatni bajarishlari hamda bitimga binoan xizmat qilishlari borasidagi davlat xizmatining alohida turidir.

**Harbiy xizmatning:**

— muddatli harbiy xizmat;

— askar, dengizchi; serjant va starshina, shuningdek praporshik va michman lavozimlarida bitimga binoan harbiy xizmat;

— xotin-qizlar bitimga binoan o'taydigan praporshik va michman, shuningdek askar va serjant lavozimlaridagi harbiy xizmat;

— harbiy o'quv yurtlarining kursanti (tinglovchisi) sifatida o'taladigan harbiy xizmat;

— ofitserlar lavozimlarida o'taladigan harbiy xizmatdan iborat turlari joriy etilgan.

O‘zbekiston Respublikasi Prezidentining 2008-yil 20-noyabrda «Fuqarolar tomonidan O‘zbekiston Respublikasi Qurolli Kuchlari safida muddatli harbiy xizmat o‘tash sharoitlarini takomillashtirish chora-tadbirlari to‘g‘risida»gi farmoni bilan harbiy xizmatga chaqiruv yiliga bir marta, ya’ni fevral-mart oylarida amalga oshirilishi belgilandi. Ta’kidlash joizki, O‘zbekiston Respublikasining «Umumiy harbiy majburiyat va harbiy xizmat to‘g‘risida»gi yangi tahrirdagi qonuniga (2002-yil 12-dekabr) muvofiq harbiy xizmat o‘tashning quyidagi muddatlari belgilandi:

safdor va serjant lavozimida muddatli harbiy xizmat o‘taydigan harbiy xizmatchilar tarkibi uchun — o‘n ikki oy (oliy ma’lumotga ega shaxslar uchun — to‘qqiz oy);

ofitser lavozimida muddatli harbiy xizmat o‘tashga chaqirilgan ofitserlar tarkibi uchun — to‘qqiz oy.

Tinchlik vaqtida zaxiradagi xizmat-o‘quv mashqlari yig‘inida qatnashish, urush vaqtida O‘zbekiston Respublikasi Qurolli Kuchlariga safarbar etilganida harbiy xizmatga majburlardan harbiylar ro‘yxatida qayd etilgan ixtisoslari bo‘yicha talab qilinadigan bilim, ko‘nikma va mahoratni saqlab qolish hamda takomillashtirishdan iboratdir.

Harbiy xizmatga birinchi marta chaqirilgan yoki ixtiyoriy ravishda harbiy xizmatga kirgan O‘zbekiston Respublikasining fuqarolari O‘zbekiston Respublikasining xalqiga va Prezidentiga sodiq ekanliklari to‘g‘risida Harbiy qasamyod qabul qiladilar.

Muqaddam Harbiy qasamyod qabul qilmagan harbiy xizmatga majburlar yig‘inga yoki safarbarlikka chaqirilgan vaqtda Harbiy qasamyod qabul qiladilar. Muqobil xizmat O‘zbekiston Respublikasining «Muqobil (mehnat) xizmat to‘g‘risida»gi Qonuni bilan tartibga solib boriladi.

Muqobil xizmat — O‘zbekiston Respublikasi fuqa-

rolari o‘taydigan davlat xizmatining alohida turidir. Bu xizmat fuqaroning korxonalaridagi, muassasalardagi, xalq xo‘jaligi tashkilotlaridagi, yuqori malaka talab etilmaydigan (yordamchi) ishlarni yoki o‘z malakasiga mos ishlarni, shu jumladan falokat, fojia, tabiiy ofat va boshqa favqulodda holatlarning oqibatlarini bartaraf etishga oid ishlarni bajarish bilan bog‘liqdir. Muqobil xizmat fuqarolarni harbiy ishga o‘rgatishni hamda O‘zbekiston Respublikasi Qurolli Kuchlari uchun zaxiradagi jangchilar tayyorlashni ko‘zda tutadi.

### **Muqobil xizmatni o‘tash huquqi quyidagilarga beriladi:**

O‘zbekiston Respublikasining 18 yoshdan 27 yoshgacha bo‘lgan, harbiy hisobda turadigan, muddatli harbiy xizmatga chaqirilishi lozim bo‘lgan fuqarolari, basharti ular:

— xizmatga chaqirilayotgan shaxsdan tashqari 16 yoshga to‘lmagan to‘rt va undan ortiq bolali oiladan bo‘lsalar;

— harbiy xizmatni o‘tash davrida nogiron bo‘lib qolgan ota-onasi yoki aka-uka (opa-singil) lari bo‘lsa;

— diniy e‘tiqodi qurol ishlatishga va Qurolli Kuchlarda xizmat qilishga yo‘l qo‘ymaydigan ro‘yxatdan o‘tgan diniy tashkilotlarning a‘zosi bo‘lsalar, muqobil xizmatni o‘tash huquqiga ega bo‘ladilar.

O‘zbekiston Respublikasi Vazirlar Mahkamasi muqobil xizmatni o‘tash huquqiga ega bo‘lgan fuqarolarning o‘zga toifalarini ham belgilashi mumkin:

— muqobil xizmatni o‘tayotgan shaxslar muqobil xizmat xizmatchilari deb ataladilar.

Harbiy xizmatni o‘tash burchini jinoyatkorona buzgan fuqarolarga O‘zbekiston Respublikasi Jinoyat kodeksining XXI, XXII, XXIII boblarida ko‘rsatilgan jinoiy javobgarlik belgilanadi.

Shunday qilib fuqarolarning burchlari xalq manfaatli, har bir fuqaro huquqlari va erkinliklarini ta‘minlash, davlat manfaatlarini himoya qilish maqsadida

halol va vijdonan bajarilishi kerak. Fuqarolar o'z burchlarini ongli ravishda amalga oshirsalar, bu ularning yuksak huquqiy madaniyatga ega ekanligini, o'z xalqi va davlatini yuksak qadrlashini ko'rsatadi.

## 8-§ BO'YICHA EGALLAGAN BILIMLARINGIZNI MUSTAHKAMLASH YUZASIDAN TOPSHIRIQLAR

1. Vatanni himoya qilish burchining mazmuni qanday talablarni o'z ichiga oladi?
2. Umumiy harbiy majburiyatning maqsadi nimadan iborat?
3. Umumiy harbiy majburiy xizmatning mazmunini nima tashkil etadi?
4. Kimlar muddatli harbiy xizmatga chaqiriladi?
5. Fuqaro harbiy xizmatdan bo'yin tovlagan taqdirda qaysi qonunlar asosida javobgarlikka tortiladi?
6. Qanday hollarda fuqaro harbiy xizmatga yaroqsiz deb topiladi?
7. Qonunda belgilangan qanday talablar asosida fuqaro muqobil xizmatni o'tash huquqiga ega bo'ladi?

?



**Qiyosiy  
tahlil**



Harbiy xizmat va muqobil xizmat o'rtasidagi farqni tushuntirib bering.

**Siz bilasizmi?**



O'zbekiston Respublikasi Konstitutsiyasi 52-moddasi asosida qanday qonun qabul qilingan?

**Matn  
tayyorlang**



«Vatanni sevmoq iymondandur», degan hikmatli so'zning mohiyatini ochib beruvchi matn tayyorlang. Tegishli adabiyotlardan foydalanib, xulosalar chiqaring.

## IV b o b

### HUQUQ VA ERKINLIK LARNING KONSTITUTSIYAVIY KAFOLATLARI

#### 9-§. INSON HUQUQ VA ERKINLIK LARINING TA'MINLANISHI

<b>Huquq va erkinliklar kafolatlari tushunchasi</b>
---

Davlat mustaqilligini qo'lg'a kiritib, O'zbekiston rivojlangan huquqiy demokratik

davlatni barpo qilish va adolatli fuqarolik jamiyatni shakllantirish yo'lini tanladi.

Demokratik fuqarolik jamiyatni qurishni maqsad qilib qo'ygan har qanday davlatning demokratlashuviga xos xususiyatlarni ko'rsatuvchi shartlaridan biri— inson huquq va erkinliklarining qonunlarda to'liq belgilanishi hamda ularning ta'minlanishi uchun shartsharoitlarning yaratilishi bilan belgilanadi. O'zbekistonda huquqiy demokratik davlatni qurishdan asosiy maqsad — ushbu davlatda yashovchi har bir fuqaroning huquq va erkinliklarini to'la ta'minlashdan iboratdir.

Tarixiy tajriba shuni ko'rsatadiki, inson huquq va erkinliklarini Konstitutsiya va qonunlarda mustahkamlanishi muhim ahamiyatga egadir, ammo ularni amalga oshirishning kafolatlangan, himoyalangan imkoniyatlari bo'lmasa, ular quruq gapligicha qolib ketadi. Bunga yorqin misol totalitar tuzum hukmronlik qilgan sobiq ittifoq qonunlarida ham fuqarolarning ko'plab huquq, erkinliklari juda chiroyli qilib yozib qo'yilgan edi. Biroq ular hayotda amalga oshmay qoldi. Chunki kommunistik mafkura ko'p jihatdan sinflar, davlat to'g'risida qayg'urib, «inson»ni esdan chiqargan edi.

O'z istiqlol va erkin taraqqiyot yo'lini tanlab olgan O'zbekistonda qisqa davr ichida insonning huquq va erkinliklarini to'la amalga oshirish yo'li-

da diqqatga sazovor ishlar qilindi. Inson manfaatlarini ta'minlash davlatimizning eng ustuvor vazifalaridan biriga aylandi.

Mamlakatimizda insonning huquq va erkinliklari to'g'risida 100 dan ortiq qonunlar, 200 dan ortiq qonunosti aktlari qabul qilindi.

Inson huquqlarini himoya qilish Konstitutsiyaning bosh g'oyasi va maqsadi hisoblanadi.

Inson huquq va erkinliklari kafolatlarining mazmun-mohiyatini to'la tushunish uchun avvalo kafolat tushunchasiga to'xtalmoq zarurdir. O'zbek tilining izohli lug'atida bayon etilishicha: «*Kafolat*» so'zi bu — mas'uliyatni, javobgarlikni o'z zimmasiga olgan holda, ishontirish, kafillik, ta'minlash» ma'nosini bildiradi.

Kafolat — bu fuqarolarga qonunda belgilab qo'yilgan huquq va erkinliklarni amalga oshirilishini ta'minlashga yordam beradigan vositalar, usullar va shart-sharoitlardir.

Inson huquq va erkinliklarining huquqiy kafolatlari deyilganda shaxslarning Konstitutsiyada belgilab qo'yilgan huquq va erkinliklarini amalda haqiqiy bajarish uchun zarur sharoit va barcha imkoniyatlarni yaratish tushuniladi.

Kafolat, kafolatlash bu — Konstitutsiya, qonunlarda ko'rsatilgan imkoniyatlarni hayotda amalga oshirish, huquq va erkinliklarga ega bo'lish demakdir. Fuqarolarning huquq va erkinliklarini kafolatlash Konstitutsiyada ko'rsatilgan huquq va erkinliklarga egalik qilish bilangina cheklanmasdan, ulardan to'liq foydalanish va ularni har qanday noqonuniy buzilishdan muhofaza qilish hamdir.

Konstitutsiyamizning mohiyati insonga munosib hayot sharoitlarini yaratish, uni baxtli qilishdan iborat. U jamiyat va uning a'zolari oldiga buyuk maqsadlar qo'yadi. Ana shu ezgu maqsadga erishishning yo'llarini o'zida mujassam etadi. Shu o'rinda davlat, oila va jamiyat manfaatlari, sodda qilib aytsak, davlat va

inson manfaatlari uyg'unlashib borgan sari jamiyat rivojlanib, olg'a siljib boradi.

Konstitutsiyaning asosiy huquqiy hujjat sifatidagi qimmatini shundaki, u jamiyat a'zolarining tengligini qayd etadi, unga kafolatlar beradi. Huquqiy kafolatning mohiyati davlat, uning organlari va mansabdor shaxslar fuqarolarning huquqlarini va erkinliklarini amalga oshirish uchun shart-sharoit yaratish, ularni amalga oshirish uchun doimiy ravishda zarur vositalar bilan ta'minlanishda ifodalangan burchida namoyon bo'ladi.

O'zbekiston Respublikasi Konstitutsiyasi insonlarga ma'lum huquq va erkinliklarini mustahkamlab berish bilan birga ularni to'liq amalga oshirish uchun:

- iqtisodiy;
- siyosiy va huquqiy kafolatlar bilan ta'minlaydi.

Iqtisodiy sohadagi kafolatlar shundan iboratki, O'zbekiston Respublikasi Konstitutsiyasi va qonunlarida ko'rsatilgan, jamiyatning iqtisodiy negizini tashkil etuvchi mulk shakllarining xilma-xilligidir. Hamda barcha mulk shakllarining teng huquqliligini va huquqiy jihatdan barobar muhofaza etilishini kafolatlaydi.

Siyosiy huquq va erkinliklarning kafolatlanganligi shundan iboratki, Konstitutsiyaga binoan xalq davlat hokimiyatining birdan bir manbasi ekanligi; davlat hokimiyati tizimi hokimiyatning qonun chiqaruvchi, ijro etuvchi va sud hokimiyatiga bo'linish prinsipiga asoslanganligi; O'zbekistonda ijtimoiy hayotning siyosiy institutlar, mafkuralar va fikrlarning xilma-xilligi asosida rivojlanishi; hech qaysi mafkura davlat mafkurasi sifatida o'rnatilishi mumkin emasligidir.

**Huquq va erkinliklar  
kafolatlarining o'ziga  
xos xususiyatlari**

O'zbekiston Respublikasi Konstitutsiyasida mustahkamlangan huquq va erkinliklar kafolatlarining o'ziga

xos jihatlari nimalardan iborat?

**Birinchi**dan, O'zbekiston Respublikasi Konstitu-



tsiyasida fuqarolarning huquq va erkinliklarini belgilashda va kafolatlashda Inson huquqlari umumjahon Deklaratsiyasi va xalqaro huquqning g'oyalari asos qilib olindi. Ushbu xalqaro hujjatlarga asosan fuqarolarning ko'plab huquqlari, ayniqsa, tabiiy-shaxsiy huquqlari hech kim (davlat, monarx, prezident va boshqalar) tomonidan berilmaydi. Kafolat ushbu huquq va erkinliklarning amalga oshishini, ro'yobga chiqishini ta'minlashdir. Shuning uchun ham Konstitutsiyamizga murojaat etsak, inson va fuqarolarning huquq va erkinliklari asosiy o'ringa ko'tarilgan hamda ularning kafolatlanishiga alohida e'tibor berilgan.

**Ikkinchidan**, bizning Konstitutsiyamiz bo'yicha davlat biron sinf, tabaqa yoki guruhning manfaatlari uchun emas, balki butun xalq manfaati uchun xizmat qiladi.

**Uchinchidan**, O'zbekiston Respublikasi Konstitutsiyasi va qonunchiligida belgilangan demokratik va insonparvarlik ruhi bilan sug'orilgan asosiy prinsiplardan biri bu — hokimiyatlar taqsimlanish prinsipidir. Hokimiyatlarning taqsimlanish prinsipi — demokratik davlatga xos xususiyat bo'lib inson va fuqarolar huquqlarini kafolatlashning muhim shartidir.

**To'rtinchidan**, mulkchilik, mulkchilikka munosabat masalasida ham fuqarolarning huquqlari xalqaro huquq normalariga mos kafolatlangan.

Sobiq ittifoq Konstitutsiyasiga binoan ishlab chiqarish vositalari, jamiki moddiy boyliklar davlat mulki hisoblanardi. Fuqarolarning xususiy mulkka ega bo'lishi, boylik orttirishi qat'iy man qilib qo'yilgan edi. Demokratik O'zbekiston Respublikasi Konstitutsiyasida esa «Har bir shaxs mulkdor bo'lishga haqli» (37-modda) ekani, O'zbekiston iqtisodiyoti bozor munosabatlariga asoslanishi, uning negizini xilma-xil mulk tashkil etishi, barcha mulk shakllarining teng huquqqa ega ekaniga kafolat beriladi. Mamlakatimizda ishbilarmonlik, tadbirkorlik va tashabbus-

korlik harakatiga keng yo‘l ochildi va bosqichma-bosqich mulkdorlar sinfi vujudga kelmoqda.

**Inson huquqlari va erkinliklari kafolatlari to‘g‘risidagi Konstitutsiyaviy qoidalar**

O‘zbekiston jahonning taraqqiy etgan va demokratiya yo‘lidan borayotgan davlatlar tajribalaridan kelib chiqib, umume’tirof etilgan xalqaro

huquq me’yorlari talablarini tan olib, qonunchilikning bu tarmog‘ida aktiv faoliyat olib bormoqda.

Respublikamiz taraqqiyot sari rivojlanib borayotgan mamlakatdir. Uning taraqqiyoti fuqarolarning huquq va erkinliklari hajmining kengayishi, ularni amalga oshirish va samarali himoya qilish kafolatlarining mustahkamlanishi bilan bog‘liq holda kechadi.

Fuqarolarning huquqlarini ta’minlashda O‘zbekiston Respublikasi Konstitutsiyasining «Inson huquq va erkinliklarining kafolatlari» deb nomlangan X bobi, 43—46-moddalari muhim ahamiyatga egadir.

Konstitutsiyamizda inson huquq va erkinliklarining huquqiy kafolatlari to‘g‘risidagi konstitutsiyaviy qoidalar mazmunida asosan inson manfaati ustuvor bo‘lib, uning qat’iy izchil amalga oshirilishi muhim o‘rin tutadi. O‘zbekiston Respublikasi Konstitutsiyasining 43-moddasida: «Davlat fuqarolarning Konstitutsiya va qonunlarda mustahkamlangan huquqlari va erkinliklarini ta’minlaydi», deyiladi. Bu konstitutsiyaviy qoidaning ahamiyati shundan iboratki, huquqiy demokratik davlat qurayotgan O‘zbekiston davlati o‘zining qonun chiqaruvchi organi hisoblangan Respublika Oliy Majlisi orqali inson va fuqarolarning huquq va erkinliklarining huquqiy kafolati hisoblangan umume’tirof etilgan xalqaro huquq me’yorlari talablariga mos me’yoriy hujjatlar qabul qiladi.

Konstitutsiyaning 44-moddasida «Har bir shaxsning o‘z huquq va erkinliklarini sud orqali himoya qilish, davlat organlari, mansabdor shaxslar, jamoat birlashmalarining g‘ayriqonuniy xatti-harakatlari ustidan

sudga shikoyat qilish huquqi kafolatlanadi», deyilgan. Bu qoidaga ko'ra, fuqarolar Konstitutsiyada belgilangan o'zlarining huquq va erkinliklari buzilgan deb hisoblasalar, o'z huquqlarini sud orqali himoya qilishlari mumkin. Bu fuqarolarning buzilgan huquqlarini tiklovchi eng samarali vosita hisoblanadi. Sudga shikoyat qilish huquqi shaxsning huquq va erkinliklarining kafolati hisoblanib, sud organlarigina Konstitutsiyaga asosan boshqa davlat hokimiyati organlaridan, jamoat birlashmalaridan xoli, mustaqil harakat qiluvchi va faqat qonunga bo'ysunuvchi organdir.

Mamlakatimizda sud tizimi islohotlari sohasida ko'plab ishlar qilinmoqda. Bu haqda Prezidentimiz shunday degan edi: «Xalq sudni faqat odamlarni qoralaydigan, jazolaydigan organ deb emas, aksincha, ularning haq-huquqlari va manfaatlarini himoya qiladigan organ deb bilishi kerak»<sup>1</sup>.

«Fuqarolarning huquq va erkinliklarini buzadigan xatti-harakatlar va Qaror ustidan shikoyat qilish to'g'risida»gi 1995-yil 30-avgustdagi Qonun esa faqat O'zbekiston Respublikasi fuqarolarining sudga shikoyat qilish huquqini mustahkamlamasdan, balki chet el fuqarolarining hamda fuqaroligi bo'lmagan shaxslarning ham O'zbekiston Respublikasi sud organlariga murojaat qilish huquqini belgilagan.

Konstitutsiyaviy kafolatning yana bir qoidasi Konstitutsiyamizning 45-moddasida belgilangan bo'lib, «Voyaga yetmaganlar, mehnatga layoqatsizlar va yolg'iz keksalarning huquqlari davlat himoyasidadir», deyiladi.

O'zbekiston Respublikasi faqat huquqiy davlatgina emas, balki insonparvar demokratik huquqiy davlat qurishni maqsad qilib qo'ygan. Bu esa jamiyatdagi ayrim toifadagi, himoyaga muhtoj, zaif kishilar davlatning himoyasida bo'lishini taqozo etadi.

---

<sup>1</sup> K a r i m o v I. A. Bunyodkorlik yo'lidan. 4-jild. T.: «O'zbekiston», 1996, 186-bet.

Milliy davlatchilikni shakllantirish, demokratik islohotlarni amalga oshirish, jamiyatni bir holatdan ikkinchi holatga o'tkazish hamda bozor munosabatlarga o'tish davrida ijtimoiy muammolarga alohida e'tibor berish zarur. Jahondagi ko'pgina mamlakatlarning ijtimoiy rivojlanish sohasidagi g'oyat boy tajribasi shundan dalolat beradi.

O'zbekistonning davlat qurilishi va iqtisodiyotini isloh qilish dasturining besh tamoyilidan biri — kuchli ijtimoiy himoya hisoblanadi.

O'zbekiston Respublikasi Jinoyat kodeksida yoshlar huquqlarining jinoiy huquqiy kafolatlari belgilangan. JKning oltinchi bo'limi «Voyaga yetmaganlar javobgarligining xususiyatlari» deb ataladi. Unga ko'ra turli sabablar bilan voyaga yetmaganlar huquqbuzarliklar sodir etgan hollarda ularga nisbatan majburiy-tarbiyaviy ta'sir choralarini qo'llash, ya'ni jarima solish, ijtimoiy foydali mehnatga jalb qilish; axloq tuza-tish ishlariga yuborish, ozodlikdan mahrum qilish, maxsus o'quv-tarbiya joylariga joylashtirish, hibsga olish faqat sudning hukmiga yoki qaroriga asosan amalga oshiriladi.

Davlatimizda ijtimoiy himoyaning aniq chora-tadbirlari ishlab chiqilib, amalga oshirilmoqda. Bunda, mahalliy hokimiyat va fuqarolarning o'zini o'zi boshqarish idoralari mavqeyi oshirilmoqda. 1999-yil 3-yanvar kuni O'zbekiston Respublikasi Prezidentining «Aholini aniq yo'naltirilgan ijtimoiy madad bilan ta'minlashda fuqarolarning o'zini o'zi boshqarish organlari rolini oshirish to'g'risida»gi farmoni qabul qilindi.

Ushbu farmonning ijrosini ta'minlash uchun fuqarolarning o'zini o'zi boshqarish organlari orqali quyidagilar amalga oshirildi:

- ishlamaydigan onalarga bolasi ikki yoshga yetguniga qadar uni parvarish qilish bo'yicha nafaqalar tayinlash va to'lash;

- o‘zgalarning parvarishiga muhtoj bo‘lgan yolg‘iz nafaqaxo‘rlarni asosiy oziq-ovqat mahsulotlari bilan ta‘minlash.

Konstitutsiyaning 46-moddasida xotin-qizlar va erkaklar teng huquqlidirlar, deyilgan. Ayollar bilan erkaklar teng huquqliligini ta‘minlash uchun davlat qo‘shimcha keng miqyosdagi tadbirlarni amalga oshirmoqda. Ta‘kidlash lozimki, hozirgi kunda O‘zbekistonda 12 mlnga yaqin xotin-qizlar yashaydi. Bu Respublika umumiy aholisining 51 %ini tashkil etadi. Mehnatga qobiliyatli ayollarning 50%i xalq xo‘jaligida band. Ayollarning jamiyatdagi mavqeyini oshirish bo‘yicha ma‘lum chora-tadbirlar ishlab chiqildi hamda maxsus Davlat dasturi qabul etildi. Amalda esa uning ijrosi bo‘yicha ko‘plab ishlar qilindi.

Mamlakatimiz rahbari tomonidan jamiyat va davlat qurilishida xotin-qizlarning rolini yuksaltirishga izchil e‘tibor qaratib kelinmoqda. O‘zbekiston Prezidentining quyidagi farmonlari fikrimizning yorqin dalilidir: «Xotin-qizlarning ijtimoiy muhofazasini kuchaytirishga oid qo‘shimcha chora-tadbirlar to‘g‘risida»gi (1999-yil 17-mart), «O‘zbekiston xotin-qizlar qo‘mitasi faoliyatini qo‘llab-quvvatlash borasidagi qo‘shimcha chora-tadbirlar to‘g‘risida»gi (2004-yil 25-may) farmonlar.

## **9-§ BO‘YICHA EGALLAGAN BILIMLARINGIZNI MUSTAHKAMLASH YUZASIDAN TOPSHIRIQLAR**

***E‘tibor bering!***



Davlat fuqarolarning konstitutsiya va qonunlarda mustahkamlangan huquqlari va erkinliklarini ta‘minlaydi.

***Mustaqil ishlash uchun vazifa***



O‘zbekiston Respublikasi «Mahalliy davlat hokimiyati to‘g‘risida»gi qonunining 24- va 25-moddalarining mazmuni bilan tanishib chiqing. Mazkur moddalarda xalq deputatlari Kengashlariga va hokimlarga fuqarolarning huquq va erkinliklarini ta‘minlash, muhofaza qilish sohasida qanday vazifalar yuklanganligini aniqlang.

***Yodda saqlang***



**31-modda:**

Hamma uchun vijdon erkinligi kafolatlanadi.

Mazkur moddada mustahkamlangan fuqarolarning erkinliklarini ta‘minlash chora-tadbirlari qaysi qonunda va qanday tartibda belgilab qo‘yilgan?

**Qonunlar bilan tanishib, javob bering**



Konstitutsiyaning 37—39- va 117-moddalarida mustahkamlangan fuqarolar huquqlarining ta‘minlanishi qaysi joriy qonunlarda o‘z ifodasini topgan?

**Konstitutsiyaviy qoidani izohlang**



**45-modda:**

Voyaga yetmaganlar, mehnatga layoqatsizlar va yolg‘iz keksalarning huquqlari davlat himoyasidadir.

**Matn tayyorlang**



Huquqiy kafolatlar va uning hayotdagi amaliy ifodasi bo‘yicha o‘z fikr-mulohazangiz asosida matn tayyorlang.



Huquqiy kafolatlar tushunchasi va turlariga doir bir necha test savollarini tayyorlang.

## **10-§. FUQAROLARNING HUQUQLARINI HIMOYA QILISH MEXANIZMI**

O‘zbekiston Respublikasi xalqaro huquqning umume’tirof etilgan qoidalaridan biri sifatida inson huquqi va erkinliklarini muhofaza qilish va uning kafolatini ta’minlashga muhim e’tiborini qaratib kelmoqda. Binobarin, inson huquqlari va erkinliklarining hamma narsadan ustun qo‘yilishi O‘zbekiston Konstitutsiyasining asosiy mohiyatini tashkil etadi.

O‘zbekistondagi tub islohotlar samarasi inson huquqlarining qay darajada ta’minlanganligiga va amalga oshirilayotganligiga bevosita bog‘liqdir.

O‘zbekiston Konstitutsiyasida davlat qiyofasi, uning ijtimoiy, iqtisodiy, siyosiy, huquqiy tizimlari, umume’tirof etilgan xalqaro me’yorlar va tamoyillarga muvofiqligi hamda inson huquqlari va erkinliklarining himoyalanganligi darajasi ko‘zgdagidek aks etgan.

O‘zbekistonda fuqarolar huquqlarini himoya qilish tizimining barcha huquqiy asoslari Konstitutsiya va uning asosida qabul qilingan qonunlarda mustahkamlab qo‘yilgan.

Qat’iy belgilangan konstitutsiyaviy me’yorlar asosida inson huquqlarini himoya qilish va uni amalga oshirishning tashkiliy huquqiy mexanizmini vujudga keltirish bo‘yicha O‘zbekistonda faoliyat keng rivoj topdi.

Fuqarolar huquqlarining Konstitutsiyaviy kafolatlari ta’minlanishida bevosita inson huquqlarining amalga oshirilishini ro‘yobga chiqaruvchi turli yo‘nalishdagi faoliyatlar tashkil qilingan. Ular orasida Oliy Majlisning Inson huquqlari bo‘yicha vakili

(Ombudsman), Inson huquqlari bo'yicha milliy markazni aytib o'tish o'rinlidir. Shu bilan bir qatorda fuqarolar huquqlarini himoya qilish tizimida sud, prokuratura, advokatura va boshqa davlat organlari hamda jamoat tashkilotlari ham muhim rol o'ynaydi.

Inson huquqlarini himoya qilish va unga rioya etishning amaldagi mexanizmini vujudga keltirishda quyidagilar ustuvor etib belgilangan:

1) Respublikada inson huquqlarini himoya qilish, unga amal qilishning huquqiy bazalarini shakllantirish va takomillashtirish;

2) inson huquqlarini ta'minlash sohasida sud hokimiyati va ijro hokimiyati idoralari faoliyatining samaradorligini oshirish va inson huquqlari bo'yicha qo'shimcha milliy tuzilmalar barpo etish;

3) inson huquqlariga amal qilish va uni hurmat qilishning zarurligini tushunishga erishish sohasida fuqarolarni aniq maqsadga qaratilgan va bosqichma-bosqich huquqiy tarbiyalash hamda mansabdor shaxslarning huquqiy savodxonligini kuchaytirish yo'li bilan jamoatchilik ongini oshirishga ko'maklashish;

4) inson huquqlari masalalari bo'yicha monitoring sohasida nodavlat tashkilotlarining imkoniyatlaridan samarali foydalanish maqsadida fuqarolarning jamoatchilik tuzilmalari bilan yanada yaqinroq hamkorlik o'rnatish;

5) inson huquqlarini himoya qilish va unga amal qilishni huquqiy va tashkiliy ta'minlash sohasida xalqaro tajribani o'rganish va qo'llash hamda O'zbekistonning tarixiy an'alarini hisobga olish.

O'zbekistonda Konstitutsiya asosida inson erkinliklari va huquqlarining butun majmuini qonuniy o'rnatadigan, shu bilan birga inson huquqlari va erkinliklarini himoyalashga amal qilish tartibi va mexanizmini belgilaydigan, ushbu soha ustidan davlat va jamoat nazorati turlarini aniqlaydigan barqaror huquqiy baza yaratildi.



Hozirgi vaqtda Konstitutsiya me'yorlariga muvofiq Respublikada fuqarolarning huquq va erkinliklarini amalga oshirishga bevosita aloqador bo'lgan 200 dan ortiq qonun hujjatlari qabul qilingan va hayotga tatbiq etilmoqda.

O'zbekistonda fuqarolarning huquqlarini amalga oshirish va ularning muhofazasini ta'minlovchi davlat idoralarining mavjudligi fuqarolarning huquq va erkinliklarini himoya qilish va unga rioya qilishning amaldagi mexanizmining muhim belgilaridan biridir.

Ularni ikki guruhga, ya'ni: O'zbekiston Respublikasi Konstitutsiyasiga binoan fuqarolarning huquqlarini ta'minlashga mas'ul davlat idoralari va xalqaro tashkilotlarning tavsiyalariga binoan tuzilgan, inson huquqlarini himoya qilish va unga amal qilishga ko'maklashuvchi, inson huquqlari masalalari bo'yicha qo'shimcha tuzilmalarga bo'lish mumkin.

Fuqarolarning huquqlarini himoya qilish va unga amal qilishni ta'minlashdagi asosiy mas'uliyat qonun bo'yicha sud va ijro hokimiyat idoralari zimmasiga yuklatilgan. Qonunlarda belgilangan tartibga binoan («Fuqarolarning murojaatlari to'g'risida»gi, «Fuqarolarning huquqlari va erkinliklarini buzadigan xatti-harakatlar va qarorlar ustidan sudga shikoyat qilish to'g'risida»gi qonunlar) O'zbekiston Respublikasining har bir fuqarosi davlat idorasi, tashkiloti yoki mansabdor shaxsga yoki sudga o'z huquqlarini tiklash uchun murojaat qilish huquqiga ega.

O'zbekistonda inson huquqlarini himoya qilish sohasida davlat apparati faoliyatiga ko'maklashish maqsadida inson huquqlari bo'yicha qo'shimcha institutlar vujudga keltirildi. Bular:

— inson huquqlari masalalari bo'yicha qonunchilikning samaradorligi ustidan parlament nazoratini amalga oshiruvchi Oliy Majlisning inson huquqlari bo'yicha vakili (Ombudsman);

— inson huquqlari sohasida milliy huquq me'yor-

larining xalqaro standartlarga muvofiqligini ta'minlovchi O'zbekiston Respublikasi Prezidenti huzuridagi Amaldagi qonun hujjatlari monitoringi instituti;

— inson huquqlariga amal qilish sohasida muvofiqlashtiruvchi, tahlil qiluvchi va maslahat beruvchi idora — Inson huquqlari bo'yicha milliy markaz;

— respublikada inson huquqlarini ta'minlash muammolarining sotsiologik tadqiqoti va tahlilini o'tkazuvchi «Ijtimoiy fikr» jamoatchilik markazidir.

Bu institutlarning hammasi nodavlat tashkilotlar bilan bir qatorda O'zbekistonda inson huquqlari muammolarini hal etishga o'z hissalarini qo'shib kelmoqda.

Respublikada inson huquqlarini himoyalash va unga amal qilish ustidan jamoat nazoratini amalga oshirishga qodir bo'lgan huquqiy nodavlat idoralar sektori vujudga keltirildi. Bular sudyalari, advokatlar Assotsiatsiyalari, inson huquqlari va gumanitar huquqni o'rganish Markazi, xususiy advokat va notarial xizmatlar, yuridik va jismoniy shaxslarga huquqiy maslahat xizmatini ko'rsatuvchi turli firmalar, fuqarolar turli qatlamlarining huquqlarini himoya qilish bo'yicha har xil jamiyatlar va jamg'armalar va boshqalardir. Natijada yurtimizda jamiyatimiz uchun asosan yangi bo'lgan, inson huquqlarini ta'minlash bilan shug'ullanuvchi jamoat sektori bunyod bo'ldi. Bu fuqarolarning huquqlarini himoya qilish sohasida nazorat mexanizmining belgilaridan biri bo'lib xizmat qilmoqda.

Shunday qilib, O'zbekistonda inson huquqlari bo'yicha institutlar tizimi shakllantirildi, endigi vazifa — barcha davlat va jamoat tuzilmalari faoliyatini muvofiqlashtirishdan va har bir idora va mansabdor shaxs o'z majburiyatlarini bajarishga, fuqarolarning arizalarini o'z vaqtida, odilona va vijdonan ko'rib chiqishda inson huquqini himoya qilish masalalari bo'yicha respublika qonunchiligining buzilmasligiga erishishdan iborat.

**Oliy Majlisning inson  
huquqlari bo'yicha vakili  
(Ombudsman) faoliyati  
yo'nalishlari**

O'zbekiston Respublikasida inson huquqlarini himoya qilish sohasida Oliy Majlisning inson huquqlari bo'yicha vakili (Ombudsman)-

ning o'rnini muhim ahamiyatga ega. 1995-yil 23-fevralda Oliy Majlisning inson huquqlari bo'yicha vakili lavozimi ta'sis etildi va 1997-yil 24-aprelda esa, «O'zbekiston Respublikasi Oliy Majlisining inson huquqlari bo'yicha vakili (Ombudsman) to'g'risida»gi qonun qabul qilindi.

Mazkur qonunga muvofiq inson huquqlari bo'yicha vakilga «O'zbekiston Respublikasida davlat organlari, fuqarolarning o'zini o'zi boshqarish organlari, korxonalar, muassasalar, tashkilotlar, jamoat birlashmalari va mansabdor shaxslar tomonidan inson huquqlari to'g'risidagi Konstitutsiya va boshqa amaldagi qonunlar hujjatlariga rioya etilishini samaradorligi ustida parlament nazoratini amalga oshirish» vakolati berilgan.

Inson huquqlari bo'yicha vakil faoliyati qonunga binoan, asosan: fuqarolarning shikoyatlari va arizalarini qabul qilish va ko'rib chiqish, ularning huquqlari buzilgan bo'lsa, ularni tiklash bo'yicha chora-tadbirlar qo'llashdan; jamiyatning zaifroq qatlamlari (bolalar, ayollar, nogironlar, keksalar, hibsdagilar va boshqalar)ga nisbatan inson huquqlari masalalari bo'yicha O'zbekiston Respublikasi qonunlari va xalqaro konvensiyalarga amal qilinishini o'z tashabbusiga binoan nazoratdan o'tkazishdan; inson huquqlari haqidagi qonunchilikni takomillashtirishda va uni xalqaro standartlarga muvofiq holga keltirishda ko'maklashish; inson huquqlarini hurmat qilish sohasida jamoatchilik fikrini kuchaytirishga qaratilgan axborot-ma'rifiy va tahliliy ishlarini amalga oshirish; inson huquqlarini vujudga keltirish sohasida chet el tajribasini

o'rganish maqsadida xalqaro hamkorlikni kuchaytirishdan iborat.

1998-yilda Ombudsmanning sud va huquqni muhofaza qiluvchi idora bilan o'zaro aloqalari ishlab chiqilib, hayotga tatbiq etilmoqda. Bundan ko'zlangan maqsad inson huquqlari haqidagi qonunchilikning bajarilishi ustidan nazoratni kuchaytirish bo'yicha Ombudsman ishining samarasini oshirish, fuqarolarning huquqlarini amalda tiklanishini ta'minlash, inson huquqlarini himoya qiluvchi davlat idoralari vakolat va imkoniyatlaridan yanada samaraliroq foydalanishga yo'naltirilgan.

«O'zbekiston Respublikasi Oliy Majlisining Inson huquqlari bo'yicha vakili (Ombudsman) to'g'risida»gi Qonunning 13-moddasiga ko'ra Ombudsman fuqarolarning huquqlari buzilishiga oid ariza va shikoyatlarini ko'rib chiqadi. Ombudsman o'zining 2005–2009-yillardagi faoliyati davomida fuqarolar tomonidan yo'llangan jami 44370 ariza va shikoyatni (ulardan 7074 tasi takroriy) ko'rib chiqqan; ushbu murojaatlarning 30647 tasi nazoratga olingan, 1705 ariza ijobiy hal etilgan. Birgina 2009-yilda 1184 nafar murojaat qilgan shaxslarga ularning huquqlari, erkinliklari va qonuniy manfaatlarini himoya qilishning vosita va shakllari ko'rsatilgan; 2243 shikoyat mazmunan hal etish bo'yicha vakolatli tashkilotlarga yoki mansabdor shaxslarga berilgan. Bundan shunday xulosa chiqarish mumkinki, mamlakat hayotida fuqarolarning huquqlarini ta'minlashda Ombudsmanning faoliyatiga e'tibor yanada ortayotganligi shubhasiz.

Ombudsman O'zbekiston Respublikasining «Oliy Majlisning inson huquqlari bo'yicha vakili (Ombudsman) to'g'risida»gi Qonunning 12-moddasiga muvofiq quyidagi huquqlarga ega:

- shikoyatlarni ko'rib chiqish;
- arizachiga o'z huquq, erkinlik va manfaatlarini himoya qilish vositalari va shakllarini ko'rsatish;

— shikoyatni hal qilishga vakolatli bo‘lgan tashkilot yoki mansabdor shaxslarga yuborish;

— arizachini uning huquq, erkinlik va qonuniy manfaatlariga daxldor hujjatlar, qarorlar va boshqa materiallar bilan tanishtirish;

— qonun hujjatlariga zid bo‘lmagan chora-tadbirlarni ko‘rish.

Vakil hujjatlarini ko‘rib chiqish, tekshirish chog‘ida qonunning 13-moddasida ko‘rsatilgan huquqlardan foydalanadi:

— tashkilot va mansabdor shaxslarga aniqlanishi lozim bo‘lgan holatlarni tekshirishga yordam so‘rab murojaat qilish;

— shikoyat bo‘yicha holatlarni aniqlash uchun tashkilot vakillari va mansabdor shaxslarni taklif etish;

— shikoyatni tekshirish uchun zarur hujjatlarni, material va boshqa ma’lumotlarni so‘rash va olish;

— shikoyat bo‘yicha mansabdor shaxslardan tushuntirishlar olish;

— tashkilot va mutaxassislariga aniqlanishi zarur holatlar bo‘yicha xulosalar tayyorlashni topshirish;

— tashkilot va mansabdor shaxslar tomonidan inson huquqlari, erkinliklari va qonuniy manfaatlariga daxldor masalalar yuzasidan o‘tkazilayotgan tekshiruvlarda qatnashish;

— ushlangan yoxud qamoqda saqlanayotgan shaxs bilan uchrashish va suhbat o‘tkazish;

— inson huquqlarini buzish hollari aniqlangan tashkilot yoki mansabdor shaxslarga javobgarligi to‘g‘risida xat bilan murojaat qilish kabilardan iborat.

Inson huquqlari bo‘yicha vakilga murojaat qilayotgan shaxs o‘z shikoyatida familiyasi, ismi, sharifi, manzili, shikoyat qilayotgan tashkilotning nomi, mansabdor shaxsning familiyasi, ismi, otasining ismi ko‘rsatilishi, arizachining fikricha uning huquqlari buzilishiga olib kelgan harakat yoki harakatsizlik mohiyati bayon etilishi zarur. Shikoyatga arizachining

talablarini tasdiqlovchi hujjatlar, boshqa ma'lumotlar ilova qilinadi.

Vakil vaziyatni tekshirish natijalariga binoan:

— arizachiga ko'rib chiqish natijalarini ma'lum qilishi;

— harakatlari va harakatsizligida fuqarolarning huquqlari, erkinliklari va qonuniy manfaatlari buzilganligi aniqlangan tashkilot yoki mansabdor shaxslarga buzilgan huquqlarni tiklash yuzasidan tavsiyalar bayon etilgan o'z xulosasini yuborishi shart.

Bunda vakilning xulosasini olgan tashkilot yoki mansabdor shaxs tomonidan masala oxiriga yetkazilishi va qonun doirasida adolatli hal qilinishi lozim.

**Inson huquqlari bo'yicha  
O'zbekiston Respublikasi  
milliy markazi faoliyati  
va uning vazifalari**

Bu markaz respublika Prezidenti farmoni bilan 1996-yil 31-oktabrda tashkil etildi. Mazkur milliy markaz davlatga qarashli, tahlil,

maslahat, idoralararo va muvofiqlashtirish organidir. Markazning faoliyati yo'nalishlari bevosita inson huquqlarini amalga oshirishda muhim ahamiyat kasb etib, u bir qator yuksak vazifalarni o'z oldiga qo'yadi.

**Milliy markazning asosiy vazifalari:**

— inson huquqlari, erkinliklarini muhofaza qilishning harakat rejasini ishlab chiqadi;

— inson huquqlari sohasida O'zbekiston Respublikasining xalqaro va milliy tashkilotlar hamkorligini rivojlantiradi;

— O'zbekiston Respublikasida inson huquqlariga rioya etilishi va bu huquqlarning muhofaza qilinishi yuzasidan milliy ma'ruzalar tayyorlaydi;

— davlat hokimiyati va boshqaruv organlariga, shuningdek inson huquqlari bo'yicha jamoat birlashmalariga maslahatlar beradi;

— davlat organlarining inson huquqlariga oid ta'lim, tarbiya, targ'ibot, o'quv-uslubiy adabiyotlarini nashr etish borasidagi faoliyatini muvofiqlashtiradi;

— O‘zbekistonda inson huquqlarini amalga oshirish va rivojlantirish bo‘yicha ma‘lumotlarning axborot bazasini yaratish;

— inson huquqlarini muhofaza qilish bo‘yicha davlat organlarining faoliyatini takomillashtirish yuzasidan tavsiyalar berish;

— inson huquqlarini rag‘batlantirish va muhofaza qilish sohasida ilmiy ijtimoiy tadqiqotlarni tashkil etish va o‘tkazishdir.

O‘zbekiston Respublikasida mazkur milliy markazning tashkil etilishi inson huquqlarini muhofaza qilishning muhim kafolatlaridan biri ekanligini hayot ko‘rsatib turibdi.

Inson huquqlari bo‘yicha milliy markaz faoliyati to‘g‘risida ma‘lumotlar «O‘zbekistonda demokratiyalash va inson huquqlari» maxsus jurnali orqali yoritib borilmoqda.

<b>Malakali yuridik yordam olish huquqi</b>
---

O‘zbekistonda inson huquqlarini himoya qilish va fuqarolarning malakali huquqiy yordam olish huquqini amalga oshirishga yordam beruvchi jamoat tashkilotlaridan biri Advokatura hisoblanadi. Bu jamoat birlashmasining huquqiy maqomi «Advokatura to‘g‘risida»gi Qonunda belgilangan. Mazkur Qonunning 1-moddasiga binoan: «Advokatura — huquqiy institut bo‘lib, u advokatlik faoliyati bilan shug‘ullanuvchi shaxslar hamda xususiy advokatlik amaliyoti bilan shug‘ullanuvchi ayrim shaxslarning mustaqil, ko‘ngilli, kasbiy birlashmalarini o‘z ichiga oladi. Advokatura O‘zbekiston Respublikasi Konstitutsiyasiga muvofiq, O‘zbekiston Respublikasi fuqarolari, ajnabiy fuqarolar, fuqaroligi bo‘lmagan shaxslarga, korxonalar, muassasalar, tashkilotlarga yuridik yordam ko‘rsatadi».

«Advokatura to‘g‘risida»gi Qonun 17 moddadan iborat bo‘lib, bu qonunda advokatura va uning vazifalari, advokatura to‘g‘risidagi qonun hujjatlari,

advokatning huquqiy maqomi, advokatura faoliyatining prinsiplari va tashkiliy shakllari, advokatlik faoliyatining turlari, advokatning huquq va vazifalari, advokat faoliyatining kafolatlari, advokatlarga beriladigan ruxsatnomalar, advokatlarga beriladigan intizomiy jazo choralari, advokatning siri, ijtimoiy huquqlari, advokatlik faoliyatini to'xtatish asoslari belgilangan.

1998-yilda O'zbekiston Respublikasining «Advokatlik faoliyatining kafolatlari va advokatlarni ijtimoiy himoyalash to'g'risida»gi qonuni qabul qilindi. Qonun advokatlik faoliyatining quyidagi prinsiplarini mustahkamladi: advokatning mustaqilligi; advokatlik etikasi qoidalari va qasamyodga qat'iy rioya etilishi; qonun bilan taqiqlanmagan usul va vositalarni qo'llash. Shuningdek, qonun litsenziyalash va advokatlik faoliyatining boshqa kafolatlarni nazarda tutadi.

O'zbekiston Respublikasi fuqarolariga o'z huquq va qonuniy manfaatlarini himoya qilishni yanada kuchaytirish maqsadida O'zbekiston Prezidenti tomonidan 2007-yilda «Advokatlarni palatasini tashkil etish to'g'risida» alohida farmon qabul qilindi. Unda inson va fuqarolarga o'z huquq va qonuniy manfaatlarini himoya qilishda malakali yuridik yordam olishni tashkiliy-huquqiy jihatdan takomillashtirish, advokatura idoralari faoliyatini kuchaytirish, ular faoliyatining samaradorligini ta'minlash asosiy maqsad qilib qo'yilgan.

O'zbekiston Respublikasi Prezidenti 2008-yilning 1-mayida «Advokatura institutini yanada isloh qilish chora-tadbirlari to'g'risida»gi farmonini qabul qildi. Farmonning asosiy maqsadi mamlakatimiz fuqarolarining huquqiy muhofazalanishini yanada kuchaytirish va advokaturaning butun tizimini izchil takomillashtirishdan iborat.



## 10-§ BO‘YICHA EGALLAGAN BILIMLARINGIZNI MUSTAHKAMLASH YUZASIDAN TOPSHIRIQLAR

### Javob bering



Insonning huquq va erkinliklarini sudlardan tashqari qanday idoralar himoya qiladi? Bu idoralarni nomma-nom sanab bering.

### Izlaning



1. Fuqarolarning huquqlarini himoya qilish mexanizmi tushunchasi nimadan iborat?
2. Inson huquqlarini himoya qiluvchi xalqaro tashkilotlarni aytib bering?
3. Fuqarolarning huquqlarini himoya qilish tizimining Konstitutsiyaviy asoslari nimalardan iborat?
4. Oliy Majlisning Inson huquqlari bo‘yicha vakili (Ombudsman)ning vazifalarini izohlab bering.
5. Inson huquqlari bo‘yicha milliy markazning vakolatlarini tushuntirib bering.
6. Advokatura to‘g‘risidagi Qonun mazmunini izohlab bering.
7. Fuqarolarning huquqlarini himoya qilishda davlat organlari faoliyatining ahamiyatini ko‘rsatib bering.
8. Fuqarolarning huquqlarini muhofaza qilishda xalqaro aloqalarning o‘rni qanday ahamiyat kasb etadi?

## O‘ZBEKISTON RESPUBLIKASINING DAVLAT SHAKLI VA DAVLAT ORGANLARI

### 11-§. O‘ZBEKISTON RESPUBLIKASINING DAVLAT TUZILISHI VA BOSHQARUV SHAKLI

O‘zbekiston kelajagi buyuk davlat. Bu — mustaqil, demokratik, huquqiy davlatdir. Bu insonparvarlik qoidalariga asoslangan, millati, dini, ijtimoiy ahvoli, siyosiy e’tiqodlaridan qat’i nazar fuqarolarning huquqlari va erkinliklarini ta’minlab beradigan davlatdir.

*Islom KARIMOV*

**O‘zbekiston: davlatchilikni shakllantirish va rivojlantirish yo‘lida**

Istiqlol xalqimizga o‘z Vatanida o‘zini erkin his qilish, chinakam o‘z milliy qadriyatlarini tiklash, o‘z milliy

davlatchiligini shakllantirish imkonini berdi. O‘zbekiston milliy davlatchiligi murakkab sharoitda qaror topishiga sabab bo‘ldi. Chunki sobiq sho‘roning davlatchilik illatlarini tugatish muammolari ko‘ndalang turar edi. Sababi sho‘ro davridagi Konstitutsiyalarda inson manfaatlaridan davlat manfaatlari ustunligi belgilab qo‘yilgan edi. Turkiston ASSRning 1918-, 1920-yillarda, Xorazm va Buxoro Respublikalarining 1920—21-yilda, shuningdek, O‘zbekiston SSRning 1927-, 1937-, 1978-yillarda qabul qilingan Konstitutsiyalari mazmun-mohiyatiga ko‘ra haqiqiy mustaqil davlatning qonuni emas edi.

Ushbu sho‘ro Konstitutsiyalarida inson huquqidan ko‘ra davlat huquqi hukmron edi. Shu bilan birga milliy manfaat masalasi ham o‘z yechimini topmagan edi.

Respublika hududida 28 ittifoq va 17 respublika

ittifoqining vazirlik va boshqaruvlari mavjud bo‘lib, ular iqtisod va siyosat hamda tarbiyaga oid sohalarni o‘zining ta‘sir doirasida ushlab turgan. Ular respublika mulki va milliy boyligining asosiy qismiga ega bo‘lib, ular ustidan iqtisodiy va siyosiy jihatdan o‘z hukmronliklarini o‘tkazganlar. Mustaqillikning dastlabki yillarida bu holatga barham berish zarur edi. Jamiyatni tanazzulga yetaklayotgan muammolarni bartaraf etish yo‘lida bir qator ishlar amalga oshirildi. Eski ma‘muriy-buyruqbozlik tizimi va unga mos bo‘lgan hokimiyat va boshqaruv organlari barham toptirildi. Siyosiy va iqtisodiy boshqarish hamda tartibga solishning ko‘pgina tuzilmalari tugatildi. Chunki ular inson huquqlariga va mustaqillikka raxna soluvchi ma‘muriy-buyruqbozlik tizimining ustunlari edi. 1990-yil 24-martda Respublika Oliy Kengashining birinchi sessiyasi muhim tarixiy qaror qabul qilib, O‘zbekiston Prezidenti lavozimini ta‘sis etdi. O‘zbekiston tarixida ilk marotaba joriy etilgan Respublika Prezidenti lavozimi yangi O‘zbekiston davlat hokimiyati organlari tizimida markaziy o‘rinni egalladi. U siyosiy tizimning o‘zagi bo‘lib qoldi.

Konstitutsiya suveren davlatni shakllantirishning asosiy poydevori, mustaqil davlatchiligimizning tamal toshi bo‘ldi. Konstitutsiyaning 11-moddasiga muvofiq qonun chiqaruvchi, ijro etuvchi, sud hokimiyatiga bo‘linish prinsipiga asoslangan tizim yaratildi. Ularning har biri faoliyatida huquqiy asosda avtoritarizm va totalitarizmning xurujlarini istisno etadigan chinakam demokratik me‘yorlar va yo‘l-yo‘riqlar qaror toptirildi. Konstitutsiyada hokimiyat taqsimlanish prinsipi — hokimiyatning uchta tarmog‘i: qonun chiqaruvchi, ijro etuvchi, sud hokimiyati o‘rtasida muvozanat saqlanishining oqilona tizimi yaratilganligini bildiradi. O‘zbekiston Oliy Kengashi O‘zbekistonning mustaqilligini ta‘minlashga qaratilgan yangi qonunchilik tizimini vujudga keltirish yo‘lidan bordi.

1990—1994-yillarda Oliy Kengash 200 ga yaqin qonun, 500 dan ziyod qaror qabul qildi. Konstitutsiyaga muvofiq ilk marotaba Respublika Parlamenti — Oliy Majlis tashkil etildi. Davlat hokimiyatining Oliy Majlis va xalq deputatlari mahalliy kengashlaridan iborat vakillik idoralari tarmog‘i vujudga keltirildi. Oliy Majlis qonunlarni yaratish va amalga kiritish sohasida samarali ishlab turibdi.

Asosiy Qonunning negizida Respublika sud tizimi mustaqil hokimiyat sifatida qaror toptirildi. Sud hokimiyatining yangi tuzilmalari yuzaga keldi. Sudning huquq doirasi kengaydi.

Mamlakat mudofaasini ta‘minlashda yangi tizim barpo etildi. Milliy armiya — O‘zbekiston Qurolli Kuchlarining tashkil etilishi milliy davlatchilik qaror topishi yo‘lida muhim yutuq bo‘ldi.

Tashqi aloqalarni ta‘minlaydigan tuzilmalar: Tashqi ishlar vazirligi, Tashqi iqtisodiy aloqalar vazirligi (1992-yil 21-fevral), Tashqi iqtisodiy faoliyat Milliy banki (1991-yil 7-sentabr) tuzildi va boshqa ixtisoslashgan muassasalarning butun boshli tarmog‘i vujudga keltirildi.

O‘zbekistonda ijroiya hokimiyati davlat hokimiyatining tarkibiy qismi sifatida mukammallik, yuqoridan pastga tomon mantiqiy davomiyligi huquqiy jihatdan konstitutsiyada mustahkamlangan. Respublikada mahalliy hokimlik tizimining joriy etilishi tufayli joylarda ham mas‘uliyat hissi ortdi, davlat tadbirlari, intizom, huquqiy tartib va qonuniylikka rioya qilish samarali bo‘lmoqda. Boshqaruv va hokimiyat idoralari o‘rtasidagi munosabatlar konstitutsiyaviy asosda tartibga solinib, mansabdor shaxslarning javobgarligi kuchaytirildi. Boshqaruv tizimidagi nuqsonlarga, ayniqsa bir idora funksiyasining boshqa idoralar tomonidan takrorlanishiga barham berildi.

Fuqarolarning o‘zini o‘zi boshqarish sohasida noyob mexanizm tuzildiki, uning ildizlari tarixan

tarkib topgan jamoa munosabatlari — mahallaga borib taqaladi. Shaharlar, qishloqlar, mahallalar fuqarolarining yigʻini fuqarolarga davlat ishlarini boshqarishda ishtirok etish huquqini amalga oshirishga yordam beradi. Ular oʻz hududidagi ijtimoiy va xoʻjalik vazifalarini hal qilish uchun uyushtiradigan organ sifatida tan olindi.

Shu bilan davlat mohiyati tubdan oʻzgardi. Davlat islohotlarning bosh tashabbuskori va yoʻnaltiruvchisi, ijtimoiy hayotdagi yangi gʻoyalarni asosiy amalga oshiruvchi boʻlib qoldi. **Davlatning ichki va tashqi siyosati yoʻnalishlari pirovard maqsadi** chinakam mustaqil Oʻzbekistonni barpo etishdir. **Bosh vazifa** xalqchil adolatli jamiyatni bunyod etishga qaratilgan. Bu maqsad va vazifani amalga oshirish yoʻlida islohotlar olib borilib, bu borada bir qator yutuqlar qoʻlga kiritilmoqda. Oʻzbekistonning jahondagi nufuzi yanada oshib bormoqda.

XX asr oxirlariga kelib, Oʻzbekistonni suveren davlat sifatida dunyoning barcha mamlakatlari tan olgani va jahon hamjamiyatining barcha davlatlari u bilan diplomatik aloqalar oʻrnatgani respublikaning ulkan nufuzini koʻrsatadi. Bugungi kunda Toshkentda 43 mamlakat elchixonalari va 9 xorijiy davlatning Faxriy konsulxonalari faoliyat koʻrsatishi ham diqqatga sazovor. Shu bilan birga koʻplab chet davlat vakolatxonalarining roʻyxatdan oʻtganligi, hukumatlararo tashkilotlar va nodavlat tashkilotlarining ishlab turganligi ahamiyatga molikdir.

Hozirgi kunda Oʻzbekiston 150 dan ortiq davlatlar bilan savdo-iqtisodiy aloqalar oʻrnatgan. Oʻzbekistonda 25 mingdan ortiq eksport-import operatsiyalari oʻtkazadigan korxonalar roʻyxatga olingan. 3000 dan ziyod xorijiy investitsiyalar ishtirokida korxonalar tuzilgan. Bular xalq xoʻjaligining barcha tarmoqlarida faoliyat koʻrsatmoqda.

Oʻzbekiston Respublikasining chet el diplomatik

vakolatxonalari AQSH, Germaniya, Fransiya, Turkiya, Rossiya, Hindiston, Pokiston, Misr va boshqa davlatlarda faoliyat ko'rsatib turibdi.

Dunyoda o'ziga xos boy madaniy va ma'naviy qadriyatlariga ega bo'lgan 1600 dan ortiq etnik guruh yashaydi. Ularning ko'pchiligi o'z milliy davlatchiligiga ega emas. Bugungi kunda dunyo siyosiy xaritasida ikki yuzdan ortiq davlat bor. Ana shu davlatlar orasida O'zbekiston mustaqil davlat sifatida tarix sahnasida o'z o'rniga ega bo'lib, xalqaro miqyosda nufuzi ortib bormoqda.

O'zbek milliy davlatchiligi tarixiy ildizlari qadimiy bo'lib, hatto dunyoda ilk davlatchilik yuzaga kelgan o'lkalar bilan davlatchilik shakllanish va rivojlanish tarixi bo'yicha bellasha oladi. Chunki biz yashab turgan o'lka qadimiy sivilizatsiya o'choqlaridan biri bo'lgan. Davlatchilik 2500 yil muqaddam shu zaminida qaror topgan. Buyuk Xorazm, Baqtriya davlat birlashmalari o'zbek davlatchiligining ibtidosidir. O'zbekiston zaminida yashayotganligimizdan va shu yurt farzandi ekanligimizdan qalbimiz faxr-iftixorga to'ladi.

Mustaqil O'zbekiston davlati taraqqiyotiga tahdidlar yo'q emas. Bu tahdidlardan Konstitutsiya qudratli kuch sifatida himoya qila oladi. Har qanday tahdidan ogoh bo'lishga undaydi va ularga qarshi kurasha olish yo'lini ko'rsatib beradi. Davlat mustaqilligiga va mamlakatimiz xavfsizligiga raxna soluvchi tahdidlar quyidagilardir: mintaqaviy mojarolar; diniy ekstremizm va fundamentalizm; buyuk davlatchilik shovinizmi va agressiv millatchilik; etnik va millatlararo ziddiyatlar; korrupsiya va jinoyatchilik; mahalliychilik va urug'-aymoqchilik; ekologik muammolardir. Bu tahdidlar jamiyatni tanazzulga yetaklaydi va inson huquqlari buzilishiga olib keladi. Shuning uchun Konstitutsiyada bu tahdidlardan himoyalaniish mexanizmining barcha huquqiy jihatlari mustahkamlab qo'yilgan.

Sizlar maktabda «Davlat va huquq asoslari» fanini o‘qigan vaqtlaringizda davlat

shakllari: davlat tuzilishi va davlat boshqaruvi, davlat siyosiy rejimi tushunchalarining mohiyatini o‘rgan-gansiz. Davlat tuzilishi shakli uch turda: unitar (oddiy), konfederativ va federativ (murakkab) shakl-larda bo‘ladi.

O‘zbekiston o‘zining davlat shaklini aniqlashda respublikamizning o‘ziga xos sharoitlari, tarixiy tajriba va an‘analarini, milliy mentaliteti, ya’ni xalqimizning fikr yuirtish, jamiyat hayotini anglash va talqin qilish sohasidagi hamda davlat qurilishi borasidagi jahon amaliyoti yutuqlari inobatga olinib, davlat tuzilishi-ning eng mukammal shakli tanlandi. O‘zbekiston Respublikasiga davlat tuzilishining unitar shakli xos-dir. Biroq, O‘zbekiston davlati tuzilishi o‘ziga xos xususiyatlarga ham ega. Uning tuzilish tarkibida Qoraqalpog‘iston Respublikasi ham mavjud. Shu nuq-tayi nazardan olib qaraganda federativ davlat tuzilishi-ga xos ba’zi elementlarni davlatchiligimiz o‘z mazmu-nida mujassam etadi. O‘zbekiston yagona hudud, yagona fuqarolik, yagona qonuniylik, yagona Oliy davlat hokimiyatiga ega markazlashgan unitar davlat-dir. Unitar davlatlarga Qozog‘iston, Turkmaniston, Tojikiston, Qirg‘iziston, Fransiya, Italiya va shu kabi-lar kiradi. Unitar davlatdan federativ davlatning farqi shundan iboratki, federativ davlat bir necha mustaqil davlatlar yoki alohida hududlarning birlashishi nati-jasida yuzaga keladi. Federativ davlatlarga AQSH, Germaniya, Hindiston, Rossiya misol bo‘la oladi. Federativ davlat federal hokimiyat tizimiga, federal qonunchilikka, federatsiya subyektlarining tengligiga va ularning o‘ziga xos mustaqillik belgilariga ega bo‘ladi.

O‘zbekiston Konstitutsiyasi o‘zbek davlatchiligi tarixiy tajribalarini asosli yo‘sinda aks ettirib, bu jihat

milliy davlat va ma'muriy-hududiy birliklar hamda hokimiyat va boshqaruv organlari tuzilishida namoyon bo'ladi.

O'zbekiston Respublikasi Konstitutsiyasi 3-moddasida mustahkamlangan qoidaga binoan «O'zbekiston Respublikasi o'zining milliy-davlat va ma'muriy-hududiy tuzilishini, davlat hokimiyati va boshqaruv organlarining tizimini belgilaydi, ichki va tashqi siyosatni amalga oshiradi». Bu norma O'zbekiston davlat sifatida o'zining milliy davlat va ma'muriy-hududiy tuzilishini o'zi belgilab, mustaqil siyosatini olib borishini bildiradi.

O'zbekiston Respublikasining ma'muriy-hududiy va davlat tuzilishi huquqiy asoslari Konstitutsiyaning 4-bo'limi 68—75-moddalaridagi qoidalarda berilgan. O'zbekiston Respublikasi o'z ichki hududiy tuzilishiga ega. Konstitutsiyaning 68-moddasidagi qoidaga muvofiq «O'zbekiston Respublikasi viloyatlar, tumanlar, shaharlar, shaharchalar, qishloqlar, ovullar, shuningdek Qoraqalpog'iston Respublikasidan iborat» bo'lib, bular O'zbekiston hududining tarkibiy bo'g'inlaridir. Bunday bo'linish idora etishning davlat organlariga aholining yaqin bo'lishini, ishlab chiqarishni samarali tashkil qilishni nazarda tutib amalga oshiriladi. 69-moddaga binoan «Qoraqalpog'iston Respublikasi, viloyatlar, Toshkent shahrining chegaralarini o'zgartirish, shuningdek viloyatlar, shaharlar, tumanlar tashkil qilish va ularni tugatish O'zbekiston Respublikasi Oliy Majlisining roziligi bilan amalga oshiriladi». O'zbekiston Respublikasi tarkibini: Qoraqalpog'iston Respublikasi, 12 ta viloyat, Toshkent shahar, 163 ta tuman, 119 ta shahar, 115 ta shaharchalar tashkil etadi.

O'zbekiston Respublikasi davlat tuzilishining davlatning yaxlitligi, davlat organlari tuzilishining yagonaligi va shu kabi prinsiplari mavjud. **O'zbekiston Respublikasi davlat tuzilishining o'ziga xos belgilari**



**tizimi quyidagilardan iborat:** suverenitetning butun hududda amal qilishi, konstitutsiya va qonunlar, davlat hokimiyati organlari, davlat hududi, yagona fuqarolik, davlat tili, yagona qurolli kuchlar, O‘zbekiston davlati ramzlari, poytaxti va shu kabilar.

**O‘zbekiston Respublikasi davlat tuzilishining muhim belgilari:** *hudud, aholi, hokimiyat va suverenitetdir.*

O‘zbekiston Respublikasi hududi: 447,4 ming *kv. km* ni tashkil qiladi. Davlat hududi chegaralarini va davlat suvereniteti amal qilishini belgilovchi chiziq — *davlat chegarasi deb ataladi*. Davlat chegarasi ma’lum davlatni boshqa davlatlar hududidan yoki xalqaro hududlardan ajratib turadi. O‘zbekiston Respublikasi davlat chegarasini belgilash, o‘zgartirish, himoya qilish va qo‘riqlash sohasidagi munosabatlar «O‘zbekiston Respublikasining Davlat chegarasi to‘g‘risida»gi Qonuni bilan tartibga solinadi. Ushbu Qonunning 3-moddasiga binoan, O‘zbekiston Respublikasi davlat chegarasi O‘zbekiston Respublikasi hududi doirasini (quruqlikda, suvda, yer ostida, havo bo‘shlig‘ida) belgilovchi chiziqdan va bu chiziq bo‘ylab o‘tuvchi vertikal sathdan iborat.

O‘zbekiston Respublikasi besh mustaqil davlat — Qozog‘iston, Qirg‘iziston, Tojikiston, Turkmaniston va Afg‘oniston davlatlari bilan chegaradosh. Davlatimiz chegaralarining umumiy uzunligi 6221 kilometrni tashkil etadi. Jumladan, Afg‘oniston bilan chegara — 137 *km*, Qozog‘iston — 2203 *km*, Qirg‘iziston — 1099 *km*, Tojikiston — 1161 *km*, Turkmaniston bilan 1621 *km* dan iborat.

Har bir davlat o‘z chegaralari doirasida joylashgan hududiga ega. *Davlat hududi tushunchasi* — yer sharining ma’lum davlat chegaralariga tegishli bo‘lgan qismini bildiradi. Chegaradosh davlatlarning hudud-

lari bir-biridan davlat chegaralari bilan ajratiladi. Elchixonalar, konsulliklar va O‘zbekiston Respublikasining boshqa xorijiy vakolatxonalari ham mamlakatimizning davlat hududi hisoblanadi. Davlatning hududiy hukmronligi uning o‘z hududida to‘la va beistisno mustaqilligini anglatadi.

O‘zbekiston Respublikasi hududi va iqtisodiy qudrati bo‘linmas, uning chegaralari esa daxlsiz bo‘lib, davlat himoyasidadir. Bu prinsip konstitutsiyada ham belgilab qo‘yilgan. Mamlakat hududining yaxlitligi va chegaralarining daxlsizligi har qanday davlatning muhim belgisi va hozirgi zamon xalqaro huquqining asosiy prinsiplaridandir.

«O‘zbekiston Respublikasining davlat mustaqilligi asoslari to‘g‘risida»gi Qonunning 4-moddasiga ko‘ra, «O‘zbekiston Respublikasining davlat chegarasi va hududi daxlsiz va bo‘linmas bo‘lib, uning xalqi o‘z xohish-irodasini erkin bildirmasdan turib o‘zgartirishi mumkin emas». Hududning yaxlitligi va daxlsizligi davlat xavfsizligining asosiy elementi bo‘lib, ularni himoya qilish va ta‘minlash davlatning asosiy vazifalaridan biridir.

O‘zbekiston davlat chegarasini qo‘riqlash vazifasini Respublika Milliy xavfsizlik xizmati chegara qo‘shinlari amalga oshiradi. O‘zbekiston chegarasi bilan bog‘liq masalalar chegaradosh davlatlar bilan shartnoma va kelishuvlar asosida hamda umume’tirof etilgan xalqaro me‘yoriy hujjatlar asosida tartibga solinadi. Davlat chegarasi masalasida O‘zbekiston izchil ravishda hozirgi zamon siyosiy tamoyillariga monand yo‘ldan bormoqda.

### **O‘zbekiston xalqi**

O‘zbekiston xalqini millatidan qat’i nazar O‘zbekiston Respublikasi fuqarolari tashkil etadi. Bu Konstitutsiyaning 8-moddasida qayd etilgan. O‘zbekiston aholisi 26,9 million kishi (2005-yil). O‘zbek millati aholining taxminan 78 foizini tashkil etadi. Ayni vaqt-

da O'zbekiston hududida o'z madaniyatiga va an'alariga ega bo'lgan millat vakillari yashaydi. O'zbekiston hududida 130 millat va elat vakillari istiqomat qiladi. Millat vakillarining tarkibiga agar e'tibor bersak: ruslar, tojiklar, qozoqlar, qirg'izlar, turkmanlar, ozarbayjonlar, uyg'urlar, tatarlar, dunganlar, gruzinlar, moldavanlar, arman, yahudiy va boshqa milliy guruhlar yashab mehnat qilishadi.

Respublikada istiqomat qiluvchi barcha millatlarining milliy madaniyatlari, urf-odatlari, an'analari va tillariga o'zaro hurmatda bo'lish konstitutsiyaviy talablardan biridir. Konstitutsiyaning 4-moddasida bu masala o'z aksini topgan: «O'zbekiston Respublikasi o'z hududida istiqomat qiluvchi barcha millat va elatlarning tillari, urf-odatlari va an'analari hurmat qilinishini ta'minlaydi, ularning rivojlanishi uchun sharoit yaratadi». Konstitutsiya O'zbekiston fuqarosi deb hisoblangan barcha shaxslarni, ularning millati, tili, urf-odatlari va milliy an'alaridan qat'i nazar, hurmat qilinishini huquqiy jihatdan kafolatlaydi. Shu bois har bir insonning o'zini erkin va teng huquqli deb his qilish imkonini beradigan munosabatlar o'rnatilmoqda.

O'zbekiston Respublikasi Konstitutsiyasining joriy yillarida Respublikada 100 ta milliy-madaniy Markaz ta'sis etildi va ular millatlararo hamjihatlikni ta'minlashda muhim rol o'ynamoqda. Ularning tashkil topishi bilan millat vakillarida o'z urf-odatlari, an'analari va tilini qayta tiklash uchun imkoniyatlar yaratildi. Milliy-madaniy Markazlar tomonidan amalga oshirilayotgan tadbirlar millatlar o'rtasida aloqalarning yanada mustahkamlanishida muhim ahamiyat kasb etmoqda. Dinga e'tiqod erkinligi ham huquqiy jihatdan ta'minlangan. Bugungi kunda mamlakatimizda ko'p millatlilik sharoitida 15 ta diniy konfessiya birlashmalari faoliyat ko'rsatib kelmoqda.

O'zbekiston Respublikasi Konstitutsiyasining XVII

bobida Qoraqalpog‘iston Respublikasining maqomi va uning suvereniteti muhofaza etilishi mustahkamlab qo‘yilgan. O‘zbekiston Respublikasi va Qoraqalpog‘iston Respublikasi o‘rtasidagi o‘zaro munosabatlarning huquqiy asoslari Konstitutsiyaning 70—75-moddalarida keng yoritilgan. Suveren Qoraqalpog‘iston Respublikasi O‘zbekiston Respublikasi tarkibiga kiradi. Bunday holat O‘zbekistonning va Qoraqalpog‘istonning umumiy mushtarak manfaatlariga monand keladi. Qoraqalpog‘iston suvereniteti O‘zbekiston Respublikasi tomonidan muhofaza qilinadi. O‘zbekiston Respublikasi qonunlari Qoraqalpog‘iston Respublikasi hududida ham majburiydir. O‘zbekiston Respublikasi va Qoraqalpog‘iston Respublikasi o‘rtasidagi o‘zaro munosabatlar O‘zbekiston Respublikasi Konstitutsiyasi doirasida tuzilgan shartnomalar va bitimlar bilan tartibga solinadi.

**Qoraqalpog‘iston Respublikasining konstitutsiyaviy belgilari:** o‘z konstitutsiyasiga egaligi, respublika parlamenti mavjudligi, respublika maqomining O‘zbekiston Respublikasi va Qoraqalpog‘iston Respublikasi Konstitutsiyasi tomonidan belgilanishi tashkil etadi. 1993-yilda Qoraqalpog‘iston Respublikasining Konstitutsiyasi qabul qilindi. Bu esa o‘zbeklar bilan qoraqalpoqlarning abadiy birligi va qon-qardoshligini to‘la tasdiqlaydi.

**O‘zbekiston Respublikasi  
davlat boshqaruvi**

Boshqaruv har qanday jamiyatning ichki ehtiyojidir. Mehnat jarayoni va umuman har qanday faoliyat jarayonini tashkil etish ehtiyoji boshqaruvni keltirib chiqaradi. **Boshqaruv** — ijtimoiy munosabatlarni tartibga solishga qaratilgan faoliyat hisoblanadi. Jamiyat maxsus boshqaruv tizimisiz mavjud bo‘la olmaydi. Jamiyat hayotidagi tartib jamiyat nomidan ish yurituvchi maxsus davlat boshqaruv tizimi va mustaqil shaxs hamda jamoalarning ijtimoiy o‘z-o‘zini boshqaruvi tizimi asosiga

qurilgandir. Lekin davlatgina jamiyatning yaxlit boshqaruv tizimi bo‘lib xizmat qila oladi. Davlat boshqaruvining o‘ziga xos tizimi shundaki, u davlat qonunlarining hamma fuqarolar uchun majburiy bo‘lgan kuchiga, jamiyatga va uning a‘zolariga taalluqli bo‘lgan ommaviy hokimiyatga tayanadi. Davlat boshqaruvining samaradorligi uning hokimiyati uyushqoqligi bilan kafolatlanadi. Ijtimoiy boshqaruv tizimida davlat asosiy bo‘g‘inni tashkil etadi. Buni davlat tomonidan amalga oshiriladigan boshqaruvni anglatgani uchun «Davlat boshqaruvi» deb atash mumkin. **Davlat boshqaruv tizimi** — ijro hokimiyatini amalga oshiruvchi idoralar tizimi, ya’ni ijro etish va farmoyish berish faoliyatini amalga oshiruvchi organlar tizimidan iborat.

O‘zbekiston Respublikasida davlat boshqaruvi tizimi quyidagilardan iborat:

— O‘zbekiston Respublikasi Bosh vaziri — respublika hukumatining boshlig‘i sifatida;

— O‘zbekiston Respublikasi Vazirlar Mahkaması — respublika hukumati;

— O‘zbekiston Respublikasi vazirliklari;

— O‘zbekiston Respublikasi davlat qo‘mitalari; O‘zbekiston Respublikasi markaziy davlat boshqaruvi idoralari va ularning joylardagi mahalliy organlari;

— viloyat, shahar, tuman hokimliklari hamda ularning bo‘lim va boshqarmalari.

Davlat boshqaruvi tizimining yuqoridagi tarmoq va yo‘nalishlari O‘zbekiston Respublikasi Konstitutsiyasi va har bir sohaga tegishli qonun hujjatlariga tayanib ish ko‘radilar.

Davlatning boshqaruv shaklini aniqlashda eng muhim belgilardan biri davlat boshlig‘ining huquqiy maqomi qandayligi, u davlat boshiga qanday yo‘l bilan kelishi hisoblanadi. Hozirgi dunyodagi mamlakatlar boshqaruv tizimi shakl jihatdan turlichadir. Dunyo davlatchiligi taraqqiyotida boshqaruvning

asosan ikki shakli — respublika va monarxiya shakli keng tarqalgan.

Respublika xalq hokimiyati demakdir. Respublika tushunchasi huquqiy qadriyat sifatida — *davlat idoralari vakolatlarini aniq belgilab berishni, qonun chiqaruvchi va ijroiya organlarning saylab qo'yilishini, ovoz beruvchilarning xohish-irodasi hisobga olinishini* bildiradi. Bu jihatlar Respublika tushunchasining ajralmas belgilaridir.

Respublika o'z navbatida Prezidentlik Respublikasi, Parlamentar Respublika va aralash respublika shaklida bo'ladi. Prezidentlik Respublikaning Parlamentar respublikadan farqi shundaki, prezident xalq tomonidan saylanadi, u davlat va ijro hokimiyatning boshlig'i hisoblanadi, hukumat prezident tomonidan tuziladi va unga hisobot beradi.

Parlamentar respublikada esa parlament, ya'ni Oliy vakillik, qonun chiqaruvchi idora, prezidentni va hukumat tarkibini saylaydi. Parlament saylovlarida g'alaba qilgan partiya rahbarlari hukumatni tuzadilar. Hukumat boshlig'i bosh vazir bo'lib, real hokimiyat uning qo'lida bo'ladi. Parlament hukumat qarorlariga o'z ta'sirini ko'rsatadi. Butun hukumat yoki uning ayrim a'zolarini iste'foga jo'natadi. Hukumat parlament oldida hisob beradi. Davlat boshqaruvining parlamentar respublika shakli hozirgi davrda Germaniya, Italiya, Hindiston, Avstriya, Polsha, Ruminiya, Turkiya kabi mamlakatlarda o'rnatilgan.

Aralash respublikada prezidentlik va parlamentar respublikaning asosiy xususiyatlari aralashgan holda o'z aksini topadi. Bunda prezident bevosita xalq tomonidan ma'lum muddatga saylanadi. U bevosita hukumatga rahbarlik qilmaydi. Hukumatni bosh vazir boshqaradi. Prezident Konstitutsiyaga binoan parlament yoki uni quyi palatasini tarqatib yuborish huquqiga ega. Qonun bilan belgilangan muddat o'tgandan so'ng, xalq tomonidan saylangan hokimiyat organ-

larining vakolati tugatiladi va ularga qaytadan saylov o'tkaziladi. Aralash respublika shakli hozirgi davrda Fransiya va Rossiya Federatsiyasi uchun xosdir.

Davlat boshqaruvining prezidentlik respublikasi shakli — davlat boshqaruvining samarali shakli bo'lib, davlatni boshqarish san'ati nazariyoti va amaliyotining taraqqiyoti natijasida tarixiy tajriba asosida tanlab olingan yo'llardan biri. Bu boshqaruv shaklida davlatni boshqarishda Parlamentga nisbatan Prezidentning huquqlari ustuvorligi ta'minlangan bo'ladi.

Prezidentlik respublikasi hozirgi kunda eng ko'p tarqalgan davlat boshqaruv shakli hisoblanadi. 1995-yilgi ma'lumotga ko'ra BMTga a'zo 186 davlatdan 140 tasida prezident lavozimi mavjud bo'lib, ularning aksariyati prezidentlik respublikasidir. Bular AQSH, Argentina, Braziliya, Meksika, Gonduras, Zambiya, Urugvay va boshqalardir.

O'zbekiston davlat mustaqilligiga erishgach, mamlakatda davlatni idora etishning zamonaviy hamda samarali shakli — prezidentlik shakli tizimi qaror top-tirildi. Ya'ni, *O'zbekistonda davlat boshqaruvining Prezidentlik Respublikasi shakli o'rnatilgan*. Prezidentlik Respublikasi shakli xalqning ma'naviy qadriyatlarini, xohish-istaklari va ruhiga mos keladi. Kuchli Prezidentlik Respublika boshqaruvi — kuchli ijroiya, idora qiluvchi hokimiyatdir. Ya'ni Respublika Parlamenti va xalqi oldida O'zbekiston kelajagini, fuqarolarning siyosiy erkinligini ta'minlashga qaratilgan kuchli ijroiya hokimiyatidir.

Prezidentlik Respublikasida eng muhimi — hokimiyat bo'linishini adolatli tarzda amalga oshirish imkoni bor. Ya'ni, qonun chiqaruvchi, ijro etuvchi, sud hokimiyati bir-biridan mustaqil holda ish olib boradi. Prezidentlik Respublikasida ijro hokimiyati Prezidentga bo'ysunadi. O'zbekiston nima uchun davlat boshqaruvining aynan shu usulini tanladi?

Buning sabablari bor. **Birinchidan** — sharqda demokratiyaga keng imkoniyat yaratilishi bilan birga kuchli hokimiyat mavjud boʻlgan. Davlat boshligʻi talabchan, qatʼiyatli, tinchlik, adolat va haqiqatga xizmat qilgan. **Ikkinchidan** — boshqaruvning parlamentar respublika usulida prezident parlament yigʻilishida uning aʼzolari tomonidan saylanadi. Prezidentlik Respublikasida esa, u umumxalq saylovi yoʻli bilan barcha fuqarolarning ovoz berishi bilan saylanadi. Bunda prezident oʻz vakolatini parlamentning sanoqli aʼzolaridagina emas, bevosita keng xalq ommasidan oladi. Qolaversa, buning siyosiy, huquqiy, maʼnaviy va demokratik mazmuni ham bor. Demak, jamiyatni boshqarishda davlat boshliqlarini saylash tartibi muhim ahamiyatga ega hisoblanadi. Prezidentning xalq tomonidan saylanishi, oʻz vakolatini xalqdan olishi boshqaruvning samarali amalga oshirilishiga taʼsir koʻrsatadi. Shuning uchun boshqaruvning Prezidentlik Respublika shakli davlat boshqaruvining eng maqbul shaklidir.

Prezidentlik Respublika boshqaruvi Prezidentga qatʼiy, dadil va jasurlik bilan faoliyat koʻrsatishi uchun imkon yaratadi. Oʻzbekiston Respublikasi Konstitutsiyasining 89-moddasida taʼkidlanganidek, «Oʻzbekiston Respublikasining Prezidenti davlat boshligʻidir va davlat hokimiyati organlarining kelishilgan holda faoliyat yuritishini hamda hamkorligini taʼminlaydi». Prezident Islom Karimovning demokratik qarashlari, qadriyatlarga tayanishi, rivojlanishni oldindan seza bilishi, yuz berayotgan jarayonlarga ilmiy asosda yondashishi, yechimlarni izlashda ommaga tayanishi, asoslangan rejalarni hayotga tatbiq etishi, siyosatda tadbirkorlik va oqillik kabi fazilatlarini keltirish oʻrinlidir.

Boshqaruvning Prezidentlik Respublikasi shakli mamlakatda demokratik siyosiy tuzum amal qilishini kafolatlaydigan tashkiliy davlat hokimiyatini ifoda



etadi. Shu nuqtayi nazardan qaraganda «Respublika» tushunchasi «demokratiya» tushunchasi bilan uzviy bogʻliqdir. Oʻzbekiston Respublikasida davlat hokimiyatini tashkil etish va amalga oshirish usul va vositasi demokratik asosga qurilgan. Bilasizki, davlat siyosiy rejimining demokratik, totalitar, avtoritar turlari mavjud. Oʻzbekistonda hokimiyatni amalga oshirishda demokratik yoʻl maqbul topilgan. Kuchli va taʼsirchan demokratik davlat hokimiyati bilan totalitarizm, avtoritarizm, diktatura oʻrtasida hech qanday mushtaraklik yoʻq. Faqat demokratiya ustuvor boʻlgan davlatgina xalqni baxt-saodatga eltib boradi.

**Demokratiya** bu Konstitutsiya va qonunlar doirasida erkinlik demakdir. Konstitutsiyamizda demokratik respublikaning barcha belgilari bor. Jumladan: xalq hokimiyatning yagona manbayidir, davlat boshligʻi har 7 yilda qayta saylanadi, davlat hokimiyatini amalga oshirishda vakillik organlari muhim oʻrin tutadi, fuqaroning huquq va erkinliklari taʼminlanganligini aytiшимiz mumkin.

Jamiyatda demokratiya qay darajada ekanligini belgilovchi uchta mezon bor. **Birinchisi** — xalq qarorlar qabul qilish jarayonlaridan qanchalik xabardorligi, **ikkinchisi** — hukumat qarorlari xalq tomonidan qanchalik nazorat qilinishi, **uchinchisi** — oddiy fuqarolar davlatni boshqarishda qanchalik ishtirok etishidir.

Xalqni hokimiyatning yagona manbayi sifatida tan olish boshqaruvning respublika shakliga ega boʻlgan demokratik davlatlarga xos xususiyatdir. Xalq hokimiyatchiligi hokimiyatning davlat tuzilmalari (vakillik organlari ijro etuvchi va sud hokimiyati) va fuqarolarning oʻzini oʻzi boshqarish organlari orqali amalga oshiriladi. Xalq hokimiyatchiligining bevosita (toʻgʻridan toʻgʻri) demokratiya va bilvosita, yaʼni vakillik shakli mavjud. Bevosita (toʻgʻridan toʻgʻri) demokratiya shakliga: referendum (umumxalq ovoz berishi), saylovlar, qonun loyihalarini muhokama qi-

lish, yigʻilishlar, mitinglar va namoyishlar, hokimiyat tuzilmalariga yakka tartibda va jamoa boʻlib murojaat qilish kabilar kiradi. Vakillik shakliga esa, butun davlat, vakillik idoralari, siyosiy partiyalar, jamoat birlashmalari, ommaviy ijtimoiy harakatlar kiradi. Demokratiyaning asosiy vazifasi — jamiyatdagi kuchlarni murosasida birlashtirib, ularni umumiy kelishuv — konsensusga olib kelish va mamlakatning taraqqiyoti uchun xizmatga safarbar qilishdan iboratdir. Bugungi kunda Oʻzbekiston demokratiya tamoyillariga amal qilgan holda rivojlanmoqda.

## 11-§ BOʻYICHA EGALLAGAN BILIMLARINGIZNI MUSTAHKAMLASH UCHUN TOPSHIRIQLAR

**Mustaqil  
fikir  
bildiring**



1. Sobiq shoʻro davlatchilik qurilmasining mohiyatini ochib bering.
2. Shoʻro davrida qabul qilingan Konstitutsiyalar mazmuniga munosabat bildiring.
3. Oʻzbekistonning milliy davlatchilikni rivojlantirish tajriba va istiqbollari haqida fikr yuriting.
4. Oʻzbek milliy davlatchiligi rivojlanishi boy huquqiy merosga asoslanishini tarixiy dalillarga suyanib izohlang.

**Statistik  
maʼlumotlar  
keltiring**



Mustaqil Oʻzbekistonning jahonda xalqaro huquq subyekti sifatidagi nufuzining ortib borishi:

- 1) davlatlararo munosabatlar;
- 2) iqtisodiy sohadagi munosabatlar;
- 3) jahon hamjamiyati bilan aloqalar;
- 4) turli yoʻnalishdagi oʻzaro shartnomalar;
- 5) inson huquqlariga daxldor xalqaro huquqiy hujjatlarning ratifikatsiya qilinishi.

**Bilimingizni mustahkamlang**



O'zbekistonda davlat tuzilishi va boshqaruv shakli bo'yicha olgan bilimlaringizni jadvalga qayd qilib, uni Konstitutsiyadan kelib chiqqan holda asoslab bering.



O'zbekistonda davlat tuzilishi	O'zbekistonda davlat boshqaruvi

**Qonunlar bilan tanishing**



O'zbekistonda milliy davlat tuzilishi va boshqaruv shaklini Konstitutsiya asosida qabul qilingan qonunlar bilan izohlab bering.

**Konstitutsiyaviy qoidalarni izohlang**



Konstitutsiyaning to'rtinchi bo'limidagi 68—75-moddalardagi qoidalar mazmunini izohlab, O'zbekiston Respublikasining ma'muriy-hududiy va davlat tuzilishini yoritib bering.

**Mulohaza yuriting**



Konstitutsiyaning XVIII bobi Qoraqalpog'iston Respublikasiga bag'ishlanadi.



**70-modda: «Suveren Qoraqalpog'iston Respublikasi O'zbekiston tarkibiga kiradi. Qoraqalpog'iston Respublikasi suvereniteti O'zbekiston Respublikasi tomonidan muhofaza etiladi.»**

1995-yil «Tafakkur» jurnalining 3/4 sonida chop etilgan To'lepbergen Qaipbergenovning «Xalqingni suy, Turkistonni suy» mavzusidagi savollarga javoblaridan:

**Savol:** Sizningcha istiqlol ne'matlari qoraqalpoq xalqi taqdiriga qanday mazmun bag'ishladi?

**Javob:** Xabaringiz bor, mening deyarli barcha asarlarimda qoraqalpoq xalqining millat sifatida shakllanish jarayoni, uning turkiy qardoshlar bilan birlikka talpinib, o'zligini topishga intilish tarixi yoritiladi. Orol fojiasi o'laroq aytish mumkinki, mustamlaka zulmini, mustabid tuzum tazyiqini biz hammadan ham ko'proq tatidik. Shu bois, Vatanimiz mustaqilligidan biz barchadan ortiq quvondik. Istiqlol tufayli qoraqalpoq tili, dini, milliy qadriyatlarini erkin rivojlantirish, milliy maktab-maorifni yo'lga solish, o'z sharoitimizga mos iqtisodiyot yuritib, turmush kechirish imkoniyatiga ega bo'ldik.

U sobiq SSSR davrida nomigagina muxtor jumhuriyat sanalar, aslida oddiy viloyat maqomida edi. Qoraqalpoq xalqi endi haqiqiy qadr-qimmatni topa boshladi.

**Xotirada saqlang**



Quyidagi tushuncha va so'z birikmalarini esda tuting va dars jarayonida ularga o'z munosabatingizni bildiring:

Davlat shakli, davlat tuzilishi, davlat boshqaruvi, davlat hududi, davlat chegarasi, hudud va chegara daxlsizligi, davlat aholisi, O'zbekiston xalqi, Prezidentlik va Parlamentar Respublika, demokratiya.

## **12-§. O'ZBEKISTON RESPUBLIKASI PARLAMENTI — OLIY MAJLIS**

**O'zbekiston Respublikasi  
Oliy Majlisining davlat  
hokimiyati organlari  
tizimida tutgan o'rni**

Parlamentning davlat organlari tizimidagi o'rni va mavqeyi juda muhim. «Parlament» so'zi fransuzcha «parler» so'zidan olinib, «gapirmoq», «so'zlamoq» ma'nosini anglatadi. Nimaga davlatning oliy organi «so'zlovchi» organ deb atalgani surishtirsak, biz parlamentning ahamiyatini tushunib olamiz. Qadimgi Rim, Gretsiya davlatlarida xalq vakillik organlari mavjud bo'lgani bilan parlamentning vatani Angliya sanaladi. 1215-yili qirol hokimiyatining zo'ravonligidan charchagan aslzodalar qirol hokimi-

yatiga qarshi chiqishdi va «Erkinliklar Buyuk xartiyasi-ni» e'lon qilishdi. Unga ko'ra davlatning asosiy masalalari hududiy birliklardan yuborilgan aslzodalar vakillik organi bilan bamaslahat qabul qilinishi nazarda tutilgan. Shu davrgacha qirol o'z bilganicha insonlar hayotiga, mol-mulkiga hukmronlik qilib kelgan edi. Parlamentning paydo bo'lishi tarixiy zarurat bo'ldi. Chunki, qanchalik odil qirol bo'lganida ham, u oddiy fuqaro manfaatini amalga oshirish uchun barcha hudud xalq vakillaridan mavjud muammolarni bilishi kerak bo'lardi. Parlament ana shu maqsadda oddiy kishilar manfaatlarini ko'zlab davlat hokimiyatini amalga oshirish mexanizmini shakllantirib keldi. Aynan parlamentning paydo bo'lishi jamiyatni evolucion rivojlanishiga xizmat qildi. Chunki parlament fuqarolar, ularning turli guruhlari o'rtasidagi ziddiyatlarni mavjud ijtimoiy holatdan kelib chiqqan holda barcha uchun qulayroq yechimini topib, jamiyatda murosas va tinchlikni ta'minlagan.

O'zbekiston Respublikasi Oliy Majlisi ham parlamentarizm madaniyatining barcha yutuqlarini o'zida mujassamlashtirishni maqsad qilib qo'ygan. O'zbekiston Respublikasi Konstitutsiyasi bo'yicha davlat hokimiyatining tashkil etilishi va faoliyati vakolatlarining taqsimlanishi prinsipi asosida amalga oshiradi. Qonun chiqaruvchi, ijro etuvchi va sud hokimiyati davlatning uch asosiy tayanchidir. O'zbekiston Respublikasi Konstitutsiyasida ana shu uchta hokimiyat idorasining uyg'un faoliyatini ta'minlash vositalari, ularni davlat siyosatining umumiy yo'nalishlari bo'yicha murosasga keltirish va bu idoralarning o'zaro bir-birlarini xatolar, zo'ravonliklardan tiyib turish mexanizmini vujudga keltiruvchi qoidalar mustahkamlangan.

O'zbekiston Respublikasi Konstitutsiyasining 76-moddasiga muvofiq O'zbekiston Respublikasining Oliy Majlisi Respublikada qonun chiqaruvchi ho-

kimiyatni amalga oshiruvchi davlatning oliy vakillik organi hisoblanadi.

O‘zbekiston Respublikasi Oliy Majlisi ikki palatadan — Qonunchilik palatasi (quyi palata) va Senat (yuqori palata)dan iborat.

1992-yilgi Konstitutsiya qabul qilgunga qadar, Respublika Oliy Kengashi oliy hokimiyat organi hisoblanar edi. O‘zbekiston Respublikasi Oliy Majlisi avvalgi Oliy Kengashdan ko‘pgina jihatlari bilan ajralib turadi. Respublika Prezidenti Islom Karimov Oliy Majlisning 1-sessiyasida so‘zlagan nutqida bu farqlarni ko‘rsatib o‘tib, shunday degan edi: «Oliy Majlis sobiq Oliy Kengashdan butun mazmun-mohiyati bilan farq qiladi. Uning shakllanishidan tortib, o‘z faoliyatini tashkil etish tartiblari va ish usullarigacha buni yaqqol isbotlaydi»<sup>1</sup>.

Respublika Oliy Majlisning sobiq ittifoq davridagi Oliy Kengashdan *birinchi eng muhim farqi* Oliy Majlis ikki palata — Senat va Qonunchilik palatalaridan iborat.

Respublika Oliy Majlisning avvalgi Respublika Oliy Kengashidan *ikkinchi farqi* shundaki, Oliy Majlis Qonunchilik palatasi birinchi marta haqiqiy ko‘ppartiyaviylik tamoyili asosida shakllandi. Har bir partiyaning deputatlari Oliy Majlisda partiya fraksiyalarini tashkil etadi. Ular orqali siyosiy partiyalar Oliy Majlisning qonun chiqarish faoliyatida faol qatnashib, shu tariqa davlat hokimiyatini amalga oshirishda munosib hissa qo‘shadigan bo‘ldilar.

Respublika Oliy Majlisning Oliy Kengashdan *uchinchi farqi* shundaki, Oliy Majlis deputatlarini shakllantirish avvalgi Oliy Kengashni sinfiy asosda soni va o‘rnini avvaldan ko‘rsatib, shakllanishidan butunlay farq qilib, hozirda O‘zbekiston Respublikasi

---

<sup>1</sup> K a r i m o v I. A. O‘zbekistonning siyosiy-ijtimoiy va iqtisodiy istiqbolining asosiy tamoyillari. T., «O‘zbekiston», 1995, 25-bet.

Oliy Majlisining Qonunchilik palatasi hududiy saylov okruglari bo'yicha saylanadigan bir yuz ellik deputatdan iborat bo'ladi.

O'zbekiston Respublikasi Oliy Majlisning Senati jami 100 nafar, jumladan 84 nafar hududiy vakillardan va 16 nafar fan, san'at, adabiyot, ishlab chiqarish sohasida hamda davlat va jamiyat faoliyatining boshqa tarmoqlarida katta amaliy tajribaga ega bo'lgan, alohida xizmat ko'rsatgan eng obro'li fuqarolar orasidan O'zbekiston Respublikasi Prezidenti tomonidan tayinlanadigan Senat a'zolaridan iborat bo'ladi.

Respublika Oliy Majlisining avvalgi Oliy Kengashdan *to'rtinchi farqi* shundaki, Oliy Majlis Senat tarkibidagi a'zolarining ma'lum bir qismi Oliy Majlis Senati tuzilmalari va uning qo'mitalarida doimiy ishlash uchun qoldiriladi. Qonunchilik palatasining 150 nafar deputatlari doimiy ishlaydi.

2008-yil 25-dekabrda «Saylov to'g'risidagi qonun hujjatlari takomillashtirilishi munosabati bilan O'zbekiston Respublikasining ayrim qonunlariga qo'shimcha va o'zgartishlar kiritish to'g'risida»gi O'zbekiston qonuni qabul qilindi. Mazkur Qonunga binoan Qonunchilik palatasining deputatlari soni 120 dan 150 nafarga ko'paytirildi. Bunda 135 deputat ko'p partiyaviylik asosida hududiy saylov okruglaridan saylanadi. Palataning 15 deputati esa mamlakat ma'muriy-hududiy bo'linishidan kelib chiqib, O'zbekiston Ekologik harakatidan saylanadi.

Qonunchilik palatasi nafaqat doimiy, balki professional asosda ishlaydi.

Respublika Oliy Majlisining *yana bir farqli jihati* shundaki, Oliy Majlis O'zbekistonni mustaqil tashqi siyosat olib borishi tufayli bir qator nufuzli tashkilotlarga, jumladan: Parlamentlararo Ittifoq, Yevropa xavfsizlik va hamkorlik tashkilotlarining Parlament Assambleyasiga a'zo bo'ldi. Oliy Majlis O'zbekistonning jahondagi barcha Parlamentlar bilan aloqalarini

yanada mustahkamlash maqsadida o'z qoshida maxsus parlamentlararo aloqalar qo'mitasini tashkil etgan. O'zbekiston Respublikasi Oliy Majlisining Qonunchilik palatasi va Senati qonun chiqaruvchi hokimiyatni amalga oshirish vakolatiga egadir.

**Oliy Majlis Qonunchilik palatasi va Senatining birgalikdagi vakolatlari**

O'zbekiston Respublikasi Konstitutsiyasining 78—80-moddalari Respublika Oliy Majlisining Qonunchilik palatasi va Senatning birgalikdagi hamda alohida mutlaq vakolatlarini belgilaydi. Respublika Oliy Majlisi Qonunchilik palatasi va Senatining birgalikdagi vakolatlari Respublika Konstitutsiyasining 78-moddasida to'liq ko'rsatib berilgan. Shuni alohida qayd etish lozimki, O'zbekiston Respublikasida davlat hokimiyati idoralari tomonidagina amalga oshiriladi. Shuning uchun O'zbekiston Konstitutsiyasida nazarda tutilmagan tartibda davlat hokimiyati vakolatlarini o'zgartirish, hokimiyat idoralari faoliyatini to'xtatib qo'yish yoki tugatish, hokimiyatning yangi va muvoziy tarkiblarini tuzish Konstitutsiyasiga zid hisoblanadi va qonunga binoan javobgarlikka tortishga asos bo'ladi.

O'zbekiston Respublikasi Konstitutsiyasining 78-moddasiga asosan, O'zbekiston Oliy Majlisi Qonunchilik palatasi va Senatining qonun chiqarish sohasidagi birgalikdagi vakolatlarini shaklan besh guruhga bo'lish mumkin. Jumladan: 1) davlat qurilishi sohasidagi; 2) xo'jalik sohasidagi; 3) boshqaruv va sud organlarini tuzish sohasidagi; 4) O'zbekiston Respublikasi huquq tizimi qonunchiligi va inson huquqlari sohasidagi; 5) xalqaro aloqalar sohasidagi vakolatlardir.

**Oliy Majlis Qonunchilik palatasi va Senatining davlat qurilishi sohasidagi qonunchilik vakolatiga quyidagi masalalar kiradi:** O'zbekiston Respublikasining Konstitutsiyasini qabul qilish, unga o'zgartishlar va qo'shimchalar kiritish; O'zbekiston Respublikasining qonun chiqaruvchi, ijro etuvchi va sud



hokimiyati tizimini va vakolatlarini O‘zbekiston Respublikasi Konstitutsiyasiga muvofiq belgilash; O‘zbekiston Respublikasi tarkibidagi yangi davlat tuzilmalarini qabul qilish va ularni O‘zbekiston Respublikasi tarkibidan chiqarish haqidagi qarorlarini tasdiqlash; ma’muriy-hududiy tuzilish masalalarini qonun yo‘li bilan tartibga solish, O‘zbekiston Respublikasi chegaralarini o‘zgartirish; tumanlar, shaharlar, viloyatlarni tashkil etish, tugatish, nomini o‘zgartirish va ularning chegaralarini o‘zgartirish; O‘zbekiston Respublikasi Oliy Majlisiga va mahalliy vakillik organlariga saylov tayinlash, Markaziy saylov komissiyasini tuzish; vakolati tugashi munosabati bilan O‘zbekiston Respublikasi Prezidenti saylov kunini tayinlash; Respublika referendumini o‘tkazish to‘g‘risida va o‘tkazish sanasini tayinlash haqidagi qarorlarni qabul qilish; davlat mukofotlari va unvonlarini ta’ sis etish.

**Oliy Majlis Qonunchilik palatasi va Senatning xo‘jalik sohasidagi qonunchilik vakolatlari quyidagilardan iborat:** O‘zbekiston Respublikasi ichki va tashqi siyosatining asosiy yo‘nalishlarini belgilash va davlat strategik dasturlarini qabul qilish; boj, valuta va kredit ishlarini qonun yo‘li bilan tartibga solish; Vazirlar Mahkamasining taqdimiga binoan O‘zbekiston Respublikasining budjetini qabul qilish va uning ijrosini nazorat etish, soliqlar va boshqa majburiy to‘lovlarni joriy qilish.

**Oliy Majlis Qonunchilik palatasi va Senatning O‘zbekiston Respublikasining boshqaruv organlarini tuzish sohasidagi birgalikdagi vakolatlariga quyidagilar kiradi:** O‘zbekiston Respublikasining Konstitutsiyasiga muvofiq (O‘zbekiston Respublikasi Prezidentining taqdimiga binoan), O‘zbekiston Respublikasi Bosh vaziri nomzodini ko‘rib chiqadi va tasdiqlaydi; vazirliklar, davlat qo‘mitalari va davlat boshqaruvining boshqa organlarini tuzish hamda tugatish to‘g‘risidagi farmonlarini tasdiqlaydi.

Oliy Majlis Qonunchilik palatasi va Senatning O‘zbekiston Respublikasi huquq tizimi va inson huquqlari sohalari bo‘yicha birgalikdagi vakolatiga: respublika huquq tizimining barcha sohasidagi qonunlarni qabul qilish hamda ularga tegishli o‘zgartishlar va qo‘shimchalar kiritish, O‘zbekiston Respublikasi Oliy Majlisining Inson huquqlari bo‘yicha vakili va uni o‘rinbosarini saylash kiradi.

Oliy Majlis Qonunchilik palatasi va Senatning xalqaro masalalar sohasidagi birgalikdagi vakolatlariga: xalqaro shartnomalar va bitimlarni ratifikatsiya (tasdiqlash) va denonsatsiya qilish (barvaqt to‘xtatish); O‘zbekiston Respublikasi Prezidentining umumiy yoki qisman safarbarlik e‘lon qilish, favqulodda holat joriy etish, uning muddatini uzaytirish va to‘xtatish to‘g‘risidagi farmonlarini tasdiqlash kiradi.

O‘zbekiston Respublikasi Oliy Majlisi o‘z faoliyatini Senat a‘zolari va Qonunchilik palatasi tarkibiga saylangan deputatlar orqali amalga oshiradi.

Respublika Oliy Majlisi Senati a‘zolari va Qonunchilik palatasi deputatlari o‘z huquqlari va burchlarini ijro etishda O‘zbekiston Respublikasi Konstitutsiyasining 88-moddasida ko‘rsatilgan qoidalarga amal qilgan holda ishlaydilar. Bu moddada Oliy Majlis Senati a‘zolari va Qonunchilik palatasi deputatining huquqlari, burchlari hamda faoliyatining shakllari va kafolatlari ko‘rsatilgan.

<b>Oliy Majlis Senatining mutlaq vakolatlari</b>
--

O‘zbekiston Respublikasi Oliy Majlisining Senati mutlaq vakolatlari Konstitutsiyamizning 80-moddasida belgilangan:

— Senat Raisini va uning o‘rinbosarlarini, qo‘mita raislari va ularning o‘rinbosarlarini saylash; Prezident taqdimiga binoan Konstitutsiyaviy sudni, Respublika Oliy sudi, Oliy xo‘jalik sudini saylash; Prezident taqdimiga binoan Respublika tabiatni muhofaza qilish davlat qo‘mitasining raisini tayinlash va lavozimidan ozod qi-

lish; Prezidentning Respublika Bosh prokurori va uning o‘rinbosarlarini tayinlash va ularni lavozimidan ozod etish to‘g‘risidagi farmonlarini tasdiqlash; Prezidentning Respublika Milliy xavfsizlik xizmati raisini tayinlash va uni lavozimidan ozod etish to‘g‘risidagi farmonlarni tasdiqlash; Prezidentning taqdimiga ko‘ra chet davlatlardagi diplomatik va boshqa vakillarini tayinlash hamda ularni lavozimidan ozod qilish; Prezidentning taqdimiga binoan amnistiya to‘g‘risidagi hujjatlarni qabul qilish; Respublika Bosh prokurorining taqdimiga ko‘ra, Senat a‘zosini daxlsizlik huquqidan mahrum etish to‘g‘risidagi masalalarni hal etish; Respublika Bosh prokurorining, Tabiatni muhofaza qilish davlat qo‘mitasi raisining, Respublika Markaziy banki boshqaruvi raisining hisobotlarini eshitish; o‘z faoliyatini tashkil etish va palataning ichki tartib-qoidalari bilan bog‘liq masalalar yuzasidan qarorlar qabul qilish; siyosiy, ijtimoiy-iqtisodiy hayot sohasidagi u yoki bu masalalar yuzasidan, shuningdek, davlat ichki va tashqi siyosati masalalari yuzasidan qarorlar qabul qilish. Bu vakolatlar Konstitutsiyamizning yuqorida ko‘rsatilgan moddasida 14 ta bandeda aniq ko‘rsatib o‘tilgan.

**Oliy Majlis Qonunchilik  
palatasining mutlaq  
vakolatlari**

O‘zbekiston Respublikasi Konstitutsiyasining 79-moddasida Qonunchilik palatasi mutlaq vakolatlari aniq ko‘rsatilgan:

— Qonunchilik palatasi Spikeri va uning o‘rinbosarlarini saylash; Bosh prokuror taqdimiga binoan Qonunchilik palatasi deputatini daxlsizlik huquqidan mahrum etish to‘g‘risidagi masalalarni hal etish; o‘z faoliyatini tashkil etish va palataning ichki tartib-qoidalari bilan bog‘liq masalalar yuzasidan qarorlar qabul qilish; siyosiy, ijtimoiy-iqtisodiy hayot sohasidagi u yoki bu masala yuzasidan, shuningdek, davlat ichki va tashqi siyosati masalalari yuzasidan qarorlar qabul qilish.

O'zbekiston Respublikasi Oliy Majlisi Qonunchilik palatasi va Senati vakolat muddati besh yil bo'lib, bu muddat tugagach, ular yangi chaqiriq Qonunchilik palatasi va Senati ish boshlaguniga qadar o'z faoliyatini davom ettirib turadi.

**Oliy Majlis Qonunchilik  
palatasi va Senati faoliyatining tashkiliy  
shakllari**

O'zbekiston Respublikasi Oliy Majlisi Qonunchilik palatasi va Senatining faoliyat shakllari Konstitutsiyamizning 81-moddasida, O'z-

bekiston Respublikasi Oliy Majlisining Qonunchilik palatasi reglamenti to'g'risidagi hamda Oliy Majlis Senatining reglamenti to'g'risidagi 2003-yil 29-avgustda qabul qilingan qonunlarda belgilab berilgan.

Qonunchilik palatasi faoliyatining tashkiliy shakli, uning Qonunchilik palatasi sessiyalari davrida, qoida tariqasida, haftasiga uch marta o'tkaziladigan majlislaridir.

Qonunchilik palatasining majlislari, agar ularning ishida palata deputatlari umumiy sonining kamida yarmi ishtirok etsa vakolatli hisoblanadi. O'zbekiston Respublikasi Konstitutsiyasini, konstitutsiyaviy qonunlarni qabul qilishda, ularga o'zgartirishlar va qo'shimchalar kiritishda deputatlar umumiy sonining kamida uchdan ikki qismi hozir bo'lishi shart.

Qonunchilik palatasining birinchi majlisi Qonunchilik palatasiga saylovdan keyin, ikki oydan kechiktirmay o'tkaziladi. Mazkur majlisni O'zbekiston Respublikasi Markaziy saylov komissiyasining Raisi ochadi va Qonunchilik palatasi Spikeri saylangunga qadar unda raislik qiladi.

Qonunchilik palatasining birinchi majlisi ishini tashkil etish uchun majlisning muvaqqat kotibiyati va sanoq komissiyasi saylanadi.

Qonunchilik palatasining birinchi majlisida uning faoliyatini tashkil etish bilan bog'liq masalalar ko'rib chiqiladi, shu jumladan, qoida tariqasida:

— elektron tizimdan foydalanish ustidan muvaqqat nazorat guruhi saylanadi;

— Qonunchilik palatasi Spikeri va uning o‘rinbosari saylanadi;

— siyosiy partiyalar fraksiyalari va deputatlar ro‘yxatga olinadi;

— Qonunchilik palatasining qo‘mitalari tuziladi.

Qonunchilik palatasining navbatdan tashqari majlislari uning sessiyalari oralig‘ida O‘zbekiston Respublikasining Prezidenti, Qonunchilik palatasi Spikeri taklifiga yoki Qonunchilik palatasi deputatlar umumiy sonining kamida uchdan bir qismining taklifiga binoan chaqirilishi mumkin.

Qonunchilik palatasining majlislari ochiq, oshkora o‘tkaziladi va ommaviy axborot vositalari tomonidan yoritiladi. Qonunchilik palatasining qaroriga binoan yopiq majlislar o‘tkazilishi ham mumkin.

Qonunchilik palatasi faoliyatini samarali tashkil etish, qo‘mitalar ishini muvofiqlashtirib borish, qonun loyihalarini tayyorlash ishini rejalashtirish masalasini dastlabki tarzda ko‘rib chiqishni tashkil etish maqsadida Qonunchilik palatasi Kengashi tuziladi.

Qonunchilik palatasi Kengashining tarkibiga Qonunchilik palatasining Spikeri, uning o‘rinbosarlari, fraksiyalar va deputatlar guruhining rahbarlari, Qonunchilik palatasi qo‘mitalari raislari kiradi.

Qonunchilik palatasi Kengashiga Qonunchilik palatasi Spikeri rahbarlik qiladi, u Kengashning majlislarini olib boradi va uning qarorlarini imzolaydi.

Qonunchilik palatasining qo‘mitalari, komissiyalari, fraksiyalari va deputatlar guruhlari huquqiy maqomlari Qonunchilik palatasi reglamenti to‘g‘ri-sidagi Qonunda belgilangan.

Senat faoliyatining tashkiliy shakli — zaruratga qarab, lekin yiliga kamida uch marta o‘tkaziladigan majlislaridir.

Senat majlislari, agar senatorlar umumiy sonining kamida yarmi ishtirok etganda vakolatli hisoblanadi. O‘zbekiston Respublikasining Konstitutsiyasini, konstitutsiyaviy qonunlarni ma’qullash, ularga o‘zgartirishlar va qo‘shimchalar kiritish to‘g‘risidagi masalalarni ko‘rib chiqishda senatorlar umumiy sonining kamida uchdan ikki qismi hozir bo‘lishi shart.

Senatning birinchi majlisi Senat shakllantirilgandan keyin bir oydan kechiktirmay o‘tkaziladi. Mazkur Majlisni O‘zbekiston Respublikasi Markaziy saylov komissiyasining Raisi ochadi va Senat Raisi saylangunga qadar unda raislik qiladi.

Senatning birinchi majlisi ishini tashkil etish uchun majlisning muvaqqat kotibiyati va sanoq komissiyasi saylanadi.

Senatning birinchi majlisida uning faoliyatini tashkil etish bilan bog‘liq masalalar ko‘rib chiqiladi, jumladan qoida tariqasida:

— elektron tizimdan foydalanish ustidan muvaqqat nazorat guruhi saylanadi;

— Senat raisi, uning o‘rinbosarlari saylanadi;

— Senatning qo‘mitalari tuziladi.

Senatning navbatdan tashqari majlislari O‘zbekiston Respublikasining Prezidenti, Senatning raisi, taklifiga yoki senatorlarning umumiy sonining kamida uchdan bir qismining taklifiga binoan chaqirilishi mumkin.

Senatning majlislari ochiq, oshkora o‘tkaziladi va ommaviy axborot vositalari tomonidan yoritiladi. Senatning qaroriga binoan yopiq majlislar ham o‘tkazish mumkin.

Senat va Qonunchilik palatalari Qonunda belgilangan hollarda palatalarning qo‘shma majlislarini o‘tkazadi.

Qo‘shma majlislar O‘zbekiston Respublikasi Prezidenti, Senat raisi, Qonunchilik palatasi Spikerining taklifiga yoki tegishli senatorlar yoxud Qonunchilik

palatasi deputatlari umumiy sonining kamida uchdan bir qismini taklifiga binoan chaqiriladi.

Senat Kengashi — senat faoliyatini samarali tashkil etish, qo‘mitalar ishini muvofiqlashtirish, kun tartibi yuzasidan takliflar tayyorlash, qonunlarni dastlabki tarzda ko‘rib chiqishni tashkil etish maqsadida tuziladi.

Senat kengashi tarkibiga Senat Raisi, uning o‘rinbosarlari, Senat qo‘mitalari raislari kiradi.

Senat Kengashiga Senat raisi rahbarlik qiladi.

Senat qo‘mitalari, komissiyalarining huquqiy maqomlari «O‘zbekiston Respublikasi Oliy Majlisi Senatining reglamenti to‘g‘risida»gi Qonunda belgilangan.

<b>Oliy Majlisning qonun chiqaruvchilik faoliyati</b>
---

O‘zbekiston Respublikasi Oliy Majlisining qonun chiqaruvchilik faoliyati besh

bosqichda amalga oshiriladi. Ushbu bosqichlar konstitutsiyaviy huquq nazariyasida qonun chiqarish jarayoni deb ataladi va qonunchilik tashabbusini ko‘rsatish qonun loyihasini muhokama qilish, qabul qilish, Senat tomonidan ma’qullash hamda qonunni imzolash va e’lon qilishdan iborat bo‘ladi.

**Qonun chiqarish jarayonining birinchi bosqichi.**

O‘zbekiston Respublikasi Konstitutsiyasining 83-moddasida O‘zbekiston Respublikasi Oliy Majlisida qonunchilik tashabbusi huquqiga ega subyektlarning ro‘yxati keltiriladi. Qonunchilik tashabbusi huquqiga O‘zbekiston Respublikasining Prezidenti, shuningdek, o‘z davlat hokimiyatining oliy organi orqali Qoraqalpog‘iston Respublikasi, O‘zbekiston Respublikasi Oliy Majlisi Qonunchilik palatasining deputatlari, O‘zbekiston Respublikasi Vazirlar Mahkamasi, O‘zbekiston Respublikasi Konstitutsiyaviy sudi, Oliy sudi, Oliy xo‘jalik sudi, Bosh prokurori egadirlar.

Bu huquq qonunchilik tashabbusi huquqi subyektlari tomonidan qonun loyihasini O‘zbekiston Respublikasi Oliy Majlisining Qonunchilik palatasiga kiritish orqali amalga oshiriladi.

Oliy Majlis Qonunchilik palatasiga qonunchilik taklifi bilan murojaat etish huquqi hech kim uchun cheklanmagan. Shunday taklif kiritilgan taqdirda esa, qonun loyihalari qonun chiqarish tashabbusi huquqiga ega bo'lgan yuqorida ko'rsatilgan idoralar va shaxslar orqali O'zbekiston Respublikasi Oliy Majlisi Qonunchilik palatasiga kiritiladi.

Qonun loyihasi Qonunchilik palatasiga qonunchilik tashabbusi huquqi subyektlari tomonidan kiritiladi.

Qonun loyihasini Qonunchilik palatasiga kiritishda quyidagilar taqdim etilishi kerak:

1) qonun loyihasiga uning konsepsiyasi bayon qilingan holdagi tushuntirish xati;

2) o'zgartirishlar va qo'shimchalar kiritish to'g'risidagi, shuningdek qonun loyihasi kiritilishi bilan bog'liq qonunlarni o'z kuchini yo'qotgan deb topish to'g'risidagi qonun loyihasi;

3) o'zgartirilishi, qo'shimchalar kiritilishi, o'z kuchini yo'qotgan deb topilishi yoki qabul qilinishi lozim bo'lgan qonunosti hujjatlarning ro'yxati;

4) moddiy xarajatlarni talab qiladigan qonun loyihalari uchun moliyaviy-iqtisodiy asoslar;

5) davlat daromadlarini kamaytirish yoki davlat xarajatlarini ko'paytirish, shuningdek O'zbekiston Respublikasi Davlat budjeti (bundan buyon matnda Davlat budjeti deb yuritiladi) moddalari bo'yicha o'zgartirishlarni nazarda tutuvchi qonunlarning loyihalari yuzasidan O'zbekiston Respublikasi Vazirlar Mahkamasining xulosasi.

Qonun loyihasi Qonunchilik palatasi tomonidan birinchi o'qishda qabul qilinguniga qadar qonun loyihasini kiritgan qonunchilik tashabbusi huquqining subyekti loyiha matnini o'zgartirish yoki o'zi kiritgan qonun loyihasini chaqirib olish huquqiga ega.

**Qonun chiqarish jarayonining ikkinchi bosqichida** Oliy Majlis qonunchilik palatasiga taqdim etgan loyi-



halarni qonun chiqarish jarayonining barcha qoidalariga to'la rioya etgan holda ko'rib chiqishi shart. Shuni ham nazarda tutish kerakki, Oliy Majlis Qonunchilik palatasi shu qonun loyihasini qabul qilish yoki inkor etish huquqiga ega.

Qonunchilik palatasiga kelib tushgan qonun loyihasini Qonunchilik palatasi Spikeri qonun loyihasini dastlabki tarzda ko'rib chiqadigan qo'mita (bundan buyon matnda mas'ul qo'mita deb yuritiladi) topshiradi. Mas'ul qo'mita qonun loyihasini ko'rib chiqishga qabul qilinishi mumkinligi yoki uni qonunchilik tashabbusi huquqi subyektiga qaytarish zarurligi to'g'risida Qonunchilik palatasi Kengashiga belgilangan muddatda xulosa taqdim etadi.

Qonunchilik palatasi Kengashi mas'ul qo'mitaning xulosasi asosida qonun loyihasini Qonunchilik palatasi ko'rib chiqishi uchun qabul qilish yoki u belgilangan talablarga nomuvofiq bo'lsa, uni qonunchilik tashabbusi huquqi subyektiga qaytarish to'g'risida qaror qabul qiladi. Aniqlangan kamchiliklar bartaraf etilgandan keyin qonun loyihasi Qonunchilik palatasi ko'rib chiqishi uchun yangidan kiritilishi mumkin.

Agar tegishli masala bo'yicha qonun loyihasi palata tomonidan birinchi o'qishda qabul qilingan bo'lsa, ayni shu masala bo'yicha boshqa qonun loyihasi Qonunchilik palatasida ko'rib chiqishi uchun qabul qilinmaydi.

Qonun loyihasi ko'rib chiqish uchun qabul qilinganda Qonunchilik palatasi Kengashi qonun loyihasini Qonunchilik palatasi majlisida ko'rib chiqishga tayyorlash muddatini belgilaydi.

Ko'rib chiqish uchun qabul qilingan qonun loyihasi tegishli materiallar bilan Qonunchilik palatasining qo'mitalariga yuboriladi.

Qonun loyihasini dastlabki tarzda muhokama qilish va uni Qonunchilik palatasida birinchi o'qishda

ko'rib chiqishga tayyorlash mas'ul qo'mita tomonidan amalga oshiriladi.

Qonun loyihasini Qonunchilik palatasining qo'mitalarida muhokama qilish ochiq tarzda qonun loyihasini kiritgan qonunchilik tashabbusi huquqi subyekting vakili taklif etilgan holda o'tkaziladi.

Agar Qonunchilik palatasi Kengashi tomonidan boshqa muddat belgilangan bo'lmasa, mas'ul qo'mita qonun loyihasi olingan kundan e'tiboran ikki oy ichida:

Qonunchilik palatasi Kengashining qonun loyihasini birinchi o'qishda ko'rib chiqish uchun Qonunchilik palatasiga kiritish to'g'risidagi qarorining loyihasini;

mas'ul qo'mitaning mazkur qonun loyihasini qabul qilish yoki rad etish zarurligi asoslangan holdagi xulosasini ilova qilib, Qonunchilik palatasi Kengashida ko'rib chiqishi uchun taqdim etadi.

Qonunchilik palatasi Kengashi mas'ul qo'mita taqdim etgan qonun loyihasini birinchi o'qishda ko'rib chiqishi uchun Qonunchilik palatasi majlisining kun tartibi loyihasiga kiritish to'g'risida qaror qabul qiladi.

Qonunchilik palatasi qonun loyihasini, qoida tariqasida, uch o'qishda ko'rib chiqadi.

Qonun loyihasini Qonunchilik palatasi majlislarida birinchi o'qishda ko'rib chiqish chog'ida mazkur qonun loyihasini qabul qilish zarurati, qonun loyihasining konsepsiyasi, uni O'zbekiston Respublikasining Konstitutsiyasi va boshqa qonunlarga muvofiqligi, shuningdek qonunni amalga oshirish bilan bog'liq xarajatlar va moliyalash manbalari to'g'risidagi masala muhokama qilinadi.

Qonunchilik palatasi muhokama natijalari bo'yicha qonun loyihasini maromiga yetkazish va keyingi o'qishda ko'rib chiqish uchun muhokamaga kiritish muddatini belgilagan holda uni birinchi o'qishda

qabul qilish yoki qonun loyihasini rad etish to'g'risida qaror qabul qiladi.

Qonunchilik palatasi muhokamasiga qonun loyihasining muqobil variantlari kiritilgan taqdirda, ular bir vaqtda ko'rib chiqilishi kerak. Qonunchilik palatasi deputatlarining qaror qabul qilish uchun talab qilinadigan eng ko'p miqdordagi ovozini to'plagan qonun loyihasi birinchi o'qishda qabul qilingan hisoblanadi. Qonun loyihasining qolgan variantlari Qonunchilik palatasi tomonidan rad etilgan hisoblanadi.

Mas'ul qo'mita qonun loyihasini ikkinchi o'qishga tayyorlash chog'ida tushgan takliflarni umumlashtiradi. Mas'ul qo'mita tomonidan asosli deb topilgan takliflar qonun loyihasining matniga kiritiladi.

Qonun loyihasini Qonunchilik palatasi tomonidan ikkinchi o'qishda ko'rib chiqish chog'ida mas'ul qo'mita ma'qullagan takliflar ham, ma'qullamagan takliflar ham muhokama qilinadi. Qonun loyihasi bo'yicha ovoz berish moddama-modda o'tkaziladi.

Qonunchilik palatasi muhokama natijalari bo'yicha qonun loyihasini maromiga yetkazish va keyingi o'qishda ko'rib chiqish uchun muhokamaga kiritish muddatini belgilagan holda uni ikkinchi o'qishda qabul qilish yoxud qonun loyihasini rad etish to'g'risida qaror qabul qiladi.

Uchinchi o'qishda qonun loyihasi muhokama qilinmasdan to'laligicha ovozga qo'yiladi.

Qonun loyihasi birinchi yoki ikkinchi o'qishda qabul qilingan taqdirda, mas'ul qo'mitaning taklifiga binoan qonunni keyingi o'qish tartib-taomillarini istisno etgan holda qabul qilish to'g'risidagi masala ovozga qo'yilishi mumkin.

**Qonun chiqarish jarayonining uchinchi bosqichi.** Ma'lumki, Oliy Majlis vakolatlarini amalga oshirishning huquqiy shakli, u qabul qiladigan qonun hujjatlari hisoblanadi. O'zbekiston Respublikasining qonunlari Oliy Majlis qabul qiladigan asosiy hujjatlardir.

Qonun Qonunchilik palatasi tomonidan palata deputatlari umumiy sonining ko'pchilik ovozi bilan qabul qilinadi. O'zbekiston Respublikasi Konstitutsiyasi, konstitutsiyaviy qonunlar, ularga o'zgartirishlar va qo'shimchalar kiritish to'g'risidagi qonun loyihalarini qabul qilish uchun Qonunchilik palatasi deputatlarining umumiy sonining uchdan ikki qismidan iborat ko'pchilik ovoz talab qilinadi.

Qonunchilik palatasi tomonidan qabul qilingan qonun o'n kun ichida Senatga ko'rib chiqish uchun yuboriladi.

### **Qonun chiqarish jarayonining to'rtinchi bosqichi.**

Senatga kelib tushgan qonun ro'yxatga olinadi va Senat Raisi tomonidan qonunni ko'rib chiqadigan hamda uning yuzasidan xulosa tayyorlaydigan qo'mitaga topshiriladi. Bu ishga mas'ul qo'mitaning xulosasida qonunni ma'qullash yoki rad etish to'g'risidagi tavsiya ifodalangan baho bo'lishi kerak. Qonunni rad etish zarurligi to'g'risidagi xulosada mas'ul qo'mitaning qonunni rad etish zarur deb hisoblashining vajlari bayon etilishi lozim. Mas'ul qo'mitaning xulosasi Senat Kengashiga taqdim etiladi, Kengash qonunni Senat majlisining kun tartibi loyihasiga kiritish-kiritmaslik to'g'risida qaror qabul qiladi.

O'zbekiston Respublikasi Oliy Majlisining Senati tomonidan rad etilgan qonun O'zbekiston Respublikasi Oliy Majlisining Qonunchilik palatasiga qaytariladi.

Agar O'zbekiston Respublikasi Oliy Majlisining Senati tomonidan rad etilgan qonunni qayta ko'rib chiqishda Qonunchilik palatasi deputatlar umumiy sonining uchdan ikki qismidan iborat ko'pchilik ovozi bilan qonunni yana ma'qullasa, qonun O'zbekiston Respublikasi Oliy Majlisi tomonidan qabul qilingan hisoblanadi hamda imzolanishi va e'lon qilinishi uchun O'zbekiston Respublikasi Prezidentiga Qonunchilik palatasi tomonidan yuboriladi.

O‘zbekiston Respublikasi Oliy Majlisining Senati tomonidan rad etilgan qonun yuzasidan Qonunchilik palatasi va Senat yuzaga kelgan kelishmovchiliklarni bartaraf etish uchun Qonunchilik palatasi deputatlari va Senat a‘zolari orasidan tenglik asosida kelishuv komissiyasini tuzishi mumkin. Palatalar kelishuv komissiyasi takliflarini qabul qilganda qonun odatdagi tartibda ko‘rib chiqilishi kerak.

Senatning majlisida qonunni ko‘rib chiqish ma‘ruzachining mas‘ul qo‘mita xulosasini o‘qib eshittirishdan boshlanadi. Ko‘rib chiqilayotgan qonun yuzasidan uning muhokamasi tartibida senatorlar so‘zga chiqishi mumkin.

Qonun Senat tomonidan senatorlar umumiy sonining ko‘pchilik ovozi bilan ma‘qullanadi. O‘zbekiston Respublikasi Konstitutsiyasini, Konstitutsiyaviy qonunlari, ularga o‘zgartirishlar va qo‘shimchalar kiritish to‘g‘risidagi qonunlarni ma‘qullash uchun senatorlar umumiy sonining uchdan ikki qismidan iborat ko‘pchilik ovoz talab qilinadi.

**Qonun chiqarish jarayonining beshinchi bosqichi.** O‘zbekiston Respublikasi Konstitutsiyaning 93-moddasi 17-bandiga binoan, qonunlarni O‘zbekiston Respublikasi Prezidenti imzolaydi. Senat tomonidan ma‘qullangan qonun imzolanishi va e‘lon qilinishi uchun O‘zbekiston Respublikasi Prezidentiga o‘n kun ichida yuboriladi. O‘zbekiston Respublikasi Prezidenti tomonidan qonun o‘ttiz kun ichida imzolanadi va e‘lon qilinadi.

O‘zbekiston Respublikasi Prezidenti qonunni o‘z e‘tirozlari bilan O‘zbekiston Respublikasi Oliy Majlisga qaytarishga haqli. Prezidentning e‘tirozlari bo‘lsa, u holda Prezident bu qonunni takroriy muhokama qilish va ovozga qo‘yish uchun o‘z e‘tirozlari bilan Oliy Majlis Qonunchilik palatasiga qaytarib yuboradi. Qonunchilik Palatasi qayta ko‘rib chiqqandan so‘ng

ilgari ma'qullangan qonun kabi belgilangan tartibda Senatga yuboriladi.

O'zbekiston Respublikasi Konstitutsiyasining 84-moddasiga muvofiq, Qonun Oliy Majlis Qonunchilik palatasida qabul qilinib, Senat tomonidan ma'qullanib, O'zbekiston Respublikasi Prezidenti tomonidan imzolaniib, qonunda belgilangan tartibda rasmiy nashrda e'lon qilinadi va belgilangan muddatdan so'ng yuridik kuchga ega bo'ladi.

O'zbekiston Respublikasining qonunlari Respublika Prezidenti imzolaganidan keyin uzog'i bilan bir hafta ichida rasman e'lon qilinadi. Agar qonun hujjatlarining o'zida boshqa qoida belgilanmagan bo'lsa, ular rasman e'lon qilinganidan keyin o'n kun o'tgach, butun O'zbekiston hududida bir vaqtning o'zida kuchga kiradi.

Qonunlar to'liq matnining «O'zbekiston Oliy Majlisi axborotnomasi», «Xalq so'zi», «Народное слово» gazetalarida chop etilishi ularning birinchi marta rasman e'lon qilinishi hisoblanadi.

O'zbekiston Respublikasi qonunlari o'ziga xos xususiyatlarga ega. U faqat O'zbekiston Respublikasi Oliy Majlis palatalari tomonidan qonunda belgilangan tartibda qabul qilinadi va butun O'zbekiston xalqining erkini ifoda etadi. O'zbekiston Respublikasining qonuni o'zida huquqiy qoidalarni mujassam etadi va shuning uchun huquqiy normativ hujjat hisoblanadi. O'zbekiston Respublikasi hududida amalda bo'lgan qonunlarning bajarilishi barcha davlat organlari, jamoat birlashmalari va fuqarolar uchun majburiydir. Davlat organlarining huquqiy-normativ hujjatlari qonunga muvofiq bo'lishi shart. O'zbekiston Respublikasining qonunlari barcha davlat organlari, o'zini o'zi boshqaruv organlari, jamoat birlashmalari va fuqarolar faoliyatining huquqiy asosidir. U davlat organlari chiqaradigan barcha huquqiy hujjatlardan ustun turadi.

O‘zbekiston Respublikasi Oliy Majlisi Konstitutsiya, boshqa qonunlarda ko‘rsatilgan vakolatlarni samarali amalga oshirish uchun qonuniy tartibda ma’lum organlar tuzadi va ularning ishlariga rahbarlik qiladi.

**Oliy Majlis Qonunchilik  
palatasi deputatlar  
guruhleri va partiya  
fraksiyalari faoliyati**

O‘zbekiston Respublikasi Oliy majlisining Qonunchilik palatasi to‘g‘risidagi Qonunning 23—26-moddalarida deputatlar birlashmalari, fraksiyalar va deputatlar guruhlarini tuzish tartiblari, fraksiya va deputatlar guruhlarining vakolatlari, fraksiya va deputatlar guruhlarining faoliyatini tugatish haqida qoidalar belgilangan.

«O‘zbekiston Respublikasi Oliy Majlisi Qonunchilik palatasining reglamenti to‘g‘risida»gi (2003-yil 29-avgust) Qonunda deputatlarining fraksiyalari, guruhleri to‘g‘risida qoidalar belgilangan. Bu qonunning 9-moddasida ko‘rsatilishicha, Oliy Majlisning siyosiy partiyalar tashabbuskor guruhleri tomonidan ko‘rsatilgan deputatlari fraksiyalar va guruhlariga birlashishlari mumkin.

O‘zbekiston Respublikasining 2007-yil 11-apreldagi «Davlat boshqaruvini yangilash va yanada demokratlashtirish hamda mamlakatni modernizatsiya qilishda siyosiy partiyalarning rolini kuchaytirish to‘g‘risida»gi konstitutsiyaviy qonun siyosiy partiyalar fraksiyalarini yangicha talqin etdi. Mazkur qonunning 2-moddasida quyidagilar mustahkamlangan:

Siyosiy partiya fraksiyasi siyosiy partiyadan ko‘rsatilgan deputatlar tomonidan partiya manfaatlarini O‘zbekiston Respublikasi Oliy Majlisining Qonunchilik palatasida ifodalash maqsadida tuziladigan va belgilangan tartibda ro‘yxatdan o‘tkazilgan deputatlar birlashmasidir.

O‘zbekiston Respublikasi Oliy Majlisining Qonunchilik palatasida ko‘pchilik o‘rinni egallagan siyosiy partiya fraksiyasi parlamentdagi ko‘pchilikni tashkil etadi.

O‘z dasturiy maqsadli vazifalarining yaqinligidan yoki mosligidan kelib chiqqan holda blok tuzadigan bir nechta siyosiy partiyalar fraksiyalari va O‘zbekiston ekologik harakatidan saylangan deputatlar ham parlamentdagi ko‘pchilikni tashkil etishi mumkin.

Yangitdan shakllantirilgan hukumatning tutgan yo‘li va dasturiga yoki uning ayrim yo‘nalishlariga qo‘shilmaydigan siyosiy partiyalar fraksiyalari, shuningdek O‘zbekiston ekologik harakatidan saylangan deputatlar o‘zlarini muxolifat deb e‘lon qilishi mumkin.

Siyosiy partiyalar fraksiyalarining blokka birlashishi qonunda nazarda tutilgan huquqlarni amalga oshirishda ularning mustaqilligini cheklab qo‘ymaydi.

O‘zini parlamentdagi muxolifat deb e‘lon qilgan siyosiy partiya fraksiyasi qonunda fraksiyalar uchun nazarda tutilgan vakolatlar bilan bir qatorda quyidagi huquqlarga ega:

O‘zbekiston Respublikasi Oliy majlisi Qonunchilik palatasi mas‘ul qo‘mitasining tegishli masala bo‘yicha ma‘ruzasi bilan bir vaqtda qonun loyihasining muqobil tahririni kiritish;

muhokama etilayotgan masalalar yuzasidan o‘zining alohida fikrini O‘zbekiston Respublikasi Oliy Majlisi Qonunchilik palatasining yalpi majlisi bayon-nomasiga kiritish;

O‘zbekiston Respublikasi Oliy Majlisining Senati tomonidan rad etilgan qonun bo‘yicha kelishuv komissiyasida o‘z vakillarining kafolatli ishtirok etishi.

Parlamentdagi muxolifatning qonun bilan kafolatlangan huquqlari parlamentdagi ko‘pchilik tomonidan kamsitilishi mumkin emas.

Siyosiy partiyadan ko‘rsatilgan va O‘zbekiston Respublikasi Oliy Majlisining Qonunchilik palatasiga saylangan deputat faqat shu partiya fraksiyasining a‘zosi bo‘lishi mumkin.

Oliy Majlis deputati faqat bitta deputatlar birlashmasi (fraksiya, guruhda) bo‘lishga haqli.



Fraksiyalar, guruhlar o'z faoliyatini belgilangan tartibda ro'yxatga olinganidan keyin amalga oshiradi va O'zbekiston Respublikasining Konstitutsiyasini hamda amaldagi boshqa qonunlar doirasida ish olib boradi. Fraksiya, guruh rahbari fraksiyani, guruhni ro'yxatga olish to'g'risidagi iltimos bayon etilgan ariza bilan fraksiyalarning, guruhlarning rahbarlari tuzilgan fraksiyaning, guruhning maqsad va vazifalari to'g'risida axborot berishi, boshqa ma'lumotlarni aytishi mumkin.

Oliy Majlis Qonunchilik palatasi rasmiy fraksiyalarni, guruhlarni ro'yxatga olish masalasi yuzasidan qaror qabul qiladi.

Oliy Majlis guruh va fraksiyalarining faoliyati to'g'risidagi masala mantiqan O'zbekiston Respublikasi Konstitutsiyasi, boshqa qonunlardan kelib chiqadi. Bu hujjatlarga muvofiq, O'zbekiston ijtimoiy hayot, siyosiy institutlar, mafkura va fikrlarning xilma-xilligi asosida rivojlanadi; siyosiy partiyalar xalqimiz turli tabaqa va guruhlarining irodasini ifodalab, deputatlikka saylangan o'z vakillari orqali davlat hokimiyatini tuzishda va uning faoliyatini amalga oshirishda ishtirok etadi. Chunki partiya xalqning, ijtimoiy qatlamning bir qismi bo'lsa, guruh va fraksiyalar Oliy Majlis hamda siyosiy partiyaning muayyan bo'lagidir. Shuning uchun ham O'zbekiston Respublikasining Oliy Majlisi 1996-yil 26-dekabrda «Siyosiy partiyalar to'g'risida» alohida qonun qabul qilib, unda siyosiy partiyalarning O'zbekiston Respublikasi Oliy Majlisidagi fraksiyalari faoliyatiga alohida modda ajratdi.

Qonunning 13-moddasiga muvofiq, siyosiy partiyalarning O'zbekiston Respublikasi Oliy Majlisi Qonunchilik palatasidagi fraksiyalari siyosiy partiyalar tomonidan ko'rsatilgan deputatlarning ta'sis yig'ilishlarida va o'z partiyalarining siyosatini uyushqoqlik bilan o'tkazish uchun tuziladi.

O'zbekiston Respublikasi Oliy Majlisi Qonunchilik palatasi fraksiya va deputatlar guruhlarini:

1) Qonunchilik palatasi majlisining kun tartibi, muhokama qilinayotgan masalalarni ko'rib chiqish tartibi va mohiyati yuzasidan takliflar hamda fikr-mulohazalar kiritadi;

2) Qonunchilik palatasida tuzilgan siyosiy partiya fraksiyasi o'z vakili Qonunchilik palatasi Spikerining o'rinbosari lavozimlaridan birini egallashida kafolatli huquqqa ega (2007-yil 11-apreldagi Konstitutsiyaviy qonun tahririda);

3) Qonunchilik palatasi majlisida muhokama qilinayotgan har bir masala yuzasidan muzokaralarda fraksiya, deputatlar guruhi vakiliga kafolatlangan tarzda so'z berilishi huquqidan foydalanadi;

4) Kelishuv komissiyasi va boshqa komissiyalar tuzish to'g'risidagi masalalarni qo'yadi;

5) Qonunchilik palatasida davlat hokimiyati va boshqaruvi organlarining mansabdor shaxslariga ularning tasarrufiga kiradigan masalalar yuzasidan asoslantirilgan tushuntirish berish yoki nuqtayi nazarni bayon qilish talabi bilan murojaat etadi;

6) Qonunchilik palatasi majlisida muhokama qilinayotgan masala yuzasidan fraksiyaning, deputatlar guruhining fikrini Qonunchilik palatasi deputatlari o'rtasida tarqatadi;

7) palataning Kengashi, qo'mitalari va komissiyalari ishida ishtirok etadi;

8) Qonunchilik palatasida muhokama qilinayotgan qonun loyihalari va boshqa qarorlarning loyihalari yuzasidan o'z takliflarini kiritadi;

9) hukumat a'zolarini ularning faoliyati masalalari yuzasidan eshitish to'g'risida masala qo'yadi;

10) fraksiya, deputatlar guruhining faoliyati uchun zarur materiallar va hujjatlarni davlat organlari hamda ularning mansabdor shaxslaridan talab qilib oladi;

11) qonun hujjatlariga muvofiq boshqa vakolatlarni amalga oshiradi.

Siyosiy partiya fraksiyasining va deputatlar guruhining rahbarlari Oliy Majlis Kengashining tarkibiga kiradi.

O'zbekiston Respublikasi Oliy Majlisining II chaqiriq I sessiyasida birinchi marta 2000-yil 22-yanvarda Oliy Majlisning deputatlar bloklari va partiya fraksiyalari ro'yxatga olingan edi. Partiya fraksiyalari bir-biridan farq qiladigan o'z faoliyat dasturlariga ega bo'lib, Oliy Majlis Qonunchilik palatasining qonun chiqarish faoliyatida siyosiy murosalar asosida ish olib borib, eng muhim vazifalarni bajarishga ko'maklashmoqdalar.

**Oliy Majlisning  
Qonunchilik palatasi  
Spikeri va uning  
o'rinbosarlari**

Saylovdan keyingi birinchi majlisda Qonunchilik palatasining deputatlari orasidan yashirin ovoz berish orqali deputatlar umumiy sonining

ko'pchilik ovozi bilan Qonunchilik palatasining vakolat muddatiga Qonunchilik palatasi Spikeri saylanadi. Qonunchilik palatasi Spikerligiga nomzod ko'rsatish va saylash tartibi Qonunchilik palatasi Reglamentida belgilanadi.

Qonunchilik palatasi Spikeri o'z vazifasini bajarish davrida siyosiy partiyaga a'zolikni to'xtatib turadi hamda siyosiy partiya fraksiyasi (bundan buyon matnda fraksiya deb yuritiladi) va deputatlar guruhi tarkibiga kirishi mumkin emas.

Qonunchilik palatasi Spikeri Qonunchilik palatasi qo'mitalarining tarkibiga saylanishi mumkin emas.

Qonunchilik palatasi Spikeri yashirin ovoz berish orqali Qonunchilik palatasi deputatlarining uchdan ikki qismidan ko'prog'ining ovozi bilan qabul qilingan Qonunchilik palatasi qaroriga binoan muddatidan ilgari chaqirib olinishi mumkin.

Qonunchilik palatasi Spikeri O'zbekiston Respub-

likasi Konstitutsiyasining 85-moddasida mustahkamlangan vakolatlarni bajaradi.

Qonunchilik palatasi Spikeri o'z vakolatiga kiradigan masalalar yuzasidan farmoyishlar chiqaradi.

Qonunchilik palatasi Spikeri o'zining vakolatiga taalluqli masalalarni Kengash muhokamasiga kiritishga haqli.

Qonunchilik palatasi Spikerining o'rinbosarlariga nomzodlar ko'rsatish va saylash tartibi Qonunchilik palatasi Reglamentida belgilanadi.

2007-yilda qabul qilingan «Davlat boshqaruvini yangilash va yanada demokratlashtirishi hamda mamlakatni modernizatsiya qilishda siyosiy partiyalarning rolini kuchaytirish to'g'risida»gi Konstitutsiyaviy qonunda (3-modda) Qonunchilik palatasi Spikerining o'rinbosarlarini saylash tartibiga quyidagi o'zgartirishlar kiritildi:

Qonunchilik palatasi o'z tarkibidan Qonunchilik palatasining Spikeri va uning o'rinbosarlarini saylaydi.

Qonunchilik palatasi Spikerining o'rinbosarlari yashirin ovoz berish orqali deputatlar umumiy sonining ko'pchilik ovozi bilan Qonunchilik palatasining vakolati muddatiga saylanadi.

Qonunchilik palatasi Spikerining o'rinbosarini saylash uchun siyosiy partiya fraksiyasi, qoida tariqasida, o'z fraksiyasi rahbarining nomzodini taqdim etadi.

Siyosiy partiya fraksiyasidan taqdim etilgan nomzod Qonunchilik palatasi Spikerining o'rinbosari lavozimiga saylanmagan taqdirda, siyosiy partiya fraksiyasi o'z fraksiyasi a'zolari orasidan boshqa nomzodni taqdim etish huquqiga ega.

Qonunchilik palatasi Spikerining o'rinbosari Qonunchilik palatasi qo'mitalaridan birining tarkibiga saylanishi mumkin.

**Oliy Majlis Senati raisi  
va uning o'rinbosarlari**

O'zbekiston Respublikasi  
Konstitutsiyasining 86-,  
Oliy Majlis Senati to'g'risi-

dagi Qonunning 13—15-moddalarida Oliy Majlis Senati raisi va uning o‘rinbosarlari hududiy maqomlari belgilangan.

Senat Raisi Senat tarkib topganidan keyingi birinchi majlisda O‘zbekiston Respublikasi Prezidentining taqdimiga binoan Senat a‘zolari orasidan yashirin ovoz berish orqali senatorlar umumiy sonining ko‘pchilik ovozi bilan Senat vakolati muddatiga saylanadi. Senat Raisligiga nomzod ko‘rsatish va saylash tartibi senat Reglamentida belgilanadi.

Senat Raisi o‘z vazifasini bajarish davrida partiya va harakatlarga a‘zolikni to‘xtatib turadi.

Senat Raisi Senat qo‘mitalarining tarkibiga saylanishi mumkin emas.

Senat raisi yashirin ovoz berish orqali senatorlarning uchdan ikki qismidan ko‘prog‘ining ovozi bilan qabul qilingan Senat qaroriga binoan muddatidan ilgari chaqirib olishi mumkin.

Senat Raisi o‘z vakolatiga kiradigan masalalar yuzasidan Farmoyishlar chiqaradi.

Senat Raisining vakolatlari O‘zbekiston Respublikasi Konstitutsiyasining 86-moddasida mustahkamlangan.

Senat Raisi o‘zining vakolatiga taalluqli masalalarni Kengash muhokamasiga kiritishga haqli.

Senat Raisining o‘rinbosarlari Senat a‘zolari orasidan yashirin ovoz berish orqali senatorlar umumiy sonining ko‘pchilik ovozi bilan Senat vakolati muddatiga saylanadi. Senat Raisining o‘rinbosarligiga nomzodlar ko‘rsatish va saylash tartibi Senat Reglamentida belgilanadi.

Senat Raisining o‘rinbosarlari o‘z vazifalarini bajarish davrida siyosiy partiyalar va harakatlarga a‘zolikni to‘xtatib turadi.

Senat raisining o‘rinbosarlari Senat qo‘mitalarining tarkibiga saylanishi mumkin emas.

Senat raisining o‘rinbosarlari Senat raisining topshirig‘iga binoan uning ayrim vazifalarini bajaradi va Senat raisi yo‘qligida yoki o‘z vazifalarini amalga oshirishi mumkin bo‘lmagan hollarda uning vazifasini bajarib turadi.

Senat Raisining o‘rinbosarlaridan biri Qoraqalpog‘iston Respublikasining vakili bo‘ladi.

**Oliy Majlis  
Qonunchilik palatasi va  
Senati Kengashlari**

Qonunchilik palatasi faoliyatini samarali tashkil etish, palata qo‘mitalari ishini muvofiqlashtirib borish, qonun loyihalarini tayyorlash ishini rejalashtirish masalasini dastlabki tarzda ko‘rib chiqishni tashkil etish maqsadida Qonunchilik palatasi Kengashi tuziladi.

Qonunchilik palatasi Kengashi palata majlislari oralig‘ida zaruratga qarab to‘planadi.

Qonunchilik palatasi Kengashining tarkibiga Qonunchilik palatasi Spikeri, uning o‘rinbosarlari, fraksiyalar va deputatlar guruhlarining rahbarlari, Qonunchilik palatasi qo‘mitalarining raislari kiradi.

Qonunchilik palatasi Kengashi o‘z vakolatiga kiradigan masalalar yuzasidan a‘zolari umumiy sonining ko‘pchilik ovozi bilan qarorlar qabul qiladi.

Senat faoliyatini samarali tashkil etish, palata qo‘mitalari ishini muvofiqlashtirib borish, kun tartibi yuzasidan takliflar tayyorlash, qonunlarni dastlabki tarzda ko‘rib chiqishni tashkil etish maqsadida — Senat Kengashi tuziladi.

Senat Kengashi palata majlislari oralig‘ida zaruratga qarab to‘planadi.

Senat Kengashining tarkibiga Senat Raisi, uning o‘rinbosarlari, fraksiyalar va qo‘mitalarining raislari kiradi.

Senat Kengashi o‘z vakolatiga kiradigan masalalar yuzasidan a‘zolari umumiy sonining ko‘pchilik ovozi bilan qarorlar qabul qiladi.

**Oliy Majlisning Qonunchilik palatasi va Senati qo'mitalarini saylash va ularning vakolatlari**

Qonun loyihalarini tayyorlash ishini olib borish, Qonunchilik palatasi muhokamasiga kiritiladigan masalalarni dastlabki tarzda

ko'rib chiqish va tayyorlash O'zbekiston Respublikasi qonunlari hamda palata tomonidan qabul qilinadigan qarorlarning ijrosini nazorat qilish uchun Qonunchilik palatasining vakolatlari muddatiga Qonunchilik palatasi deputatlari orasidan rais, uning o'rinbosarlari va a'zolardan iborat tarkibda qo'mitalar saylanadi.

Qo'mita raisi, uning o'rinbosarlari va qo'mita a'zolari lavozimlari deputatlarning qaysi guruhga mansubligini hamda saylovda saylovchilarning qancha ovozi o'lganligini inobatga olgan holda yaxlit (umumiy) qaror bilan belgilanadi.

Qonunchilik palatasi qo'mitalarining barcha a'zolari teng huquqlardan foydalanadilar.

Qo'mita tarkibiga saylanmagan deputat uning ishida maslahat ovozi huquqi bilan ishtirok etishga haqli.

Qonunchilik palatasi qo'mitalari Qonunchilik palatasi oldida mas'ul va unga hisobdordir.

Qonunchilik palatasi qo'mitalari vakolatlari:

— o'z tashabbusi bilan yoki Qonunchilik palatasining topshirig'iga binoan O'zbekiston Respublikasi qonunlarining hamda o'zining vakolatlariga kiradigan masalalar yuzasidan Qonunchilik palatasi boshqa qarorlarining loyihalarini ishlab chiqadi;

— qonun loyihalarining dastlabki tarzda ko'rib chiqilishini va ularni Qonunchilik palatasida ko'rib chiqishga tayyorlashni amalga oshiradi;

— qonunlarning loyihalari yuzasidan xulosalar beradi, qonun loyahasining Qonunchilik palatasining majlisi kun tartibiga kiritish, uning ustida ishlashni davom ettirish yoki asoslantirilgan holda uni rad etish to'g'risida Kengashga takliflar kiritadi;

— O‘zbekiston Respublikasining Davlat budjeti loyihasi yuzasidan xulosalar va takliflar beradi;

— Qonunchilik palatasining topshirig‘iga ko‘ra yoki palata Kengashining tavsiyasiga binoan muayyan qonun loyihasi yoki palata vakolatlariga kiradigan boshqa masala yuzasidan mas‘ul bo‘ladi;

— kiritilgan qonun loyihalarini ko‘rib chiqish bo‘yicha ishchi guruhlari tuziladi, ularning tarkibiga davlat organlari va nodavlat notijorat tashkilotlarning, ilmiy muassasalarning vakillarini, mutaxassislar va olimlarni, xo‘jalik yurituvchi subyektlarning rahbarlarini jalb etadi.

Senat muhokamasiga kiritiladigan masalalarni dastlabki tarzda ko‘rib chiqish va tayyorlash, O‘zbekiston Respublikasi qonunlari hamda Senat tomonidan qabul qilinadigan qarorlarning ijrosini nazorat qilish uchun Senat shakllanganidan keyin uning vakolatlari muddatiga senatorlar orasidan rais, uning o‘rinbosari va a‘zolaridan iborat tarkibda qo‘mitalar saylanadi.

Senat qo‘mitalarining barcha a‘zolari teng huquqlardan foydalanadilar.

Qo‘mita tarkibiga saylanmagan senator uning ishidan maslahat ovozi huquqi bilan ishtirok etishga haqli.

Senat qo‘mitalari Senat oldida mas‘ul va unga hisobdordir.

Senat qo‘mitalari vakolatlari:

— Qonunchilik palatasi tomonidan Senatga ma‘qullash uchun topshirilgan qonunlar yuzasidan xulosalar beradi;

— o‘zining vakolatlariga kiradigan masalalar yuzasidan o‘z tashabbusi bilan va Senatning topshirig‘iga binoan Senat hujjatlari loyihalarini ishlab chiqadi.



## 12-§ BO‘YICHA EGALLAGAN BILIMLARINGIZNI MUSTAHKAMLASH UCHUN TOPSHIRIQLAR

1. O‘zbekiston Respublikasi Oliy Majlisi davlat hokimiyati organlari tizimida qanday o‘rin tutadi?
2. O‘zbekiston Respublikasi Oliy Majlisining avvalgi Oliy Kengashdan farqli jihatlari nimalardan iborat?
3. O‘zbekiston Respublikasi Oliy Majlisi Qonunchilik palatasining Spikeri va Senatining Raisi qanday vakolatlarni bajaradi?
4. O‘zbekiston Respublikasi Oliy Majlisi palatalarining konstitutsiyada mustahkamlangan vakolatlari nimalardan iborat?
5. Oliy Majlis palatalari faoliyatining shakllari qanday?

?



**Bilimingizni mustahkamlang**

⇒ Oliy Majlis qonun chiqaruvchilik faoliyatining bosqichlarini quyidagi jadvalga qayd etib, dars jarayonida izohlab bering.



1-bosqich	2-bosqich	3-bosqich	4-bosqich

**Qonunlar bilan tashish**



**Oliy Majlis qabul qilgan qonunlar**



1. Siyosiy sohaga oid qonunlar.
2. Iqtisodiy sohaga oid qonunlar.
3. Ijtimoiy sohaga oid qonunlar.
4. Huquqiy sohaga oid qonunlar.

**Erkin fikr bildiring**



1. Oliy Majlis Qonunchilik palatasi deputatlar guruhi va partiya fraksiyalarining faoliyati haqida;
2. Oliy Majlis Qonunchilik palatasi Spikeri va uning o‘rin-

- bosarlari, Senat raisi va uning o‘rinbosarlari faoliyati haqida;
3. Oliy Majlis palatalari Kengashlari va ularning vakolatlari haqida.

### **13-§. IJRO ETUVCHI HOKIMIYATNING HUQUQIY ASOSLARI**

**Ijro etuvchi hokimiyat-  
ning davlat hokimiyatini  
amalga oshirishda tutgan  
o‘rni, O‘zbekiston  
Respublikasi Prezidenti**

Ijro etuvchi hokimiyatning huquqiy asoslari O‘zbekiston Respublikasi Konstitutsiyasi va qonunlarida mustahkamlab qo‘yilgan. Ijro etuvchi

hokimiyat davlat hokimiyatini amalga oshirishning bir shakli bo‘lganligi uchun uni tashkil etishning asosiy qoidalari konstitutsiyada belgilangandir. Konstitutsiyaning 93-moddasi 8-bandiga asosan O‘zbekiston Prezidenti ijro etuvchi hokimiyat devonini tuzadi va unga rahbarlik qiladi.

1991-yilning 29-dekabridagi referendumda O‘zbekiston xalqi mamlakatimizning mustaqil rivoji uchun ovoz berdi va tariximizda ilk marotaba bevosita, umumiy, teng va yashirin ovoz berish yo‘li bilan Respublika Prezidentini saylagan edi.

O‘zbekiston Respublikasi Konstitutsiyasi prezident hokimiyatini ancha mustahkamladi. Konstitutsiyaning 89-moddasiga muvofiq, O‘zbekiston Respublikasi Prezidenti davlat boshlig‘idir va davlat hokimiyati organlarining kelishilgan holda faoliyat yuritishini hamda hamkorligini ta‘minlaydi. Prezident davlatning bosh arbobi, millatning ramzi, fuqarolar xavfsizligining kafolatidir. Konstitutsiyaning 90-moddasiga binoan respublika prezidenti O‘zbekiston Respublikasi fuqarolari tomonidan umumiy, teng va to‘g‘ridan to‘g‘ri saylov huquqi asosida yashirin ovoz berish yo‘li bilan 7 yil muddatga saylanadi.

Konstitutsiyaga muvofiq Respublika Prezidentini

saylashda O‘zbekistonning 18 yoshga to‘lgan fuqarolari ishtirok etadilar. Fuqarolarning saylov huquqlarini to‘g‘ridan to‘g‘ri yoki bilvosita cheklashga yo‘l qo‘yilmaydi. Saylovda faqat sud tomonidan muomalaga layoqatsiz deb topilgan fuqarolar, shuningdek ozodlikdan mahrum etish joylarida saqlanayotganlar qatnashishi mumkin emas. Boshqa har qanday hollarda fuqarolarning saylov huquqlarini to‘g‘ridan to‘g‘ri yoki bilvosita cheklashga yo‘l qo‘yilmaydi.

«O‘zbekiston Respublikasi Prezidenti saylovi to‘g‘risida»gi Qonunning 24-moddasiga muvofiq respublika Prezidentligiga nomzodlar qonun asosida ro‘yxatdan o‘tgan respublika siyosiy partiyalari, O‘zbekiston Respublikasi fuqarolari tomonidan ko‘rsatiladi. 2002-yil 27-yanvarda o‘tkazilgan Referendumda Prezident vakolatlarini yetti yilga uzaytirish umumxalq ovozig qo‘yildi va bu qoida Konstitutsiyamizga kiritildi.

**O‘zbekiston Respublikasi Prezidentining vakolatlari.** Prezidentning vakolatlari uni davlat hokimiyati organlari tizimidagi tutgan o‘rnini belgilab beradi. O‘zbekiston Respublikasi Prezidenti keng vakolatlarga ega. O‘zbekiston Respublikasi Konstitutsiyaning XIX bobi O‘zbekiston Respublikasi Prezidentining huquqiy maqomiga, alohida, 93-moddasi Respublika Prezidentining vakolatlariga bag‘ishlangan. O‘zbekiston Respublikasi Prezidentining Konstitutsiyada ko‘rsatilgan vakolatlarini maqsadi, mazmuniga ko‘ra, shartli ravishda bir necha guruhga bo‘lish mumkin:

1. Qonunchilik va qonuniylik sohasidagi vakolatlar;
2. Davlat organlarini tuzish sohasidagi vakolatlar;
3. Fuqarolarning huquq, erkinliklari, burchlari va qonuniy manfaatlarini ta‘minlash sohasidagi vakolatlar;
4. Xalqaro munosabatlar sohasidagi vakolatlar.

O‘zbekiston Prezidentining qonunchilik sohasidagi vakolatlarining asoslari O‘zbekiston Respublikasi Konstitutsiyasida belgilangan. Respublika Prezidenti,

birinchi navbatda davlat boshlig'i sifatida davlat va jamiyat rivojlanishining asosiy strategik yo'nalishlarini ishlab chiqadi va ularni Oliy Majlis yig'ilishlarida e'lon qiladi. Prezidentning bunday dasturlarida Respublika oldida turgan vazifalar, ularni hal etish yo'llari, qonunchilik sohasidagi asosiy yo'nalishlar ko'rsatib beriladi. Respublika Prezidenti davlat rahbari sifatida qonunchilik jarayonining bevosita ishtirokchisidir. Konstitutsiyaning 83-moddasiga binoan O'zbekiston Respublikasi Prezidenti qonunchilik tashabbusi huquqiga ega. U Oliy Majlisga qonun loyihalarini yoki biror masala bo'yicha qonun ishlab chiqishni taklif etishi mumkin. Bu bilan respublika Prezidenti qonunlar yaratilishining boshlang'ich davrida ishtirok etadi. Respublika Prezidenti O'zbekiston Respublikasi Oliy Majlisida qonun loyihalari muhokama qilinayotganda istagan vaqtda so'z olib, o'z fikrini bildirishi mumkin.

Konstitutsiyaning 93-moddasining 17-bandiga asosan, Respublika Prezidenti Oliy Majlis tomonidan qabul qilingan qonunlarni imzolaydi. Bu holat esa Oliy Majlis qabul qilgan qonun faqat Respublika Prezidenti imzosidan keyingina kuchga kirishini bildiradi. Qonunga e'tirozi bo'lganda Prezident o'z e'tirozlarini ilova etib, uni takroran muhokama qilish va ovozga qo'yish uchun Oliy Majlisga qaytarishga, tasdiqlashni kechiktirishga haqlidir.

Agar qonun avvalgi qabul qilingan tahririda tegishincha O'zbekiston Respublikasi Oliy Majlisining Qonunchilik palatasi deputatlari va Senati a'zolari umumiy sonining kamida uchdan ikki qismidan iborat ko'pchilik ovozi bilan ma'qullansa, qonun O'zbekiston Respublikasi Prezidenti tomonidan o'n to'rt kun ichida imzolanishi va e'lon qilinishi kerak. (O'zR Konstitutsiyasi, 84-moddaning 9-bandi).

Prezident qonuniylik ta'minlanishining kafilidir. Uning faoliyati qonuniylikni ta'minlashda ishtirok etuvchi organlarni tuzishda, ularning faoliyatini nazo-

rat qilib turishda o'z ifodasini topadi. Respublika Prezidenti prokuratura organlarining rahbarlarini tayinlaydi, ularning bajarilishini ta'minlash sohasidagi faoliyatini nazorat qiladi. Bundan tashqari Respublika Prezidenti fuqarolarning huquqlari va erkinliklariga, Konstitutsiya va davlat qonunlariga amal qilinishiga, davlat organlari va mansabdor shaxslarning qonunchilikni amalga oshirishlariga kerakli sharoitlar yaratadi.

Prezidentning davlat organlarini tuzishdagi vakolatlari ham Konstitutsiyada mustahkamlab qo'yilgan. Unga ko'ra Respublika Prezidentiga davlat organlari tuzish, ularning rahbarlarini tayinlash borasida katta vakolatlari berilgan. Bunda ularning ayrimlarini respublika Prezidenti bevosita o'zi tuzadi yoki ularni tuzish, tayinlash, saylash, tasdiqlash uchun tavsiya qiladi.

Respublika Prezidenti davlat rahbari sifatida respublikadagi davlat oliy hokimiyati va boshqaruv organlarining ishlarini yo'naltirib, ularning bahamjihat ishlashini ta'minlab turadi. U hokimiyat va boshqaruv organlarini bog'lash vazifasini bajaradi. O'zbekiston vazirliklari, davlat qo'mitalari va ularga tenglashtirilgan idoralar respublika Prezidentining farmoni bilan tuziladi yoki tugatiladi. Ushbu farmonlar tasdiqlash uchun Oliy Majlisga kiritiladi. Bosh vazir, uning birinchi va boshqa o'rinbosarlari, Vazirlar Mahkamasining boshqa a'zolari ham respublika Prezidenti tomonidan tayinlanadi yoki lavozimidan ozod qilinaadi. Oliy Majlis ushbu farmonlarni tasdiqlaydi. Prezident O'zbekiston Konstitutsiyaviy sudining raisi va a'zolari, Oliy sud raisi va a'zolari, Oliy xo'jalik sudi raisi va a'zolari lavozimiga nomzodlarni, Tabiatni muhofaza qilish davlat qo'mitasining raisi, Markaziy bank boshqaruvining raisi lavozimiga nomzodlarni Oliy Majlisga taqdim etadi. Prezident Respublika Bosh prokurori va uning o'rinbosarlarini tayinlaydi va lavozimidan ozod qiladi hamda bu masalani tasdiqlash uchun Oliy Majlisga kiritadi. Viloyatlar hokimlarini va

Toshkent shahar hokimini tayinlaydi va lavozimidan ozod qiladi, bu masalalarni tegishli xalq deputatlari kengashining tasdig'iga qo'yadi.

Viloyat, tuman, shahar va xo'jalik sudlarining sudyalari respublika Prezidenti tomonidan tayinlanadi va lavozimidan ozod etiladi. Konstitutsiya 93-moddasining 15-bandiga asosan respublika Prezidenti Konstitutsiyani, qonunlarni buzgan yoki o'z sha'ni va qadr-qimmatiga dog' tushadigan xatti-harakat sodir etgan tuman va shahar hokimlarini ham o'z qarori bilan lavozimidan ozod etishga haqlidir. Bundan tashqari, respublika Prezidenti milliy xavfsizlik va davlat nazorat xizmatlarini tuzadi, ularning rahbarlarini tayinlaydi va lavozimidan ozod etadi. Prezident Respublika Qurolli Kuchlarining Oliy Bosh qo'mondoni hisoblanadi. U Qurolli Kuchlarning oliy qo'mondonlarini tayinlaydi va vazifasidan ozod qiladi, oliy harbiy unvonlarni beradi.

Konstitutsiyaning 95-moddasida respublika Prezidentiga o'ta muhim vakolat yuklangan bo'lib, ya'ni bu Oliy Majlis Qonunchilik palatasi va Senatini tarqatib yuborish huquqidir. Respublika Oliy Majlisi qonunchilik faoliyatida hal qilish qiyin bo'lgan qarama-qarshiliklar, ixtiloflar bo'lishi yoki Oliy Majlis Qonunchilik palatasi va Senati bir necha marta Konstitutsiyaga zid qarorlar qabul qilgan bo'lishi mumkin. Bunday hollar Oliy Majlis Qonunchilik palatasi va Senati normal faoliyatini tahdidga soladi.

Respublika Prezidenti davlat boshlig'i sifatida bunday hollarda o'zining konstitutsiyaviy vakolatlaridan foydalanib, ixtilofni hal qilish choralarini ko'radi. Hal qilib bo'lmaydigan ixtiloflar yuzaga kelgan taqdirda, Konstitutsiyaning 95-moddasiga ko'ra O'zbekiston Respublikasi Prezidentiga Konstitutsiyaviy sud bilan bamaslahat qabul qilgan qarori asosida Oliy Majlis Qonunchilik palatasi va Senatini tarqatib yuborish huquqi berilgan. Oliy Majlis favqulodda holat joriy etilgan davrda tarqatilishi mumkin emas.

Respublika Prezidentining fuqarolarning huquq, erkinliklari, burchlari va qonuniy manfaatlarini tam'inlash sohasidagi vakolatlari Asosiy Qonunimizda bayon etilgan. O'zbekiston Konstitutsiyasida respublika Prezidenti fuqarolarning huquqlari va erkinliklariga, Konstitutsiya va qonunlarga rioya etilishining kafilidir, deb belgilangan.

Respublika Prezidenti o'z lavozimiga kirishish paytida O'zbekiston Respublikasi Oliy Majlisi yig'ilishida: «O'zbekiston xalqiga sadoqat bilan xizmat qilishga, Respublikaning Konstitutsiyasi va qonunlariga qat'iy rioya etish, fuqarolarning huquqlari va erkinliklariga kafolat berishga, O'zbekiston Respublikasi Prezidenti zimmasiga yuklatilgan vazifalarni vijdonan bajarishga tantanali qasamyod qilaman», — deb qasamyod qabul qiladi.

Respublika Prezidenti fuqarolarning huquq va erkinliklarini respublika hududidagina emas, balki uning tashqarisida, boshqa chet davlatlar hududlarida ham ta'minlashning asosiy kafili bo'ladi.

O'zbekiston Prezidenti respublika fuqaroligiga qabul qilish, fuqarolikdan chiqarish, siyosiy boshpana berish masalalarini ham hal qiladi.

O'zbekiston Respublikasining ordenlari, medallari va faxriy yorliqlari bilan fuqarolarni mukofotlaydi.

Fuqarolarning xavfsizligini ta'minlash borasida ham respublika Prezidentiga katta vakolatlar berilgan. Prezident inson huquqlarini himoya qilish uchun shaxsan javobgardir. Respublika Prezidenti fuqarolar xavfsizligini saqlash uchun kerakli choralar ko'radi. Jumladan, favqulodda vaziyatlar (real tashqi xavf, ommaviy tartibsizliklar, yirik halokat, tabiiy ofat, epidemiyalar) yuz bergan taqdirda, fuqarolarning xavfsizligini ta'minlashni ko'zlab, O'zbekiston Respublikasining butun hududida yoki uning ayrim joylarida favqulodda holat joriy etadi, qabul qilingan Qarorni uch kun mobaynida O'zbekiston Respublikasi Oliy Majlisining tasdig'iga kiritadi.

Shuningdek, Prezident davlat miqyosidagi katta bayramlar va tantanalarga bag'ishlab amnistiya to'g'risida hujjatlar qabul qiladi, O'zbekiston Respublikasining sudlari tomonidan hukm qilingan fuqarolarni afv etadi.

Respublika Prezidentining xalqaro munosabatlar sohasidagi vakolatlari ham keng qirralidir. Avval aytib o'tilganidek, O'zbekiston Prezidenti xalqaro munosabatlarda Respublika nomidan ish ko'radi. Uning xalqaro sohadagi vakolatlarini ana shu qoida belgilaydi. Respublika Prezidenti birinchi navbatda mamlakat xalqaro siyosatining asosiy yo'nalishlarini belgilaydi, o'z davlatining vakili sifatida xalqaro munosabatlarda yuqori vakillikni olib boradi, chet davlatlar va xalqaro tashkilotlar bilan muzokaralar o'tkazadi, bitim va shartnomalar tuzadi, ularni imzolaydi, respublika bilan tuzilgan hujjatlarga rioya etilishini ta'minlaydi.

Respublika Prezidenti o'z huzurida akkredita-tsiyadan o'tgan diplomatik va boshqa vakillarning ishonch va chaqiruv yorliqlarini qabul qiladi; O'zbekiston Respublikasining chet davlatlardagi diplomatik va boshqa vakillarini tayinlaydi hamda lavozimlaridan ozod qiladi; Respublika Oliy Majlisiga har yili ichki va xalqaro ahvol xususida ma'lumotnoma taqdim etadi. Respublika Prezidenti mamlakatimizga hujum qilinganda yoki tajovuzdan bir-birini mudofaa qilish bo'yicha tuzilgan shartnoma majburiyatlarini bajarish zaruriyati tug'ilganda urush holati e'lon qilish huquqiga ega va bu to'g'ridagi qarorini uch kun mobaynida O'zbekiston Respublikasi Oliy Majlisining tasdig'iga kiritadi. Respublika Prezidenti devoni alohida davlat hokimiyati organi hisoblanmaydi. Uning vazifasiga Prezidentning vakolatlarini amalga oshirishda zarur tashkiliy, huquqiy-maslahat, moddiy-texnik va boshqa har tomonlama sharoit yaratib berish, Prezidentning boshqa davlat tizimi organlari bilan aloqasini mustahkamlashga yordam berish kiradi. Respublika



Prezidenti o'z faoliyatining asosiy sohalarini bo'yicha davlat maslahatchilarini tayinlaydi va ular orqali Prezident devoni ishiga rahbarlik qiladi.

O'zbekiston Respublikasida davlat boshqaruvining Prezidentlik Respublikasi shakli doimiy ravishda takomillashib bormoqda. Hayotning har xil sohalariga rahbarlik qilish uchun yangi organlar tashkil etilmoqda. Masalan, Respublika Oliy Majlisining 1995-yil 23-fevraldagi birinchi sessiyasida davlatdagi oliy mansabdor shaxslarning maslahat organi sifatida respublika Prezidenti huzurida Xavfsizlik Kengashi tuzish taklif qilingan edi. Bu kengashning vazifalari ko'p qirrali bo'lib, milliy xavfsizlikning ustuvor yo'nalishlarini va davlat siyosati asoslarini ishlab chiqishga javob beradi. Shaxs, jamiyat va davlatning xavfsizligini ta'minlash yuzasidan dasturlar majmui Xavfsizlik Kengashi rahbarligida rejalashtiriladi va amalga oshiriladi. Shu bilan bir qatorda Prezident huzurida maxsus Iqtisodiy islohot, tadbirkorlik va chet el investitsiyalari bo'yicha idoralararo kengash tuzilgan. Bu kengash ijtimoiy-iqtisodiy rivojlantirishning yagona strategiyasini ishlab chiqadi, iqtisodiy islohotlarning huquqiy negizini takomillashtirish bo'yicha tavsiyalar tayyorlaydi. Bu tavsiyalar respublika Prezidenti farmonlariga asos bo'ladi.

Konstitutsiyaning 91-moddasiga muvofiq, respublika Prezidenti o'z vazifasini bajarib turgan davrda boshqa haq to'lanadigan lavozimni egallashi, tadbirkorlik faoliyati bilan shug'ullanishi hamda vakillik organiga deputat bo'lishi mumkin emas.

Konstitutsiyaning 97-moddasiga binoan vakolati tugashi munosabati bilan iste'foga chiqqan Prezident umrbod Senat a'zosi lavozimini egallaydi. Bunday tajribalar xorijiy davlatlar tarixida mavjud va bu holat ko'plab davlatlarning Konstitutsiyalarida mustahkamlangan.

Prezident Oliy Majlis qabul qilgan qonunlarni amalga oshirishni ta'minlash maqsadida farmonlar, qarorlar va farmoyishlar qabul qiladi. Prezident farmonlari ijro hokimiyati organlari chiqaradigan normativ aktlar ichida oliy kuchga egadir. Prezidentning farmonlari respublikaning strategik xarakterga ega bo'lgan muhim normativ-huquqiy hujjatidir. Farmonlar bilan bir qatorda respublika Prezidenti davlat boshlig'i sifatida o'zining konstitutsiyaviy vakolatlari doirasida O'zbekiston Respublikasining butun hududida majburiy kuchga ega bo'lgan qarorlar va farmoyishlar ham chiqaradi.

Prezident farmonlarida qabul qilingan yechimlar uning qarorlarida huquqiy asosda batafsil yoritib beriladi va zarur chora-tadbirlar bilan mustahkamlanadi. Qarorlar vositasida iqtisodiy islohotning jadal sur'atda borishi huquqiy jihatdan tartibga solinadi, iqtisodiyotning g'oyat muhim bo'g'inlari va sohalarida o'zgarishlar qilinadi.

Respublika Prezidentining ko'pgina qarorlari muammolarning hal etilishi va mazmuni jihatidan belgilovchi xarakterga ega bo'lib, iqtisodiyotning ayrim bo'g'inlarida islohotlarni avj oldirishning boshlang'ich nuqtasi bo'lib xizmat qiladi.

**Vazirlar Mahkamasi O'zbekiston Respublikasining hukumati hisoblanadi.** O'zbekiston Respublikasi Konstitutsiyasining 98-moddasiga va 1993-yil 6-mayda qabul qilingan «O'zbekiston Respublikasi Vazirlar Mahkamasi to'g'risida»gi qonunning 1-moddasiga binoan, O'zbekiston Respublikasining hukumati iqtisodiy, ijtimoiy va ma'naviy sohalarda samarali faoliyat ko'rsatilishiga rahbarlikni, O'zbekiston Respublikasi qonunlarining ijro etilishini, Oliy Majlisning qarorlari, O'zbekiston Respublikasi Prezidenti farmonlari, qarorlari va farmoyishlarining bajarilishini ta'minlaydigan ijro etuvchi hokimiyat organi hisoblanadi.

Vazirlar Mahkamasi davlat boshqaruvi va o'zi tashkil etadigan xo'jalik boshqaruvi organlariga rahbarlik qiladi, ularning hamjihatlik bilan faoliyat ko'rsatishini ta'minlaydi.

Vazirlar Mahkamasi O'zbekiston Respublikasi tasarrufida bo'lgan davlat va xo'jalik boshqaruvining O'zbekiston Respublikasi Konstitutsiyasi bo'yicha o'z vakolatiga kiruvchi barcha masalalarini hal etishga haqlidir. Shu bilan birga, Vazirlar Mahkamasi qonunchilik tashabbusi huquqiga ham ega.

O'zbekiston Respublikasining Konstitutsiyasi va «O'zbekiston Respublikasi Vazirlar Mahkamasi to'g'risida»gi qonunda Vazirlar Mahkamasining ijroiya hokimiyat organi sifatidagi faoliyatining asosiy yo'nalishlari to'liq ko'rsatib berilgan. Vazirlar Mahkamasi o'z faoliyatida kollegiallik, demokratiya va qonuniylik, O'zbekiston Respublikasida yashovchi barcha millatlar va elatlarning manfaatlarini hisobga olish prinsiplariga asoslanadi.

Bundan tashqari, Vazirlar Mahkamasi o'z vakolatiga kiruvchi masalalar bo'yicha jamoat birlashmalari bilan hamkorlik qiladi va amaldagi qonun hujjatlariga muvofiq, ularga zarur yordam ko'rsatadi. O'zbekiston Respublikasining Prezidenti, O'zbekiston Respublikasining Konstitutsiyasiga muvofiq, ijro etuvchi hokimiyat devonini tuzadi va unga rahbarlik qiladi. Bosh vazir Vazirlar Mahkamasi faoliyatiga rahbarlik qiladi hamda uning o'z vakolatlarini samarali amalga oshirishi uchun chora-tadbirlarni ko'radi. Amalga oshirilgan bunday tadbirlar natijasida O'zbekistonda davlat qurilishida katta muvaffaqiyatlarga erishildi. Bularning hammasi davlat tizimi organlarining faoliyatini uyg'unlashtirish va ularning hamkorlikda ishlashini ta'minladi, davlat organlaridagi intizomni ko'tardi, pirovardida respublika iqtisodiy va ijtimoiy sohalarining rivojlanishiga olib keldi.

Vazirlar Mahkamasi tarkibi-  
ga O'zbekiston respublikasi  
Bosh vaziri (bundan buyon

matnda Bosh vazir deb yuritiladi), uning o'rinbosarlari, vazirlar, davlat qo'mitalarining raislari kiradi. Qoraqalpog'iston Respublikasi Hukumatining boshlig'i o'z lavozimi bo'yicha Vazirlar Mahkamasi tarkibiga kiradi.

Vazirlar Mahkamasining tarkibi O'zbekiston Respublikasi Prezidenti tomonidan shakllantiriladi. Bosh vazir nomzodi O'zbekiston Respublikasi Oliy Majlisi palatalarining mansabdor shaxslari saylanganidan va organlari shakllantirilganidan keyin bir oy ichida O'zbekiston Respublikasi Prezidenti tomonidan O'zbekiston Respublikasi Oliy Majlisining Qonunchilik palatasidagi siyosiy partiyalar fraksiyalarining har biri bilan hamda O'zbekiston Ekologik harakatidan saylangan deputatlar bilan maslahatlashuvlar o'tkazilganidan so'ng O'zbekiston Respublikasi Oliy Majlisining Qonunchilik palatasi va Senati ko'rib chiqishi hamda tasdiqlashi uchun taqdim etiladi.

O'zbekiston Respublikasi Oliy Majlisining Qonunchilik palatasi deputatlari va Senati a'zolari umumiy sonining ko'pchilik ovozini olgan Bosh vazir nomzodi tasdiqlangan hisoblanadi.

Agar ovoz berish vaqtida Bosh vazir nomzodi O'zbekiston Respublikasi Oliy Majlisining Qonunchilik palatasi yoki Senatida O'zbekiston Respublikasi Oliy Majlisining Qonunchilik palatasi deputatlari yoki Senati a'zolari umumiy sonining ko'pchilik ovozini ololmasa, O'zbekiston Respublikasi Prezidenti siyosiy partiyalar fraksiyalari va saylovchilar tashabbuskor guruhlaridan saylangan deputatlar bilan qo'shimcha maslahatlashuvlar o'tkazganidan so'ng Bosh vazir lavozimiga nomzodlarni yana ikki marta taqdim etish huquqiga ega.

O‘zbekiston Respublikasi Oliy Majlisining Qonunchilik palatasi yoki Senati taqdim etilgan Bosh vazir nomzodini uch marta rad etgan taqdirda, O‘zbekiston Respublikasi Prezidenti Bosh vazir vazifasini bajaruvchini tayinlaydi, O‘zbekiston Respublikasi Oliy Majlisini yoki uning palatalaridan birini tarqatib yuboradi.

Vazirlar Mahkamasining a‘zolari Bosh vazir taqdimiga binoan O‘zbekiston Respublikasi Prezidenti tomonidan tasdiqlanadi va lavozimidan ozod etiladi.

Vazirlar Mahkamasi yangi saylangan O‘zbekiston Respublikasi Oliy Majlisining oldida o‘z vakolatlarini zimmasidan soqit qiladi. (O‘zR ning 11.04.2007-y. 90-son Qonuni tahriridagi modda matni).

**Vazirlar Mahkamasining  
Oliy Majlis va davlat  
hokimiyati boshqa organ-  
lari bilan munosabati**

«O‘zbekiston Respublikasi Vazirlar Mahkamasi to‘g‘ri-sida»gi qonunda Vazirlar Mahkamasining O‘zbekiston Respublikasi Oliy Majlisi va

davlat hokimiyatining boshqa organlari bilan munosabati to‘liq ko‘rsatib berilgan. Masalan, ushbu qonunning 4-moddasida yangi saylangan Oliy Majlis oldida Vazirlar Mahkamasining o‘z vakolatlarini zimmasidan soqit qilishi ko‘rsatilgan, qonunning 8-moddasida ko‘rsatilishicha, yangi shakllantirilgan Vazirlar Mahkamasi O‘zbekiston Respublikasi Prezidenti bilan kelishilgan holda O‘zbekiston Respublikasi Oliy Majlisiga ko‘rib chiqish uchun o‘z vakolatlari davridagi faoliyati dasturini taqdim etadi.

Vazirlar Mahkamasi O‘zbekiston Respublikasini iqtisodiy va ijtimoiy rivojlantirishning asosiy yo‘nalishlarini, O‘zbekiston Respublikasi Davlat budjetining asosiy ko‘rsatkichlarini va unga kiritiladigan o‘zgartishlarni ishlab chiqadi hamda ularni O‘zbekiston Respublikasi Oliy Majlisi ko‘rib chiqishi uchun taqdim etadi.

O‘zbekiston Respublikasi Oliy Majlisining palatalari Vazirlar Mahkamasi muayyan a‘zosining o‘zi rahbarlik qilayotgan davlat yoki xo‘jalik boshqaruvi

organi faoliyati masalalari yuzasidan axborotini eshittishlari hamda zarur bo'lganda uni iste'foga chiqarish to'g'risida O'zbekiston Respublikasi Prezidenti ko'rib chiqishi uchun taklif kiritishlari mumkin.

Vazirlar Mahkamasining a'zolari O'zbekiston Respublikasi Oliy Majlisi palatalari majlislarida, palatalarning qo'mitalari majlislarida hozir bo'lish va axborot berishga haqli.

O'zbekiston Respublikasi Oliy Majlisining Qonunchilik palatasi deputatlari va O'zbekiston Respublikasi Oliy Majlisining Senati a'zolari tomonidan Vazirlar Mahkamasi yoki uning muayyan a'zolari faoliyatiga taalluqli masalalar qo'yilgan taqdirda, Bosh vazir shu masalalar yuzasidan zarur tushuntirishlar olish va tushuntirishlar berishga haqli.

Vazirlar Mahkamasi O'zbekiston Respublikasi Oliy Majlisi palatalari qo'mitalarining O'zbekiston Respublikasi Hukumati faoliyati masalalariga doir tavsiyalari va takliflarini ko'rib chiqadi hamda ular yuzasidan chora-tadbirlar ko'radi. Tavsiyalar va takliflarni ko'rib chiqish natijalari haqida hamda ko'rilgan chora-tadbirlar to'g'risida Vazirlar Mahkamasi O'zbekiston Respublikasi Oliy Majlis palatalarining tegishli qo'mitalariga kelishilgan muddatda ma'lum qiladi.

Hukumatning qonun chiqaruvchi organ bilan yana bir munosabati Oliy Majlisning deputatlari Vazirlar Mahkamasi yoki uning ayrim a'zolari faoliyatiga taalluqli masalani ko'rish, Bosh vazir ana shu masala yuzasidan zarur tushuntirish va izohlarni olish hamda berish huquqiga egaligida namoyon bo'ladi.

Bundan tashqari, Vazirlar Mahkamasi Oliy Majlis qo'mitalari va komissiyalarining hukumat faoliyatiga doir tavsiyalari va takliflarini ko'rib chiqadi va ular yuzasidan chora-tadbirlar ko'radi. Shu bilan birga, Vazirlar Mahkamasi tavsiyalar va takliflarni ko'rib chiqish natijalari hamda ko'rilgan chora-tadbirlar to'g'risida Oliy Majlisning tegishli qo'mitalari va

komissiyalariga ular bilan kelishilgan muddatlarda axborot beradi.

Vazirlar Mahkamasi to'g'risidagi qonunda ushbu organning Oliy Majlis deputatlari, qo'mitalari va komissiyalarining so'rovlariga javob berishiga doir masalalarga ham o'rin berilgan. Qonunning 9-moddasida ko'rsatilishicha, O'zbekiston Respublikasi Oliy Majlisining Qonunchilik palatasidan, Qonunchilik palatasi deputatidan, O'zbekiston Respublikasi Oliy Majlisining Senatidan, Senat a'zosidan O'zbekiston Respublikasi Hukumatining yoki unga bo'ysunuvchi davlat yoxud xo'jalik boshqaruvi organlarining faoliyatiga doir parlament so'rovi olgan Vazirlar Mahkamasi yoxud O'zbekiston Respublikasi Hukumati a'zosi qonun bilan belgilangan muddatlarda O'zbekiston Respublikasi Oliy Majlisi tegishli palatalarining majlislarida og'zaki yoki yozma javob berishi shart.

Vazirlar Mahkamasi:

Qoraqalpog'iston Respublikasi Vazirlar Kengashi bilan o'zaro hamkorlik qiladi, uning O'zbekiston Respublikasi qonunlari, O'zbekiston Respublikasi Oliy Majlisining hamda Oliy Majlis palatalarining qarorlari, O'zbekiston Respublikasi Prezidentining farmonlari, qarorlari va farmoyishlari hamda xo'jalik va ijtimoiy-madaniy qurilish masalalariga doir boshqa hujjatlar qanday bajarilayotganligi haqidagi ma'lumotlarini eshitadi;

Vazirlar Mahkamasining vakolatiga kiruvchi masalalar bo'yicha Qoraqalpog'iston Respublikasi Vazirlar Kengashining takliflarini ko'rib chiqadi;

vazirliklar, davlat qo'mitalari, idoralar hamda davlat va xo'jalik boshqaruvining boshqa organlari tomonidan tarmoqlararo va mintaqaviy o'ta muhim kompleks dasturlarni amalga oshirishda Qoraqalpog'iston Respublikasi huquqlariga rioya etilishini ta'minlaydi, bunda chiqib qoladigan bahsli masalalarni hal etadi;

Qoraqalpog'iston Respublikasi Vazirlar Kengashi-

ning O‘zbekiston Respublikasining Konstitutsiyasiga, O‘zbekiston Respublikasi qonunlariga, O‘zbekiston Respublikasi Prezidentining farmonlari, qarorlari va farmoyishlariga hamda Vazirlar Mahkamasining qarorlariga zid bo‘lgan qarorlari va farmoyishlarining ijro etilishini o‘z vakolati doirasida to‘xtatib qo‘yish huquqiga ega.

Qoraqalpog‘iston Respublikasini iqtisodiy, ijtimoiy-madaniy rivojlantirishga, tabiiy resurslaridan oqilona foydalanish va ularni muhofaza qilishga taalluqli masalalar Vazirlar Mahkamasi tomonidan hal etilayotganda Qoraqalpog‘iston Respublikasi Vazirlar Kengashining fikri hisobga olinadi.

Vazirlar Mahkamasi huzurida Qoraqalpog‘iston Respublikasi Vazirlar Kengashining Doimiy vakolatxonasi bo‘ladi.

O‘zbekiston Respublikasi Vazirlar Mahkamasi Qoraqalpog‘iston Respublikasi Vazirlar Kengashi bilan o‘zaro hamkorlik qiladi, uning O‘zbekiston Respublikasi qonunlari, Oliy Majlisning boshqa qarorlari, Respublika Prezidentining farmonlari hamda xo‘jalik va ijtimoiy-madaniy qurilish masalalari bo‘yicha boshqa aktlarning qanday bajarayotganligi haqidagi axborotlarini eshitadi; Vazirlar Mahkamasi o‘z vakolatiga kiruvchi masalalar bo‘yicha Qoraqalpog‘iston Vazirlar Kengashining takliflarini ko‘rib chiqadi; Vazirlar Kengashining O‘zbekiston qonunlariga va huquqiy normalariga zid bo‘lgan qarorlari va farmoyishlarining ijro etilishini to‘xtatib qo‘yadi.

O‘zbekiston bilan Qoraqalpog‘iston Respublikalari o‘rtasidagi iqtisodiy, madaniy va boshqa sohadagi munosabatlarga doimiy va keng tus berilishi Vazirlar Mahkamasi huzurida Qoraqalpog‘iston Respublikasi Vazirlar Kengashining doimiy vakolatxonasini tuzishga olib keldi.

Respublika Vazirlar Mahkamasi o‘z vakolatlari yuzasidan mahalliy ijro etuvchi hokimiyat organlari



bilan ma'lum munosabatlarda bo'ladi. Bunday munosabatlarning turlari va hajmi «O'zbekiston Respublikasi Vazirlar Mahkamasi to'g'risida»gi qonunning 11-moddasida to'liq ko'rsatilgan.

Vazirlar Mahkamasi o'z vakolatlari doirasida:

hududlarning iqtisodiy va ijtimoiy-madaniy rivojlantirilishini ta'minlash bilan bog'liq masalalarda mahalliy ijro etuvchi hokimiyat organlarining faoliyatini muvofiqlashtirib boradi;

viloyatlar va Toshkent shahar hokimlarining Vazirlar Mahkamasi tomonidan hal etilishi talab qilinadigan masalalarga doir takliflarini ko'rib chiqadi, Vazirlar Mahkamasi qarorlari va farmoyishlarining bajarilish jarayonini nazorat qiladi, ularning amalga oshirilishi yuzasidan mahalliy ijro etuvchi hokimiyat organlari rahbarlarini taklif qilish hamda ularning axborotlarini eshitishga haqli;

vazirliklar, davlat qo'mitalari, idoralar hamda davlat va xo'jalik boshqaruvi boshqa organlarining viloyatlar va Toshkent shahar hokimlari bilan o'zaro hamkorligini ta'minlaydi, bunda chiqib qoladigan bahsli masalalarni hal etadi;

hududlarni iqtisodiy va ijtimoiy rivojlantirishning asosiy ko'rsatkichlarini tasdiqlaydi, mahalliy ijro etuvchi hokimiyat devonining soni va namunaviy tuzilmasini belgilaydi;

viloyatlar va Toshkent shahar hokimlarining qonun hujjatlariga zid bo'lgan qarorlari va farmoyishlari ijrosini to'xtatib qo'yish hamda ularni bekor qilishga haqli.

**O'zbekiston  
Respublikasi Vazirlar  
Mahkamasining asosiy  
vakolatlari**

Vazirlar Mahkamasi O'zbekiston Respublikasining hukumati sifatida juda keng vakolatlarga ega. Ular O'zbekiston Respublikasi Kons-

titutsiyasida va «O'zbekiston Respublikasi Vazirlar Mahkamasi to'g'risida»gi qonunda mustahkamlangan.

Vazirlar Mahkamasi o'z vakolatlari doirasida:

iqtisodiy, ijtimoiy-madaniy jarayonlarni boshqara-

di, mulkchilikning barcha shakllarini uyg'unlashtirish va ularning tengligi, iqtisodiyotni monopoliyashtirishdan chiqarish, bozor iqtisodiyotining huquqiy mexanizmini ishga solish asosida erkin tadbirkorlik uchun shart-sharoitlar yaratadi;

xo'jalik yuritishning yangi shakllari — konsernlar, konsorsiumlar, tarmoqlararo birlashmalar, turli uyushmalar va boshqa shunga o'xshash tashkilotlarni barpo etishga va mustahkamlashga yordamlashadi, iqtisodiyotni rivojlantirish va aholi talab-ehtiyojlarini qondirish zaruriyatidan kelib chiqqan holda ular faoliyatini yo'naltiradi va muvofiqlashtiradi;

O'zbekiston Respublikasida pul va kredit tizimini mustahkamlash chora-tadbirlarini amalga oshirishga ko'maklashadi, yagona narx siyosatini o'tkazish, mehnatga haq to'lash miqdorining belgilangan kafolatlarini hamda ijtimoiy ta'minot darajasini ta'minlash chora-tadbirlarini ishlab chiqadi va amalga oshiradi;

O'zbekiston Respublikasi Davlat budjetini, shuningdek O'zbekiston Respublikasini iqtisodiy va ijtimoiy rivojlantirish istiqbol ko'rsatkichlarini va eng muhim dasturlarini ishlab chiqishni hamda ularning ijrosini tashkil etadi;

boshqaruv tuzilmasini takomillashtirish to'g'risida, vazirliklar, davlat qo'mitalari, idoralar hamda O'zbekiston Respublikasi davlat va xo'jalik boshqaruvining boshqa organlarini tuzish, qayta tashkil etish va tugatish to'g'risida takliflar ishlab chiqadi;

fan va texnikani rivojlantirish, tabiiy resurslardan oqilona foydalanish va ularni muhofaza qilish chora-tadbirlarini amalga oshiradi;

fuqarolarning huquq va erkinliklarini, ularning mehnat qilishga, ijtimoiy va huquqiy himoyalanihga bo'lgan huquqlarini ta'minlash hamda himoya qilish chora-tadbirlarini ko'radi, ijtimoiy ta'minot tizimini takomillashtiradi;

sog'liqni saqlash, xalq ta'limini rivojlantirish va

takomillashtirishning asosiy yoʻnalishlarini belgilaydi, madaniyatni rivojlantirishga koʻmaklashadi;

Oʻzbekiston Respublikasining davlat xavfsizligi va mudofaa qobiliyatini, davlat chegaralari qoʻriqlanishini taʼminlash, davlat manfaatlarini himoya qilish, jamoat tartibini saqlash chora-tadbirlarini amalga oshirishga yordamlashadi;

davlat boshqaruv organlarining tabiatni muhofaza qilish tadbirlarini birgalikda oʻtkazish hamda respublika va xalqaro ahamiyatga molik yirik ekologik dasturlarni amalga oshirish borasidagi ishlarini muvofiqlashtiradi, yirik avariya va falokatlarning, shuningdek tabiiy ofatlarning oqibatlarini tugatish chora-tadbirlarini koʻradi;

Oʻzbekiston Respublikasining xorijiy davlatlar va xalqaro tashkilotlardagi vakilligini taʼminlaydi, hukumatlararo shartnoma va bitimlar tuzadi, ularni bajarish chora-tadbirlarini koʻradi.

Oʻzbekiston Respublikasi Vazirlar Mahkamasining majlislarini tayyorlash va oʻtkazish tartibi «Oʻzbekiston Respublikasining Vazirlar Mahkamasi ish tartibi» bilan belgilangan.

Davlat boshqaruvining, xoʻjalik ijtimoiy-madaniy qurilishning eng muhim masalalari Vazirlar Mahkamasining majlislarida hal etiladi.

Vazirlar Mahkamasining majlislari yilning har choragida kamida bir marta oʻtkaziladi.

Vazirlar Mahkamasining majlislarini Bosh vazir oʻtkazadi.

Oʻzbekiston Respublikasining Prezidenti Vazirlar Mahkamasining majlislarida raislik qilishga haqli.

Qonunda Bosh vazir, uning oʻrinbosarlari, Vazirlar Mahkamasi aʼzolarining vazifalari aniq koʻrsatilgan. Masalan, Bosh vazir Vazirlar Mahkamasi faoliyatini tashkil etadi va unga rahbarlik qiladi hamda uning samarali ishlashi uchun shaxsan javob beradi.

Bosh vazir:

O‘zbekiston Respublikasi Prezidenti bilan kelishilgan holda Bosh vazirning o‘rinbosarlari o‘rtasida vazifalarni taqsimlaydi;

Vazirlar Mahkamasining qarorlarini imzolaydi;

O‘zbekiston Respublikasi Prezidentining topshirig‘iga binoan xalqaro munosabatlarda Vazirlar Mahkamasi nomidan ish ko‘radi hamda hukumatlararo shartnomalar va bitimlarni imzolaydi;

davlat va xo‘jalik boshqaruvining Vazirlar Mahkamasi majlisida ko‘rib chiqish talab etilmaydigan masalalari bo‘yicha qarorlar qabul qiladi;

O‘zbekiston Respublikasi qonunlarida, O‘zbekiston Respublikasi Prezidentining farmonlari, qarorlari va farmoyishlarida nazarda tutilgan boshqa vakolatlarni amalga oshiradi.

Bosh vazir o‘z vakolatlariga kiruvchi masalalar yuzasidan farmoyishlar chiqaradi.

Bosh vazir Vazirlar Mahkamasining ishi to‘g‘risida O‘zbekiston Respublikasi Prezidentiga muntazam ravishda axborot berib boradi.

Bosh vazir yo‘qligida uning vazifasini Bosh vazir o‘rinbosarlaridan biri bajaradi.

Bosh vazirning o‘rinbosarlari esa vazirlar vakolatining taqsimotiga muvofiq o‘zlari rahbarlik qiladigan tarmoqlardagi ishlarning ahvoli uchun javob beradilar. Ular tegishli vazirliklar, davlat qo‘mitalari, idoralar hamda davlat va xo‘jalik boshqaruvining boshqa organlari faoliyatini muvofiqlashtirishni, ularning ishini nazorat qilishni amalga oshiradilar, Vazirlar Mahkamasiga kiritilgan takliflarni hamda qaror va farmoyishlar loyihalarini dastlabki tarzda ko‘rib chiqadilar.

Qonunga muvofiq, Vazirlar Mahkamasi a‘zolari:

o‘zlariga topshirilgan faoliyat sohasi uchun javob beradilar;

Vazirlar Mahkamasining majlislarida masalalarni ko‘rib chiqishda ishtirok etadilar;

Vazirlar Mahkamasining vakolatiga kiruvchi ma-

salalarni ko‘rib chiqish haqida Vazirlar Mahkamasiga taklif kiritishlari, Vazirlar Mahkamasi qarorlarining loyihalarini tayyorlash tashabbusi bilan chiqishlari mumkin.

Vazirlar Mahkamasining a‘zolari ilmiy va pedagogik faoliyatdan tashqari haq to‘lanadigan boshqa turdagi faoliyat bilan shug‘ullanishlari mumkin emas.

Vazirlar Mahkamasining doimiy ishini ta‘minlash maqsadida, uning doimiy tuzilmasi sifatida, Bosh vazir va uning o‘rinbosarlaridan iborat tarkibda Vazirlar Mahkamasining Rayosati faoliyat ko‘rsatadi.

Bosh vazirning qaroriga binoan Vazirlar Mahkamasi Rayosatining tarkibiga O‘zbekiston Respublikasi Hukumatining boshqa a‘zolari ham kiritilishi mumkin.

O‘zbekiston Respublikasi Vazirlar Mahkamasi Rayosatining hujjatlari qarorlar, farmoyishlar va bayon-qarorlar shaklida chiqariladi. Vazirlar Mahkamasi davlat va xo‘jalik boshqaruvining ayrim masalalari bo‘yicha takliflar tayyorlash maqsadida doimiy va vaqtinchalik komissiya tuzadi va ularning a‘zolari, vakolatlari hamda faoliyat tartibini belgilaydi.

**Vazirlar Mahkamasi  
chiqaradigan hujjatlar**

O‘zbekiston Respublikasi Vazirlar Mahkamasining vakolatlari u qabul qiladigan hujjatlar, qarorlar va farmoyishlar orqali amalga oshiriladi. Bu huquqiy hujjatlar O‘zbekiston Respublikasi Konstitutsiyasi, qonunlari, Respublika Prezidentining farmonlari va «O‘zbekiston Respublikasi Vazirlar Mahkamasi to‘g‘risida»gi qonun asosida qabul qilindi. Ushbu qonunning 20-moddasiga ko‘ra: «O‘zbekiston Respublikasi Vazirlar Mahkamasi amaldagi qonun hujjatlariga muvofiq O‘zbekistonning butun hududida barcha organlar, korxonalar, muassasalar, tashkilotlar, mansabdor shaxslar va fuqarolar tomonidan bajarilishi majburiy bo‘lgan qarorlar va farmoyishlar chiqaradi».

### 13-§ BO‘YICHA EGALLAGAN BILIMLARINGIZNI MUSTAHKAMLASH UCHUN TOPSHIRIQLAR

**Javob bering**



Quyidagi savollarga konstitutsiya va uning asosida qabul qilingan qonunlarni o‘rganish asosida javob bering:

1. Ijro etuvchi hokimiyatning davlat hokimiyatini amalga oshirishdagi o‘rni?
2. O‘zbekiston Respublikasi Prezidenti vakolatlarini belgilab beruvchi konstitutsiyaviy qoidalar?
3. Vazirlar Mahkamasining mamlakatimiz iqtisodiy, ijtimoiy-siyosiy va madaniy ravnagini ta‘minlash yo‘lida amalga oshirayotgan tadbirlari.

**Ko‘rgazmali material**



Vazirlar Mahkamasi tarkibi va tuzilishi tartibi, uning boshqa davlat organlari bilan munosabatini aks ettiruvchi ko‘rgazmali material tayyorlang.

**Matn tayyorlang**



«Ijro etuvchi hokimiyatning huquqiy asoslari» mavzusida o‘zingiz mustaqil ravishda matn tayyorlang va dars jarayonida o‘rtoqlaringiz bilan muhokama qiling.

### 14-§. MAHALLIY DAVLAT HOKIMIYATI VA FUQAROLARNING O‘ZINI O‘ZI BOSHQARISH ORGANLARI

**Mahalliy davlat hokimiyati organlari tizimi**

O‘zbekiston Respublikasida mahalliy davlat hokimiyati faoliyatini tashkil etishning

asosiy qoidalari Konstitutsiyada belgilanib qo‘yilgan. Oliy hokimiyat organlari faoliyatini tashkil etish kabi mahalliy davlat hokimiyatini tashkil etishda ham Konstitutsiyada belgilab qo‘yilgan asosiy qoidalarga asoslanish juda muhimdir. Chunki, aynan mahalliy hokimiyat bevosita qonunlar va ijro etuvchi hokimiyat

normativ hujjatlarini amalga oshiradi, bevosita jamiyatning turli sohalaridagi muammolar bilan to'qnashadi. Shuning uchun mahalliy davlat hokimiyati xalq farovonligini ta'minlash va shu kabi davlat oldida turgan muhim vazifalarni bajarishda asosiy o'rin tutadi. O'zbekiston Respublikasi dunyo tajribasidan kelib chiqqan holda o'ziga xos tarzda joylarda davlat hokimiyatini amalga oshirish mexanizmini yaratdi.

Konstitutsiyaning 99-moddasiga binoan viloyatlar, tumanlar va shaharlarda (tumanga bo'ysunadigan shaharlarda, shuningdek shahar tarkibiga kiruvchi tumanlardan tashqari) hokimlar boshchilik qiladigan xalq deputatlari Kengashlari hokimiyatning vakillik organi bo'lib, ular davlat va fuqarolarning manfaatlarini ko'zlab o'z vakolatlariga taalluqli masalalarni hal qiladilar.

2007-yil 11-apreldagi Konstitutsiyaviy qonunning 6-moddasiga binoan:

Viloyat va Toshkent shahar hokimi nomzodlari O'zbekiston Respublikasi Prezidenti tomonidan tegishli xalq deputatlari Kengashlaridagi partiya guruhlarining har biri bilan maslahatlashuvlar o'tkazilganidan so'ng xalq deputatlari viloyat va Toshkent shahar Kengashiga tasdiqlash uchun taqdim etiladi.

Tegishli xalq deputatlari Kengashi deputatlari umumiy sonining ko'pchilik ovozini olgan viloyat va Toshkent shahar hokimi nomzodi tasdiqlangan hisoblanadi.

Agar ovoz berish vaqtida viloyat va Toshkent shahar hokimi nomzodlari tegishli xalq deputatlari Kengashi deputatlari umumiy sonining ko'pchilik ovozini ololmasa, O'zbekiston Respublikasi Prezidenti mazkur lavozimlarga nomzodlarni partiya guruhlari bilan qo'shimcha maslahatlashuvlar o'tkazganidan so'ng bir oy ichida yana ikki marta taqdim etish huquqiga ega.

Tegishli xalq deputatlari Kengashi taqdim etilgan viloyat va Toshkent shahar hokimi nomzodlarini uch

marta rad etgan taqdirda, O‘zbekiston Respublikasi Prezidenti viloyat va Toshkent shahar hokimi vazifasini bajaruvchini tayinlash, tegishli xalq deputatlari Kengashini tarqatib yuborish huquqiga ega. Bunda xalq deputatlari viloyat va Toshkent shahar Kengashlariga saylov tarqatib yuborish to‘g‘risida qaror qabul qilingan kundan e‘tiboran uch oy ichida o‘tkaziladi.

O‘zbekiston Respublikasi Prezidenti xalq deputatlari viloyat va Toshkent shahar Kengashlarining qaroriga muvofiq hokim nomzodi bo‘yicha farmon qabul qiladi.

Hokim vakillik va ijroiya hokimiyatini boshqaradi. Hokimlarning vakillik organlariga rahbarligi vakillik organlarining ishini tashkil qilishga qaratilganidir.

Viloyat hokimi, Toshkent shahri hokimi O‘zbekiston Respublikasining Prezidenti va tegishli xalq deputatlari Kengashi oldida hisobdordirlar. Tuman va shahar hokimi yuqori turuvchi hokim va tegishli xalq deputatlari Kengashi oldida hisobdordirlar.

Toshkent shahridagi tumanlarda vakillik organlari bo‘lmaganligi tufayli Toshkent shahridagi tuman hokimlarini bevosita Toshkent shahar hokimi tayinlaydi va lavozimidan ozod qiladi, ular Toshkent shahar Xalq deputatlari Kengashida tasdiqlanadi. O‘zbekiston Konstitutsiyasi 93-moddasining 15-bandiga binoan, «Konstitutsiyani, qonunlarni buzgan yoki o‘z sha’ni va qadr-qimmatiga dog‘ tushiradigan xatti-harakat sodir etgan tuman va shahar hokimlarini Prezident o‘z qarori bilan lavozimidan ozod etishga haqli». Bu tartib hokimlarda mas’uliyat hissini yanada kuchaytiradi.

Nazorat qilish vazifalari samaradorligini oshirish maqsadida xalq deputatlari viloyatlar, Toshkent shahar Kengashlaridagi partiya guruhlariga viloyat va Toshkent shahar hokimi lavozimiga tasdiqlangan shaxslarning qoniqarsiz faoliyati to‘g‘risida O‘zbekiston Respublikasi Prezidentiga asoslangan xulosalar



taqdim etish tashabbusi huquqi beriladi. Bunday tashabbus yetakchi partiya guruhlari tomonidan qo‘llab-quvvatlangan taqdirda, O‘zbekiston Respublikasi Prezidenti bu tashabbusning xalq deputatlari Kengashidagi muhokamasini tayinlaydi va muhokama natijalariga muvofiq qaror qabul qiladi. (Konstitutsiyaviy qonun, 2007, 11-aprel, 7-m.)

«Mahalliy davlat hokimiyati to‘g‘risida»gi qonunning 2-moddasida ko‘rsatilishicha, tuman markazlari hisoblangan shaharlarda, viloyat hokimi shahar hokimini tuman hokimiga bo‘ysundirish va yagona boshqaruv organi tuzish vakolatiga ega. Bu xususdagi qaror xalq deputatlari viloyat Kengashi tomonidan tasdiqlanadi. Qonunda bunday holatni ko‘rsatishdan maqsad, hokimlik tizimini mustahkamlash va uning ishini samarali tashkil qilish, boshqaruv apparatini ixchamlashtirish va arzonlashtirishdir. Xalq deputatlari barcha pog‘onasidagi Kengashlarining va hokimning vakolat muddati besh yil.

Qoraqalpog‘iston Respublikasining tuman va shahar xalq deputatlari Kengashlari va tegishli hudud hokimlarining faoliyati O‘zbekiston Respublikasi Konstitutsiyasi va «Mahalliy hokimiyat to‘g‘risida»gi qonun bilan hamda Qoraqalpog‘iston Konstitutsiyasi va qonunlari bilan tartibga solinadi.

<b>Mahalliy hokimiyat organlari vakolatlari</b>
---

O‘zbekiston Respublikasi Konstitutsiyasining 100-moddasida mahalliy hokimiyat organlari ixtiyoriga berilgan vazifalar ko‘rsatilgan bo‘lib, ular mahalliy hokimiyat organlari vakolatlarining konstitutsiyaviy asoslari hisoblanadi.

Bu moddaga binoan, mahalliy hokimiyat organlari vakolatiga quyidagilar kiradi:

- qonuniylikni, huquqiy tartibotni va fuqarolarning xavfsizligini ta‘minlash;
- hududlarni iqtisodiy, ijtimoiy va madaniy rivojlantirish;

— mahalliy budjetni shakllantirish va uni ijro etish, mahalliy soliqlar, yig'implarni belgilash, budjetdan tashqari jamg'armalarni hosil qilish;

— mahalliy kommunal xo'jalikka rahbarlik qilish;

— atrof-muhitni muhofaza qilish;

— fuqarolik holati aktlarini qayd etishni ta'minlash;

— normativ hujjatlarni qabul qilish hamda O'zbekiston Respublikasi Konstitutsiyasiga va qonunlariga zid kelmaydigan boshqa vakolatlarni amalga oshirish.

Bu vazifalar mahalliy vakillik va ijroiya hokimiyati organlarining birgalikda amalga oshiradigan vazifalari bo'lib, ularning vakolatlari shu vazifalardan kelib chiqadi. Konstitutsiya vakillik va ijroiya hokimiyati organlarining vazifalarini aniq ajratib ko'rsatmagan bo'lsa-da, mahalliy davlat hokimiyati to'g'risidagi qonunda vakillik va ijroiya hokimiyati organlarining vakolatlari aniq belgilab berilgan.

Mahalliy hokimiyat organlari tegishli hududda qonuniylik, huquqiy tartibot va fuqarolarning xavfsizligini ta'minlashda turli organlarni shu maqsad sari yo'naltiruvchi, ularning faoliyatini muvofiqlashtiruvchi rolni o'ynaydi. Ular mazkur hududda qonuniylikni va huquqiy tartibotni mustahkamlash, fuqarolarning xavfsizligini ta'minlash hamda jinoyatchilikka qarshi kurash choralarining umumiy yo'llarini, tadbirlarini ishlab chiqadi va shu tadbirlarning bajarilishini nazorat qiladi. Mahalliy hokimiyat organlarining bu sohadagi vakolatlari tegishli qonun hujjatlarida belgilab qo'yilgan.

Mahalliy hokimiyat organlari o'z hududidagi iqtisodiy, ijtimoiy va madaniy sohalarni rivojlantirishga rahbarlik qiladi. Mahalliy Kengashlar hududni rivojlantirishning istiqbolga mo'ljallangan dasturlarini, tuman, shaharning bosh rejasi va uni qurish qoidalarini tasdiqlaydi. «Mahalliy davlat hokimiyati to'g'risida»gi qonunning 7-moddasiga asosan, mahalliy

Kengashlar va hokimlar O‘zbekiston Respublikasi mulki bo‘lgan davlat mulki obyektlariga nisbatan ishlab chiqarish va ijtimoiy obyektlarni samarali joylashtirish, tabiiy va mehnat resurslaridan oqilona foydalanish, atrof-muhitni muhofaza qilish, aholini ijtimoiy himoya qilish kabi sohalarda nazoratni amalga oshiradilar. Bundan tashqari, xalq deputatlari viloyat, tuman, shahar Kengashi davlat mulkini chegaralash natijasida o‘ziga berilgan yoki qonunlarga muvofiq, o‘zi sotib olgan obyektlarga nisbatan mulkdor vakolatlarini to‘liq amalga oshiradi.

Mahalliy hokimiyat organlari o‘z ixtiyoridagi mulklarning xo‘jalik faoliyatidan va boshqa vositalardan vujudga kelgan daromadlarni va shu daromadlar hisobidan orttirilgan mol-mulknini mustaqil tasarruf etish huquqiga egadirlar.

Vakillik organlari, hokimlar o‘z mulklarini qonunga zid bo‘lmagan tartibda vaqtincha foydalanish yoki doimiy egalik qilish uchun boshqa shaxslarga berish huquqiga egadirlar. Mahalliy organlar bu huquqdan o‘z hududida ishlab chiqarishni rivojlantirish, aholining turmush farovonligini oshirish maqsadida foydalanadilar.

Mahalliy hokimiyat organlarining yer munosabatlari sohasidagi vakolatlari qonunning 10-moddasida mustahkamlangan. Chunonchi, viloyat, shahar hokimi korxonalar, muassasalar, tashkilotlar, dehqon xo‘jaliklari va fuqarolarga egalik qilish, foydalanish uchun ijaraga yer berishga, bu subyektlarning yerga egalik qilish va yerdan foydalanish huquqini to‘xtatib qo‘yishga, shuningdek, yerlarni olib qo‘yishga haqli bo‘lib, uning bu xususda qabul qilgan qarorlari tegishli xalq deputatlari Kengashi tomonidan tasdiqlanadi. Xalq deputatlari Kengashi, hokim, O‘zbekiston Respublikasi qonunlariga muvofiq, yer munosabatlariga doir boshqa masalalarni ham hal qiladilar.

Bundan tashqari, mahalliy hokimiyat organlari o‘z

hududida sanoat, qurilish, aloqa vositalari, qishloq xo'jaligi, aholiga xizmat ko'rsatish sohalari, ijtimoiy va madaniy sohalarga rahbarlikni amalga oshiradilar. Ushbu organlarning rahbarlarini lavozimga tayinlash, lavozimidan ozod qilish, shu organlarning faoliyatini nazorat qilish, ularning hisobotlarini eshitish mahalliy hokimiyat organlarining vakolatiga kiradi. Bu ham rahbarlikning bir shaklidir. Mahalliy davlat hokimiyati organlarining rahbarlik bo'yicha aniq vazifalari va vakolatlari amaldagi qonunlarda va boshqa huquqiy hujjatlarda belgilangan.

Mahalliy hokimiyat organlarining, mahalliy budjetni shakllantirish va uni ijro etish, mahalliy soliqlar, yig'imlarni belgilash, budjetdan tashqari jamg'armalarni hosil qilish vazifasi hududning iqtisodiy rivojlanishida, fuqarolarning turmush sharoitini yaxshilashda, davlat organlarini saqlab turishda zarur moddiy bazani vujudga keltirishga qaratilgan.

Mahalliy davlat hokimiyati to'g'risidagi qonunda mahalliy hokimiyat organlarining bu masaladagi vakolatlari ajratib ko'rsatilgan. Masalan, ko'rsatilgan qonunning 25-moddasiga binoan, hokimlarning vakolatiga budjet loyihalarini tayyorlash, budjetning ijrosi haqidagi hisobotni tayyorlash, ijroni tashkil qilish kirsam, 24-moddada ko'rsatilganidek, xalq deputatlari Kengashlari vakolatiga hokimning taqdimiga binoan mahalliy budjet va uning ijrosiga doir hisobotni tasdiqlash kiradi.

Shuningdek, ularning har ikkalasiga taalluqli vakolatlar ham ko'rsatilgan. Masalan, mahalliy kommunal xo'jalikka rahbarlik qilish mahalliy hokimiyat organlari faoliyatining muhim qismidir. Mahalliy davlat hokimiyati to'g'risidagi qonunda, hokimlar aholiga kommunal xizmat ko'rsatish sohasida qonun hujjatlari o'z vakolatiga berilgan masalalarni hal qilishi ta'kidlangan. Hokimlar o'z hududida kommunal xo'jalik tarmoqlari faoliyatini muvofiqlashtiradi va

ularga rahbarlik qiladi. Kommunal xo‘jalik tarmoqlari, hokimliklarning tarkibiy bo‘linmalari orqali boshqariladi. Ularning boshliqlari hokim tomonidan lavozimga tayinlanadi va ozod qilinadi. Bu masala mahalliy Kengash sessiyasida tasdiqlanadi. Mahalliy vakillik organlari va hokimlar kommunal xo‘jalik tarmoqlari faoliyatini nazorat qilib boradilar.

Bundan tashqari, Konstitutsiya normalariga asosan, mahalliy hokimiyat organlari o‘z hududida fuqarolik holati aktlarini qayd etishni ta‘minlaydilar. «Mahalliy davlat hokimiyati to‘g‘risida»gi qonunda mahalliy davlat hokimiyati organlarining bu sohadagi vakolatlari bevosita qayd etilmagan, lekin qonunning moddalarida ko‘rsatilishicha, hokimlarning va ularga qarashli ijroiya organlarining fuqarolar huquqlari va qonuniy manfaatlarini himoya qilishni tashkil etish bo‘yicha vakolatlari fuqarolik holati aktlarini qayd etish organlarining faoliyati bilan bevosita bog‘liqdir. Mahalliy davlat organlari fuqarolik holati aktlarini qayd etuvchi organlarning faoliyatiga rahbarlik qiladi, bu organlarning faoliyatiga umumiy rahbarlik qiladi.

Qonunning 25-moddasida ko‘rsatilishicha, yuqorida ko‘rsatilganlardan tashqari hokimlarning asosiy vazifasi Konstitutsiya, qonunlar, Oliy Majlisning boshqa hujjatlari, Prezident va Vazirlar Mahkamasining hujjatlari, yuqori turuvchi organlar va tegishli xalq deputatlari Kengashlarining qarorlari ijrosini tashkil etishdir.

Bundan tashqari hokimlar jamoat tartibiga rioya etilishi va jinoyatchilikka qarshi kurash, fuqarolarning xavfsizligini ta‘minlash, ularning huquqlarini himoya qilish va salomatligini muhofaza qilish chora-tadbirlarini ko‘radilar, tabiiy ofatlar, epidemiyalar va boshqa favqulodda hollarda tegishli ishlarni tashkil etadilar, agar quyi turuvchi hokimlarning qarorlari Konstitutsiya, qonunlar va boshqa yuqori tashkilotlar qarorlariga zid bo‘lsa, ularni bekor qiladilar; rahbarlari

tegishli xalq deputatlari Kengashlari tomonidan lavozimga tayinlanadigan va lavozimidan ozod etiladigan ijroiya hokimiyati bo'linmalarining ishini nazorat qiladilar; xalq deputatlari Kengashi va hokim qabul qilgan va chiqargan hujjatlarni bajarmaganliklari uchun mansabdor shaxslarni intizomiy javobgarlikka tortish to'g'risida taqdimnoma kiritadilar; davlat mukofotlari bilan taqdimlashga doir iltimosnomalarni qarab chiqadilar va ular yuzasidan takliflar kiritadilar, respublika va xorijda viloyat, tuman hamda shaharning rasmiy vakili sifatida ish ko'radilar; aholini qabul qilishni tashkil etadilar, fuqarolarning taklif va shikoyatlarini ko'rib chiqadilar va o'z vakolatiga berilgan boshqa masalalarni hal etadilar.

O'zbekiston Respublikasi Konstitutsiyasida ko'rsatilishicha, mahalliy hokimiyat organlari o'z vakolatlari doirasida normativ hujjatlar qabul qiladilar. Ular qaror va farmoyishlar shaklida bo'lishi mumkin. Mahalliy Kengash o'z qarorlarini kollegial asosda qabul qilsa, hokim yakkaboshchilik prinsipi asosida qabul qiladi. Ular qabul qilgan qarorlarning ushbu hududda bajarilishi shartdir. Mahalliy hokimiyat organlari Konstitutsiya va qonunlarga zid kelmaydigan boshqa vakolatlarni ham amalga oshirishlari mumkin.

«Mahalliy davlat hokimiyati to'g'risida»gi qonunda, yuqorida keltirilganlardan tashqari, faqat xalq deputatlari Kengashlarining o'ziga taalluqli bo'lgan vakolatlarni ham ko'rsatilgan. Masalan, amaldagi qonunlarga muvofiq, mahalliy soliqlar, yig'imlar, boj miqdorini belgilash, mahalliy budjetga tushadigan mahalliy soliqlar, yig'imlar va to'lovlar bo'yicha imtiyozlar berish; hokim va uning o'rinbosarlarini lavozimga tasdiqlash va lavozimidan ozod etish; xalq deputatlari Kengashining ish tartibini, xalq deputatlari Kengashi doimiy va boshqa komissiyalari to'g'risidagi nizomlarni tasdiqlash; xalq deputatlari Kengashining doimiy va muvaqqat komissiyalarini, boshqa organla-

rini tuzish, saylash va tugatish; bo‘limlar, boshqarmalar va boshqa bo‘linmalarining hisobotlarini tinglash; xalq deputatlarining so‘rovlarini ko‘rib chiqish va ular yuzasidan qarorlar qabul qilish; hokimning va quyi Kengashning O‘zbekiston Respublikasi qonunlariga mos kelmaydigan qarorlarini bekor qilish.

**Mahalliy davlat hokimiyati organlari faoliyatining tashkiliy shakllari**

Mahalliy vakillik organlari kollegial organdir. Ular o‘z vakolatlarini amalga oshirishlari uchun deputatlar-

ning to‘la ishtiroki talab etiladi. Shuning uchun, mahalliy Kengash ishining asosiy tashkiliy-huquqiy shakli sessiyadir. Faoliyatning sessiya shaklidagina vakillik organlari to‘laqonli davlat hokimiyati organi sifatida ishlaydilar. Sessiyada, asosan, Kengash vakolatiga kiradigan masalalar muhokama qilinadi, hisobotlar eshitaladi va bajarilishi shart bo‘lgan qarorlar qabul qilinadi. Xalq deputatlari viloyat, tuman, shahar Kengashlarining sessiyalari tegishli darajadagi hokim, hokim yo‘qligida esa uning o‘rinbosarlaridan biri tomonidan zaruratga qarab yiliga kamida ikki marta chaqiriladi. Shuningdek, sessiya tegishli Kengash deputatlari kamida uchdan ikki qismining tashabbusi bilan ham chaqirilishi mumkin.

Xalq deputatlari Kengashlari va hokimlar o‘z faoliyati yuzasidan va vakolati doirasida tegishli qarorlar va farmoyishlar chiqarishi to‘g‘risida aytib o‘tilgan edi. «Mahalliy davlat hokimiyati to‘g‘risida»gi qonunda mahalliy vakillik organlari va hokimlarining aktlari Konstitutsiya, qonunlar, Oliy Majlis qarorlari, respublika Prezidentining farmonlari va farmoyishlari, Vazirlar Mahkamasining hujjatlariga zid bo‘lmasligi kerakligi ta’kidlangan.

Viloyat, tuman va shahar xalq deputatlari va hokimlar faoliyatining qonuniy bo‘lishi turli vositalar orqali nazorat qilinadi.

Ma’lumki, Mahalliy Kengashlarning Konstitu-

tsiyaga, qonunlarga, respublika Prezidentining farmonlari, farmoyishlari va qarorlariga zid keladigan qarorlari O‘zbekiston Respublikasi Oliy Majlisi tomonidan bekor qilinadi. Quyi pog‘onadagi Kengashlarning qarorlari yuqori pog‘onadagi Kengashlar tomonidan bekor qilinishi mumkin.

Hokimlarning Konstitutsiya va qonunlarga, Prezident farmonlari, farmoyishlari va qarorlariga, Vazirlar Mahkamasi hujjatlariga zid keladigan, shuningdek, hokimlarning respublika manfaatlariga zid keladigan hujjatlari O‘zbekiston Prezidenti tomonidan yoki Vazirlar Mahkamasi tomonidan to‘xtatib qo‘yiladi yoki bekor qilinadi.

Hokimlarning qarorlarini xalq deputatlari Kengashlari ham, quyi hokimlarning qarorlarini yuqori turuvchi hokimlar ham bekor qila oladi. Bularning hammasi Mahalliy Kengashlar va hokimlarning faoliyatida qonuniylik prinsipining amalga oshirilishini kafolatlaydi.

Ularning o‘z faoliyatlarini qonuniylik asosida olib borishlarining yana bir kafolati hokimlar chiqargan hujjatlar (qaror va farmoyishlar) yuzasidan sudga shikoyat qilish mumkinligidir. Ushbu qonunning 28-moddasida ko‘rsatilishicha, fuqarolar, jamoat birlashmalari, korxonalar, muassasalar va tashkilotlar hokimlar chiqargan huquqiy hujjatlar yuzasidan sudga shikoyat qilishlari mumkin.

Shikoyat bo‘yicha sud qabul qilgan hujjatlar barcha davlat organlari, jamoat birlashmalari, korxonalar, muassasalar, mansabdor shaxslar va fuqarolar uchun, shu jumladan, hokimlar uchun ham majburiydir.

Mahalliy hokimiyat organlari faoliyatida qonuniylikni ta‘minlashda prokuratura organlarining o‘rni katta. O‘zbekiston Respublikasi «Prokuratura to‘g‘risida»gi qonunning 1-moddasida O‘zbekiston Respublikasi Bosh prokurori va unga bo‘ysunuvchi prokurorlar barcha davlat idoralari kabi hokimlarning qonun-



larni aniq va bir xilda ijro etishini nazorat qilishi belgilab qo'yilgan. Prokuratura to'g'risidagi qonunning 22-moddasiga binoan, prokuror hokimlarning qarorlariga nisbatan protest bildirish huquqiga ega. Shuning uchun ham hokimning O'zbekiston Respublikasining Konstitutsiyasi va qonunlariga, Prezident va hukumatning hujjatlariga zid bo'lgan va prokuror protest bildirgan qarorlarini shu hokimning o'zi yoki yuqori turuvchi hokim yoki O'zbekiston Respublikasi Vazirlar Mahkamasi, zaruratga qarab esa, O'zbekiston Respublikasi Prezidenti qayta ko'rib chiqadi. Prokurorning protestini ko'rib chiqish natijasi darhol prokurorga ma'lum qilinadi.

**Fuqarolar o'zini o'zi boshqarish organlari tuzilish tartibi va vakolatlari**

O'zbekiston Respublikasi Konstitutsiyasining 105-moddasida va O'zbekiston Respublikasining 1999-yil 14-aprelida qabul qilingan «Fuqarolarning

o'zini o'zi boshqarish organlari to'g'risida»gi Qonunning yangi tahririda shahar, qishloq va ovullarda, shuningdek, ular tarkibidagi mahallalarda hamda shaharlardagi mahallalarda tuziladigan fuqarolarning o'zini o'zi boshqarish organlari tuzilishi va ularning huquqiy holati belgilab berilgan.

«Fuqarolarning o'zini o'zi boshqarish to'g'risida»gi Qonunning 1-moddasiga asosan, fuqarolarning o'zini o'zi boshqarishi — fuqarolarning O'zbekiston Respublikasi Konstitutsiyasi va qonunlari bilan kafolatlangan, ularning o'z manfaatlaridan, rivojlanishning tarixiy xususiyatlaridan, shuningdek milliy va ma'naviy qadriyatlaridan, mahalliy urf-odatlar va an'analardan kelib chiqqan holda mahalliy ahamiyatga molik masalalarni hal qilish borasidagi mustaqil faoliyatidir. O'zini o'zi boshqarishga bo'lgan huquqning ikki muhim tomoni mavjuddir. Birinchidan, o'zini o'zi boshqarish huquqining ta'minlanishi bu insonlarning siyosiy huquqlarining amalga oshishi, xalq hokimi-

yatchiligining ta'minlanishi bo'lsa, ikkinchi tomondan, ijtimoiy boshqaruvni takomillashtirishdir. O'zini o'zi boshqarish institutining o'zi ham aynan mana shu ikkita omilni ta'minlash maqsadida paydo bo'ldi. O'zbekistonda shahar, qishloq va ovullarda, shuningdek, ularning tarkibidagi mahallalarda hamda shaharlardagi mahallalarda fuqarolar yig'ini o'zini o'zi boshqarish organlari hisoblanadi. Bu organlar o'z majlislarida rais (oqsoqol)ni va uning maslahatchilarini ikki yarim yil muddatga saylaydilar.

O'zini o'zi boshqarish organlarining asosiy maqsadi jamiyat va davlat ishlarini boshqarishda fuqarolarga ko'maklashish, o'z hududlaridagi ijtimoiy va xo'jalik vazifalarini hal etish, ommaviy-madaniy tadbirlarni o'tkazish, davlat hokimiyati va boshqaruv organlariga O'zbekiston qonunlarini, respublika Prezidentining farmonlarini, O'zbekiston hukumatining, xalq deputatlari Kengashlari va hokimlarning qarorlarini bajarishda yordamlashish uchun fuqarolarni birleshtirishdir.

O'zbekiston Respublikasining «Fuqarolarning o'zini o'zi boshqarish organlari to'g'risida»gi qonuniga ko'ra, o'zini o'zi boshqarish organlari ikki bosqichda tuziladi. Birinchisi, Konstitutsiyaga asosan quyi ma'muriy-hududiy birliklardagi qishloq, shahar va ovullarda; ikkinchisi, tuman va shahardagi mahallalarda tuziladi.

O'zbekiston Respublikasida hayotga tatbiq etilgan o'zini o'zi boshqarish tizimi, birinchidan, O'zbekistonning bozor munosabatlariga o'tish talablarini hisobga olib amalga oshirilgan bo'lsa, ikkinchidan, u shu sohada dunyoda qabul qilingan tizimlarga ham mos keladi.

O'zbekiston sharoitida mahalla o'z tarixiy ildizlariga ega. U O'rta Osiyoda shaharlar doirasidagi hududiy-ma'muriy birlik bo'lgan va bizga o'tmishdan meros bo'lib qolgan. Mahalla cheklangan hududda

istiqomat qiluvchi odamlar birlashmasi bo'lib, unda odamlar faqat qo'shnichilik rishtalari bilan emas, balki yuzlab yillar davomida yaratilgan ichki tartib-qoida, ma'naviy-axloqiy normalar, urf-odatlar va an'analar bilan bog'langanlar.

«Fuqarolarning o'zini o'zi boshqarish organlari to'g'risida»gi qonunga asosan o'zini o'zi boshqarish organlari hududiy prinsip bo'yicha tuziladi.

Fuqarolar yig'inlari ishida o'n sakkiz yoshga yetgan va mazkur hududda doimiy yashovchi fuqarolar qatnashadi.

Fuqarolar yig'inining raisi (oqsoqol) tegishli hokim bilan kelishilgan holda saylanadi.

Fuqarolar yig'inlarida qatnashish huquqiga ega bo'lgan barcha aholining yarmidan ko'prog'i kelgan taqdirda, yig'inlar vakolatli hisoblanadi, vakillar yig'ilishlari esa ularga delegatlarning kamida uchdan ikki qismi kelgan taqdirda vakolatli hisoblanadi.

Yig'ilishni rais yoki uning maslahatchilaridan biri boshqaradi. Barcha masalalar bo'yicha qarorlar ochiq ovoz berish orqali va oddiy ko'pchilik ovoz bilan qabul qilinadi. Yig'in bayonnomasi va qarorlarini rais, uning yo'qligida esa, maslahatchilaridan biri imzolab, tegishli tuman, shahar hokimiga yuboradi.

Rais va uning maslahatchilarini fuqarolar yig'ini tegishli tuman, shahar hokimi bilan kelishgan holda saylaydi.

Maslahatchilarning miqdorini yig'in belgilaydi. Yig'inga maslahatchilarning nomzodlarini rais tavsiya etadi. Rais va maslahatchilar ularga yig'inda ishtirok etgan fuqarolarning yarmidan ko'prog'i ovoz bersa, saylangan hisoblanadilar.

O'zini o'zi boshqarish organlari o'z mulklariga va moliyaviy manbalariga ega. Ular o'zlari qurgan, sotib olgan yoki qonunda belgilangan tartibda o'zlariga berilgan jamoat obyektlariga, ijtimoiy-maishiy va boshqa obyektlarga, shuningdek, sotib olingan trans-

port vositalari, xo‘jalik anjomlari hamda boshqa mol-mulkka ega bo‘lib, ulardan foydalanadilar.

O‘zini o‘zi boshqarish organlarining moliyaviy resurslari Xalq deputatlari Kengashlari tomonidan ajratiladigan budjet mablag‘laridan, fuqarolar va mehnat jamoalarining ixtiyoriy xayr-ehsonlaridan, xayriya jamg‘armalari ajratgan mablag‘lardan tashkil topadi. O‘zini o‘zi boshqarish organlarining faoliyatini tashkil etish tartibi bu organlar to‘g‘risidagi qonunda belgilangan.

## 14-§ BO‘YICHA EGALLAGAN BILIMLARINGIZNI MUSTAHKAMLASH UCHUN TOPSHIRIQLAR

**Qonunlar  
bilan  
tanishing**



Mahalliy davlat hokimiyati organlari va fuqarolar o‘zini o‘zi boshqarish organlari haqidagi bilimlaringizni konstitutsiya asosida qabul qilingan qonunlardan foydalanib bo‘yiting:

1. 1993-yil 2-sentabrdagi «Mahalliy davlat hokimiyati to‘g‘risida»gi O‘zbekiston Respublikasi Qonuni.
2. 1998-yil 2-apreldagi «Fuqarolarning o‘zini o‘zi boshqarish organlari to‘g‘risida»gi O‘zbekiston Respublikasi Qonuni.

**Bilimingizni  
mustahkam-  
lang**



Quyidagi jadvalga mahalliy davlat hokimiyati organlari va fuqarolar o‘zini o‘zi boshqarish organlari faoliyati, ularning o‘ziga xos vazifalarini qayd qilib, izohlab bering.



<b>Davlat mahalliy hokimiyati organlari</b>	<b>Fuqarolar o‘zini o‘zi boshqarish organlari</b>

**Tanishing**

O‘zingiz yashab turgan joydagi fuqarolar o‘zini o‘zi boshqarish organi faoliyati bilan tanishing. Tanishish natijasida hosil bo‘lgan tasavvurlaringiz hamda bu organning jamiyatdagi tutgan o‘rni yuzasidan munosabatingizni yozma shaklda bildiring.

**15-§. SUD HOKIMIYATI****Sud hokimiyati tizimi, uning tashkil etilishi va odil sudlovning konstitutsiyaviy prinsiplari**

O‘zbekiston Respublikasi fuqarolik jamiyati sari intilayotgan davlatdir. Fuqarolik jamiyati va huquqiy davlatning asosiy belgilaridan biri

bu uchta hokimiyatning normal ishlashini ta‘minlashdir. Sud hokimiyati davlat hokimiyatini amalga oshirishning bir shakli bo‘lib, huquqni muhofaza qiladi. Yuqorida ko‘rsatilganidek, davlat hokimiyatining bo‘linishi prinsipiga asosan, sud O‘zbekiston Respublikasida odil sudlovni amalga oshiruvchi organdir. Odil sudlov davlat faoliyatining bir turi bo‘lib, jamiyatda sodir bo‘ladigan va huquqiy normalarning buzilishi natijasida kelib chiqadigan ijtimoiy kelishmovchiliklarni ko‘rib chiqish va hal etishga qaratilgandir. Odil sudlov o‘zining maxsus belgilari bilan ajralib turadi. U davlat nomidan, qonunda belgilangan protsessual shaklda hamda fuqaroviy, jinoiy va boshqa ishlarni sud majlislarida ko‘rib chiqish orqali amalga oshiriladi. Odil sudlovni amalga oshiruvchi sud hokimiyati qonun chiqaruvchi va ijro etuvchi hokimiyatlardan, siyosiy partiyalardan, boshqa jamoat birlashmalaridan mustaqil holda ish yuritadi. O‘zbekiston Respublikasida sud organlarining faoliyati O‘zbekiston Konstitutsiyasi va boshqa qonunlarda hamda inson huquqlari to‘g‘risidagi xalqaro hujjatlarda e‘lon qilingan fuqarolarning huquq va erkinliklariga, korxonalar,

muassasalar va tashkilotlarning huquqlari hamda qonun bilan qo'riqlanadigan manfaatlariga rioya etilishini kafolatlashga qaratilgan.

Sudning faoliyati ijtimoiy adolatni, tinchlik va totuvlikni ta'minlashga, huquqiy tartib va qonuniylikni barcha choralar bilan mustahkamlashga qaratilgan.

O'zbekiston Respublikasi Konstitutsiyasining 107-moddasi va O'zbekiston Respublikasining 2000-yil 14-dekabrda qabul qilingan «Sudlar to'g'risida»gi (yangi tahrirdagi) Qonunining 1-moddasida ko'rsatilganidek, O'zbekiston Respublikasining sud tizimi «O'zbekiston Respublikasi Konstitutsiyaviy sudi, O'zbekiston Respublikasi Oliy sudi, O'zbekiston Respublikasi Oliy xo'jalik sudi, Qoraqalpog'iston Respublikasi fuqarolik va jinoyat ishlari bo'yicha Oliy sudlari, fuqarolik va jinoyat ishlari bo'yicha viloyat va Toshkent shahar sudlari, fuqarolik ishlari bo'yicha tumanlararo, tuman (shahar) sudlari, harbiy sudlar, Qoraqalpog'iston Respublikasi xo'jalik sudi, viloyat va Toshkent shahar xo'jalik sudlaridan» iboratdir.

Yangi tahrirdagi «Sudlar to'g'risida»gi O'zbekiston Respublikasi qonunida umumyurisdiksiya va xo'jalik sudlarining tashkil topishi, ularni saylash va tayinlash tartibi ko'rsatilgan. Bu Qonunning 63-moddasiga muvofiq, O'zbekiston Respublikasi Oliy sudi va Oliy xo'jalik sudi sudyalari O'zbekiston Respublikasi Prezidenti taqdimnomasiga binoan O'zbekiston Respublikasi Oliy Majlisining Senati tomonidan saylanadi. (O'zR 03.12.2004-y. 714-II-son Qonuni tahririda.)

Qoraqalpog'iston Respublikasi sudlarining sudyalari Qoraqalpog'iston Respublikasi Jo'qorg'i Kengesi Raisining O'zbekiston Respublikasi Prezidenti bilan kelishilgan taqdimnomasiga binoan Qoraqalpog'iston Respublikasi Jo'qorg'i Kengesi tomonidan saylanadi yoki tayinlanadi. Mazkur masala O'zbekiston Respub-

likasi Prezidenti huzuridagi Sudyalarni tanlash va lavozimlarga tavsiya etish bo'yicha oliy malaka komissiyasining xulosasi asosida O'zbekiston Respublikasi Prezidenti bilan kelishish uchun kiritiladi. (O'zRning 20.07.2007-y. 103-son Qonuni tahririda.)

Viloyatlar, Toshkent shahar sudlari, tumanlararo, tuman (shahar) sudlari, harbiy sudlarning, viloyatlar hamda Toshkent shahar xo'jalik sudlarining sudyalari O'zbekiston Respublikasi Prezidenti huzuridagi Sudyalarni tanlash va lavozimlarga tavsiya etish bo'yicha oliy malaka komissiyasining taqdimnomasiga binoan O'zbekiston Respublikasi Prezidenti tomonidan tayinlanadi. (O'zR ning 20.07.2007-y. 103-son Qonuni tahririda.)

Harbiy sudlar sudyalari O'zbekiston Respublikasi Prezidenti huzuridagi Sudyalarni tanlash va lavozimlariga tavsiya etish bo'yicha oliy malaka komissiyalarining taqdimnomasiga binoan O'zbekiston Respublikasi Prezidenti tomonidan tayinlanadi. Sudyalar besh yil muddatga saylanadi yoki tayinlanadi.

O'zbekiston Respublikasida odil sudlovni amalga oshirish Konstitutsiyada ko'rsatilgan huquqiy davlatni shakllantirishga qaratilgan demokratik prinsiplarga asoslanadi.

O'zbekiston Respublikasida odil sudlov faqat sud tomonidan amalga oshiriladi. Boshqa hech qanday davlat organi fuqaroviy, jinoiy va boshqa sudlov ishlarini ko'rish va hal qilish huquqiga ega emas. Bu qonunchilikni amalga oshirishni, fuqarolarning huquqlari va qonuniy manfaatlarini himoya qilishni ta'minlaydi.

«Sudlar to'g'risida»gi Qonunga asosan, odil sudlovni amalga oshirish vazifasi faqat ma'lum huquqqa ega bo'lgan, o'z burchini professional asosda amalga oshiruvchi, huquqshunoslik ixtisosiga ega bo'lgan shaxsga topshiriladi.

Ko'rsatilgan qonunga asosan, O'zbekiston Respublikasining 25 yoshga to'lgan, oliy yuridik ma'lumotli,

huquq ixtisosi bo'yicha kamida uch yillik mehnat stajiga ega bo'lgan, malaka imtihonini topshirgan O'zbekiston Respublikasi fuqarosi tumanlararo, tuman (shahar) sudi, xo'jalik sudi sudyasi bo'lib ishlashi mumkin.

O'zbekiston Respublikasining oliy yuridik ma'lumotli, huquq ixtisosi bo'yicha kamida besh yillik, jumladan, sudyalik lavozimida kamida ikki yillik mehnat stajiga ega bo'lgan va malaka imtihonini topshirgan O'zbekiston Respublikasi fuqarosi Qoraqalpog'iston Respublikasi Oliy sudi, viloyat sudi, Toshkent shahar sudi, O'zbekiston Respublikasi harbiy sudining sudyasi bo'lishi mumkin.

O'zbekiston Respublikasi Oliy sudi, Oliy xo'jalik sudi sudyasi bo'lib saylanish uchun oliy yuridik ma'lumotga ega bo'lish, huquqshunoslik ixtisosi bo'yicha kamida yetti yillik, shu jumladan, qoida tariqasida sudya bo'lib kamida besh yillik mehnat stajiga ega bo'lishi va malaka imtihonini topshirgan bo'lishi talab etiladi.

Sudyalar siyosiy partiyalar va harakatlarning a'zosi bo'lishlari hamda boshqa haq to'lanadigan lavozimni egallashlari mumkin emas.

Odil sudlovni amalga oshirish prinsiplaridan yana biri sudyalarning mustaqilligidir. O'zbekiston Respublikasi Konstitutsiyasining 112-moddasi va «Sudlar to'g'risida»gi Qonunning 4-moddasiga asosan, sudyalar mustaqil bo'lib, faqat qonunga bo'ysunadilar. Sudyalarning odil sudlovni amalga oshirish borasidagi faoliyatiga biron-bir tarzda aralashishga yo'l qo'yilmaydi va bunday aralashish qonunga muvofiq javobgarlikka sabab bo'ladi. Sud hokimiyati qonun chiqaruvchi va ijro etuvchi hokimiyatlardan, siyosiy partiyalardan va boshqa jamoat birlashmalaridan mustaqil holda ish yuritadi.

Sudlar to'g'risidagi qonunda sudyalarning mustaqilligini ta'minlash kafolatlari ko'rsatilgan. Bu kafolatlar quyidagilardan iborat: ularni qonun bilan belgi-



langan tartibda saylash, tayinlash va ozod qilish; sudyalar daxlsizligi; odil sudlov qat'iy tartibda amalga oshirilishi; qaror chiqarish chog'ida sudyalar maslahatining sir tutilishi va uni oshkor qilishni talab etishning taqiqlanishi; sudga hurmatsizlik yoki muayyan ishlarni hal qilishga aralashish; sudyalar daxlsizligini buzganlik uchun javobgarlik; sudyaga uning oliy maqomiga munosib ravishda davlat hisobidan moddiy va ijtimoiy ta'minot belgilash.

O'zbekiston Respublikasi Konstitutsiyasi va «Sudlar to'g'risida»gi Qonunda sudyalarning mustaqilligini ta'minlash maqsadida sudyaning shaxsiy daxlsizligi mustahkamlanadi. Daxlsizlik sudyaga g'ayriqonuniy ta'sir etishdan saqlaydi, odil sudlovni amalga oshirayotganida uning huquqlarini cheklashga imkon bermaydi. Qonun moddasidagi bu talab sudyaning turar joyi, xizmat xonasi, uning transport va aloqa vositalari, xat-xabarlari, buyum va hujjatlariga ham taalluqlidir.

Qonunda sudyaning shaxsiy xavfsizligini saqlash choralari ham ko'rsatilgan. Masalan, sudyaga nisbatan jinoyat ishi faqat O'zbekiston Respublikasi Bosh prokurori tomonidagina qo'zg'atilishi mumkin. Sudya, tegishlicha, O'zbekiston Respublikasi Oliy sudi Plenumining, Oliy xo'jalik sudi Plenumining roziligisiz jinoiy javobgarlikka tortilishi, hibsga olinishi mumkin emas.

Qonunda sudya vakolatlarining to'xtatilish va tugatilish tartibi, vaziyatlari, ularni jinoiy va ma'muriy javobgarlikka tortishning o'ziga xos tartibi ko'rsatilgan.

O'zbekiston Respublikasining Konstitutsiyasi sud hokimiyatini amalga oshirishni ta'minlaydigan bir necha prinsiplarni mustahkamlagan.

O'zbekiston Respublikasi Konstitutsiyasiga binoan, hamma sudlarda ishlar ochiq ko'riladi. Sudlarda fuqarolik va jinoyat ishlarini oshkora muhokama qilish prinsipi barcha jinoyat va fuqarolik ishiga taalluqlidir. Bu prinsip fuqarolik yoki jinoyat ishlarida taraf sifatida ishtirok etmagan fuqarolar uchun u yoki bu

sud ishini sud tomonidan muhokama qilish paytida ishtirok qilish imkoniyatini ta'minlab beradi.

Ishlarni yopiq majlisda tinglashga qonunda belgilangan hollardagina yo'l qo'yiladi, masalan, sud muhokamasida davlat yoki tijorat sirlarini oshkor qilish xavfi mavjud bo'lsa yoki jinoyat ishi jinsiy jinoyat bilan aloqador bo'lsa, yopiq sud majlisiga, sudning ajrimiga ko'ra, 18 yoshga yetmagan shaxslar taklif qilinmaydi. Sudning hukmi yoki qarori barcha hollarda ochiq sud majlisida e'lon qilinadi.

Sud faoliyatining oshkoraligini ta'minlashda ommaviy-axborot vositalarining o'rni katta bo'lganligi sababli, sudyalar sud jarayoniga ommaviy-axborot vositalari xodimlarini, jamoat tashkilotlari va mehnat jamoalari vakillarini taklif qilishlari mumkin. Bundan tashqari, oshkora sud majlislarini bevosita korxonalar, muassasa va tashkilotlarda ham o'tkazish mumkin.

Odil sudlovni amalga oshirishda til to'g'risidagi konstitutsiyaviy prinsip katta ahamiyatga ega. O'zbekiston Respublikasi Konstitutsiyasining 115-moddasiga binoan, O'zbekistonda sud ishlarini yuritish o'zbek tilida, qoraqalpoq tilida yoki muayyan joydagi ko'pchilik aholi so'zlashadigan tilda olib boriladi. Sud ishlari olib borayotgan tilni bilmaydigan sud ishtirokchilarining tarjimon orqali ish materiallari bilan to'la tanishish va sud ishlarida ishtirok etish huquqi hamda sudda ona tilida so'zlash huquqi ta'minlanadi.

O'zbekiston Respublikasi jinoyat protsessual kodeksida ko'rsatilishicha, ayblanuvchiga, sudlanuvchiga yoki muhokamada ishtirok etuvchi boshqa shaxslarga taqdim etilishi lozim bo'lgan tergov va sud hujjatlari, ularning ona tiliga yoki ular biladigan boshqa tilga tarjima qilib berilishi lozim. Sudlarda milliy tilni yuritish masalasining bunday hal qilinishi sudda ishtirok etayotgan barcha shaxslar uchun tushunarli bo'ladi, boshqa tomondan esa, ayblanuvchi va jabrlanuvchiga protsessning tegishli harakatlarida

ishtirok etishda o'zlarining huquqlarini amalga oshirib, o'z manfaatlarini himoya qilish imkoniyatlarini yaratib beradi. Sud jarayonida ushbu prinsipning buzilishi ish bo'yicha qabul qilingan sud qarorining bekor qilinishiga olib keladi.

O'zbekiston Respublikasida odil sudlovning asosiy prinsiplaridan yana biri aybsizlik prezumpsiyasidir.

Aybsizlik prezumpsiyasi — bu aybi qonunda belgilangan tartibda va tegishli organlar tomonidan tasdiqlanmaguncha shaxsning aybsiz hisoblanishidir. O'zbekiston Respublikasi Konstitutsiyasining 26-moddasida ko'rsatilishicha, jinoyat sodir etganlikda ayblanayotgan har bir shaxsning ishi sudda qonuniy tartibda, oshkora ko'rib chiqib, aybi aniqlanmaguncha, u aybdor hisoblanmaydi. Sudda ayblanayotgan shaxsga o'zini himoya qilish uchun barcha sharoitlar ta'minlab beriladi. Bu prinsipga amal qilinishi sud organlarining jazo to'g'risidagi hukmni chiqarishlaridan oldin aynan shu shaxsning aybi bor yoki yo'qligini aniqlashga yordam beradi.

Dastlabki tekshirish organi jinoyat sodir etgan shaxsga ayb e'lon qilishda, uning ushbu jinoyatni sodir qilishdagi aybdorligini (aybsizligini) albatta isbot qilib berishga majbur, chunki ayblanuvchi aybsizlik prezumpsiyasiga ko'ra sudning chiqargan ayblov hukmi qonuniy kuchga kirmagunga qadar aybdor deb hisoblanmaydi. Ayblanuvchi o'zining aybsizligini isbot qilib berishga majbur emas. Jinoyat qilgan shaxsning aybdorligini isbotlash majburiyati tergovchi, surishtiruvchi shaxs, prokuror va sudga yuklatilgan.

O'zbekiston Respublikasi Konstitutsiyasida har bir kishining huquqi kafolatlanadi. Qoidaga ko'ra shaxsning bu huquqi advokatlar orqali amalga oshiriladi. Advokat har bir huquqiy masalalar yuzasidan malakali yordam berib, jinoiy va fuqaroviy sud ishlarida ishtirok etadi va ularga murojaat qilgan shaxslarning manfaatini himoya qiladi.

O‘zbekiston Respublikasi Konstitutsiyasi va «Sudlar to‘g‘risida»gi Qonunda hech kim qiynoqqa solinishi, zo‘ravonlikka, shafqatsiz yoki inson qadr-qimmatini kamsituvchi boshqa tarzdagi tazyiqqa duchor etilishi mumkin emasligi ta’kidlangan.

**O‘zbekiston  
Respublikasi  
Konstitutsiyaviy sudi**

O‘zbekiston Respublikasining Konstitutsiyasida Konstitutsiyaviy sud organini tashkil etilishi ko‘rsatilgan. 1990-yil

mart oyida tuzilgan O‘zbekiston Respublikasi Konstitutsiyaviy nazorat qo‘mitasiga O‘zbekiston Respublikasi Oliy Kengashining qarori bilan, Konstitutsiyaviy sud saylanguncha uning vazifasini bajarish vazifasi yuklatildi. Konstitutsiyaviy nazorat qo‘mitasining vazifasi Oliy Kengash qabul qilgan qonunlar va boshqa huquqiy hujjatlarning, shuningdek, Respublika Oliy Kengashi muhokamasiga kiritilgan qonunlar va boshqa hujjatlarning O‘zbekiston Respublikasi Konstitutsiyasiga qay darajada muvofiq kelishini aniqlashdan iborat edi.

O‘zbekiston Respublikasining Konstitutsiyaviy sudining birinchi tarkibi 1995-yil 21-dekabrda Oliy Majlis sessiyasida saylandi.

O‘zbekiston Respublikasining Konstitutsiyaviy sudi respublikada konstitutsiyaviy nazorat olib boruvchi oliy sud organidir. Konstitutsiyaviy sudning vakolati, uning tuzilish va faoliyat tartibi, O‘zbekiston Respublikasi Konstitutsiyasining 108-moddasi va 1995-yil 30-avgustda qabul qilingan «O‘zbekiston Respublikasi Konstitutsiyaviy sudi to‘g‘risida»gi Qonun bilan belgilanadi. Bu qonunlarga asosan Konstitutsiyaviy sud O‘zbekiston hududida Konstitutsiya ustunligini ta’minlash maqsadida quyidagi vazifalarni bajaradi:

— qonunlarning va O‘zbekiston Respublikasi Oliy Majlisi qabul qilgan boshqa hujjatlarning, O‘zbekiston Respublikasi Prezidenti farmonlarining, Hukumat qarorlarining va davlat hokimiyati mahalliy organlari

qarorlarining, O‘zbekiston Respublikasi davlatlararo shartnomalarning va boshqa majburiyatlarning O‘zbekiston Respublikasiga mosligini aniqlaydi;

— Qoraqalpog‘iston Respublikasining Konstitutsiyasi O‘zbekiston Respublikasi Konstitutsiyasiga, Qoraqalpog‘iston Respublikasining qonunlari O‘zbekiston Respublikasi qonunlariga muvofiqligi to‘g‘risida xulosa beradi;

— O‘zbekiston Respublikasi Konstitutsiyasi va qonunlarning normalariga sharh beradi;

— O‘zbekiston Respublikasi Konstitutsiyasi va qonunlar bilan berilgan doiradagi boshqa ishlarni ham ko‘rib chiqadi.


Konstitutsiya va qonunda Konstitutsiyaviy sud ish faoliyatining asosiy prinsiplari ko‘rsatilgan. Bular O‘zbekiston Respublikasi Konstitutsiyasiga sodiqlik, sudyalar mustaqilligi, kollegiallik, oshkoralik va sudyalar huquqlarining tengligidir.

O‘zbekiston Respublikasi Konstitutsiyaviy sudining qarorlari, xulosalari va boshqa to‘xtamlari ommaviy-axborot vositalarida e‘lon qilinadi va ular matbuotda e‘lon qilingan paytdan boshlab kuchga kiradi. Konstitutsiyaviy sudning to‘xtami qat‘iy va uning ustidan shikoyatga o‘rin bo‘lmaydi.

Konstitutsiyaviy sudning qarorlari davlat hokimiyati va boshqaruv organlarining korxonalar, muassasalar, tashkilotlar hamda jamoat birlashmalari, mansabdor shaxslar va fuqarolarning barchasi uchun majburiydir.

## **15-§ BO‘YICHA EGALLAGAN BILIMLARINGIZNI MUSTAHKAMLASH UCHUN TOPSHIRIQLAR**

1. O‘zbekistonda sud hokimiyatining qanday tizimlari bor?
2. Odil sudlovning qanday konstitutsiyaviy prinsiplari mavjud?



3. O'z huquqini sud orqali himoya qilish tushunchasi va bu konstitutsiyadagi asosiy qoidalardan biri ekanligini izohlab bering.
4. Sud tizimidagi o'zgarishlar va yangilanishlar asosan qaysi yo'nalishlarda amalga oshirilmogda?
5. Konstitutsiyaviy sudning asosiy vazifasi nimalardan iborat?

**Izlaning**



**O'zingiz yashab turgan tumandagi sud organi faoliyati bilan tanishing va ommaviy axborot vositalarida chop etilgan sud jarayoni yuzasidan materiallarni jamlab, ularga o'zingizning mustaqil fikrlaringizni bildiring.**

**Munosabat bildiring**



1. Sud hokimiyatining davlat hokimiyati tizimidagi o'rni;
2. Inson huquqlari va erkinliklarini hayotda to'la amalga oshirishda sud hokimiyati faoliyati;
3. Huquqiy meros va sud.

**Sud jarayoni bo'yicha sahnaviy ko'rinish tayyorlang**



Unda:

- sud vakolatlari;
- sudning odillikka asoslanishi;
- sud qarorining qat'iy kuchga egaligi;
- sudning qonunga asoslanishi;
- sud inson huquqi va erkining himoyachisi va shu kabi masalalar atroflicha yoritilishiga e'tibor qarating.

## 16-§. O‘ZBEKISTON RESPUBLIKASIDA PROKURATURA ORGANLARINING HUQUQIY ASOSLARI

### Prokuratura organlari faoliyatining asosiy yo‘nalishlari

O‘zR Konstitutsiyasiga asosan, O‘zbekiston hududida qonunlarning aniq va bir xilda bajarilishini O‘zbekiston

Respublikasining Bosh prokurori va unga bo‘ysunuvchi prokurorlar nazorat qiladilar.

Prokuratura organlarining maqsad va vazifalari birinchi navbatda qonunning ustunligini har tomonlama qaror toptirishga, huquq-tartibotni mustahkamlashga, O‘zbekiston Respublikasi Konstitutsiyasi bilan mustahkamlangan inson va fuqaroning ijtimoiy, iqtisodiy, siyosiy, shaxsiy huquqlari hamda erkinliklarini, shuningdek, davlat mustaqilligini, Konstitutsiyaviy tuzum asoslarini, siyosiy va iqtisodiy tizimlarni, milliy guruhlar va hududiy tuzilmalarning huquqlarini g‘ayriqonuniy tajovuzlardan muhofaza qilishni ta‘minlashga qaratilgan. O‘zbekiston Respublikasi prokuratura idoralari faoliyatini tashkil etish hamda prokurorlarning vakolatlari O‘zbekiston Respublikasi Konstitutsiyasi, 2001-yil 29-avgustda qabul qilingan «Prokuratura to‘g‘risida»(yangi tahrirda)gi Qonun va O‘zbekiston Respublikasi hududida amalda bo‘lgan boshqa qonun hujjatlari bilan belgilanadi.

«Prokuratura to‘g‘risida»gi Qonunning 4-moddasiga muvofiq, prokuratura organlari o‘z faoliyatlarini quyidagi asosiy yo‘nalishlarda amalga oshiradilar:

— vazirliklar, davlat qo‘mitalari, idoralar, fuqarolarning o‘zini o‘zi boshqarish organlari, jamoat birlashmalari, korxonalar, muassasalar, tashkilotlar, hokimlar va boshqa mansabdor shaxslar, shuningdek fuqarolar tomonidan qonunlarning bajarilishi ustidan nazorat qilish;

— ushlab turilganlarni, qamoqqa olinganlarni saqlash joylarida, jinoiy jazolarni va jinoyat-huquqiy ta'sirning boshqa choralarini ijro etish chog'ida qonunlarga rioya etilishi ustidan nazorat qilish;

— O'zbekiston Respublikasi Qurolli Kuchlarida, vazirliklar, davlat qo'mitalari va idoralarning harbiy tuzilmalarida qonunlarga rioya etilishi ustidan nazorat qilish;

— qonuniylikni ta'minlash va jinoyatchilikka qarshi kurash borasidagi faoliyatini muvofiqlashtirish;

— jinoyat yuzasidan dastlabki tergov olib borish;

— sud muhokamasining barcha bosqichlarida va qonun hujjatlarini qo'llash amaliyoti to'g'risidagi masalalar sud tomonidan ko'rilayotganda ishtirok etish;

— qonun ijodkorligi faoliyatida hamda jamiyatda huquqiy madaniyatni oshirish ishida ishtirok etish kabilardir.

### **Prokuratura organlari faoliyati prinsiplari**

O'zbekiston Respublikasi prokuratura organlari faoliyatini amalga oshirishning o'ziga xos prinsiplari mavjud. Quyi pog'onadagi prokurorlar yuqori pog'onadagi prokurorlarga bo'y-sunish tartibida O'zbekiston Respublikasi Bosh prokurori boshchiligidagi yagona markazlashgan tizimni tashkil etadilar. Ushbu tamoyil barcha darajadagi prokurorlar oldida turgan maqsad va vazifalarning birligini hamda qonunlarning ijro etilishi ustidan nazoratni amalga oshirish shakli va uslublarining umumiylikni, qonun buzilishi holatlariga nisbatan prokurorning ta'sir ko'rsatish vositalari, shuningdek qonunbuzarliklarning oldini olish choralarini ko'rishning yagonaligini anglatadi.

Prokuraturaning yagona va markazlashtirilganligi prokuratura tizimining barcha boshqaruv organlari, korxonalar, muassasalar, tashkilotlar, jamoat birlashmalari, mansabdor shaxslar va fuqarolarning qonunlarni aniq va bir xilda ijro etishlarining na-



zoratini amalga oshirishda ifodalanadi. Ushbu prinsip O‘zbekiston Respublikasining hududida yagona qonunchilikning o‘rnatilishini ta‘minlaydi.

Prokuratura organlari nazoratni va o‘z vakolatlarini davlat hokimiyati hamda mahalliy boshqaruv idoralaridan, mansabdor shaxslardan, jamoat birlashmalaridan mustaqil ravishda, O‘zbekiston Respublikasi hududida amal qilib turgan qonunlarga, xalqaro va davlatlararo shartnomalarga (bitimlarga) qat‘iy rioya etib va faqat O‘zbekiston Respublikasi Bosh prokuroriga bo‘ysungan holda amalga oshiradilar, Prokuratura faoliyati faqat O‘zbekiston Respublikasi Prezidenti va Oliy Majlis nazoratida bo‘ladi. Prokuraturaning qonunlar ijro etilishini nazorat qilish, jinoiy ishlarni tergov qilish, shikoyatlar, arizalar va xabarlarni tekshirish, kadrlarni tanlash va joy-joyiga qo‘yish borasidagi faoliyatiga davlat hokimiyati va boshqaruvining boshqa organlari, jamoat tashkilotlari, shuningdek, mansabdor shaxslarning aralashishi taqiqlanadi. Prokuraturaning mustaqilligi, prokuratura organlarining tashkiliy tuzilishi, ulardagi bo‘ysunish va hisob berish tartibi amalga oshirilishi bilan ta‘minlanadi. Har bir prokuror o‘z faoliyatida mustaqil bo‘lib, o‘z vazifasini bajarishda qonunlarga va ularga muvofiq O‘zbekiston Respublikasi Bosh prokurori tomonidan chiqarilgan buyruqlar, qo‘llanmalar va ko‘rsatmalarga amal qiladi. Prokurorlar o‘z vakolatlari davrlarida siyosiy maqsadni ko‘zlagan siyosiy partiyalar va boshqa jamoat birlashmalariga a‘zolikni to‘xtatib turadilar.

Prokuratura organlari qonuniylik hamda jinoyatchilikning ahvoli, asosiy yo‘nalishlari to‘g‘risida, boshqaruv idoralari tomonidan qonunlarga rioya etilishini ta‘minlash, davlat va jamoat tartibini saqlash, fuqarolarning huquqlarini muhofaza qilish borasidagi vazifalar qanday bajarilayotganligidan, tegishliligiga qarab, O‘zbekiston Respublikasi Prezidentini, Oliy

Majlisni, Qoraqalpog‘iston Respublikasi davlat hokimiyatining oliy idoralarini, O‘zbekiston hukumati, xalq deputatlarining mahalliy Kengashlarini, hokimlarni xabardor etadilar. Qonuniylik tamoyili deganda nafaqat prokuratura idoralarining boshqa davlat idoralari, korxonalar, muassasa va tashkilotlar tomonidan qonunlarga rioya etilishini nazorat qilishini, balki barcha prokurorlar va ular itoatidagi xodimlarning o‘z faoliyatida qonun talablariga qat’iy amal qilishlarini ham tushunmoq lozim.

Prokuratura organlari fuqarolarning huquq va erkinliklarini muhofaza qilish to‘g‘risidagi, shuningdek, davlat siri hamda qonun bilan muhofaza qilinadigan boshqa sirni saqlash haqidagi qonun talablariga zid kelmaydigan darajada ish ko‘radilar.

Prokurorning qonunda ko‘rsatilgan vakolatlarini bajarish yuzasidan qo‘ygan talablarini bajarish barcha idoralar, mansabdor shaxslar va fuqarolar uchun majburiydir. Prokuror talablarini to‘la bajarishning majburiyligi va Prokurorning o‘z vazifalarini moneliksiz amalga oshirishi qonun bilan kafolatlangan.

Prokuratura organlari qonuniylikni ta‘minlash va jinoyatchilikka qarshi kurash borasidagi faoliyatida jamoatchilik bilan hamkorlikda harakat qiladi. Prokuratura organlari o‘z faoliyatida oshkoralikni ta‘minlash maqsadida:

— qonuniylik va jinoyatchilikning ahvoli to‘g‘risida jamoatchilikni muntazam xabardor qilib boradilar;

— ommaviy axborot vositalari vakillari bilan uchrashuvlar o‘tkazib turadilar;

— deputatlarning hamda ommaviy axborot vositalarining murojaatlariga qonunda belgilangan tartibda axborot taqdim etadilar.

Jamoatchilik va ommaviy axborot vositalari vakillari prokuratura organlari hay‘atlari hamda muvofiglashtiruvchi kengashlari majlislariga taklif etilishlari mumkin.

Prokuratura tizimi O'zbekiston Respublikasi miqyosida O'zbekiston Bosh prokuroriga bo'ysunuvchi prokuratura organlari yig'indisidan iborat bo'lib, bu qonunlarning aniq va bir xilda ijro etilishining nazoratini ta'minlash bilan bog'liq umumiy funksiyani amalga oshiradi.

O'zbekiston Respublikasi prokuratura idoralari tizimini O'zbekiston Respublikasi Prokuraturasi, Qoraqalpog'iston Respublikasi Prokuraturasi, viloyatlar, Toshkent shahri, shaharlar va tumanlar, tumanlararo va boshqa hududiy prokuraturalar tashkil etadi.

O'zbekiston respublikasi prokuratura idoralarining tizimiga, shuningdek, transport, harbiy, tabiat muhofazasi prokuraturalari va boshqa ixtisoslashtirilgan prokuraturalar ham kiradi.

Bundan tashqari, O'zbekiston Respublikasi Bosh prokurori tomonidan viloyatlar va tumanlar prokuraturalariga tenglashtirilgan boshqa prokuraturalar, tuman prokuraturalariga ega bo'lgan shaharlarda esa tuman prokuraturalariga bo'ysunadigan shahar prokuraturalari tuzilishi mumkin.

O'zbekiston Respublikasi Bosh prokurori tomonidan tuziladigan transport, tabiat muhofazasi prokuraturalari, boshqa ixtisoslashtirilgan prokuraturalar viloyatlar, tumanlar prokuraturalari, tumanlararo prokuraturalar yoki shahar prokuraturalari vakolati bilan tashkil etiladi hamda faoliyat ko'rsatadi.

O'zbekiston Respublikasi Qurolli Kuchlarining harbiy Prokuraturasini tashkil etish va uning ish tartibi «Prokuratura to'g'risida» (yangi tahrirda)gi Qonun, boshqa qonun hujjatlari hamda O'zbekiston Respublikasining Bosh prokurori tomonidan tasdiqlanadigan O'zbekiston Respublikasi Qurolli Kuchlarining harbiy Prokuraturasi to'g'risidagi nizom bilan belgilanadi.

O'zbekiston Respublikasi Bosh prokurori O'zbekiston Konstitutsiyasiga muvofiq, O'zbekiston Res-

publikasi Prezidenti tomonidan besh yil muddatga tayinlanib, O'zbekiston Respublikasi Prezidenti va Oliy Majlis oldida hisobdordir.

O'zbekiston Respublikasi Bosh prokurorining birinchi o'rinbosari va o'rinbosarlari Respublika Prezidenti tomonidan tayinlanadi va vazifasidan ozod etiladi, keyin Oliy Majlis tasdig'idan o'tadi.

Qoraqalpog'iston Respublikasi prokurori O'zbekiston Respublikasi Bosh prokurori bilan kelishilgan holda Qoraqalpog'iston Respublikasi davlat hokimiyatining oliy organi tomonidan besh yil muddatga tayinlanadi va ular oldida hisobdordir. Viloyat prokurorlari va Toshkent shahri prokurori hamda ularga tenglashtirilgan prokurorlar O'zbekiston Respublikasi Bosh prokurori tomonidan besh yil muddatga tayinlanadilar, unga bo'ysunadilar va uning oldida hisobdordirlar.

Shahar, tuman prokurorlari va ularga tenglashtirilgan prokurorlar (harbiy qo'shin prokurori, harbiy garnizonlar, transport prokurorlari va ixtisoslashtirilgan prokuraturalarning prokurorlari) O'zbekiston Respublikasi Bosh prokurori tomonidan besh yil muddatga tayinlanadilar, o'zidan yuqori pog'onadagi prokurorlar va O'zbekiston Respublikasi Bosh prokuroriga bo'ysunadilar hamda ular oldida hisobdordirlar. Quyi prokurorlarning bevosita O'zbekiston Respublikasi Bosh prokurori tomonidan tayinlanishi ularning mahalliy ta'sirlardan mustaqilligining muhim kafolatlaridan biridir.

O'zbekiston Respublikasi prokuraturasiga O'zbekiston Respublikasi Bosh prokurori boshchilik qiladi. Respublika prokuraturasida Bosh prokuror, uning birinchi o'rinbosarlari, o'rinbosarlari, Qoraqalpog'iston Respublikasi prokurori, O'zbekiston Respublikasi Qurolli Kuchlarining harbiy prokurori, prokuratura idoralarining boshqa rahbar xodimlaridan iborat tartibda hay'at tuziladi. Hay'atning shaxsiy tarkibini O'zbekiston Respublikasi Prezidenti tasdiqlaydi.

O‘zbekiston Respublikasi Prokuraturasida bosh boshqarmalar, boshqarmalar va bo‘limlar tuzilib, ularda katta prokurorlar va prokurorlar bo‘ladi.

Prokuror nazorati — bu O‘zbekiston Respublikasi Bosh prokurori va unga bo‘ysunuvchi prokurorlarning O‘zbekiston Respublikasi hududida barcha vazirliklar, davlat qo‘mitalari, idoralar, davlat nazorati organlari, hokimlar, kimga bo‘ysunishidan, kimning tasarrufida bo‘lishidan va mulkchilik shaklidan qat’i nazar, boshqaruv organlari, korxonalar, tashkilotlar, mansabdor shaxslar, shuningdek, fuqarolar tomonidan qonunlarning aniq va bir xilda bajarilishini ta’minlash, har qanday qonun buzilishi, uning sabablari va shart-sharoitlariga o‘z vaqtida barham berish, buzilgan huquqlarni tiklash hamda aybdorlarni belgilangan tartibda qonuniy javobgarlikka tortish yo‘li bilan davlat nomidan amalga oshiriladigan faoliyatdir.

Prokuror va uning o‘rinbosarlari qonunlarga rioya etilish ustidan umumiy nazorat faoliyatida quyidagi huquqiy va boshqa hujjatlarni qabul qilishlari mumkin: mansabdor shaxslarning qonuniy qarorlari va xatti-harakatlariga nisbatan protest keltirish; qonunni ochiqdan ochiq buzish hollariga chek qo‘yish to‘g‘risida amrnoma berish; qonunning buzilishiga yo‘l qo‘ymaslik xususida mansabdor shaxslar va fuqarolarga yozma ravishda ogohnoma bildirish; davlat idoralari, jamoat birlashmalari va mansabdor shaxslarga qonunbuzarlik hollarini, shuningdek qonun buzilishining sabablari va bunga yo‘l ochib bergan shart-sharoitlarni bartaraf etish to‘g‘risida taqdimnomalar kiritish; fuqarolar, jamiyat va davlatning huquqlari hamda qonun bilan muhofaza etiladigan manfaatlarini himoya qilish to‘g‘risida sudlar yoki xo‘jalik sudlariga ariza bilan murojaat etish.

## 16-§ BO‘YICHA EGALLAGAN BILIMLARINGIZNI MUSTAHKAMLASH UCHUN TOPSHIRIQLAR

### Bilimingizni mustahkamlang



1992-yil 9-dekabrda qabul qilingan «Prokuratura to‘g‘risida»gi O‘zbekiston Respublikasi Qonunini o‘rganish asosida quyidagilar haqida mulohazalaringizni bayon qiling:

1. Prokuratura organlari faoliyatining asosiy yo‘nalishlari?
2. Prokuratura organlari faoliyati asosiy prinsiplari?
3. Prokuratura organlari tizimi, ularning qonuniylikni ta‘minlashdagi o‘rni?

**Mustaqil  
fikir**



**Prokuratura va yoshlar hamkorligini  
mustahkamlash yuzasidan fikringizni  
ayting.**



1. Prokuratura va yoshlar hamkorligini mustahkamlash omillari.
2. Yoshlarning qonuniylikni ta‘minlashda faol ishtiroki ahamiyati.
3. Voyaga yetmagan yoshlarning huquqlarini ta‘minlashda Prokuratura organlarining o‘rni.

## M U N D A R I J A

<i>Kirish</i> . . . . .	3
<b>I b o b. O‘zbekiston Respublikasi Konstitutsiyasi, unda shaxs va davlat munosabatining huquqiy asoslari</b>	
1-§. O‘zbekiston Respublikasi Konstitutsiyasi — asosiy qonun . . . . .	14
2-§. O‘zbekistonda shaxs va davlat munosabati . . . . .	32
<b>II b o b. O‘zbekiston fuqarolarining asosiy huquqlari</b>	
3-§. Fuqarolar huquqlarining konstitutsiyaviy asoslari . . . . .	40
4-§. Shaxsiy huquq va erkinliklar . . . . .	58
5-§. Siyosiy huquqlar . . . . .	69
6-§. Iqtisodiy va ijtimoiy huquqlar . . . . .	78
<b>III b o b. O‘zbekiston fuqarolarining asosiy burchlari</b>	
7-§. Fuqarolarning konstitutsiyaviy burchlari . . . . .	90
8-§. Vatanni himoya qilish va harbiy xizmatni o‘tash burchlari . . . . .	96
<b>IV b o b. Huquq va erkinliklarning konstitutsiyaviy kafolatlari</b>	
9-§. Inson huquq va erkinliklarining ta‘minlanishi . . . . .	102
10-§. Fuqarolarning huquqlarini himoya qilish mexanizmi	111
<b>V b o b. O‘zbekiston Respublikasining davlat shakli va davlat organlari</b>	
11-§. O‘zbekiston Respublikasining davlat tuzilishi va boshqaruv shakli. . . . .	122
12-§. O‘zbekiston Respublikasi Parlamenti — Oliy Majlis . . . . .	140
13-§. Ijro etuvchi hokimiyatning huquqiy asoslari . . . . .	170
14-§. Mahalliy davlat hokimiyati va fuqarolarning o‘zini o‘zi boshqarish organlari . . . . .	190
15-§. Sud hokimiyati . . . . .	205
16-§. O‘zbekiston Respublikasida Prokuratura organlarining huquqiy asoslari . . . . .	215

**«O‘ZBEKISTON RESPUBLIKASI  
KONSTITUTSIYASINI O‘RGANISH»**

**kursidan o‘quv qo‘llanma**

*(O‘rta maxsus, kasb-hunar ta’limi  
muassasalari uchun)*

«Sharq» nashriyot-matbaa  
aksiyadorlik kompaniyasi  
Bosh tahririyati  
Toshkent — 2010

Muharrir *Z. Mirzahakimova*  
Badiiy muharrir *T. Qanoatov*  
Texnik muharrir *D. Gabdraxmanova*  
Musahhihlar: *M. Ziyamuhamedova, Sh. Xurramova*  
Sahifalovchi *I. Soy*

Bosishga ruxsat etildi: 19.08.2010. Bichimi 84x108<sup>1/32</sup>.  
«Times» garniturasini. Ofset bosma. Shartli bosma tobog‘i 11,76.  
Nashriyot-hisob tobog‘i 10,9. Adadi 5000 nusxa. 1160-A -son buyurtma.  
Bahosi kelishilgan narxda.

**«Sharq» nashriyot-matbaa  
aksiyadorlik kompaniyasi bosmaxonasi,  
100000, Toshkent shahri, «Buyuk Turon» ko‘chasi, 41.**